

საქართველოს გეოგრაფიული საზოგადოება

დავ. დონდუა

# სამხედრო გეოგრაფია

მისი არსი

და

თემატიკა

რედაქტორი პროფ. ვ. ნ. გიხტყანი

შეკვეთა № 2380  
ტირაჟი 2000  
უფ1397

---

საქ. ადვ. შრეწვ. სახ. კომ-ის სტამბა, ფურცლუაძის ქუჩა № 5.

ზ ი ნ ა ა რ ს ი

გვერდი  
№

ჟურნალისაკენ

I. სამხედრო მეცნიერებათა დარგი

სამხედრო მეცნიერებანი, როგორც ცოდნათა განსახლვრული დარგი.—  
სამხედრო ხელოვნება.—სამხედრო სამეცნიერო დისციპლინები.—  
სამხედრო გეოგრაფია, როგორც სამხედრო ცოდნის ერთ-ერთი  
უმნიშვნელოვანესი დარგი

7—11

II. სამხედრო გეოგრაფიის განვითარების საწყისი პერიოდი

სამხედრო გეოგრაფია და ჩვეულებრივი მეცნიერული გეოგრაფია.—ქარლ  
ფონ-კლაუზევიცის შეხედულებანი გეოგრაფიულ მონაცემთა ომი-  
სათვის მნიშვნელობის შესახებ.—პ. გეისმანის შეხედულებანი ამა-  
ვე საკითხზე.—სამხედრო თვალსაზრისი გეოგრაფიულ კვლევა-  
ში.—სამხედრო გეოგრაფიის ჩასახვა რუსეთში.—ანრი ჯომინი.—  
პ. იაზიკოვი

12—27

III. სამხედრო გეოგრაფია, როგორც მეცნიერება

სამხედრო გეოგრაფიის, როგორც მეცნიერების, ჩამოყალიბება.—დიმი-  
ტრი ალექსის-ძე მილუტინი, როგორც სამხედრო გეოგრაფიის  
ფუძემდებელი.—დ. ა. მილუტინის ცხოვრება და მოღვაწე-  
ობა.—დ. ა. მილუტინის სამხედრო-გეოგრაფიული კონცეპცია.—  
სამხედრო გეოგრაფია და სამხედრო სტატისტიკა .

26—72

IV. სამხედრო გეოგრაფია მისი განვითარების თანამედროვე ეტაპზე

სამხედრო გეოგრაფიის მდგომარეობის განმტკიცება საბჭოთა ხანაში.—  
ანესარევის სამხედრო-გეოგრაფიული კონცეპცია.—ფიზიკურ-გე-  
ოგრაფიული ფაქტორის როლი და ადგილი სამხედრო მოქმედე-  
ბათა შეფასების საქმეში

73—104

V. სამხედრო გეოგრაფიის შედგენილობა და თემატიკა

სამხედრო ქვეყანათმცოდნეობა.—სამხედრო მოქმედებათა, თეატრების  
გეოგრაფია.—დ. ა. მილუტინის პროგრამული მოსაზრებანი.—  
ი. ტროიციკის სტრატისთან დათული პროგრამის ნიმუში.—საბ-  
ჭოთა სამხედრო გეოგრაფიის თემატიკა ერთ-ერთი უახლესი  
პროგრამის მიხედვით . . . . .  
ციტირებული და გამოყენებული ლიტერატურა . . . . .

105—119  
120

## ა მ ტ ო რ ი ს ა ბ ა ნ

დიდი სამამულო ომის პირობებში, როცა ყოველი სამეცნიერო ლასციბლინა მოწოდებულია ემსახუროს ქვეყნის თავდაცვის მიზნებსა და ამოცანებს, ბუნებრივია, რომ გეოგრაფთა წინაშეც იდგეს საკითხი გეოგრაფიის როლისა და დანიშნულების შესახებ სამხედრო საქმეში,—საკითხი მეტად აქტუალური და გადაუდებელი, რომლის საბასუხოდ ქართულ სამეცნიერო ლიტერატურაში დღემდე თითქმის არაფერი არ მოგვეპოვება.

ამ საერთო საკითხის ერთ-ერთ არსებით მომენტს სამხედრო გეოგრაფიის ისტორიისა და მეთოდოლოგიის გათვალისწინება წარმოადგენს. წინამდებარე ნაშრომი—„სამხედრო გეოგრაფია, მისი არსი და თემატიკა“ სწორედ ასეთ ისტორიულ-მეთოდოლოგიურ სფეროს ეკუთვნის; მისი დანიშნულებაა დაეხმაროს მკითხველს სამხედრო გეოგრაფიის, როგორც სამეცნიერო დისციპლინის, მიზანდასახულებისა და შედგენილობის გარკვევაში და თავისი მხრივაც ხელი შეუწყოს სამხედრო-გეოგრაფიული კვლევის სწორი გეზით წარმართვას ჩვენში.

ნაშრომი შეიცავს ხუთ თავს, რომელთაგან პირველი თავი შესავალის მაგიერია, ხოლო მომდევნო ოთხი—მისი ძირითადი ნაწილები. სამხედრო გეოგრაფთა შორის აქ შედარებით უფრო ვრცლად არიან განხილული რუსეთის სამხედრო გეოგრაფიის მთავარი წარმომადგენლები, სახელდობრ—მილუტინი და სნესარევი, რომელნიც ცნობილი არიან ჩვენში, როგორც ცოდნის ამ დარგის ფუძემდებელი და მეთოდოლოგნი. ინტერესს ამ ორი სამხედრო მოაზროვნის მიმართ ისიც აძლიერებს, რომ მათი შეხედულებანი სამხედრო გეოგრაფიაზე ყოველთვის იქნება მნიშვნელობის მქონე არა-სამხედრო გეოგრაფიისათვისაც და ამდენად ისინი გარკვეულ ადგილს შეინარჩუნებენ საერთოდ გეოგრაფიული მეცნიერების ისტორიისა და მეთოდოლოგიის დარგში.

ნაშრომი იმ კვლევის შედეგია, რომელსაც ავტორი აწარმოებდა ს ტ ა ლ ი ნ ი ს სახელობის თბილისის სახელმწიფო უნივერსიტე-

ტის გეოგრაფია-გეოლოგიის ფაკულტეტის გეოგრაფიული განყოფილების გეომორფოლოგიის კათედრაზე ამ უკანასკნელის სამეცნიერო-საკვლევო მუშაობის გეგმის მიხედვით 1941/42 ს. წელს. ნაშრომი წაკითხულ იქნა კათედრის ღია სხდომაზე და აგრეთვე საქართველოს გეოგრაფიული საზოგადოების საჯარო სხდომაზე. იგდრეცენზირებული და განხილული არის საქართველოს სსრ განათლების სახალხო კომისარიატთან არსებული სასწავლო-მეთოდურ-საბჭოს სამხედრო სექციის მიერ.

**დავ. დონდუა.**

24 ოქტომბერი, 1942 წ.  
თბილისი.

# I

## სამხედრო მეცნიერებათა დარგი

სამხედრო მეცნიერებანი, როგორც ცოდნათა განსაზღვრული დარგი.—სამხედრო ხელოვნება.—სამხედრო სამეცნიერო დისციპლინები.—სამხედრო გეოგრაფია, როგორც სამხედრო ცოდნის ერთ-ერთი უმნიშვნელოვანესი დარგი.

ომის წარმატებით წარმართვა ბევრადაა დამოკიდებული მეტწილთა კადრის მომზადებასა და დახელოვნებაზე. მეტწილთა სამხედრო განათლება პირველ რიგში გულისხმობს მეტწილთა გარკვევას სამ ძირითად საკითხში, როგორცაა: ომის მიზნები, ომის საშუალებანი, ომის მეთოდები. ომის მიზნებს ხელისუფლების სახელმწიფოებრივი პოლიტიკა განსაზღვრავს. ომის საშუალებათა ცოდნა ნიშნავს მეომარი ქვეყნის ბუნების, მოსახლეობის, მეურნეობის ცოდნას, აგრეთვე ყველა გეარეობის ჯარების, საზღვაო, საჰაერო, სახმელეთო ძალების, სიმაგრეების და მისთანათა ორგანიზაციის, მართვა-გამგეობის, შეიარაღების, აღჭურვილობის ცოდნას. ომის მეთოდები კი მოიცავს დასახული მიზნის მისაღწევად ომის საშუალებათა გამოყენებას. ომის მიზნების, ომის საშუალებათა და ომის მეთოდების საკითხებში ჯეროვანად გარკვევა საგრძნობლად ადვილდება სპეციალური სამხედრო განათლების შემწეობით. ხოლო ასეთი განათლების მიღება მოხერხდა მას შემდეგ, როცა იგი ნამდვილ მეცნიერულ საფუძველს დაემყარა, როცა წარმოიშვა ცოდნათა განსაზღვრული დარგი—სამხედრო მეცნიერებათა დარგი.

სამხედრო მეცნიერებათა შექმნას ასზე მეტი წლის ისტორია აქვს. სამხედრო მეცნიერებათა განვითარების კვალდაკვალ ყალიბდებოდა ომის თეორია, მოძღვრება ომის შესახებ. მაგრამ ომის როგორც თვით თეორია, ისე სამხედრო ცოდნის ცალკეული დარ-

გები, განვითარების ნამდვილ გზას მხოლოდ მის შემდეგ დაადგენ, როდესაც მათ მიიღეს მარქსისტულ-ლენინური ფილოსოფიური გაშუქება. ომის თეორიას, მოძღვრებას ომის შესახებ უდიდესი ყურადღებით მოეპყრნენ მარქსიზმ-ლენინიზმის კლასიკოსები: მარქსი, ენგელსი, ლენინი, სტალინი. მათ მოგვეცეს ომის მიზნების, ომის არსისა და ხასიათის ერთადერთი მართებული განსაზღვრება. და, როცა ვაგებულა ომის მიზეზები, ომის არსი და ხასიათი, ცხადია, ამით ომის თეორიისა და ცალკეულ სამხედრო სამეცნიერო დარგთა საკითხებიც შესაბამისად ნათელი ხდება.

საკითხზე—არის თუ არა საჭირო სამხედრო საქმის ცოდნა ომის წარმატებით წარმოებისათვის, ლენინი სრული გარკვეულობით ამბობდა შემდეგს: აიღეთ სამხედრო საქმე. არც ერთს ჩვენგანს, რომელიც ცოტათი მაინც გაცნობილია ისტორიისთან, რომელსაც უსწავლია ამ საქმის დიდი მცოდნესგან—ენგელსისაგან, არასოდეს ეკვი არ შეუტანია სამხედრო ცოდნათა უდიდეს მნიშვნელობაში (ლენინი, რჩეული ნაწერები, ტ. II, თბ. 1933 წ., „რევოლუციური ჯარი და რევოლუციური მთავრობა“, გვ. 254—255). ამ საკითხს შეეხო ლენინი თავის სხვა სტატიებშიც, მოვიგონოთ, მაგალითად, სტატია—„პორტ-არტურის დაცემა“, მოთავსებული ლენინის თხზულებათა VII ტომში, რუსული გამოცემა, გვ. 44—50, და ა. შ. ეს აზრი გააღრმავა და განავითარა დიდმა სტალინმა, რომლის უშუალო ხელმძღვანელობით განხორციელდა ჩვენს სოციალისტურ სახელმწიფოში სამხედრო ცოდნათა დაწერვა მოსახლეობის უფართოეს მასაში, ჩვენი სახელოვანი წითელი არმიის ორგანიზება და მისი შეიარაღება თანამედროვე საომარი ტექნიკის უკანასკნელი სიტყვის მიხედვით.

უდავოა, რომ არც ცოდნა კმარა. თუ მას არ ახლავს მისი ოსტატურად, დახელოვნებულად გამოყენების უნარი. ამიტომ შემთხვევითი როდია, რომ ორგვარ შესაძლო გამოთქმას შორის—სამხედრო მეცნიერება თუ სამხედრო ხელოვნება, უპირატესობა ეძლევა მეორეს—სამხედრო ხელოვნებას. მოვიგონოთ ლენინის მიერ კარლ მარქსის ციტირება (მარქსის სტატიიდან „რევოლუცია და კონტრრევოლუცია გერმანიაში“, გერმანული გამოცემა, 1907 წ., გვ. 118), სადაც ნათქვამია, რომ ომი ხელოვნებაა: „აჯანყება არის ხელოვნება, სწორედ ისე, როგორც ომი, როგორც ხელოვნების სხვა სახეები“ (ლენინი, რჩეული ნაწერები, ტ. III, თბ. 1933 წ., „შეინარჩუნებენ თუ არა ბოლშევიკები სახელმწიფო ძალოუფლებას?“, გვ. 550).

სამხედრო ცოდნა და მისი ოსტატურად გამოყენება, როგორც ეთქვით, ომის წარმატებით წარმოების ერთ-ერთი აუცილებელი საშუალებაა და ბუნებრივია, რომ ჩვენში განვითარების შესაფერ სიმაღლეზე დგანან სამხედრო მეცნიერებათა დარგის ყველა სპეციალური სამხედრო დისციპლინები—ჯარის ამათუიმ გვარეობის შესახებ, მათი საჭურველის შესახებ და ა. შ. და აგრეთვე სამხედრო მიზნებთან და ამოცანებთან შეფარდებული სამეცნიერო დისციპლინებიც, რომელთაც სამხედრო საქმესთან მჭიდრო კავშირის გამო წმინდა სამხედრო განხრა მიუღიათ, სახელდობრ: სამხედრო ისტორია, სამხედრო გეოგრაფია, სამხედრო გეოლოგია, სამხედრო ტოპოგრაფია, სამხედრო ქიმიკა და მისთანანი.

სამხედრო ისტორია — სამხედრო ცოდნის ეს ერთ-ერთი უმნიშვნელოვანესი დარგი მეტად განვითარდა ჩვენში. სამხედრო ისტორია უდიდეს ბიძგს იძლევა სამხედრო აზრის განვითარებისათვის, რადგან ის გვითვალისწინებს სხვადასხვა დროის და სხვადასხვა ხალხის ან სახელმწიფოს მიერ სხვადასხვა მიზნით, სხვადასხვა საშუალებით და სხვადასხვა მეთოდით წარმოებული ომების ისტორიას; იგი არ კმაყოფილდება სამხედრო ამბების უბრალო გადმოცემით, შეფასებასაც აძლევს იმ პოლიტიკურ ვითარებას, რამაც გამოიწვია ომი და რაც გავლენას ახდენდა ომის მსვლელობაზე; იგი იძლევა ომის სარბიელის ზუსტ სურათს და მეომარ მხარეთა შეიარაღებული ძალების მდგომარეობას, რამდენადაც ამას გავლენა ექნებოდა სამხედრო მოქმედებაზე; სამხედრო ისტორია აგრეთვე იკვლევს იმ აზრებს, რომლითაც ხელმძღვანელობდნენ ისინი, ვინც განკარგულებებს ახდენდა სამხედრო ოპერაციებისათვის, ასევე იმ გარემოებათ, რომლებიც შეიძლება ჩაითვალოს ომის წარმატების ან მარცხის მიზეზად. ომის კრიტიკული შეფასება, რასაც სამხედრო ისტორია იძლევა, სამხედრო მეცნიერების ზრდისა და განვითარების საუკეთესო საშუალებაა.

სამხედრო ცოდნის სხვა დარგთა შორის განსაკუთრებულ ყურადღებას მოითხოვს ჩვენგან სამხედრო გეოგრაფია. ცნობილია, რომ იმ პირობებს შორის, რომელთა გათვალისწინებაც გვიხდება საბრძოლო ოპერაციების წარმოებისათვის, ერთ-ერთი საპატიო ადგილი გეოგრაფიულ პირობებსაც ეკუთვნის. გეოგრაფიული პირობები ყოველთვის თავს იჩენს როგორც სტრატეგიულ, ისე ტაქტიკურ ამოცანათა გადაწყვეტის დროს და მათთვის სათანადოდ ანგარიშის გაწევა აუცილებელია.



ამ საკითხში მართებულად გარკვევის მიზნით ზედმეტად არ მიგვაჩნია აქვე განიმარტოს ცნებები—სტრატეგია და ტაქტიკა. ამისათვის შეიძლება ზიგმარტოთ სამხედრო ხელოვნების ცნობილ ბურჟუაზიულ თეორეტიკოსს გენერალ კარლ ფონ-კლაუზევიცს (1780—1831 წ.წ.). სამხედრო ხელოვნება, კლაუზევიცის გაგებით, ესაა ბრძოლაში მოცემულ საშუალებათა გამოყენება, ე. ი. ომის წარმოება, ვიწრო გაგებით. მაგრამ სამხედრო ხელოვნება საქმიანობის სხვა სახეებსაც მოიცავს: სამხედრო ხელოვნება მოიცავს მთელ მუშაობას შეიარაღებულ ძალთა შესაქმნელად—მათი დაკომპლექტება, შეიარაღება, წყობა და განსწავლა—ფართო გაგებით. ომის წარმოება—ესაა ძალთა განლაგება და ბრძოლის წარმოება. ბრძოლა არაა ერთი რამ აქტი, იგი შედგება რამდენიმე ცალკეული, დასრულებული აქტისაგან, ე. წ. კერძო ბრძოლებისაგან. აქედან ჩვენი საქმიანობაც ორგვარი უნდა იყოს: ა) ამ ცალკეული ბრძოლების ორგანიზება და მათი წარმოება და ბ) მათი შერწყმა, დაკავშირება ომის საერთო მიზანთან. პირველს ტ ა ქ ტ ი კ ა ეწოდება, ხოლო მეორეს ს ტ რ ა ტ ე გ ი ა. ამგვარად, ტაქტიკა არის მოძღვრება შეიარაღებულ ძალთა გამოყენების შესახებ ბრძოლაში, ხოლო სტრატეგია—მოძღვრება ბრძოლათა გამოყენების შესახებ ომის მიზნებისათვის. სამხედრო ხელოვნების თეორიის გაყოფა ტაქტიკად და სტრატეგიად დღეს საყოველთაოდ არის გავრცელებული (იხ. Клаузевиц—„О войне“, მეორე გამოცემა, ნაწილი მეორე—Теория войны, თავი I—Деление на части теории военного искусства, გვ. 67). ამგვარად, ს ტ რ ა ტ ე გ ი ა არის ომის მიზნებისა და ამოცანების შესაბამისად სამხედრო ოპერაციათა საერთო ხელმძღვანელობა, მოძღვრება ბრძოლათა გამოყენების შესახებ ომის მიზნებისათვის, ცალკეული ბრძოლების შერწყმა, დაკავშირება ომის საერთო მიზანთან, კერძო ბრძოლათა შეერთება ერთ გააზრებულ მთელად, ხოლო ტ ა ქ ტ ი კ ა—მოძღვრება შეიარაღებულ ძალთა გამოყენების შესახებ ბრძოლაში, ომის ცალკეული ბრძოლების ორგანიზება და მათი წარმოება.

გეოგრაფია სამხედრო მიზნებსა და ამოცანებს, სამხედრო ხელოვნების ორსავე დარგს—სტრატეგიასა და ტაქტიკას ორგანულად დაუკავშირდა სამხედრო ხელოვნების თეორიის ჩამოყალიბების პირველსავე ხანებში. ჯერ კიდევ იგივე კლაუზევიცი, არკვევდა—რა ტაქტიკისა და სტრატეგიის მიზნებსა და საშუალებებს, საპატიო ადგილზე აყენებდა გეოგრაფიულ მონაცემებს. ტაქტიკის მიზანია გამარჯვება—ამბობდა კლაუზევიცი,—საშუალებას კი ამისათვის წარმოადგენს განსწავლული შეიარაღებული ძალები, რომელთაც უნდა აწარმოონ

ბრძოლა. საშუალებათა მომარჯვებას თან ახლავს სხვადასხვა გარემოებანი. გარემოებანი, რომელნიც ყოველთვის თან ახლავს ბრძოლას და მეტ-ნაკლებად გავლენას ახდენენ ბრძოლაზე, შემდეგია: ადგილის პირობები, დღელამური დრო და ამინდი. ადგილის პირობები (აქ იგულისხმება როგორც თვით ადგილი, ისე ნიადაგიც), მკაცრად რომ ვთქვათ, იქნებ ვერც კი მოახდენდა გავლენას, ბრძოლა რომ წარმოებულყო აბსოლუტურად ბრტყელ, ნაგებობათაგან თავისუფალ ვაკეზე. სტეპურ მხარეებში ეს ასედაცაა, ევროპის დამუშავებულ რაიონებში კი ეს თითქმის ფანტაზიაა. ევროპის ცივილიზებულ ხალხთა შორის ერთი ბრძოლაც კი არ შეიძლება წარმოვიდგინოთ მასზე ადგილისა და ნიადაგის გავლენის გარეშე. ამინდი კიდევ უფრო იშვიათად ახდენს გადამწყვეტ გავლენას ბრძოლაზე, უმეტეს შემთხვევაში გარკვეულ როლს ასრულებს ნისლი. დღეა თუ ღამე, ესეც გავლენას ახდენს ბრძოლის მსვლელობაზე. სტრატეგიის მიზანია—ბოლო ინსტანციაში იმ მდგომარეობამდე მიღწევა, რომელმაც უშუალოდ უნდა მიგვიყვანოს ზავის ჩამოგდებისაკენ, სტრატეგიის ძირითად საშუალებას კი წარმოადგენს გამარჯვება, ე. ი. ტაქტიკური წარმატება. სტრატეგიის ამ საშუალებათა მომარჯვებას თან ახლავს გარემოებანი, რომელნიც მასზე მეტ-ნაკლებ გავლენას ახდენენ, ესენია: ადგილი და ნიადაგი (ფართო გაგებით—ქვეყანა და მოსახლეობა ომის მთელი თეატრის ფარგლებში), დღელამური დრო (ფართოვდება წელიწადის დრომდე), ამინდი (უჩვეულო გამოვლინება—ძლიერი ყინვები და ა. შ.). ამგვარად, ტაქტიკისა და სტრატეგიის საშუალებათა მომარჯვებას, კლაუზევიცის სამართლიანი შენიშვნით, მუდამ თან ახლავს გეოგრაფიული გარემოებანი, რომელნიც მეტნაკლებად გავლენას ახდენენ ბრძოლაზე და ომზე საერთოდ (იხ. ციტირ. ნაშრომი, ნაწილი მეორე—Теория войны, თავი II—Теория войны, პარაგრაფები—29, 30, 31, 32, 33, 34 და 35, გვ. 83—84).

ჩვენ შორსა ვართ იმ განზრახვისაგან, რომ გეოგრაფიულ ფაქტორებს გადამწყვეტი როლი მივაკუთვნოთ სამხედრო ოპერაციათა წარმატებით წარმოებაში. საქმის ამ მხარეზე შესავალ თავში აღარ შევჩერდებით, რადგან იგი მომდევნო თავებში გვაქვს გაშუქებული, ისიც, რა თქმა უნდა, იმდენად, რამდენადაც ამის საშუალებას ჩვენი ნაშრომის ძირითადი მიზანდასახულება გვაძლევს.

ჩვენი პირდაპირი მიზანია—ნათელგყოთ საკითხი, რომ სამხედრო გეოგრაფია სამხედრო ცოდნის ერთ-ერთ უმნიშვნელოვანეს დარგს წარმოადგენს და, აქედან გამომდინარე, ჩვენი ამოცანაა—გავარკვიოთ სამხედრო გეოგრაფიის არსი, მისი შედგენილობა და თემატიკა.

## II

# სამხედრო გეოგრაფიის განვითარების საწყისი პერიოდი

სამხედრო გეოგრაფია და ჩვეულებრივი მეცნიერული გეოგრაფია.—  
კარლ ფონ-კლაუზევიცის შეხედულებანი გეოგრაფიულ მონაცემთა  
ომისათვის ცნიშვნელობის შესახებ.— პ. გეისმანის შეხედულებანი  
ამავე საკითხზე.—სამხედრო თვალსაზრისი გეოგრაფიულ კვლევაში.—  
სამხედრო გეოგრაფიის ჩასახვა რუსეთში.—ანრი ეომინი.— პ. იახი-  
კოვი.

სამხედრო გეოგრაფია ჩვეულებრივი მეცნიერული გეოგრაფი-  
ისაგან მხოლოდ თვალსაზრისით განსხვავდება და არა კვლევის ობი-  
ექტით, ამდენად მისი არსი ძირითადად იგივეა, რაც საერთოდ  
მეცნიერული გეოგრაფიისა: განიხილოს დედამიწის ზედაპირის გან-  
საზღვრული მონაკვეთების—ქვეყანათა და სახელმწიფოთა, ან მცირე-  
ოდენი სივრცის უბნებისა და ადგილგარემოთა ბუნება, მოსახლეობა,  
მეურნეობა, შეისწავლოს ადგილის დამახასიათებელი ცალკეული  
ბუნებრივი და ეკონომიური ფაქტორები, აგრეთვე ადგილები ბუ-  
ნებრივ და ეკონომიურ მოვლენათა კომპლექსების სახით.

სამხედრო თვალსაზრისი გეოგრაფიულ კვლევაში თავს იჩენს  
ყველგან, სადაც კი დაისმება საკითხი: რა დადებითი თუ უარყო-  
ფითი მნიშვნელობა აქვს ამ მოვლენას, ამ ფაქტორს ომის წარმა-  
ტებით წარმოებისათვის. ცალკეული ბუნებრივი და ეკონომიური  
ფაქტორების სამხედრო თვალსაზრისით განხილვა არ ხდება მათი  
დაცილებით ზედაპირის განსაზღვრული მონაკვეთისაგან, პირიქით,  
იგი მჭიდროდაა დაკავშირებული გარკვეულ ტერიტორიასთან. თი-  
თოეული ფაქტორის ზოგადად განხილვას აუცილებლად მოჰყვება  
ზისი გათვალისწინება მოცემული ადგილის კონკრეტულ ფარგლებში  
და სწორედ ამ შენთხევეაში გამოვლინდება განსაკუთრებული სიმ-  
კვეთით სამხედრო თვალსაზრისიც, ფაქტორთა ზოგადად გაანა-

ლიზება კი ხდება სავსებით და მთლიანად ჩვეულებრივი მეცნიერული გეოგრაფიის საფუძველზე.

ამგვარად, სამხედრო გეოგრაფიის ყველა ფესვი ჩვეულებრივი მეცნიერული გეოგრაფიის ნიადაგშია გადგმული, იგი ამ ნიადაგიდან მიღებული სასიცოცხლო წვენით საზრდობს.

მაინც რაში მდგომარეობს კონკრეტულად სამხედრო თვალსაზრისი გეოგრაფიაში? ქვეყნის გეოგრაფიული აღწერა ჩვეულებრივ გულისხმობს მთავარი გეოგრაფიული ელემენტების განხილვას, როგორცაა, მაგალითად, მდებარეობა, რელიეფი, მდინარეები, ტბები, ჰავა, ნიადაგები, მცენარეები, ცხოველები, აგრეთვე შეიცავს ცნობებს მოსახლეობისა და მისი სამეურნეო საქმიანობის შესახებ და ა. შ. სამხედრო გეოგრაფიაც ამავე გეოგრაფიულ ელემენტებს განიხილავს, მაგრამ, როგორც ვთქვით, სამხედრო თვალსაზრისით. ავიღოთ რომელიც გნებავთ სამხედრო-გეოგრაფიული ნაშრომი, აი, თუნდაც მ. ლიტვინოვის სამხედრო-გეოგრაფიული ნაკვეთი კავკასიის შესახებ (იხ. М. Литвинов—Украины России, военно-географические очерки, I—Кавказ, გამოცემა მე-2, ს.-პ. 1884 წ.). ამ წიგნში, რომელიც ავტორს გამოუცია იმ მიზნით, რომ რუსეთის სამხედრო გეოგრაფიის შესწავლისათვის სახელმძღვანელოთა სრული უქონლობის პირობებში გაეადვილებინა სამხედრო პირთათვის საშუალო სკოლაში მიღებული გეოგრაფიული ცოდნის შევსება, მოცემულია მოკლედ კავკასიის სამხედრო გეოგრაფია. საკმარისია გადაიკითხოთ ეს წიგნი, რომ საკმაოდ ნათელი წარმოდგენა შეიძუშაოთ იმ თვალსაზრისზე, რომელსაც ატარებს სამხედრო გეოგრაფი ქვეყნის სამხედრო-გეოგრაფიულ აღწერაში. მოვიყვანოთ რამდენიმე დამახასიათებელი მაგალითი. კავკასიის რელიეფის განხილვის დროს ავტორს დასახელებული აქვს ქედები, მთები, ვაკეები, დაბლობები, ცალკეული მწვერვალები, ხეობები, უღელტეხილები და მისთანანი და ყოველივე ეს ისე, რომ მკითხველს შეუძლია გაითვალისწინოს ზედაპირის ამ ფორმებით შექმნილი ხელშემწყობი თუ ხელშემშლელი პირობები მათზე და მათ შორის მოძრაობისათვის, მიმოსვლისათვის: ციცაბო თუ დამრეცი კალთები, ტერასები, კონტრფორსები, ღია და დახშული ტაფობები, მაღლობთა და გადასავალთა აბსოლუტური სიმაღლე და მისადგომობა, მთებსა და ქედებს შორის გასასვლელი ადგილები, მდინარეთა და ხევ-ხეობათა წყალგამყოფები, ქედების მიმართულება და მათი გავრცელება; არც ერთ შესაძლო შემთხვევაში მხედველობიდან არაა გაშვებული სამიმოსვლო გზა. ავტორი ყველგან ცდილობს სამხედრო შეფასება მისცეს რე-

ლიეფის პირობებს, მაგალითად, ერთ ადგილას ის ამბობს: კავკასიონის საერთო მიმოხილვის შემდეგ არ შეიძლება ასეთი დასკვნა არ გამოიყვანოთ, რომ იგი სამხედრო თვალსაზრისით სერიოზულ დაბრკოლებას ჰქმნის ამიერ-კავკასიასთან ურთიერთობისათვის. ამიერ-კავკასია გამოყოფილია რუსეთის დანარჩენი ტერიტორიისაგან და ამის გამო საჭიროა მეტად უზრუნველყოთ იგი, რაც უნდა გამოიხატოს იმაში, რომ ჯარების დიდი რაოდენობა უნდა ვიყოლიოთ იქ (გვ. 7). მდინარეების განხილვის დროს ავტორი უთვალისწინებს მკითხველს მდინარის სათავეს, შესართავს, შენაკადებს, მიმართულებას, წყლის მასას, წყლის დენის სისწრაფეს, ნაოსნობის პირობებს, მდინარის ფონს, სადაც მისი გადალახვა ხერხდება; ყოველივე ამას მოსდევს ავტორის ცდა—მისცეს მოვლენებს სამხედრო შეფასება. მაგალითად, ის ამბობს: მტკვრის აუზის მიმოხილვიდან ჩანს, რომ მისი უდიდესი ნაწილი სამხედრო ოპერაციათა წარმოებისათვის მეტად საძნელო ადგილებს წარმოადგენს (გვ. 16). ჰავისა და მცენარეულობის პირობების შესახებ ავტორი ამბობს: მაღალი ტემპერატურა, დიდი სინესტე, მდინარის შლამი აპირობებენ ტყეების არაჩვეულებრივ სიუხვეს რიონის დაბლობზე, აგრეთვე მის გაგრძელებაზე ენგურის, ხობის და სხვა მდინარეების ქვემო დინებებში, მაგრამ ჭაობიანი ნიადაგის გამო ჰავა არაა საღი. ეს თვისებები მნიშვნელოვნად აძნელებენ სამხედრო მოქმედებათა წარმოებას ამიერ-კავკასიის ამ ნაწილში (გვ. 17). საფაბრიკო-საქარხნო მრეწველობის შესახებ ავტორი შენიშნავს, რომ კავკასიის არმია ყველა საჭირო საფაბრიკო-საქარხნო ნაწარმოების მხრივ დამოკიდებულია ევროპულ რუსეთზე, რაც ამის პერიოდებში ცუდ შედეგებს იწვევს (გვ. 37) და ა. შ. აღარ შეეჩერდებით ისეთ საკითხებზე, როგორცაა საზღვრების და სამიმოსვლო გზების დახასიათება, მოცემული მ. ლიტვინოვის მიერ, რადგან მათი სამხედრო თვალსაზრისით განხილვა თავისთავადაც ადვილი წარმოსადგენია. შევნიშნავთ მხოლოდ, რომ ჩვენი მსჯელობის საგანს არ შეადგენს—რამდენად სრული და უნაკლოა მ. ლიტვინოვის კავკასიის სამხედრო-გეოგრაფიული ნარკვევი. 52-გვერიდან წიგნს ამ მხრივ რა დიდი მოთხოვნილება უნდა წავუყენოთ. ჩვენ დაგვაინტერესა მხოლოდ სამხედრო თვალსაზრისმა, რომლის გატარებას შეეცადა ავტორი აღნიშნულ წიგნში.

სამხედრო თვალსაზრისი იგრძნობა ბევრჯერ ზოგიერთ ისეთ გეოგრაფიულ ნაშრომშიაც, რომელსაც ავტორი სამხედრო გეოგრაფიად არ სთვლის. ეს ხდება მეტადრე ისტორიის ისეთ ხანებში,

როცა სამხედრო მოქმედება, ომიანობა ხშირია და ხანგრძლივ ხასიათს ღებულობს. ამ მხრივ, ცხადია, უკვალოდ არ ჩაუვლია კავკასიის ომს, რომელიც რუსეთისა და კავკასიის ხალხების ისტორიაში ცნობილია, როგორც 65-წლიანი განუწყვეტელი ომი, წარმოებული კავკასიის დასაპყრობად 1800 წლიდან 1864 წლამდე. კავკასიის ომის წარმატებით წარმოებისათვის რუსეთს სჭირდებოდა კავკასიის ქვეყნებისა და ხალხების სრული და ყოველმხრივი შესწავლა. შეიძლება თამამად ითქვას, რომ უმთავრესად ამ გარემოებამ მისცა უდიდესი ბიძგი კავკასიის შესახებ საკმაოდ მდიდარი და მრავალფეროვანი ლიტერატურის შექმნას რუსულ ენაზე. ამ დროის არა თუ გეოგრაფიული, არამედ ისტორიული, ეთნოგრაფიული და სხვა ნაშრომებიც კავკასიის შესახებ სამხედრო თვალსაზრისს დიდ ანგარიშს უწევენ. გადაფურცლეთ, მაგალითად, ნ. დუბროვინის ნაშრომი „კავკასიაში რუსთა ომისა და ბატონობის ისტორია“ („История войны и владычества русских на Кавказе“, ტომი I, სამ წიგნად, ს.-პ., 1871 წ.) და გაეცანით ჰასში იმ თავებს, სადაც მოცემულია ჩრდილო და ამიერ-კავკასიის გეოგრაფიული აღწერა. აქ ზედაპირის ფორმების და მეტადრე მდინარეების აღწერას მუდამ თან სდევს მათი გადალახვის სიძნელე-სიადვილის გათვალისწინება, ან ჰავის განხილვის დროს ავტორს მუდამ ახსოვს მისი მეტი თუ ნაკლები სისაღე, მისი გავლენა ჯანმრთელობაზე და ა. შ. აი, მაგალითებიც: მთიანი ქვეყანა ავარია შეიცავს ზეგნებს, რომელთაც მოსდევს ისევ ზეგნები ავარიის-ყოისუსა და ყარა-ყოისუს შორის. მათგან ყველაზე მნიშვნელოვანია გუნიბის ზეგანი, რომელმაც ესოდენ დიდი როლი შეასრულა სამხედრო ისტორიაში, მისი აბსოლუტური სიმაღლე 7742 ფუტს უდრის. გუნიბის ზეგანი ყარა-ყოისუს ღრმა ხეობით გამოიყოფა 7905 ფუტის აბსოლუტური სიმაღლის ბრტყელი მაღლობისაგან, რომელზედაც, სწორედ ანდალიალურ სოფელ ჩოხის თავზე, მდებარეობს მთა ტურჩი-დალი. ტურჩი-დალის ტერასა ცნობილია, როგორც დიდებული საზაფხულო საბანაკო ადგილი ჩვენი ჯარებისათვის. ამ ზეგნების უნეტესი ნაწილი გარემოცულია ყოველი მხრიდან ქარაფებით და დაკავშირებულია ერთმანეთთან წყალგამყოფი ყულებით (გვ. 12—13). კიდევ: მდინარე ყუბანი თავისი ზემო დინებიდან თანდათან ეშვება დაბლობზე და უკვე ყარაჩაის ქვევით მასზე იშვიათად გვხვდება ფონები. თუმცაღა წელიწადის უმეტეს დროს შეიძლება გამოძებნო გადასასვლელი ადგილი ყუბანზე, განსაკუთრებით სივრცეზე მისი სათავეებიდან იმ ადგილამდე, სადაც მას მდ. ურუფი ერთვის; იქით კი გადასვლა შესაძლებელი ხდება მხო-

ლოდ ხიდებისა ან ბოგირების საშუალებით, მეტადრე წყლის მო-  
ვატების დროს. ამას მოჰყვება ყუბანის დახასიათება სხვა მხრივაც—  
წყალდიდობა და მისი შედეგები. გაყინულობის დაწყება და დამ-  
თავრება, ყუბანის გადალახვის პირობები მისი გაყინვის დროს, საი-  
დან სადამდეა ყუბანი სანაოსნოდ ან სატივოდ გამოსადეგი, ყუბანის,  
როგორც მთის მდინარის, თვისებები და ა. შ. (გვ. 18—19). ან კი-  
დევ: დალისტანში ყოველგვარი ჰავის ნიმუშებს ნახავთ, ისიც მეტად  
მოკლე მანძილზე. ასე, მაგალითად, იმ ადგილას, სადაც ჩვენი სი-  
მაგრე ნიზოვოე იყო, მთელი ზაფხულის განმავლობაში აესნებიანი  
მალარია მძვინვარებდა, სამ ვერსზე კი აღმოსავლეთით, პეტრეს სი-  
მაგრის ადგილას, ჰავა სავსებით საღია და იქ გავზავნილი ავადმყო-  
ფები ძლიერ ჩქარა იკურნებოდნენ (გვ. 37).

საკმაოდ ნათელ წარმოდგენას იძლევა სამხედრო-გეოგრა-  
ფიულ თვალსაზრისზე ცნობილი სამხედრო მოაზროვნის კარლ  
ფონ-კლაუზევიცის მსჯელობა გეოგრაფიულ მონაცემთა ომი-  
სათვის მნიშვნელობის შესახებ. კლაუზევიცმა ამ საკითხს სპე-  
ციალური თავები დაუთმო, როგორცაა თავდაცვა მთებში, მდი-  
ნარეთა დაცვა, ჭაობების დაცვა, შეტბორვა, ტყეების დაცვა. ეს  
მასალა გაშლილია მის ნაშრომში „ომის შესახებ“, მეექვსე ნაწილის  
XV—XXI თავებში, 362-დან 402 გვერდამდე. საკმარისია მოვიგო-  
ნოთ მოკლედ მისი შეხედულებანი. მთები—კლაუზევიცის აზრით—  
მეტისმეტად დიდ გავლენას ახდენს ომის წარმოებაზე. მთების სა-  
კითხი სამხედრო ხელოვნების თეორიისათვის მეტად მნიშვნელოვა-  
ნია. მთების გავლენას შემკავებელი საწყისი შეიქვს სამხედრო მო-  
ქმედებაში, ამიტომ იგი უწინარეს ყოვლისა თავდაცვას მიეკუთვნება.  
დაუსრულებელი სიძნელეები ახლავს დიდი კოლონების მოძრაობას  
მთის გზებში. უჩვეულო ძალას იძენს უმნიშვნელო რაოდენობის  
რაზმიც კი, როცა იგი მოფარებულია ფრონტიდან ციცაბი ფერდო-  
ბით, მარჯვნიდან და მარცხნიდან კი ხეობებით. ეს ორი გარემო-  
ება, რომელსაც შეიძლება დამყაროს რაზმი, უდავოდ ანიჭებს  
მთებს ძალას და ქმედუნარიანობას, მხოლოდ შეიარაღებისა და ტაქ-  
ტიკის თავისებურებანი გარკვეულ პერიოდებში იწვევდა მას, რომ  
შეიარაღებულ ძალთა დიდი მასები თავს არიდებდნენ მათ. რამდე-  
ნიმე ასეულ კაცს ძალუძს უკუაქციოს მთებში მთელი ლაშქარი.  
ორწოხებში, ღელე-ღრანტეებში, სადაც კოლონა კუს ნაბიჯით მო-  
ძრაობს დაკლანკილ გზაზე და სადაც საკმარისია ორთვალას გაფუ-  
ჭება, რომ მისი შეკეთების დროს უკან ყველა გაჩერდეს, ერთი მუ-  
ჟა ხალხი მთელი არმიის შეკავებას ახერხებს. მაგრამ ერთია სალა-

შპრო მოძრაობა და სულ სხვაა შეტევა. ოცდაათწლიან ომამდე, როცა საბრძოლო წესს სიღრმე ახასიათებდა, როცა კავალერია მრავალრიცხოვანი იყო, ცეცხლმსროლელი იარაღი არამალაქხარისხიანი და სხვ., რელიეფით შექმნილ დაბრკოლებებს ვერ იყენებდნენ, ნამდვილი თავდაცვა კი მთებში, რეგულარული ჯარებით, თითქმის შეუძლებელ საქმედ ითვლებოდა. მხოლოდ მას შემდეგ, რაც საბრძოლო წესმა უფრო გაშლილი ხასიათი მიიღო და წინა პლანზე გამოვიდა ფენოსანი და ცეცხლმსროლელი იარაღი, უკვე ყურადღება მიაქციეს მთებსა და ხეობებს. მაგრამ სამხედრო ხელოვნებამ მთები მაინც კიდევ 100 წლის შემდეგ აითვისა, ეს მოხდა XVIII საუკუნის შუა ხანაში. მცირეოდენი რაზმი, როგორც ვთქვით, უჩვეულო ძალას იძენს მოხერხებულად არჩეულ პოზიციაზე მთებში, ოღონდ ერთი პირობით—ფრონტი არ გაიშალოს, რაზმს უკან არ მოექცეს მტერი. მთებში თავდაცვა ხელს უშლის მას, რომ ნაწილები მოძრავი იყოს. მთიანი გარემო კარგია ფარდობითი წინააღმდეგობისათვის, ხოლო აბსოლუტური თავდაცვისათვის მთა იმდენად ხელსაყრელი არაა. მთა ნაკლებად შველის თავდამცველებს გადამწყვეტი ბრძოლისათვის, შემტევს კი იგი დიდად უწყობს ხელს. მთა ბრძანებლობს გარემო ადგილებზე. გაბედულ პარტიზანთა მცირე ჯგუფები თავს აფარებენ მთებს დენის დროს და დაუსჯელად გამოჩნდებიან ხოლმე ახალახალ ადგილებში. ძლიერი კოლონებიც კი შეიძლება მიუახლოვდეს დამხედურ ჯარს, თუ ისინი მთებს იქნებიან მოფარებული. შორს უნდა იმყოფებოდნენ, რომ არ მოექცე მთების გავლენის ქვეშ. როცა უკან დასახევი გზა ნხოლოდ ერთი გაქვს, ვერ ჩაებმები გადამწყვეტ ბრძოლაში. მთები მოწინააღმდეგის ძალებს თიშავს, როგორც ბარიერი (მდინარესავით). მთებში კომუნიკაციის ხაზის გადაჭრის საფრთხე იქნება. მთიანი ადგილებისათვის მისადგომებია ხეობები. მაღალი მთების დასაცავად აუცილებელი ხდება ძალების გაფანტვა (გვ. 362—360).

მდინარეების შესახებ კლაუზევიცი ასეთი აზრისაა: დიდნი და საშუალო სიდიდის მდინარეები მთების მსგავსად სტრატეგიულ ბარიერებს წარმოადგენენ. აქ მხედველობაშია მისაღები: მდინარის გადალახვის პირობები და საშუალებანი, მდინარის სიგრძე, სივანე, სიდიდე, წყლის მასის რაოდენობა, ნაპირების ხასიათი (ქარაფიანი, ქაობიანი), მდინარის ზემო, შუა და ქვემო დინების ხასიათი, მდინარის ხეობის ხასიათი (სიღრმე), მდინარის დენის ხასიათი (სწორ-ხაზოვანი, მეტისმეტად მიმოხვეული), მდინარის თვისებები სხვადასხვა სეზონის მიხედვით, მდინარის დენის მიმართულება (საზღვრის



პარალელურად, საზღვრისადმი პერპენდიკულარულად), ნაოსნობის პირობები მდინარეზე და ა. შ. (გვ. 380—396); ქაობებიც თავდაცვის ერთ-ერთი მნიშვნელოვანი საშუალებაა. ქაობების შესწავლის დროს უნდა გაირკვეს შემდეგი საკითხები: რა ფართობი უკავია ქაობს, გაუვალია თუ არა იგი, რა საშუალებებით შეიძლება მისი გადალახვა, რა მანძილზე იქნება საჭირო მისი გადალახვა, პატარა მდინარე ხომ არ მიედინება ქაობის შუა ზოლში, ბევრადგილას ხომ არ ზერხდება ქაობზე გადასვლა, ხანგრძლივი დრო ხომ არაა საჭირო ქაობის ერთი ნაპირიდან მეორემდე გადასვლისათვის (გვ. 396—397). შეტბორვა (მიწის ზედაპირის წყლით დაფარვა) დიდ ქაობებს მოგვაგონებს. შეტბორვის მდგომარეობა უნდა გავითვალისწინოთ შემდეგნაირად: რა მიზეზით შეიძლება გამოწვეულ იქნას შეტბორვა (მდინარის მიერ თავისი ნაპირების გადმოლახვა, ჯებირების გარღვევა, დიდი წვიმები ან ლანქერი), შეტბორილი წყლის სიღრმე, ფონების არსებობა მასზე, რუები ხომ არაა შეტბორილი წყლის ქვეშ და თუ არის—რა ხასიათის: რაოდენობა, სიღრმე, მიმართულება (გვ. 398—401). ტყეების შესახებ საჭიროა გავთვალისწინებულ იქნას შემდეგი: რა ხასიათისაა ტყე (ხშირი, უდაბური, გაუვალა, მხვიარა მცენარეებით გადახლართული), ბილიკები და გზები ხომ არ ჰკვეთს მას, როგორია გარსახედველი ტყეში და ტყის პირას, რა ადგილასაა ტყე—მთაში თუ ვაკეზე (გვ. 401—402). ყველა ამ გეოგრაფიულ მონაცემს 'ივთვალისწინებს კლასიფიკაციის სტრატეგიულ მიმართებაში, ფაქტებს იგი სამხედრო ისტორიიდან კრებს ამა თუ იმ ომის კონკრეტული ვითარების მიხედვით.

კლასიფიკაციის ეს შეხედულებანი დღემდე ინარჩუნებენ თავის აზრს და მნიშვნელობას, თუმცა მათი გამოქვეყნების შემდეგ ასზე მეტმა წელმა განვლო (კლასიფიკაციის ნაშრომი „ომის შესახებ“ იწერებოდა 1818—1830 წლებში, პირველად გამოიცა ბერლინში 1832—1833—1834 წლებში სამი ნაწილი, რუსულ ენაზე ითარგმნა და პირველი გამოცემა გამოქვეყნდა 1902 წელს კ. ვოიდეს თარგმანი, იგი ხუთ ნაწილს შეიცავს, მისი სათაურია—Воина (Турция стратегия), ტ. I, 1—342 გვ., ჩვენს დროში პირველი რუსული გამოცემა გამოქვეყნდა 1932 წელს, ხოლო მეორე, სრული ტექსტი, 1934 წელს, ა. კ. რაჩინსკის თარგმანი, წიგნი შეიცავს რვა ნაწილს, 13—682 გვ.).

შედარებით უფრო ახალ ნაშრომებშიაც სამხედრო ხელოვნების შესახებ გეოგრაფიულ მონაცემებს. ჯეროვანი ყურადღება ექცევა. დამსახურებული პროფესორის გენერალ-ლეიტენანტის პ. გეი-

სმანის მიერ შედგენილ ნაშრომში—„სამხედრო ხელოვნების ისტორიის მოკლე კურსი—საშუალო და ახალი საუკუნეები, VI—XVIII საუკუნეები“, რომელიც პირველად 1893 და 1894 წელს გამოიცა (1893 წელს გამოიცა პირველი ნაწილი—საშუალო საუკუნეები, 1894 წელს მეორე ნაწილი—ახალი საუკუნეები), მეორედ კი 1907 წელს, თავი VIII ეხება შვიდწლიანი ომის მოქმედებათა თეატრებს, ომის პირველ პერიოდს 1756 და 1757 წლების ლაშქრობებს, სადაც მოცემულია სამხედრო მოქმედებათა მთავარი, თეატრის—სამხრეთი თეატრის მიმოხილვა, ავტორი დაწვრილებით არჩევს თეატრის მდებარეობას, საზღვრებს, მის რელიეფს, მდინარეებს. მთების შესახებ აქ ნათქვამია შემდეგი: სამხრეთი თეატრის ცენტრალურ ნაწილს შეადგენს ქედების რიგი, რომელიც გარს ეკვრის ჩეხეთ-მორავიის ოლქს ჩრდილო-დასავლეთიდან, ჩრდილოეთიდან და ჩრდილო-აღმოსავლეთიდან და ნიმიართება მდ. ზაალეს სათავეებიდან ოდერის სათავეებამდე (დასახელებულია ეს მთები და ქედები, ნაჩვენებია მათ უმაღლეს წერტილთა სიმაღლეები). ეს მთიანი ზოლი, სიგრძით 500-მდე და განით 20-დან 50 ვერსამდე, წარმოადგენდა სერიოზულ თავდაცვითი ხაზს, მისადგომს მხოლოდ არსებული გასასვლელების გავლით, რომელნიც იმყოფებიან შემდეგს გზებზე (დასახელებულია გზათა მარშრუტები გადასავალთა ჩვენებით). ყველა გზა ელბის დასავლეთით უკეთეს მდგომარებაში იყო და გადიოდა შედარებით უფრო კარგად დასახლებულ ადგილებში. ეს თავდაცვითი ხაზი მეტ ზელსაყრელ პირობას წარმოადგენდა იმ მოწინააღმდეგისათვის, რომელიც ფლობდა მის ჩრდილო კალთებს, ე. ი. პრუსიელთათვის უცილობლად სილეზიაში და პირობითად საქსონიაში, იმ შემთხვევაში, თუ ისინი დაასწრებდნენ ავსტრიელთ და მათზე ადრე ჩაიდებდნენ ხელთ ამ ოლქს. შემდეგ დასახელებულია და დახასიათებულია ჩეხეთ-მორავიის მთები, მათი ტერასებიანი წყალგამყოფი ნაწილი, მათი გრძელი დაპრეცი ტოტები დასავლეთ მხარეზე, რომელნიც ჰქმნიან შიდა ჩეხეთის მალლობს, უფრო მოკლე ტოტები აღმოსავლეთ მხარეზე, ჩეხეთის ტყე (ბემერვალდი), მისი ფერდობები, რომელნიც ღრმადაა შეჭრილი ჩეხეთში და მის შიდა მალლობთან კავშირში ჰქმნის რამდენიმე საფეხურს. ამგვარად—დაასკვნის ავტორი—ჩეხეთის მთიანი ოთხკუთხედის მთელი შინაგანი სივრცე თითქმის სულ ამოვსებულია დასახელებული მთების ფერდობებით და მათი მალლობებით; თითქმის ასეთივე ხასიათი აქვს მორავიასაც; ხოლო ოლქები, რომელნიც მდებარეობენ მოქმედებათა თეატრის ცენტრალური მთიანი

ზოლის ჩრდილო მხარეზე, ჰკარგავენ ამ ხასიათს ახლო მანძილზე წყალგამყოფიდან. ეს წესაძლებლობას აძლევდა პრუსიელებს უფრო მალე მოეყარათ თავი საჭირო რაოდენობის ჯარისათვის მოცემული მიმართულებით, ვიდრე ავსტრიელებს. მდინარეების შესახებ ავტორს მოჰყავს ასეთი ცნობები. მდინარეთაგან მნიშვნელობა ჰქონდათ: ელბას მარცხენა შენაკადებით, ვლტავითა და ეგერიტ (ელბის მარჯვენა შენაკადთაგან შეიძლება დავისახელოთ იზერი, რომლის თავდაცვითი თვისებებია ისეთივეა, როგორც ზემო ელბისა), და ზაალესა და ოდერს. შემდეგ დახასიათებულია მდინარეები შემდეგი მაჩვენებლების მიხედვით: მდინარის რომელი ნაწილი, რა ადგილას, როგორ ხეობაში მიედინება (გაშლილი, დავიწროებული), მისი ნაპირები როგორია (მთიანია, ღია სივრცის მქონე), როგორი სიგანისაა მდინარე სხვადასხვა ნაწილში, როდის იწყება მდინარეზე წყალდიდობა და რას აღწევს ამ დროს მდინარის განი. ამრიგად—დაასკვნის ავტორი—ელბის ამ ნაწილს (ჩეხეთის ფარგლებში) შეეძლო ჰქონოდა სერიოზული თავდაცვითი ხაზის მნიშვნელობა მხოლოდ წყალდიდობის პერიოდებში; დანარჩენ დროს კი ის წარმოადგენდა დაბრკოლებას უმთავრესად ტაქტიკური მხრივ. ელბის ამ ნაწილის მნიშვნელობა ძლიერდებოდა ციხე-სიმაგრეებით (დასახელებულია ორი). მთების ჩრდილო მხარეზე ელბა სერიოზულ გადაშლას წარმოადგენდა და ჰკვეთდა გზებს, რომელთაც მიუყავართ ჰაინის ხეობიდან ბერლინისაკენ. ვლტავა—განაგრძობს ავტორი—თავისი თვისებებით ელბას ჰგავს. შემდეგ ახასიათებს მას: რა ადგილას როგორი სიგანისაა, როდის იცის წყალდიდობა. ვლტავა—დაასკვნის ავტორი—ელბაზე უფრო მეტად აკმაყოფილებს მოთხოვნილებას, აუცილებელს იმისათვის, რომ სცნო იგი სერიოზულ დაბრკოლებად სტრატეგიული თვალსაზრისით, და ამ მხრივ მას ჩეხეთის მდინარეებს შორის პირველი ადგილი უკავია. ეგერი თავისი თვისებებით ვლტავისა და ელბის შემდეგ უნდა დაგვეყენებინა, მაგრამ, რადგან საზღვარს თითქმის გასწვრივ გასდევს, ელბასთან ერთად, შეიძლება იგი ვცნოთ ავსტრიელთა თავდაცვის მეორე ხაზად. არსებითი ნაკლი ეგერს ისაა აქვს, რომ ის თავის დასაფლეთ ნაწილში საზღვართან ახლოსაა. ასევე დახასიათებულია მდ. ზაალე და ოდერი. მაშასადამე, გეისმანიც საკმაოდ დაწვრილებით და გულდასმით განიხილავს გეოგრაფიულ მონაცემთა როლს და მნიშვნელობას ამა თუ იმ ომის პირობებში. ჩვენ განგებ შევჩერდით კლაუზევიცისა და გეისმანის შეხედულებებზე, რომელნიც, თუმცა სამხედრო ხელოვნების თეორეტიკოსები არიან და არა სამხედრო გეო-

გრაფები, მაგრამ მაინც სათანადოდ აფასებენ გეოგრაფიულ მონაცემთა მნიშვნელობას ომისათვის.

როგორც ვხედავთ, სამხედრო გეოგრაფებსა და ომის თეორეტიკოსებში ყოველი გეოგრაფიული ფაქტი და მოვლენა ინტერესს იწვევს არა როგორც თავისთავადი რამ, არა როგორც თვითმიზანი—მისი წარმოშობისა და განვითარების გასათვალისწინებლად, არამედ მხოლოდ როგორც საშუალება სამხედრო მოქმედებისათვის, როგორც ჯარების მოძრაობის, დაბანაკების, საბრძოლო ოპერაციების და ამასთან დაკავშირებულ ყველა სხვა სამხედრო მოვლენის სარბიელი. სამხედრო გეოგრაფი გეოგრაფიაში მის წმინდა გამოყენებითი მხარეს ეხება, იგი გეოგრაფიულ გარემოს სარგებლიანობის თვალსაზრისით იკვლევს. აქვე უნდა დავსძინოთ სამხედრო გეოგრაფიის ერთი თავისებურებაც—მისი თვალსაზრისის არამუდმივობა და ცვალებადობა: სამხედრო მეცნიერების, ტექნიკისა და ხელოვნების განვითარებასთან ერთად ყოველთვის ერთნაირად ვერ შეთვისდება თუნდაც ერთი და იმავე ადგილის სარგებლიანობა, სამხედრო თვალსაზრისი სხვადასხვა დროსა და გარემოებაში გადაფასებას განიცდის.

სამხედრო გეოგრაფიის არსის განსაზღვრასთან დაკავშირებით მოვიგონოთ რამდენიმე მთავარი მომენტი სამხედრო გეოგრაფიის საკმაოდ მდიდარი წარსულიდან.

ბუნებრივია, რომ ყოველი დროის ყველა ხალხს სამხედრო საქმიანობაში სჭირდებოდა ცნობების დაგროვება ქვეყნის ტერიტორიის, მოსახლეობისა და ეკონომიკის შესახებ და, მაშასადამე, ყოველ სამხედრო მოღვაწეს მოეთხოვებოდა გეოგრაფიის საფუძვლიანი ცოდნა. მაგრამ მე-19 საუკუნემდე სამხედრო მიზნებისათვის გამოსადეგ გეოგრაფიულ ცნობათა დაგროვება უსისტემოდ და ნაწყვეტ-ნაწყვეტად ხდებოდა. ნაპოლეონის დროის ომების შემდეგ განსაკუთრებით ცხადი შეიქნა, რომ ომის წარმატებით წარმოებისათვის აუცილებელია სამხედრო მოქმედებათა თეატრების საფუძვლიანი შესწავლა. გაჩნდა ბეჭდვითი ნაშრომები, რომლებშიაც სახელმწიფო სამხედრო თვალსაზრისით განიხილებოდა. სამხედრო გეოგრაფიის სახელწოდებით გამოქვეყნდა თხზულებანი, მიძღვნილი ქვეყნის ზედაპირის სამხედრო თვალსაზრისით შესწავლისადმი. ხოლო ცნობები სახელმწიფოს სამხედრო ძალთა შესახებ, უმთავრესად ციფრობლივი მონაცემები სახმელეთო ჯარებისა და სამხედრო ფლოტის შესახებ, ქვეყნდებოდა სამხედრო სტატისტიკის სახელწოდებით. სამხედრო გეოგრაფია ჩვეულებრივი გეოგრაფიის წიაღში წარმო-

იშვა. გეოგრაფიული კვლევა ძველი დროის ომების დიდ მნიშვნელობასთან დაკავშირებით ხშირად სამხედრო განხრას ლებულობდა, ამ შემთხვევაში გეოგრაფიული კვლევა კონკრეტულ სამხედრო მიზნებს ემსახურებოდა. მე-19 საუკუნის შუა ხანებში კი შესაძლებელი შეიქნა დიდი ხნის განმავლობაში დაგროვილი სამხედრო-გეოგრაფიული ხასიათის მასალების უკვე სისტემაში მოყვანა, რის შედეგადაც სამხედრო გეოგრაფია სამხედრო ცოდნის ერთ-ერთ უმნიშვნელოვანეს დარგად იქცა. მე-19 საუკუნის შუა ხანებში ბევრ ქვეყანაში დაარსებულ იქნა სამხედრო გეოგრაფიის კათედრები უმაღლეს სამხედრო სასწავლებლებში. სამხედრო გეოგრაფთა წინამორბედებად მიჩნეული არიან სამხედრო ხელოვნების ცნობილი თეორეტიკოსნი მე-18 საუკუნის დამლევა და მე-19 საუკუნის დასაწყისში, მათ შორის ანრი ჟომინი, რომელმაც თავის სტრატეგიულ მოსაზრებებს საფუძვლად გეოგრაფიული მონაცემები დაუდო. ანრი ჟომინის დიდი ღვაწლი მიუძღვის რუსული სამხედრო გეოგრაფიის წინაშე. მისი წინადადებით დაარსდა რუსეთში პირველი სამხედრო აკადემია, სადაც პირველი წლებიდანვე დაწესდა სამხედრო გეოგრაფიის კათედრა.

ანრი ჟომინი, წარმოშობით შვეიცარიელი, დაიბადა 1779 წელს, 6 მარტს. სამხედრო საქმეზე ბავშვობიდანვე გაიტაცა ჟომინი. ჟომინიმ სამხედრო სამსახური 1798 წლიდან დაიწყო. იგი შვეიცარული ნაციონალური მილიციის ერთ-ერთი ორგანიზატორია. აქტიურად მონაწილეობს ბევრ ლაშქრობაში: მასენის, ნაპოლეონის მომავალი მარშალის, შვეიცარულ ლაშქრობებში, ომში ავსტრიის წინააღმდეგ მარშალ ნეისთან ერთად, პირადი სიმამაცის ჯილდოდ მარშალი ნეი გზავნის მას ნაპოლეონთან ცნობის მისაწოდებლად ოპერაციების შესახებ. 1806—1807 წლებში მარშალ ნეისთან ერთად მონაწილეობს ლაშქრობაში პრუსიისა და რუსეთის წინააღმდეგ. როგორც ჯარების საუკეთესო ხელმძღვანელს, მას ნიშნავენ მარშალ ნეის შტაბის უფროსად და ანიჭებენ ბარონის ტიტულს. შტაბის უფროსად ყოფნის დროს 1808 წელს მოაწყო ლაშქრობა ესპანეთის წინააღმდეგ. მარშალ ნეის საბრძოლო წარმატებათა მოშურნეებმა დაარბიეს ხმები, რომ ნეის წარმატებანი ჟომინის უნდა მიეწეროსო. ნეი ამ ხმებმა განაწყენა და ჟომინი მოხსნეს სამხედრო სამსახურიდან. ჟომინიმ, ნეისაგან შეურაცხყოფილმა, ალექსანდრე I-ს მიმართა თხოვნით—მიეღოთ იგი რუსულ სამხედრო სამსახურში. ალექსანდრე I-მა თანხმობა განუცხადა. ნაპოლეონმა, რა გაიგო ეს ამბავი, სამხედრო მინისტრის პირით წინადადება მისცა ჟომინის—ისევე

დაბრუნებულიყო საფრანგეთის არმიაში გენერლის ჩინით, არა და დაპატიმრებით ემუქრებოდა. ჟომინი დაბრუნდა საფრანგეთის არმიის რიგებში და დაინიშნა გენერალ ბერტიეს შტაბში. 1812 წელს, ნაპოლეონის რუსეთზე თავდასხმის დროს, ჟომინი იყო ვილნოს კომენდანტი, შემდეგ კი სმოლენსკის გუბერნატორი. გუბერნატორად ყოფნის დროს მან შექმნა მომარაგების დიდი ბაზები. აგრეთვე შეისწავლა ადგილგარემო, განსაკუთრებით მდინარეები და მათი გადასასვლელები. მოსკოვიდან ნაპოლეონის უკან დახევის დროს ჟომინის ამ ცნობებმა ხელი შეუწყო მდინარე ბერეზინაზე გადასასვლელის შერჩევის საქმეს. ჟომინი შეურიგდა მარშალ ნეის და ნაპოლეონის თანხმობით ისევ დაინიშნა მისი შტაბის უფროსად. ამ დროს მან მონაწილეობა მიიღო ლაშქრობაში ბაუცენთან. მარშალმა ნეიმ ბაუცენთან ბრძოლებში დამსახურებისათვის წარადგინა იგი დივიზიის გენერლის ხარისხზე. მაგრამ მარშალმა ბერტიემ, ჟომინის მიერ დაშვებული უმნიშვნელო წინდაუხედაობის გამო, არა თუ უარი უთხრა მას წარმატებაზე, არამედ საყვედურიც კი გამოუცხადა. ბერტიეს მოქცევით შეურაცხყოფილი ჟომინი, 14 აგვისტოს 1813 წელს პერშევიცთან დროებითი ზავს დროს, გამოცხადდა კოალიციის ბანაკში პრალაში და ხელახლა წესთავაზა მან თავისი სამსახური ალექსანდრე I-ს. ალექსანდრე I-მა ჟომინი თავის გენერალადიუტანტად დანიშნა და უბოძა მას გენერალ-ლეიტენანტის ხარისხი. 1815 წელს ჟომინი თან ახლდა ალექსანდრე I-ს პარიზში და მასთან ერთად მონაწილეობდა აახენისა და ვერონის კონგრესებზე. ჟომინიმ მუდმივი ცხოვრება რუსეთში 1822 წლიდან დაიწყო. იგი მონაწილეობდა თურქეთის წინააღმდეგ ოპერაციების გეგმების დამუშავებაში და პირადად მონაწილეობდა რუსეთ-თურქეთის ომში 1828—1829 წლებში. ჯანმრთელობის მდგომარეობამ აიძულა ჟომინი დაეტოვებინა რუსეთი და გადასულიყო ბრიუსელში. მაგრამ აღმოსავლეთის ომის დროს (1853—1856 წლებში), ნიკოლოზ I-ის მოწვევით, ისევ დაბრუნდა რუსეთში და მონაწილეობდა სამხედრო თათბირებში. 1855 წელს ჟომინიმ, გენერალ-ანშეფის ხარისხით, საბოლოოდ დასტოვა რუსეთი და დასახლდა ჯერ ბელჯიაში, შემდეგ პარიზის ახლოს პასში, სადაც გარდაიცვალა 1869 წელს, 90 წლისა.

ჟომინი დიდად ნაყოფიერი სამხედრო მწერალიც იყო. მან პირველმა გამოიკვლია და აღწერა საფრანგეთის ბურჟუაზიული რევოლუციისა და ნაპოლეონ I-ის ომები, მან განაწიგადა და სისტემაში მოიყვანა ომების მრავალსაუკუნოვანი ისტორიის ფაქტები და

დასკვნები და მათი ანალიზის საფუძველზე შეიმუშავა XVIII და XIX საუკუნეთა პერიოდის სამხედრო ხელოვნების თეორია. ჟომინის ნაშრომი — „უმაღლესი ტაქტიკის თეორიული და პრაქტიკული კურსი“, ტ. I, გამოქვეყნდა 1803 წელს. 1805 წელს მან ნაპოლეონს თავისი ახალი ნაშრომი წარუდგინა — „ტრაქტატი დიდი სამხედრო ოპერაციების შესახებ“. 1807 წელს გამოაქვეყნა ამ ჯერ კიდევ დაუთავრებელი ტრაქტატის დასკვნითი თავი — „სამხედრო ხელოვნების მთავარი პრინციპების შესახებ“. ამ ნაშრომმა დიდი გავლენა მოახდინა სამხედრო აზრზე და სამხედრო თეორიის მიმართ ინტერესი გამოიწვია როგორც თვით საფრანგეთში, ისე საზღვარგარეთაც. 1811—1812 წლებში იგი განაგრძობდა მუშაობას, რომ დაემთავრებინა ნაშრომი „ტრაქტატი დიდი სამხედრო ოპერაციების შესახებ“ და ნაპოლეონის პირადი დაეაღებით დასწერა მის იტალიურ ლაშქრობათა ისტორია. 1829 წელს გამოსცა „მთავარი სამხედრო კომბინაციების ანალეზური მიმოხილვა“ ორი სტატიის დართვით სახელმწიფოთა სამხედრო პოლიტიკის შესახებ. 1836 წელს მან გადაამუშავა, შეავსო და დასრულებული ნაშრომის სახე მისცა თავის „ტრაქტატს დიდი სამხედრო ოპერაციების შესახებ“, და გამოსცა ჯერ ძველი სახელწოდებით, შემდეგ კი ახალი დასათაურება მისცა — „სამხედრო ხელოვნების ნარკვევები“. 1837 წელს უკვე მზად იყო ამ „ნარკვევების“ მეორე გამოცემა. „ნარკვევების“ საბოლოო დამუშავება გამოიწვია იმ გარემოებამაც, რომ ჟომინი 1837 წელს დაინიშნა მეფის წულის მასწავლებლად სტრატეგიაში და ავტორმა გადასწყვიტა გადაექცია ეს ნაშრომი ისეთ წიგნად, რომელიც დასასწავლად გამოდგებოდა. 1837 წელს გადაამუშავებული ეს „ნარკვევები“ 1840 წელს გამოიცა. ჟომინის „ნარკვევებს“, რომელიც საუკუნეზე მეტია, რაც გამოქვეყნებულია, დღესაც არ დაუკარგავს თავისი მეცნიერული ღირებულება. ფრ. შნგელსი ჟომინის კლასიციზმთან ერთად მსოფლიო ლიტერატურის ერთ-ერთ სანიმუშო ავტორად სთვლის (იხ. Г. ЖОМИН — Очерки военного искусства“, ტ. I, თარგმნილი 1855 წლის ფრანგული გამოცემიდან, მოსკოვი, 1939 წ., გვ. 3—11).

როგორც ზემოთ მოვიხსენიეთ, ჟომინის დიდი დამსახურება მიუძღვის რუსული სანხედრო გეოგრაფიის დარგში. ჟომინი ნიკოლოზ I-ის დროს მონაწილეობას იღებდა სხვადასხვა ხასიათის სამხედრო პროექტების დამუშავებაში, რომელთაგან ჩვენთვის განსაკუთრებით საინტერესოა პროექტი უმაღლესი სამხედრო სასწავლებლის შექმნის შესახებ გენერალური შტაბის ოფიცერთა მოსამზა-

დებლად. მართლაც, მისი წინადადებით 1832 წელს დაარსებულ იქნა რუსეთის პირველი სამხედრო აკადემია (საიმპერატორო, მას 1855 წლიდან ეწოდა გენერალური შტაბის ნიკოლოზის სახელობის სამხედრო აკადემია). ეს აკადემია ერთ-ერთ თავის მიზნად იმასაც ისახავდა, რომ ხელი შეეწყო სამხედრო მეცნიერების განვითარებისათვის რუსეთში. და ბუნებრივია, რომ აქ ჩაეყარა საფუძველი სამხედრო გეოგრაფიის, როგორც მეცნიერების, განვითარებას რუსეთში.

თავის „სამხედრო ხელოვნების ნარკვევებში“ ჟომინი სამხედრო გეოგრაფიის შესახებ ამბობს, რომ იგი „მდგომარეობს ომის თეატრის ტოპოგრაფიულ და სტრატეგიულ აღწერაში ყველა იმ დაბრკოლებათა აღნიშვნით, რომელნიც შეიძლება დაუპირისპიროს ჩვენს შემართებას ხელოვნებამ და ბუნებამ, და საზღვრით ან ქვეყნის მთელი სიერციით შექმნილ მუდმივ გადაძწყვეტ პუნქტთა გამოკვლევაში. არა თუ სამინისტრო, არამედ სარდალიც და გენერალური შტაბიც უნდა იყოს ამ ცნობების კურსში. წინააღმდეგ შემთხვევაში ყველა მათი ვარაუდი მეტად მცდარი იქნება, როგორც ეს ხშირად გვემართება ჩვენს დროშიაც კი, მიუხედავად იმისა, რომ ცივილიზებულმა ხალხებმა დიდ პროგრესს მიაღწიეს სტატისტიკურ, პოლიტიკურ, გეოგრაფიულ და ტოპოგრაფიულ სამეცნიერო დარგებში“ (იხ. ჟომინის „ნარკვევები“, ტ. I, თავი II, სტატია XI, გვ. 57—58). სამხედრო გეოგრაფიის გარდა ჟომინის საჭიროდ მიანჩნია აგრეთვე სამხედრო სტატისტიკის ცოდნაც, ე. ი. მისი განმარტებით, მოწინააღმდეგის სიძლიერის ყველა ელემენტის და ყველა სამხედრო საშუალების ცოდნა. „ამ მეცნიერებათ ჯერ კიდევ სჭირდებათ განვითარება“—ამბობს ჟომინი,—„სამხედრო გეოგრაფია და სამხედრო სტატისტიკა ჯერ კიდევ არ ისწავლება საყოველთაოდ, მაგრამ ევროპის სახელმწიფოთა გენერალური შტაბების არქივებში უნდა მოიპოვებოდეს მრავალი ძვირფასი დოკუმენტი, რომელთა მიხედვითაც მოხერხდებოდა ამ მეცნიერებათა შესწავლა გენერალური შტაბებისათვის დაარსებულ სპეციალურ სკოლებში მაინც“. ჟომინი გამოთქვამს იმედს, რომ ოდესმე რომელიმე ცოდნისმოყვარე სამხედრო პირი ისარგებლებს გამოქვეყნებული და გამოუქვეყნებელი დოკუმენტებით და შექმნის საერთო ინტერესებისათვის კარგ სამხედრო და სტრატეგიულ გეოგრაფიას (იქვე, გვ. 59).

ჟომინის „ნარკვევებში“ სამხედრო ოპერაციების განხილვისა და სტრატეგიულ მოსაზრებათა გაშუქების დროს მრავლადაა მონარჯებული გეოგრაფიული მონაცემები. გეოგრაფიულ მონაცემთა



ასე უხვად წარმოდგენა და მათი გაანალიზება სტრატეგიულ მიმართებაში ხელს უწყობდა სამხედრო გეოგრაფიის ჩამოყალიბებას ცალკე სამეცნიერო დისციპლინის სახით. ჟომინის „ნარკვევების“ ორსავე ტომში (იხ. Жомини — „Очерки военного искусства“, ტ. I და ტ. II, მ. 1939 წ.) გეოგრაფიული მონაცემები წინა პლანზეა წამოწეული იმდენად, რომ ამით დაჩრდილულია სოციალ-პოლიტიკური ფაქტორები.

ჟომინის დროს რუსეთში იწყო ჩამოყალიბება ორიგინალურმა რუსულმა სამხედრო გეოგრაფიამ. პირველ რუს სამხედრო გეოგრაფად შეიძლება მივიჩნიოთ პოდპოლკოვნიკი პ. ი ა ზ ი კო ვ ი, რომელიც ჟომინის შემდეგ მუშაობდა აკადემიაში სამხედრო გეოგრაფიის კათედრაზე. იაზიკოვმა 1838 წელს გამოაქვეყნა თავისი შესანიშნავი თხზულება სამხედრო გეოგრაფიის თეორიის შესახებ (იხ. „Опыт теории военной географии“, сочинение Подполковника П. Языкова, ნაწილი I და ნაწილი II, ს.-პ. 1838 წ.), რომელშიაც მიზნად დაისახა „დაემტკიცებინა გეოგრაფიული ელემენტის ცალკე გამოკვლევის შესაძლებლობა სტრატეგიულ მოსაზრებათა მიმართებაში; აეხსნა ამ გამოკვლევის პრაქტიკული სარგებლიანობა, ე. ი. დაემტკიცებინა გამოკვლეულ ქემშარიტებათა გამოყენების შესაძლებლობა მნიშვნელოვანი პრაქტიკული საკითხების გადასაწყვეტად“ (იხ. დასახელებული ნაშრომი, ნაწილი II, გვ. 198). იაზიკოვი სამხედრო გეოგრაფიის თეორიის თავისი პირველი ცდის შესახებ თვითონვე ამბობს, რომ ეს თეორია ახლა იქმნება, მან ვერ მიაღწია ჯერ კიდევ სრულ განვითარებას, ისახება შესაძლებლობა სტრატეგიის ერთ-ერთი უმნიშვნელოვანესი ელემენტის ცალკე გამოკვლევისა, შაგრამ დადგება დრო, როცა ეს მეცნიერება თავისი განვითარების უმაღლეს საფეხურს მიაღწევს (იქვე, გვ. 199) და ის გახდება სტრატეგიული მეცნიერების ერთი ყველაზე უფრო სასარგებლო დარგი (იქვე, გვ. 200). იაზიკოვმა გეოგრაფიული მონაცემები—ქვეყნის ადგილმდებარეობა, გეოგრაფიული შედგენილობა და ზედაპირის მოყვანილობა საფუძვლად დაუდო ციხე-სიმაგრეთა განლაგების სისტემების ახსნას. არ უარყოფს-რა, რომ ციხე-სიმაგრეთა განლაგებაზე პოლიტიკური მიზეზებიც ახდენს გავლენას (იხ. მისი ნაშრომი, ნაწილი II, გვ. 9), ის მაინც გეოგრაფიულ ფაქტორებს აძლევს უპირატესობას. ამგვარად, იაზიკოვი არკვევს საკითხს—რა მონაცემებს უნდა დაემყაროს მოსაზრება ციხე-სიმაგრეთა ასაგებად გამოსადეგი პუნქტების შერჩევის დროს. იაზიკოვი ასაბუთებს უამრავი მაგალითის მოყვანით, რომ ციხე-სი-

მაგრის აგება მიზანშეწონილია მხოლოდ ისეთ პუნქტებში, რომელთა აღება საგრძნობ გავლენას მოახდენს სამხედრო მოქმედებაზე, მაშასადამე, ეს პუნქტები სტრატეგიული მნიშვნელობის უნდა იყოს. ამავე დროს იაზიკოვს ისიც კარგად ესმის, რომ ამ პუნქტების სტრატეგიული მნიშვნელობაც ყოველთვის ერთნაირი არ არის (იქვე, გვ. 3—11).

3. იაზიკოვი არ იზიარებდა გერმანელ სამხედრო გეოგრაფთა შეხედულებებს სამხედრო გეოგრაფიაზე. იგი შენიშნავს, რომ 1832 წლიდან აკადემიაში სამხედრო გეოგრაფია ისწავლებოდა გერმანელ სამხედრო გეოგრაფთა სისტემით, მაგრამ გენერალმა სუხოზანეტმა (აკადემიის პირველმა დირექტორმა) ეს სისტემა ჯარადამაკმაყოფილებლად მიიჩნია და ბრძანა, რომ სამხედრო გეოგრაფიის ნიმუშებად აეღოთ იტალიის სამხედრო-გეოგრაფიული მიმოხილვა, შესრულებული მონტოლონის მიერ, და ომის თეატრის აღწერა, შედგენილი ერცჰერცოგ კარლის მიერ. იაზიკოვმაც აიჩნია ამ სისტემით მუშაობა, რომელიც, მისი აზრით, გერმანული სისტემისაგან იმით განსხვავდებოდა, რომ გერმანელთა თხზულებებში გადმოცემული იყო ერთი მხოლოდ აღწერა გეოგრაფიულ საგანთა მაშინ, როდესაც მონტოლონისა და ერცჰერცოგ კარლის მიხედვით აღწერას ერთვის გამოკვლევა და გეოგრაფიულ საგანთა მნიშვნელობის ახსნა სამხედრო თვალსაზრისით. იაზიკოვის კვლევის წესს ცალკე გავეცნობით (იხ. წინამდებარე ნაშრომის 50—51 გვ.). აქკი აღენიშნავთ შემდეგს: იაზიკოვს აფიქრებს ის გარემოება, რომ ასეთი მეცნიერება არ შეიძლება იყოს „უცვლელი“, რადგან ბუნებრივი გეოგრაფიული საგნების გარდა, როგორცაა ზღვები, ქედები, მდინარეები, მას აქვს ხელოვნური გეოგრაფიული საგნებიც—ნავსადგურები, არხები, გზები, ქალაქები, რის გამოც მისი დასკვნები მართებული იქნება მხოლოდ მოცემული ისტორიული ხანისათვის. იაზიკოვი ცდილობს, რომ სამხედრო გეოგრაფია იყოს არა აღწერილობითი, არამედ კვლევა-ძიებითი მეცნიერება, იქცეს სტრატეგიის დარგად, რომელიც შეიცავს ზუსტ მეცნიერებათათვის დანახასიათებელ ცხად ქეშმარიტებებს. იაზიკოვის შეხედულებით სამხედრო გეოგრაფია არის დედამიწის ზედაპირის გამოკვლევა სტრატეგიული მხრივ თანამედროვე ხანაში და სამხედრო გეოგრაფიის თეორია არის გეოგრაფიული ელემენტის ზოგადი გამოკვლევა სტრატეგიული თვალსაზრისით (იხ. А. Снесарев—„Введение в военную географию“, 2. 1924 წ., გვ. 306—308).

### III

## სამხედრო გეოგრაფია, როგორც მეცნიერება

სამხედრო გეოგრაფიის, როგორც მეცნიერების, ჩამოყალიბება.— დიმიტრი ალექსის-ძე მილუტინი, როგორც სამხედრო გეოგრაფიის ფუძემდებელი.— დ. ა. მილუტინის ცხოვრება და მოღვაწეობა.— დ. ა. მილუტინის სამხედრო-გეოგრაფიული კონცეპცია.— სამხედრო გეოგრაფია და სამხედრო სტატისტიკა.

სამხედრო გეოგრაფიის ჩასახვას რუსეთში, ცხადია, შედეგად უნდა მოჰყოლოდა მისი, როგორც მეცნიერების, ჩამოყალიბებაც. სამხედრო გეოგრაფიას, როგორც მეცნიერებას, მტკიცე საფუძველი ჩაუყარა დიმიტრი ალექსის-ძე მილუტინმა. დ. ა. მილუტინი, სრულიად სამართლიანად, სამხედრო გეოგრაფიის ფუძემდებლად არის მიჩნეული. ამიტომაც განსაკუთრებულ ინტერესს იწვევს ჩვენში მისი გაცნობა, რასაც შედარებით მეტი დრო და ადგილი ეთმობა წინამდებარე ნაშრომში.

ვიდრე გავეცნობოდეთ დ. ა. მილუტინს, როგორც სამხედრო გეოგრაფს, საჭიროა თუნდაც ზოგადად გადავავლოთ თვალი მის ცხოვრებასა და შემოქმედებას. ეს ხელს შეგვიწყობს გამოვავლინოთ მილუტინის ადგილი და როლი რუსულ მეცნიერებაში საერთოდ და კერძოდ სამხედრო-გეოგრაფიული აზროვნების სფეროში. დ. ა. მილუტინის შესახებ მდიდარ ბიოგრაფიულ ცნობებს გვაწვდიან პროფ. ა. პ. ლიდოვი და პოდპოლკოვნიკი ნ. პ. ჟერვეაი, მთავარი შტრიხები მილუტინის ცხოვრება-მოღვაწეობიდან.

დ. ა. მილუტინი დაიბადა 1816 წელს. 23 წლის კაბუკმა მილუტინმა სამხედრო აკადემია დაამთავრა (1839 წელს) და ამ დროიდან იგი 5 წლის განმავლობაში მსახურობდა კავკასიის ჯარებში (1839—1844 წლებში). 1839 წელს მან მონაწილეობა მიიღო დალისტანში შაჰის წინააღმდეგ ბრძოლებში, 1844 წ. ისევ ჩაჩნეთსა და დალისტანში იმყოფებოდა. 1845 წლიდან მილუტინი დაინიშნა სამ-

ხედრო აკადემიის პროფესორად სამხედრო გეოგრაფიის კათედრაზე (იაზიკოვის შემდეგ) და აქ მან 11 წელი დაჰყო. 1856 წლიდან გენერალ ალექსანდრე ივანეს-ძე ბარიატინსკის სურვილით დაინიშნა კავკასიის არმიის მთავარი შტაბის უფროსად. გენერალი ბარიატინსკი სწორედ 1856 წლიდან ჩაუდგა სათავეში კავკასიას, როგორც მეფის ნაცვალს და კავკასიის არმიის მთავარსარდალს, და მის დროს მისი უშუალო ხელმძღვანელობითა და მონაწილეობით დასრულდა აღმოსავლეთ კავკასიის—დაღისტანისა და ჩაჩნეთის სრული დაპყრობა (1859 წ.), რამაც გადაწყვიტა კავკასიის 65-წლიანი ომის დასრულება, რაც ხუთიოდე წლის შემდეგ მოხდა (1864 წ.). ამ დიდი სამხედრო ოპერაციებისათვის მას, ცხადია, მოუხდებოდა კავკასიის არმიის სათანადოდ მომზადება, მარჯვე სტრატეგიულ ღონისძიებათა დასახვა და შესაფერი ტაქტიკის გამომუშავება მაღალმთიან, ბუნებით მიუდგომელ და უგზო კავკასიონზე ბრძოლების წარმატებით ჩასატარებლად. ამისათვის საჭირო იყო გამოცდილი თანამებრძოლის გამონახვა. და ბარიატინსკის არჩევანი მილუტინზე შეჩერდა. ამის შესახებ სამხედრო ისტორიკოსი ბ. ს. ესაძე თავის „საქართველოს მატეიანეში“ სწერს: „კარგად იცნობდა-რა კავკასიას, მან (ბარიატინსკიმ—დ. დ.) დააწესა პოსტი ჯარების სარდალთა, რომელნიც ალქურვილნი იყვნენ საკორპუსო სარდლის უფლებებით, და აირჩია თავის თანაშემწედ გენერალი მილუტინი, რომელმაც განავითარა მხარეში, ბარიატინსკის იდეის მიხედვით, სამხედრო მართველობის სისტემა (იხ. В. С. Мсадзе — „Летопись Грузии“, თბილისი 1913 წ., სტატია — „Окончание войны с кавказскими горами“, გვ. 230). მილუტინი 1859 წელს მონაწილეობდა გუნიბის აღებაში, სადაც ტყვედ იქნა შეპყრობილი ცნობილი შამილი. 1860 წელს მილუტინი დაინიშნა სამხედრო მინისტრის ამხანაგად, მომდევნო 1861 წელს კი სამხედრო მინისტრად და ამ პოსტზე დარჩა ოც წელიწადს (1861—1881 წლებში). 1878 წელს მას მიანიჭეს გრაფის წოდება ომის დროს გაწეული შრომისათვის, ხოლო 1898 წელს გენერალ-ფელდმარშალის უმაღლესი სამხედრო წოდება მიიღო. მილუტინი იყო სახელმწიფო საბჭოს წევრი, საპატიო პრეზიდენტი გენერალური შტაბის აკადემიისა და სამხედრო-იურიდიული აკადემიისა, საპატიო წევრი მეცნიერებათა აკადემიისა და საარტილერიო, საინჟინერო და სამედიცინო-ქირურგიული აკადემიებისა, მოსკოვისა და ხარკოვის უნივერსიტეტებისა, დაავადებულ და დაჭრილ მეომართა მზრუნველი საზოგადოებისა. რუსეთის საიმპერატორო გეოგრაფიული საზოგადოებისა. რუსეთის სამხედრო-ისტორიული საიმპერატორო საზო-

გადოებისა, რუსეთის ისტორიისა და სიძველეთა ოდესის საზღვისა. 1866 წელს პეტერბურგის უნივერსიტეტმა მას მიანიჭა რუსეთის ასტორიის დოქტორის სამეცნიერო ხარისხი honoris causa.

მილუტინი იმპერატორ ალექსანდრე II-ის ერთ-ერთი უახლოესი, უაღრესად ენერგიული და დამსახურებული თანამშრომელი იყო. ადმინისტრაციული მოღვაწეობის დაწყებიდანვე და სამხედრო მინისტრად ყოფნის დროს რუსეთის განახლების მედგარ, დარწმუნებულ მებრძოლად არის მიჩნეული. იგი ახლო კავშირში იყო საკმაოდ ფართო სამეცნიერო-სალიტერატურო წრეებთან, საზოგადოების გამოჩენილ წარმომადგენლებთან. სამხედრო სამინისტროს ამოცანები მის დროს მეტად რთული იყო: უნდა მომხდარიყო არმიის მთელი წყობისა და მართვა-გამგეობის რეორგანიზაცია, სამხედრო ყოფის ყველა მხარე გარდაქმნას მოითხოვდა, რადგან იგი ცხოვრების მოთხოვნილებებისაგან კაი ხანია ბევრად იყო ჩამორჩენილი. ხალხისათვის მეტად სამძიმო სარეკრუტო ვალდებულების ძირითადი რეფორმის მოლოდინში, მან გამოითხოვა უმაღლესი ბრძანებულება სამხედრო სამსახურის ვადის შესამცირებლად—25 წლიდან 16 წლამდე—და სხვა შეღავათები, ხოლო რეფორმის შემდეგ სამსახურის ვადა ძალზე შეამცირა: ხმელეთის ჯარში ნამდვილი სამსახურისათვის დაწესდა ვადა 6 წელი, მარჩაფში 9 წელი, ფლოტში კი შესაბამისად 7 და 3 წელი.

სამხედრო სამსახურის ვადების შემცირებას დიდი მნიშვნელობა ჰქონდა რუსეთის სოციალ-პოლიტიკური და ეკონომიური მდგომარეობის გაუმჯობესებისათვის. მაგრამ არანაკლებ დიდი მნიშვნელობა ჰქონდა ამ მხრივ ერთ უაღრესად გონივრულ და სამართლიან ღონისძიებას, რომელიც მილუტინმა რუსეთის სამხედრო ცხოვრებაში გაატარა: მან 1874 წლიდან შემოიღო საყოველთაო სამხედრო ბეგარა. საზოგადოების მაღალი კლასები, აღზრდილნი პრივილეგიებზე, ამ რეფორმით ძლიერ უკმაყოფილო დარჩნენ. ვაჟები, მაგალითად, აცხადებდნენ—ოღონდ სამხედრო ბეგარისაგან გაგვათავისუფლეთ და მზად ვართ ჩვენს ხარჯზე შევიწახოთ ინვალიდებიო.

მილუტინმა მთელი რიგი ზომები მიიღო ჯარისკაცთა საყოფაცხოვრებო პირობების გასაუმჯობესებლად, მან დიდი მზრუნველობა გამოიჩინა არა მარტო ჯარისკაცთა უზრუნველყოფისათვის კვებისა და შემოსვის მხრივ, არამედ, რაც მთავარია, ჯარისკაცის პიროვნების დასაცავად მისთვის დამამცირებელ დამოკიდებულებათაგან. მან აკრძალა ჯარისკაცის ხელით შეხება. მისი გავლენით გამოიკა

1863 წლის 17 აპრილის კანონი, რომლითაც აიკრძალა მკაცრი სისხლის სამართლის სასჯელი—შპიცრუტენები (შპიცრუტენი მოქნილი წკებლაა, სიგრძით 2 მეტრამდე; მსჯავრდადებულს, თოფზე მიბმულს, ნელი ნაბიჯით—ან თუ ძალღონე გამოეღოდა, ერთგვარ მარხილზე დადებულს—გაატარებდნენ ორპირად გააწკრივებულ ჯარისკაცთა რიგებში. რომელთაგან თითოეულს ევალებოდა სახრესავით გადაეჟირა მისთვის წკებლა და დაერთყა გაწიშვლებულ ზურგზე ან მკერდზე. დარტყმის რაოდენობა განისაზღვრებოდა რამდენიმე ასეულიდან 12000-მდე. 3000-ზე მეტ დარტყმას, როგორც წესი, მოსდევდა დასჯილის აუცილებელი სიკვდილი. ამგვარად, შპიცრუტენით დასჯა ხშირად სიკვდილით დასჯის წინიღბეას წარმოადგენდა. შპიცრუტენით დასჯა გადმოღებულ იქნა რუსეთში პრუსიიდან 1701 წელს. ამ წესით ისჯებოდა ჯარისკაცი სამხედრო, რელიგიური და პოლიტიკური დანაშაულისათვის, მეტადრე ჯარისკაცთა, გლეხთა და მუშათა მღელვარებაში მონაწილეობისათვის. დასჯის ეს მხეცური, პრუსიული წესი 1863 წლამდე არსებობდა რუსეთში). აიკრძალა აგრეთვე ჯარისკაცის გამათრახება, როზგები, დადალვა, ეტლზე მიბმულის თრევა და ჩისთანანი. მილუტინი ჯარისკაცის ჰუმანური აღზრდის მომხრე იყო.

ეს კიდევ არაფერი. მილუტინი რუსეთის განახლების საქმეს მკიდროდ აკავშირებდა სწავლა-განათლების გავრცელების საქმესთან. აღსანიშნავია, რომ იგი გულუხვად აძლედა შეღავათებს იმ სამხედრო ვალდებულთ. რომელნიც სწავლა-განათლების ფერხულში იყენენ ჩაბმულნი. შეღავათის ხანგრძლივობა მატულობდა განათლების ხარისხთან ერთად და ნამდვილი სამსახურის ვადა განისაზღვრებოდა 4 წლიდან 6 თვემდე (ნაცვლად 6—7 წლისა). მოსწავლეთათვის შეღავათების მიცემის საკითხში მილუტინის შეურიგებელი მოწინააღმდეგე იყო თვით სახალხო განათლების მინისტრი გრაფი დიმიტრი ანდრეას-ძე ტოლსტოი (1823—1889 წლებში), რომლის წინადადებით უდიდესი შეღავათი 1 წლით უნდა განსაზღვრულიყო (ეს ის ტოლსტოია, რომელმაც სახალხო განათლების დარგში თავი ისახელა თავისი კონსერვატიულობით და რეაქციონერობით და ისტორიაში რეაქციის ერთ-ერთი დედაბოძის სახელი დაიწახსურა). მაგრამ მილუტინმა ტოლსტოის წინააღმდეგობა სძლია და თავისი თვალსაზრისი გაატარა შეღავათების დაწესების საქმეში.

მილუტინმა განსაკუთრებული ყურადღება მიუქცია ვანაოლებს გავრცელების საკითხს სამხედრო წესდებაშიაც. მის დროს პისი ნოთხოვნით დაიწყო რუსეთში პირველად წერა-კითხვის სწავლება ჯარის-

კაცთათვის. ცნობილია, რომ მაშინ სამსახურში შესულ რეკრუტთა საერთო რიცხვიდან მხოლოდ 10% იყო წერა-კითხვის მცოდნე, ჯარისკაცს წერა-კითხვას არ ასწავლიდნენ, მისი გონებრივი განვითარება ყოველმხრივ იზღუდებოდა. თვით ოფიცერთა შედგენილობაშიაც ცოტა როდი იყო ისეთი, რომელსაც ძლივს-ძლივობით შეეძლო მხოლოდ თავისი სახელისა და გვარის მოწერა ქალაღზე. მილუტინის ინიციატივით დაიწყო საკითხავი წიგნებისა და ჟურნალების გამოცემა ჯარისკაცთათვის. სამხედრო სწავლებაც დიდად განვითარდა მის დროს. გაფართოვდა სამხედრო სკოლების ქსელი, გადახალისდა საშუალო და უმაღლესი სამხედრო სკოლები, გარდაიქმნა სწავლების მოძველებული პედაგოგიური ხერხები. პირველად მილუტინმა შემოიღო სამხედრო სტატისტიკა აკადემიის კურსში (ე. ი. დისციპლინა, რომელიც, მისი გაგებით, შეისწავლის სახელმწიფოს, როგორც პოლიტიკური სხეულის, რთული ორგანიზმის ნაირგვაროვან მოვლენებს, მის ძალებსა და საშუალებებს სამხედრო თვალსაზრისით, აქ მილუტინი გეოგრაფიულ მონაცემებსაც გულისხმობს). მილუტინმა გააფართოვა სამხედრო სკოლებში ზოგადი განათლების პროგრამა, იგი ათავისუფლებდა სამხედრო სკოლებს ნაადრევი სამხედრო სპეციალიზაციის დანერგვისაგან. ამ ღონისძიებათა ცხოვრებაში გატარებამ აამაღლა რუსი ოფიცრობის გონებრივი დონე, ოფიცრად განწესებისათვის მათ გაცილებით მეტი მოთხოვნილება წაუყენეს ახლა მეცნიერული მომზადების მხრივ.

საუკეთესო მოგონებები აქვს მილუტინის დროის სამხედრო გიმნაზიების შესახებ ჩვენს მწერალს დავით კლდიაშვილს. მისი აზრი ამ საკითხზე მეტად საყურადღებოა, რადგან, როგორც ცნობილია, დავით კლდიაშვილმა თვითონ გაატარა თავისი ბავშვობა და სიცოცხლე ერთ-ერთ ასეთ სამხედრო გიმნაზიაში—მან სწავლა-აღზრდა კიევის სამხედრო გიმნაზიაში მიიღო, სადაც იგი მიაბარეს 9 წლის ბავშვი 1872 წელს. აი, რას ამბობს იგი თავის მემუარებში: „კორპუსი, ძველი სალდათური კორპუსი, ის იყო მოშალეს, გადააკეთეს სხვანაირად, დაარქვეს სამხედრო გიმნაზია; ჩამოაცალეს ყოველი მხედრული, გარდა ტანისამოსის ფორმისა; სწავლა იყო რეალურ სასწავლებლის პროგრამის, შეიდკლასიანი, ახალი ენებით, ნაცვლად ლათინური და ბერძნულისა. აღმზრდელები უმეტეს ნაწილად შტატსკეზი იყვნენ, უმაღლეს სწავლა მიღებულნი. მასწავლებელთა შორის ბევრი იყვნენ კიევის უნივერსიტეტის პროფესორები. ეს იყო ცნობილი, ევრეტწოდებული მილუტინის სამხედრო გიმნაზია... კარგ დროს მოუხვედი ჩემდა იღბლად კიევის გიმნაზიაში; ყველაფერი . ლიბერალურ

გეგმაზე იყო მონარტული: სამხედრო მინისტრმა მილუტინმა სულ გადაასხვაფერა წინანდელი კორპუსები, სწავლა მალა დააყენა და კაზარმობა გამოდენა... ჩვენი მასწავლებლები კიევის საუკეთესო პედაგოგები იყვნენ, მოწინავე ჯგუფისა; ბევრი მათგანი პროფესორებიც იყვნენ უნივერსიტეტიდან... მოსწავლეთა და მასწავლებელთა შორის დიდი ნდობა და კეთილი განწყობილება სუფევდა. ბავშვებს გვასწავლიდნენ მუსიკას, ღურგლობას, წიგნის აკონძეას, ყდის კეთების, ხარატობას, ჩუქურთმას. ყოველ კლასს ჰქონდა თავისი სიმებიანი ორკესტრი—და ვუკრავდით სხვადასხვა ოპერიდან... მოქცევა-მოპყრობა ნამდვილი კეთილშობილური იყო. არავითარ შეურაცხყოფას მოსწავლისას ადგილი არ ჰქონია; ყველაფერი მიმართული იყო იმისაკენ, რომ ბავშვს მიეღო ნამდვილი განვითარება. ამ გიმნაზიებმა დიდხანს ვერ გასტანეს. ალექსანდრე მესამის მეფობის მესამე წელიწადსვე გადააკეთეს ძველებურ ყაიდაზე, კორპუსებად; შემოიღეს სამხედრო წყობილება, არამხედრობაში მოსამსახურეს ადგილი არ ჰქონდა, ბავშვები იყვნენ ეფრეიტორები, უნტერ-ოფიცრები, ფელდფებლები და ანგვარები. თუთხმეტი წელიწადი არსებობდა „მილუტინის სამხედრო გიმნაზიები“, მაგრამ თავისი კვალი ძლიერ დააჩინა რუსეთის სამხედრო ოფიცერთა შემადგენლობას. რაც მოწინავე და ლიბერალური შეხედულების აფიცრობა იყო—ეს ამ გიმნაზიებიდან გამოსულები იყვნენ“ (იხ. დავით კლდიაშვილი— „მემუარები“, თბ. 1932 წ. გვ. 23, 28, 29, 30).

დ. ა. მილუტინი არა-სამხედრო ხაზითაც პროგრესიულად მოაზროვნე მოღვაწე იყო. მაგალითად, იგი მოითხოვდა, რომ ერობებს (ადგილობრივი თვითმართველობის ორგანოს) მეტი უფლებები და მეტი დამოუკიდებლობა მისცემოდათ. მხარს არ უჭერდა ზმონების (ქალაქის სათათბიროს წევრების) წოდებრივობის მიხედვით არჩევის შემოღებას და აზნაურთა ელემენტის გადაშეცვლას არჩეულებში, დაუინებით მოითხოვდა, რომ თვით საერობო, სამაზრო და საგუბერნიო კრებას აერჩია თავისი თავმჯდომარეები. სასამართლოს წესდებათა განხილვის დროს ყოველმხრივ უჭერდა მხარს რაციონალური მოსამართლეობის საფუძვლების გატარებას. 1865 წლის ბექდვითი კანონი მკაცრად გააკრიტიკა, — უხერხულად სცნობდა, რომ ერთ დროულად არსებობდნენ ორი რიგის გამოცემები: ერთი ისეთი, რომელსაც ეცხებოდა წინასწარი ცენზურა, მეორე ისეთი, რომელიც ამ ცენზურისაგან გათავისუფლებული იყო. წინააღმდეგ იმ ღონისძიების გატარებას, რომ ბექდვითი საქმე შინაგან საქმეთა მინისტრს დაუმორჩილეს, და მოითხოვდა, რომ ბექდვითი საქმის საკითხე-



ბი დაკისრებოდა კოლეგიალურ და საესებით დამოუკიდებელ დაწესებულებას.

საერთოდ დ. ა. მილუტინის მოღვაწეობა დაემთხვა რუსეთში 50-იანი წლების რევოლუციურ მოძრაობას და რევოლუციური სიტუაციის მომწიფების ხანას, ყირიმის ომის მარცხით დამთავრებას, რომელმაც საოცარი სიცხადით გამოაქვლავნა რუსეთის ტექნიკურ-ეკონომიური და პოლიტიკური ჩამორჩენილობა და აამოძრავა გლახობა და საზოგადოებრივი აზრი ბატონყმური მონარქიის წინააღმდეგ, პრივილეგიური საზოგადოების წრეებში ლიბერალური მიმართულების ჩასახვას, რომელიც ბატონყმობას ებრძოდა. მაგრამ რევოლუციას, მასების მოძრაობას უფრთხოდა და მხარს უჭერდა მონარქიას, მემბულეთა ხელისუფლებას, სურდა „გაეთავისუფლებინა“ რუსეთი „ზემოდან“ და ამით გადაერჩინა დაშლისაგან მეფის მონარქია, ალექსანდრე II-ის დროის რეფორმების გატარებას, 1861 წლის გლახთა რეფორმას, 60-იანი წლების რევოლუციურ მოძრაობას, იშუტინელი დ. ვ. კარაკოზოვის მოუხერხებელ თავდასხმას ალექსანდრე II-ზე და „თეთრი ტერორის“ გაბატონებას, პოლონეთის აჯანყებას, 1863—1874 წლების რეფორმების მომზადებასა და გატარებას, რომლის მიზანიც იყო შეეხამებინა რუსეთის თვითმპყრობელურ-პოლიციური წყობილება კაპიტალისტური განვითარებისათვის, მისი აზნაურულ-მემამულური არსის შენარჩუნებით. ამ მრავალმხრივ საყურადღებო ხანაში დ. ა. მილუტინი და მისი ძმა ნიკოლოზ ალექსის-ძე მილუტინი (1818—1872 წ.წ.)—ფარაო განათლებისა და დიდი ენერჯის მქონე მოღვაწე, რომელსაც ღრმად სწამდა რუსეთის სოციალ-პოლიტიკური წყობილების შეხამების აუცილებლობა ბურჟუაზიული განვითარების მოთხოვნილებებთან, სამეურნეო სტატისტიკის დარგში თვალსაჩინო სპეციალისტი, გლახთა რეფორმის მომზადებისა და გატარების ერთ-ერთი უდიდესი ფიგურა, — რუსეთის ისტორიის ფონზე გვესახებიან, როგორც ლიბერალი მოაზროვნენი<sup>1</sup> (იხ. ამის შესახებ დაწვრილებით — „История СССР“, ტომი II, რუსეთი

---

<sup>1</sup> დ. ა. მილუტინის უმცროსი ძმა ვლადიმერ ალექსის-ძე, რომელსაც აქ, ამ თემასთან უშუალო კავშირში, ვერ ვეცნობით, დიდი ნიჭით დაჯილდოვებული სწავლული ეკონომისტი და მწერალი იყო (1826—1855 წ.წ.). მას დიდი ღვაწლი მიუძღვის რუსეთის საიმპერატორო გეოგრაფიული საზოგადოების წინაშე. ამ საზ-ბის ნამდვილი წევრი გახდა იგი 1848 წლიდან, მისი მდივანი 1852 წლიდან, მუშაობდა საზ-ბის სტატისტიკის განყოფილებაში, შემდეგ საზ-ბის „მოამბის“ რედაქტორიც იყო. მის ხელში „მოამბის“ პროგრამა გაფართოვდა და გაზინაარ-

XIX საუკუნეში, პროფ. ნეჩკინას რედაქციით, ნ. :940 წ., თავები XXI—XXV, გვ. 383—481).

აი, რა საგულისხმო სტრიქონებს ვკითხულობთ ისტორიაში დ. ა. მილუტინის შესახებ: „ალექსანდრე II-ის მეფობის მეორე ნახევრის რეაქცია ყველაზე უფრო ნაკლებ შეეხო სამხედრო სკოლას. ყირიმის ომის გამოცდილებამ დაგვანახა ოფიცერთა კადრის მომზადების სრული უვარგისობა და გამოიწვია სამხედრო განათლების ძირითადი გარდაქმნა... ლიბერალური სამხედრო მინისტრის ხელმძღვანელობით განვითარებაში მყოფი სამხედრო გიმნაზიები ბევრი სიკეთით გამოირჩეოდნენ ტოლსტოის მიერ დამახინჯებული კლასიკური ვიმნაზიებისა და რეალური სასწავლებლებისაგან, როგორც თავისი სასწავლო გეგმით, ისე სწავლების დაყენებით, რომელიც თავისუფალი იყო აზრის ჩამკვლელი რეგლამენტაციისაგან. ეს გარემოება იზიდავდა მათკენ საუკეთესო პედაგოგიურ ძალებს და ხდიდა მათ პროგრესიული პედაგოგიური აზრის ცენტრებად“ („История СССР“, ტ. II, გვ. 478—479). მართლაც, სამხედრო გიმნაზიების სახით მილუტინმა რეალური განათლების მთელი სისტემა შექმნა, წინააღმდეგ „კლასიციზმისა“, რომელსაც მაშინ ტოლსტოი ნერგავდა (ნ. ბ. ჟერვე). მილუტინი დიდი შრომისმოყვარე იყო. მას ეკუთვნის შემდეგი საგულისხმო აზრი შრომასა და დასვენებაზე: „სულ არაა საჭირო ისვენებდე უსაქმოდ. საჭიროა მხოლოდ სამუშაოს შეცვლა, და ეს საკმარისია. ძველს შეწყვეტილ სამუშაოს დაუბრუნდები განახლებული ძალებით“. ინტერეს მოკლებული არ იქნება მოვიგონოთ ბისმარკის აზრი მის შესახებ: „ხელმძღვანელ მინისტრად, რამდენადაც ასეთი შეიძლება ჰყავდეს ახლა რუსეთს, გახდა მილუტინი“ (ჟერვე). მილუტინს საშინაო პოლიტიკაში მნიშვნელოვანი რეფორმების გატარება ჰქონდა განზრახული, მაგრამ ალექსანდრე II-ის მოკვლის შემდეგ დაწყებული რეაქციის პირობებში ყველა ამ რეფორმის პროექტი არქივს ჩაბარდა. 1881 წლიდან მილუტინს მოუხდა პოლიტიკური მოღვაწეობისაგან ჩამოშორება.

მილუტინის დახასიათებას გვინდა დაეუმატოთ ერთი შტრიხიც, რომელიც ნათელ სხივად ეფინება მის, როგორც მხედრის, ხსოვნას:

სიანდა, იქ თავსდებოდა მასალა არა მარტო რუსეთის შესახებ. არამედ პოვლი დედამწიფისმცოდნეობის შესახებაც.

საერთოდ სამივე აქ დასახელებული ძმა გეოგრაფიული საზოგადოების აქტიური წევრები იყვნენ. მილუტინის მესამე ძმაც—ბორის ალექსის-ძე (1831—1888), რომელიც სამხედრო იურისტი და მწერალი იყო და მოღვაწეობდა ალმათაელთა ციმბირში, თანამშრომლობდა გეოგრაფიული საზოგადოების „ვიანტეში“ (1876 წ. ტ. XII).

მილუტინის აზრით „ომი გარდუვალი ზოროტებაა, რომელიც სასურველია, იყოს რამდენადაც შეიძლება ნაკლებად მკაცრი კაცობრიობისათვის, და ამიტომ არაა აუცილებელი შემოვიღოთ ისეთი მონაკვდინებელი საშუალებანი, რომელნიც მხოლოდ აძლიერებენ ადამიანთა უბედურებას და სატანჯველს და სრულიად უსარგებლონი არიან ომის პირდაპირი მიზნისათვის“, ან კიდევ: „იარაღი ხმარებულ უნდა იქნას იმისათვის, რომ მტრის არმია დავასუსტოთ. სრულიად საკმარისია, თუ ხალხის დიდი რაოდენობა მტერს მწყობრიდან გამოუყვას; მაგრამ ველურობა იქნებოდა გაგვეძლიერებინა დაპრალთა ტანჯვა, რომელნიც მწყობრიდან გამოდიან. მებრძოლმა ნხარეებმა არავითარ შემთხვევაში არ უნდა დაუშვან იმაზე მეტი ზოროტება, რამდენიც საჭიროა მიზნის მისაღწევად. ყოველი ტანჯვა და ყოველი ზარალი, რომელნიც არ ასუსტებენ მოწინააღმდეგეს, უსარგებლოა და არც უნდა იქნას დაშვებული“ (იხ. С. Кузнецов — „Война в мнениях передовых людей“, ს.-პ. 1904 წ., გვ. 39 და 260).

სამხედრო-საბრძოლო, საპროფესორო-სამეცნიერო და სახელმწიფოებრივი მოღვაწეობის გარდა დ. ა. მილუტინი ნაყოფიერი მწერალიც იყო.

დ. ა. მილუტინს ბევრგვარი ნაშრომი აქვს გამოქვეყნებული სამხედრო გეოგრაფიიდან და სამხედრო ისტორიიდან, სახელდობრ: 1) სახელმძღვანელო ადგილის აგეგმვისათვის, რომელიც მან ჯერ კიდევ 16 წლისამ შეადგინა და გამოსცა (1832 წელს); 2) სტატიები სამხედრო და მათემატიკური დარგებიდან, მოთავსებული ა. ა. პლუშარის ენციკლოპედიურ ლექსიკონში და ზედღერის სამხედრო-ენციკლოპედიურ ლექსიკონში; 3) გუვიონ სენ-სირის წერილები, თარგმნილი ფრანგულიდან; 4) სტატია—სუვოროვი, როგორც სარდალი; 5) ღარიგება—როგორ დავიკავოთ, დავიცვათ და შეტრევით ავიღოთ ტყეები, ნაგებობანი, სოფლები და სხვა ადგილობრივი საგნები; 6) სამხედრო გეოგრაფიისა და სტატისტიკის მნიშვნელობის კრიტიკული გამოკვლევა; 7) პირველი ცდანი სამხედრო სტატისტიკისა— 2 ტომად, რომლისათვისაც მას მეცნიერებათა აკადემიამ დემილოვის პრემია მიუსაჯა; 8) ირდ. დაღისტანში 1839 წელს წარმოებულ სამხედრო მოქმედებათა აღწერა,—ეს ნაშრომი ითარგმნა გერმანულ ენაზე; 9) სუვოროვის იტალიური ლაშქრობის შესახებ; 10) იმპერატორ პავლე I-ის ნეფობის დროს 1799 წლის რუსეთსა და საფრანგეთს შორის წარმოებულ ომის ისტორია—5 ტომად,—ეს ნაშრომი რამდენიმე წლის შემდეგ მეორეჯერაც გამოიცა. ამ ნაშრომისათვის

მეცნიერებათა აკადემიამ მას დემიდოვის სრული პრემია მიჰსაჯა და აირჩია აკადემიის წევრ-კორესპონდენტად; შემდეგ კი აკადემიის საპატიო წევრად აირჩიეს იგი. ეს ნაშრომი ფრანგულ და გერმანულ ენაზედაც ითარგმნა.

დ. ა. მილუტინი გარდაიცვალა ღრმა მოხუცებულობაში—96 წლისა, 1912 წელს, 26 იანვარს, დაკრძალულ იქნა მოსკოვს, ნოვო-დევიჩის მონასტერში, 1 თებერვალს.

მილუტინის ცხოვრება-მოღვაწეობის ეს ზოგადი ცნობებიც ნათლად მოწმობს, რომ დ. ა. მილუტინი არა მარტო თანამედრობრივი მდგომარეობით და მასთან დაკავშირებული პრაქტიკული საქმიანობით, არამედ სამწერლო დარგშიაც სამხედრო სფეროს ეკუთვნის, და, რადგან მისი მოღვაწეობის პერიოდი სამხედრო სარბიელზე დაემთხვა უდიდეს ძვრათა ხანას სამხედრო და სამოქალაქო ცხოვრებაში, ამიტომ მისი მოღვაწეობაც მრავალმხრივობითა და მალანაყოფიერებით ხასიათდება. მაგრამ ჩვენთვის კიდევ უფრო საყურადღებოა საქმის ის მხარე, რომ მილუტინი საღი პროგრესიული მოაზროვნეა. აქ გვაგონდება, ერთი შეხედვით უბრალო, მაგრამ საქმეში ჩაბედული პირისათვის მეტად არსებითი ფაქტი, რომ მილუტინის ძირითად მეთოდოლოგიურ ნაშრომში „სამხედრო გეოგრაფიისა და სამხედრო სტატისტიკის მნიშვნელობის შესახებ“ გამოცხადებული ჰპოვა გენერალ კარლ ფონ-კლაუზევიცის საღი ფილოსოფიურმა შეხედულებებმა ომის გამომწვევი მიზეზების შესახებ. კლაუზევიცი — ბურჟუაზიული სამხედრო თეორიის მწვერვალი, როგორც მას სამართლიანად უწოდებენ, თავის შესანიშნავ ფილოსოფიურ ნაშრომში „ომის შესახებ“ სხვა ბურჟუაზიულ თეორეტიკოსთაგან განსხვავებულ აზრებს წერგავდა ომის შესახებ და იძლეოდა ომის ახლებურ ფილოსოფიურ გაგებას. ამ ნაშრომზე ფრ. ენგელსი 1868 წელს სწერდა—„მე ვკითხულობ ახლა კლაუზევიცის ნაშრომს ომის შესახებ, ფილოსოფიური მსჯელობის თავისებური ხერხია, მაგრამ არსებითად მეტად კარგია“. რადგან ჩვენ მხედველობაში გვაქვს კლაუზევიცის მილუტინზე გავლენის სწორედ ეს მხარე, ზედმეტი არ იქნება განვმარტოთ ეს საკითხი. ცნობილია, რომ ბურჟუაზიული თეორეტიკოსების აზრით ომი ადამიანის ბუნების თანდაყოლილი თვისებაა, ამდენად იგი მარადიულია და გარდუვალი, ომები იქნება მანამ, სანამ არსებობს სამყარო. აი, მაგალითად, მოვუსმინოთ კანტს: „ომი არ საქიროებს არაფითარ განსაკუთრებულ გამომწვევ მიზეზს. იგი გამომდინარეობს უთუოდ თვით ადამიანის ბუნებისაგან“. ტომას

ჰობსი ამბობდა: „ბუნება მიერეკება ყველა ცოცხალ არსებას განუწყვეტელ ბრძოლისაკენ. ბოროტნი ესხმიან, კეთილნი თავს იცავენო“. პრუდონის აზრით „ომი არის კაცობრიობის განუყრელი თვისება და იარსებებს მანამ, სანამ არსებობს კაცობრიობა“. დრაგომიროვის აზრით „ბუნებაში ყოველივე ბრძოლაზეა დაფუძნებული, ადამიანს კი არ ძალუძს ბუნების რომელიმე კანონს გადააბიჯოს“. ტრეიჩკე კიდევ უფრო შორს მიდის: „ომის უკუგდების მოთხოვნა ნიშნავს ადამიანის უწმინდესი გრძნობების ხელყოფას და ადამიანის ბუნების დამახინჯებას“ (იხ. С. Кузмин — „Война в мнениях передовых людей“, ს.-პ. 1904 წ., გვ. 47, 49, 76, 78 და 80). ამგვარად, გამოდის, რომ ომი არავითარ კავშირში არ იმყოფება საზოგადოებრივი ცხოვრების განვითარებასთან, სახელმწიფოს პოლიტიკურ ვითარებასთან და ამდენად უაზროც არის ბრძოლა ომების წინააღმდეგ. მაშ, დაჩაგრული კლასები მორჩილებით უნდა ჩაებან ყოველთვის კაპიტალის ინტერესებისათვის წარმოებული ომის ფერხულში. ასეთი შეხედულება ომზე მიუღებელია მარქსისტულ-ლენინური თვალსაზრისით. კლაუზევიცი პირველი იყო, რომელმაც თეორიას ომის გამომწვევი მიზეზების შესახებ სწორი კალაპორტი მიუჩინა, თუმცა საკითხის ჭეშმარიტი გადაწყვეტა მან მაინც ვერ მოგვცა, როგორც ჰეგელის იდეალიზმისა და ჰეგელისავე დიალექტიკის მიმდევარმა მოაზროვნემ. მას, როგორც დიალექტიკოსს, არ სწამს, რომ ომი თითქოს თავისთავადი რამ მოვლენა იყოს. მისი აზრით (და აქაა სწორედ მისი სიდიადე), ომი საზოგადოებრივ ურთიერთობათა განსაკუთრებული გამოვლინებაა. კლაუზევიცის შეხედულებით: ომი სხვა არა არის რა, თუ არა განგრძობა სახელმწიფო პოლიტიკისა სხვა საშუალებათა ჩარევით; არავითარ შემთხვევაში არ უნდა წარმოვიდგინოთ ომი, როგორც დამოუკიდებელი რამ, იგი უნდა იქნას წარმოდგენილი, როგორც პოლიტიკის იარაღი; ომი ყოველთვის პოლიტიკური ვითარებიდან მომდინარეობს, იგი მხოლოდ და მხოლოდ პოლიტიკური მოტივებითაა გამოწვეული; ომი პოლიტიკამ წარმოშვა; პოლიტიკა გონებაა, ომი კი მხოლოდ იარაღი, და არა პირიქით, მაშასადამე რჩება მხოლოდ დავუქვემდებაროთ სამხედრო თვალსაზრისი პოლიტიკურს; ომი არის პოლიტიკა, რომელმაც კალამი ხმალზე შესცვალა; „ომი არა მარტო პოლიტიკური აქტია, არამედ პოლიტიკის ნამდვილი იარაღიც, განგრძობა პოლიტიკურ ურთიერთობათა, მათი გატარება სხვა საშუალებებით (იხ. კლაუზევიცის „У войны“ მეორე გამოცემა, ნაწილი პირველი—ომის ბუნება, თავი I—რა არის ომი? პარაგრაფი 24-ე—ომი არის გან-

გაძობა პოლიტიკისა, მხოლოდ სხვა საშუალებებით, გვ. 27, და იქვე ნაწილი მერვე—ომის გეგმა, თავი VI, ბ—ომი არის პოლიტიკის იარაღი, გვ. 559—566). საკითხი საეხებით მართებულად გადაიჭრებოდა, რომ კლაუზევიცის დიალექტიკა მატერიალისტური ყოფილიყო. უდავო სიმართლეა, რომ ომი პოლიტიკის შედეგია. მაგრამ არაა სწორი კლაუზევიცის მიერ თვით პოლიტიკის გაგება. სამართლიანად შენიშნავენ, რომ მისი თეორიის ძირითადი შეცოდება მდგომარეობდა თვით პოლიტიკის იდეალისტურ გაგებაში: მისი აზრით პოლიტიკა არის საზოგადოების, როგორც მთელის, ყველა ინტერესების გამოხატულება, სახელმწიფოს კონცენტრირებული გონიერება. იდეალისტი კლაუზევიცი ვერ ხედავს კლასებს და კლასობრივ ბრძოლას, მის წინ ყოველთვის უსახო „ხალხია“, საზოგადოებრივ ურთიერთობათა და ხალხის „სულის“ შეცვლა მისთვის აუხსნელ საიდუმლოებას შეადგენს, „სული“ მიუჩნევია მას საზოგადოებრივ ურთიერთობათა და თვით ომების მოძრაობისა და განვითარების უკანასკნელ ძირითად ზამმარად. მაგრამ მართა ის ერთი გარემოება, რომ კლაუზევიცმა ომი პოლიტიკას დაუკავშირა და კიდევ მეტიც—მას დაუქვემდებარა, უკვე უდიდეს მონაპოვარად უნდა ჩათვლილიყო ბურჟუაზიულ სამხედრო მეცნიერებისათვის იმ ხანაში, როცა ომების წარმოშობის საკითხში ბატონობდა ბიოლოგიური, რასიული, ფსიქოლოგიური და სხვა მიუღებელი თეორიები. და, მართლაც, კლაუზევიცი შეუმჩნეველი არ დარჩენიათ თავის დროზე მარქსიზმის კლასიკოსებს—ენგელსს, ლენინს. ლენინმა კლაუზევიცის ეს ძირითადი აზრი მიიჩნია „უეჭველ შენაძენად ყოველი მოაზროვნე ადამიანისათვის“ და მოგვცა კლაუზევიცის მოძღვრებისაგან პრინციპიალურად განსხვავებული ერთადერთი მეცნიერული გაგება ომისა, როგორც „განჯაობა სხვადასხვა კლასის პოლიტიკისა მოცემულ დროში“. ლენინი კლაუზევიცს სთვლის ერთ-ერთ ყველაზე მეტად ღრმა მოაზროვნე მწერლად სამხედრო საკითხებზე (იხ. ამის შესახებ დაწვრილებით კლაუზევიცის „O войне“, მეორე გამოცემა, წინასიტყვაობა გამომცემლობისაგან VIII—XIV გვ. ლენინი—თხუთღებათა კრებული, ტ. XVIII, მე-3 რუსული გამოცემა, გვ. 197 და 248—249, ტ. XXX, გვ. 333 და 336 და Ленинский Сборник. ტ. XII, მე-2 გამოცემა—ლენინის ამონაწერები და შენიშვნები კლაუზევიცის წიგნზე „ომისა და ომის წარმოების შესახებ“. გვ. 432—441).

დ. ა. მილუტინის მეთოდოლოგიურ სტატიაშიც, რომელიც შემოთ მოვიხსენიეთ, საეხებით იგივე აზრია კატაბოლური იდეა

გამომწვევი მიზეზებთან შესახებ. მილუტინიც კლაუზევიცის მსგავსად ომის გამომწვევ მიზნად პოლიტიკას სთვლის, იგი ამბობს: „ომი არის სახელმწიფოს პოლიტიკური ცხოვრების ერთ-ერთი გამოვლინებაო“ (იხ. მილუტინის „Первые опыты военной статистики“ ს.-პ., 1847 წ., წიგნი I, გვ. 55), მაგრამ კლასებისა და კლასობრივი ბრძოლის შესახებ მილუტინიც იმნაირადვე სდუმს, როგორც კლაუზევიცი.

ომიკის ფილოსოფოსის—კლაუზევიცის მოწინავე იდეათა მილუტინის მიერ გაზიარება უეჭვოდ ხდის მილუტინის პროგრესიულობას სამხედრო აზროვნებაში. ეს, რა თქმა უნდა, თავის კეთილისმყოფელ გავლენას მოახდენდა სამხედრო აზრის შემდგომ განვითარებაზე რუსეთში, რაკი ძირითადი იდეა ომის გამომწვევი მიზეზების შესახებ საღ საწყისებს დაემყარა იმთავითვე, როცა ერთის მხრივ ყალიბდებოდა ომის თეორია, მოძღვრება ომის შესახებ, და მეორე მხრივ საფუძველი ეყრებოდა სამხედრო გეოგრაფიას, როგორც საზეცნიერო დისციპლინას.

აქვე უნდა ითქვას, რომ მილუტინმა თავის ცნობილ ნაშრომში „Первые опыты военной статистики“, რომლის I ტომში მოცემულია „გერმანიის კავშირის პოლიტიკური და სამხედრო სისტემის საფუძვლები“, ყველა სამხედრო საკითხი და მათ შორის სამხედრო-გეოგრაფიულიც, სახელმწიფოს პოლიტიკურ ცხოვრებასთან მჭიდრო კავშირში განიხილა, რაც მისასაღმებელია, მაგრამ, პოლიტიკური ამოცანებით გატაცებულმა, ჯოხი ისე ძლიერ გადაღუნა პოლიტიკური ფაქტორებისაკენ, რომ ბუნებრივი, გეოგრაფიული ფაქტორები მიჩქმალული დაურჩა, რასაც თავის ადგილზე გავეცნობით.

გავეცნოთ დ. ა. მილუტინს, როგორც სამხედრო გეოგრაფს.

დ. ა. მილუტინის შეხედულებანი სამხედრო გეოგრაფიაზე მოცემულია მის შესანიშნავ ნაშრომში—„კრიტიკული გამოკვლევა სამხედრო გეოგრაფიისა და სამხედრო სტატისტიკის მნიშვნელობის შესახებ“, რომელიც პირველად ცალკე ბროშურის სახით გამოქვეყნებულა 1846 წელს, ხოლო შემდეგ (1847 წელს) შესავალის სახით წაუშმდღარებია ავტორს თავისი კაპიტალური ნაშრომისათვის — „პირველი ცდანი სამხედრო სტატისტიკისა“ (იხ. „Первые опыты военной статистики“ Д. Милютена“, წიგნი I, ს.-პ. 1847 წ. ეს წიგნი შეიცავს ხსენებულ შესავალს და თვით თხზულებას—„გერმანიის კავშირის პოლიტიკური და სამხედრო სისტემის საფუძვლები“, გვ. 73—236, ორი ფერადი რუკით და ბატარა სტატიით ერთ-ერთი რუკის განსამარტავად).

ამ ნაშრომის შესავალი ნაწილი, როგორც მეთოდოლოგიურა ნარკვევი სამხედრო გეოგრაფიის შესახებ (გვ. 1—70), აგრეთვე თვით თხზულების პირველი თავი — „გერმანიის ზოგადი მიმოხილვა სამხედრო მხრივ, მისი ძირითადი ძალები“ (შემდგენი ქვეთემებით: ქვეყანა ანუ ტერიტორია, ტოპოგრაფიული ხასიათი, წყალსაცავი და სახმელეთო გზები, რკინიგზები, ნიადაგის ნაყოფიერება და მისი დამუშავებულობა, მშარის ადგილობრივი სახსრები, დასახლებულობა, მოსახლეობის მდგომარეობა, — გვ. 81—113), მეტწილად თავი — „საერთო დასკვნები გერმანიის სტრატეგიული მდგომარეობის შესახებ“ (ქვეთემებით: რამდენად მიაღწია გერმანიამ მთლიანობას თავის სახმედრო სისტემაში, სხვადასხვა ნაწილის სტრატეგიული მნიშვნელობა, გაყოფა ომის ორ ზოგად თეატრად — გვ. 226—236), ბოლოს ფერადებით შესრულებული „ევროპის შუა ნაწილის რუკა“ (თავისი შემდგენი მონაცემებით: ალპური ხასიათის მთაგორიანი ადგილები, მეორეხარისხოვანი მთები, ტალღბოვი ადგილები, ღია, დასახლებული და დამუშავებული ვაკეები, ღია, მაგრამ მცირედ დასახლებული და დაუშვავებელი ვაკეები, დასახლებული, მაგრამ ძლიერ დასერილი ვაკეები, ტყიანი, ტბებითა და ჭაობიანი მდინარეებით დასერილი ვაკეები, ჭაობიანი ქვეყნები, დამთავრებული რკინიგზები, მშენებარე რკინიგზები, ციხე-სიმაგოეები, სატანკო ქალაქები) და პატარა სტატია „ევროპის შუა ნაწილის რუკის განმარტება“ (გვ. 237—248) — განსაკუთრებით საყურადღებონი არიან ჩვენთვის დ. ა. მილუტინის მეთოდოლოგიურ შეხედულებათა განაცნობად გეოგრაფიაზე საერთოდ და სამხედრო გეოგრაფიაზე კერძოდ.

დ. ა. მილუტინის აღნიშნული ნაშრომი გამოქვეყნდა იმ დროს, როცა მეცნიერული გეოგრაფიის საფუძვლები მხოლოდ ვლინდებოდა და ჯერ კიდევ არ იყო ჩამოყალიბებული გარკვეული აზრი გეოგრაფიის არსისა და პრინციპების შესახებ. მილუტინს კარგად ესმოდა თავისი დროის ახალი მოთხოვნილება, რომ არ ემარა ფაქტების დაგროვება. საჭიროა მათი გაანალიზება და ზოგად იდეათა და დასკვნათა გამოშვება. სწორედ ამ აზრს ავითარებდნენ მაშინ გეოგრაფიის საზოგადოებრივი მეცნიერული გეოგრაფიის ფუძემდებელნი — ალექსანდრე ჰუმბოლდტი და კარლ რიტერი. „ჩვენი საუკუნე — სამართლიანად შენიშნავს მილუტინი — არ ემყოფილდება მარტოოდენ ფაქტიური ცნობებით, იგი მოითხოვს ყოველი საგნის კრიტიკულ გამოკვლევას, სხვადასხვა მონაცემის ერთმანეთთან დაპირისპირებას და მათზე მსჯელობას ზოგად იდეათა და დასკვნათა განოსაყვანად,



ანიტომ ცოდნათა ყველა დარგმა მიიღო სისტემატიკურ მეცნიერებათა ფორმა“ (გვ. 3—4). შემდეგ მილუტინი ეხება ქვეყანათა და სახელმწიფოთა სამხედრო თვალსაზრისით მეცნიერული შესწავლის საკითხს და ამბობს: „ქვეყნებისა და სახელმწიფოების სამხედრო მხრივ სპეციალურმა შესწავლამ მიიღო სამხედრო გეოგრაფიისა და სამხედრო სტატისტიკის სახელწოდება: პირველი ამათვანი გულისხმობს უმთავრესად ქვეყანათა ან დედამიწის ზედაპირის ნაწილთა სამხედრო მხრივ შესწავლას, მეორე კი სახელმწიფოების სამხედრო ძალთა და საშუალებათა შესწავლას. მაგრამ, სიმაართლე ითქვას, არც სამხედრო გეოგრაფიას, არც სამხედრო სტატისტიკას არ მიუღიათ დღემდე გარკვეული საფუძვლები და ისინი მეცნიერების ყველა მოთხოვნილებას როდი აკმაყოფილებენ. მასალა უკვე მდიდარი მარაგისა გვაქვს, მაგრამ, ამ მასალისაგან რომ აიგოს მოხდენილი შენობა, შეკავშირდეს ყველა ცალკეული ფაქტიური ცნობა კრიტიკული კვლევის საერთო ლოგიკური ძაფით,—აი, რა გვრჩება კიდევ გასაკეთებელი ამ დარგში“ (გვ. 4). ამ პირობებში გასაგები სდება ის გარემოება, რომ მილუტინი დიდ დროსა და ადგილს უთმობს თავის ნაშრომში ჩვენთვის დღეს უდავოდ ცნობილი საკითხის გარკვევას—არის თუ არა სამხედრო გეოგრაფია მეცნიერება. მილუტინის აზრით სამხედრო გეოგრაფია მეცნიერებად ვერ ჩაითვლება, რადგან თვით გეოგრაფია, რომლის სპეციალურ დარგსაც იგი წარმოადგენს, არ არის მეცნიერება. რით ასაბუთებს მილუტინი ამ თავის შეხედულებას? იმით, რომ გეოგრაფია თვით სახელის ეტიმოლოგიური მნიშვნელობის მიხედვით დედამიწის აღწერაა, ხოლო აღწერა ფაქტების აღნუსხვას გულისხმობს და არა მათს კრიტიკულ გამოკვლევას. მილუტინის დროინდელი გეოგრაფიის განვითარების ეტაპი მართლაც ამას ათქმევინებდა მოაზროვნეს, რადგან გეოგრაფია მთელი თავისი წარსული ტრადიციის მიხედვით მე-19 საუკუნემდე უმთავრესად აღწერილობითი ხასიათს ატარებდა, იგი უფრო მეტად ფაქტებისა და მოვლენების აღნუსხვას, რეგისტრაციას აწარმოებდა, ვიდრე მათს გაანალიზებას და ზოგად იდეათა და დასკვნათა გამოყვანას. ჰუმბოლდტ-რიტერის ახალი შეხედულებანი კი ჯერ კიდევ არ იყო საკმარისად დამკვიდრებული და ხორცმესხმული. „გეოგრაფია—ამბობს მილუტინი—დიდხანს რჩებოდა თავისი სახელის ეტიმოლოგიური მნიშვნელობის ერთგული: იგი იყო მხოლოდ აღწერა დედამიწის ზედაპირისა და ძველადანვე იყოფოდა მათემატიკურ, ფიზიკურ და პოლიტიკურ გეოგრაფიად. ამ სამსახეობაში დღემდეც სწარმოებს მისი გადმოცემა სახელმძღვანელო-

ებში და შეტად ფართო კომბილაციებშიაც კი. აქ გვხვდება განმარტებაც ასტრონომიული ტერმინებისა, ახსნაც დედამიწის ქერქის ფიზიკური ზვისებებისა, აღწერაც ხალხებისა, ქალაქებისა, მთავრობის დაწესებულებათა და სხვ. და სხვ. ყველა ეს, ცხადია, წარმოადგენს ბევრი სხვა მეცნიერების სპეციალურ საგანს; მაგრამ გეოგრაფია არ იკვლევს ღრმად არც ერთ ამ საგანს; იგი არ განიხილავს მათ რაიმე თავისი განსაზღვრული მიზნით, არამედ მხოლოდ კმაყოფილდება ფაქტიურ ცნობათა შეგროვებით და ხდება თითქოს რეზერვუარი, რომელშიაც თითქმის ყოველი მეცნიერება პოულობს თავის მონაცემებს. მაგრამ მარტოდენ მონაცემთა აღრიცხვა, რაგინდ სისტემატური წესით დალაგდეს ისინი, ჯერ კიდევ ვერ შესძლებს მეცნიერების შექმნას. ალ. ჰუმბოლდტის აზრით „მეცნიერება იწყება მხოლოდ იქ, სადაც სული ეუფლება მატერიას, სადაც უამრავი ცდა, დაკვირვება, მონაცემი ვცდილობთ დაეუმორჩილოთ გონივრულ განსჯას“ ცოტად თუ ბევრად ზოგად კანონთა და ჭეშმარიტებათა გაშლასაყვანად, მოვლენათა ნათესაობისა და კავშირის ასახსნელად, მიხეზთა და შედეგთა გამოსავლინებლად. ერთი სიტყვით, მეცნიერებას ჰქმნის არა მარტო ერთი აღწერა მონაცემთა ან მოვლენათა, არამედ ის ლოგიკური ანალიზი, რომლითაც ეს კერძო მონაცემები ან მოვლენები შეირწყმებიან იდეათა ერთ მოხდენილ მთლიანობად. ამგვარად, ცხადია, რომ გეოგრაფია, რჩებოდა-რა თავისი ეტიმოლოგიური მნიშვნელობის ერთგული, ვერც ახერხებდა შეექმნა მეცნიერება ამ სიტყვის ნამდვილი გაგებით“ (გვ. 34—35). მილუტინის ეს მოსაზრებანი, რომელნიც, უნდა ითქვას, მასზე ბევრად აღრე ჰუმბოლდტსა და რიტერს უკვე ჰქონდათ გამოთქმული, და რომელნიც სადავოს არაფერს არ შეიცავენ, სადავო ხდებიან მაშინ, როცა იწყება მათი გავრცელება გეოგრაფიის განვითარების შემდგომ ეტაპებზედაც. მილუტინი ხედავს, რომ „დადგა დრო, როცა საბუნებისმეტყველო და პოლიტიკურ მეცნიერებათა წარმატებამ დედამიწის ზედაპირის შესწავლასაც მისცა სრულიად ახალი მიმართულება. სწავლული მოგზაურნი, არკმაყოფილდებიან-რა ქვეყნების უბრალო აღწერით, შეუდგნენ დედამიწის ზედაპირის სხვადასხვა მოვლენის ერთმანეთთან შედარებას და გაანალიზებას; ამ შედარებათაგან იწყეს ზოგად კანონთა გამოყვანა დედამიწის ქერქის აგებულების შესახებ და ამგვარად, საბუნებისმეტყველო მეცნიერებათა წრეში წარმოიშვა ახალი განშტოება“ (გვ. 35), მაგრამ მილუტინი ვერ ურიგდება იმ მდგომარეობას, რომ ახალ განშტოებას ისევ ძველი სახელი მიაკუთვნეს—

ფიზიკური გეოგრაფია, ი. სახელი, რომელიც როგორც ეტიმოლოგიური წინმეტყველებით, ისე უკვე დამკვიდრებული გაგებით, ნიშნავს მხოლოდ და მხოლოდ დედამიწის ზედაპირის აღწერას“ (გვ. 35). ასეთი სახელი, მილუტინის აზრით, შეუფერებელია იმ ახალი „განსაკუთრებული მეცნიერებისათვის, რომელიც იკვლევს დედამიწის ზედაპირის ფიზიკურ მოვლენათა თვით კანონებს და რომელიც გარდუვალად ერთ მთელს შეადგენს გეოლოგიასა და გეოგნოზიასთან“ (გვ. 35—36). მილუტინი გეოგრაფიის არც მეორე და მესამე განყოფილებას—მათემატიკურსა და პოლიტიკურს—მიიჩნევს ცალკე მეცნიერებად: მათემატიკური გეოგრაფიის საკითხები—დედამიწის სფეროს, როგორც მათემატიკური სხეულის ანუ ცილობის, შესწავლა, ცნადია, ეკუთვნისო კოსმოგრაფიას, ასტრონომიას, ნაწილობრივ გეოდზიას, ხოლო პოლიტიკური გეოგრაფია შეიცავს მასალას როგორც ეთნოგრაფიისა, ისე სტატისტიკისათვის; საზღვრების, ქალაქების, გზების ჩანთვლა შეადგენდა გეოგრაფიული რუკის ვრცელ დაშატებას ან განმარტებას და მოკლებული იყო შინაგან კავშირს საგანთა შორის, იგი არ წარმოადგენდა არაფერს ისეთს, რასაც წეძლო მეცნიერების შექმნა. უახლეს გეოგრაფიულ კრებულებშიაც განაგრძობენ იმავე ნაირგვაროვან საგანთა ნუსხის მოთავსებას, თუმცა უკვე არა პოლიტიკური გეოგრაფიის სახელით. ამ ნაწილს ჭარბებს ახალი, მაგრამ უფრო ნაკლებად სწორი სახელი—ტოპოგრაფია, თითქოს სწორედ იმისათვის, რომ კიდევ უფრო აერივ-დაერივანთ ყველა სახელწოდებანი და ცნებანი (გვ. 36). მილუტინი ეხება რიტერის ახალი სკოლის მიმართულებას გეოგრაფიაში და ამბობს: „ჩვენს დროში ბერლინის პროფესორის რიტერის და მის ზოგიერთ სხვა შესანიშნავ მიმდევართა მეცნიერული და ვრცელი ნაშრომების გამოქვეყნების შემდეგ გეოგრაფიაში, სრულიად ახალი ძინიანი დაუსახეს გეოგრაფიას, და, წეიძლება ითქვას,—ახალი შინაარსიც: ახალი სკოლის წეხედულებით მან უნდა შექმნას განსაკუთრებული, თვითმყოფი მეცნიერება, რომლის მიზანი უნდა იყოს დედამიწის ზედაპირის, როგორც ადამიანის საცხოვრებელ გარემოს, განიკვლევა, ე. ი. მის თვისებათა გაელენის მიხედვით ხალხთა და სახელმწიფოთა სეგნედსე. ამგვარად, გეოგრაფიას აყენებენ თითქოს საბუნებისმეტყველო და პოლიტიკურ მეცნიერებათა შებენ ხაზზე: ამბობენ, მან უნდა დააკავშიროსო პუნების შესწავლა ადამიანის შესწავლასთან“ (გვ. 36—37). მილუტინს რიტერის სკოლის ეს წეხედულება მიუღებლად მიაჩნია. მართალია, ის არ უარყოფს, რომ „დედამიწის ზედაპირის თვისებებს ჰქონდათ და მუდამ აქვთ მეტად

საგრძნობი გავლენა ხალხთა და სახელმწიფოთა სუბიექტებზე, არაეის ფიქრადაც არ მოუვა უარყოფას ასეთი აქსიომა, ვერაფერ ვერ დაეკედება მსგავს განოკვლევათა საბიროებაში“ (გვ. 37), მაგრამ ვერ ურიგდება იმ გარემოებას, რომ ხდება „სახელწოდებათა ბოროტად გამოყენება და აღრევა, საზიანოდ მეცნიერებათათვის“ (გვ. 37). ის დარწმუნებულია, რომ „სამეცნიერო კამათისა და გახეხებობათა მეტი ნაწილი გამომდინარეობს საგანთათვის არა-საყუთარი, უცხი: ან არა-ზუსტი სახელის ნებისზერად დარქმევიდან“ (გვ. 37). ის გამოთქვამს საყვედურს: „რათ უნდა ვეწოდოთ ახალ მეცნიერებას ძველი სახელი, რომლითაც ძველადანვე უკვე შევეჩვიეთ გვესმოდეს ის, რასაც გამოხატავს სიტყვის თვით ეტიმოლოგია“ (გვ. 37). მილუტინი დაჟინებით მოითხოვს, რომ „გეოგრაფიის საგანი უნდა იყოს მხოლოდ და მხოლოდ თვით დედამიწის ზედაპირი. ხოლო, თუ ჩვენ დავისახავთ მიზნად გამოვიკვლიოთ დედამიწის ზედაპირის გავლენა ადამიანის სუბიექტზე, ამით შესწავლის სფეროში შეგვაქვს უკვე სრულიად ახალი რაგის მოვლენები: ადამიანი უკვე თვითონვე ხდება მეცნიერების მთავარი საგანი და მიზანი“ (გვ. 37). მილუტინის ამ არასწორ მოსაზრებას ერთვის ერთი სავსებით მართებული აზრი ადამიანისა და ბუნების ურთიერთდამოკიდებულების შესახებ, იგი იძლევა უაღრესად საყურადღებო კითხვას: „განა მარტოოდენ ქვეყნის ადგილობრივი თვისებები აპირობებენ ხალხთა და სახელმწიფოთა ცხოვრებას?“ და ამაზე იქვე იძლევა სწორ პასუხს: „ადამიანი რომ მიიჩნია მხოლოდ და მხოლოდ ბუნების ზეგავლენისაგან დამოკიდებულ არსებად, ეს იქნებოდა მისი დამცირება და დაყვანა მარტოოდენ ინსტინქტით მომქმედი ცხოველის დონემდე; ამიტომაც ადამიანს ადვილის გავლენის გამოკვლევა, ცხადია, კაცობრიობის სუბიექტის შესწავლის ერთ-ერთი მხარეა, ერთი იმ ელემენტთაგანის შესწავლაა, რომელთაგანაც ყალიბდება სახალხო და სახელმწიფოებრივი ყოფაცხოვრების ფორმები. მაშასადამე, თუ გეოგრაფი დავისახავს ამ მიზანს, მაშინ მას მოუხდება გამოიკვლიოს უკვე არა მარტო დედამიწის ზედაპირი საყუთრივ, არამედ თვით ადამიანი საბოლოო აქო საბოლოოდ აქო, -- სახელმწიფოში“ (გვ. 37—38). მილუტინი საბოლოოდ ისევ თავის არასწორ დასკვნას უბრუნდება, რომ გეოგრაფიას არ შეიძლება მიეცეს ასეთი შინაარსი, ეს იქნებოდა მიაი შეჭრა გამოკვლევათა იმ სფეროში, რომელიც, მისი აზრით, სტატისტიკას ეკუთვნის. დარჩა გეოგრაფია, მილუტინის შემეცნებაში, როგორც დედამიწის ზედაპირის აღმწერი ცოდნის დარგი, რომელიც თითქოს მხოლოდ თავს უყრიდეს სხვა-

დასხვა მეცნიერების კუთვნილ ნაირგვაროვან საგნებსა და მოვლენებს და ამის გამო დამოუკიდებელ, ცალკე მეცნიერებას არ წარმოადგენდეს. მილუტინი თავის აოასწორ მსჯელობაში მივიდა იმ უცნაურ დასკვნამდე, რომ დღეს სახელი გეოგრაფია, მისი აზრით, შეიძლება იხმარებოდეს მხოლოდ საგვარეო, შემკრებლობითი გაგებით: „გეოგრაფიული ცნობები ან მეცნიერებანი ეწოდება საზოგადოდ თავისი მიზნებით ნაირგვაროვან მეცნიერებათა ყველა იმ ნაწილს, რომელთაც ყველას ერთად მივხვართ ჩვენი ცთომილის გარეგანი ზედაპირის შემეცნებისაკენ, — მაგრამ რომელთა შეერთებას აოავეითარი ზოგადი, ერთგვაროვანი და ვანუყოფელი მთელის, მეცნიერების თვალსაზრისით, შექმნა არ ძალუძს“ (გვ. 39).

მაშ, ასე, თუ გეოგრაფია მეცნიერება არაა და არც შეიძლება იგი ასეთად გახდეს, ვერც მისი სახეობა — სამხედრო გეოგრაფია ჩაითვლება მეცნიერებად. „ყოველი მეცნიერება შეიძლება — ამბობს მილუტინი — გადმოცემულ იქნას რაიმე სპეციალური სახეობით, მიუხედავად იმისა კურსის გეგმასა და მოცულობას რომელიმე კერძო დანიშნულებას, მკითხველთა ან მოსწავლეთა გარკვეულ გვარობას; მაგრამ განა შეიძლება ამან ახალი მეცნიერება შეადგინოს? ნუ თუ ყოველი მეცნიერების კურსი, დაწერილი სპეციალურად სამხედრო მკითხველთათვის, უნდა აღგენდეს საშხედრო მეცნიერებათა ცალკე დარგს?“ (გვ. 13 -- 14). ამ აზრის მატარებელ მილუტინს მით უფრო არ უნდა შეეძლოს სამხედრო გეოგრაფიის მიჩნევა მეცნიერებად. მართლაც, ის ამბობს: „გეოგრაფიას ყველა სხვა საგანზე უფრო ნაკლებად შეუძლია რაიმე სპეციალური მეცნიერების შექმნა; ვინაიდან თვითონ მას არა აქვს ერთი გარკვეული მნიშვნელობა, არამედ შესდგება სულ სხვადასხვაგვარი მონაცემებისაგან, რომელნიც ცოდნათა ყველა დარგს ეხება. გეოგრაფია არის მონაცემთა უზარმაზარი მარაგი, რომელიც გამოყენებულია მასალად ყველა მეცნიერებისათვის; თვითონ კი მას არამცდაარამც ცალკე მეცნიერების შექმნა არ ძალუძს“ (გვ. 14).

ამგვარად, მილუტინი თავისი მსჯელობის დროს, როცა არაკვევდა საკითხს — არის თუ არა გეოგრაფია მეცნიერება, ან შეიძლება თუ არა იგი ასეთად გახდეს, გამოდიოდა არა მარტო გეოგრაფიის არსებული მდგომარეობიდან მისი განვითარების გარკვეულ ეტაპზე, როცა მართლაც ფერხდებოდა გეოგრაფიის ასევე ნამდვილი მეცნიერების სიმაღლეზე, თუმცა ჰუმბოლდტ-რიტერის ნაშრომთა გამოკვეყ-

ნების შემდეგ გეოგრაფიის მეცნიერული საფუძველი საკმაოდ გან-  
 მტკიცდა, არამედ ავრთვე და თითქმის უპირატესად სიტყვა გეო-  
 გრაფიის ეტიმოლოგიური გაგებიდან, რაც, რა თქმა უნდა, სწორი  
 არ არის. ცნებისაგან გადაქარბებული, ვიტყვოდი, მკაცრი მწვდრუ-  
 ლი, სიზუსტის მოთხოვნამ ლამის მსხვერპლად შეიწირა გეოგრაფია  
 მილუტინის ნაშრომში და წარმოგვიდგინა იგი არა დამოუკიდებელ  
 სამეცნიერო დისციპლინად, არამედ გეოგრაფიის სფეროში უფულებო  
 და უტრადიციო სტატისტიკის მორჩილ დარგად. გეოგრაფიის სტა-  
 ტისტიკისათვის დაქვემდებარებას ხელი შეუწყო იმ ვარემოებამ, რომ,  
 მილუტინის შეხედულებით, არ იქნეოდა სწორი სახელმწიფოსა და  
 ხალხთა ცხოვრების განხილვისას მარტოოდენ გეოგრაფიულ მონა-  
 ცემებს დავყარებოდით და უკლებელგვეყო სოციალ-პოლიტიკური  
 ფაქტორები, მეორე მხრივ არც ის იქნებოდა სწორი, რომ ადამიანი  
 გეოგრაფიის განხილვის საგნად მიჩნეულიყო. საფიქრებელია, რომ  
 ამ აზრმაც გახდა იგი იძულებული დაკავშირებოდა გეოგრაფიის  
 ნაცვლად სტატისტიკას, როგორც ვითომდა ისეთ სამეცნიერო  
 დარგს, რომელიც სახელმწიფოს განხილვის დროს საშუალებას მის-  
 ცემდა ავტორს თავის შესაფერ ადგილზე გამოეყენებინა როგორც  
 გეოგრაფიული, ისე სოციალ-პოლიტიკური მონაცემები. მილუტინმა  
 სამხედრო გეოგრაფია დასტოვა გეოგრაფიულ ცნობათა აღმწესველ  
 და აღმწერ დარგად, გეოგრაფიული მოვლენების კვლევა კი და  
 ავრთვე გეოგრაფიულ მონაცემთა შეფასება სტრატეგიული თვალ-  
 საზრისით სამხედრო გეოგრაფიას ვერ დააკისრა, რადგან, ვიმე-  
 ორებთ, გეოგრაფიისათვის შეუფერებლად მიიზნია კვლევა, გაანალი-  
 ზება, შეფასება, ზოგად იდეათა შემუშავება, ზოგად დასკვნაოა გა-  
 მოყვანა. სიტყვამ მოიტანა და არ შეიძლება არ შევნიშნოთ ა. სუ-  
 დაკოვს, რომელმაც თავის სტატიაში „რა არის სამხედრო გეოგრა-  
 ფია“ მილუტინის ნაბიჯი, სამხედრო სტატისტიკის წინა პლანზე  
 წამოწევა და მისთვის სამხედრო გეოგრაფიის დამორჩილება, მარ-  
 ტივად ახსნა: „მილუტინმა მოუხერხებლად უწოდა თავის მეცნიერებას  
 არა სამხედრო გეოგრაფია (როგორც უწოდებდნენ მას მის დრომდე  
 აკადემიაში), არამედ სამხედრო სტატისტიკა და მისცა მას ძლიერი  
 სტატისტიკური განხრა“ და ეს იმით აიხსნებაო, რომ სტატისტიკა  
 იმ დროს უკვე ჩამოყალიბებულ მეცნიერებად ითვლებოდა, ხოლო  
 გეოგრაფია მხოლოდ კომპლექსურ სასწავლო საგნად იყო მიჩნეულიო  
 (იხ. А. Судаков—„Что такое военная география“, სტატია,  
 მოთავსებული ჟურნ. „География в школе“-ში, 1940 წ., № 5, გვ-  
 54). მკითხველი ჩვენი მსჯელობის შემდეგ ადვილად მიხვდება, რომ

აქ სახელწოდების მოუხერხებელ შერჩევასთან კი არა გვაქვს საქმე, არანედ საკითხის თავისებურ სიბრტყეში დასმასთან. მილუტინი გაემიჯნა სამხედრო გეოგრაფიას და ომის თეატრის ან მთელ სახელმწიფოს სტრატეგიულ მიმართებაში კრიტიკული გამოკვლევის უფლება სამხედრო სტატისტიკას მიანიჭა.

მილუტინი კარვად იცნობს ყველა მის წინამორბედს და თანამედროვეს სამხედრო გეოგრაფიისა და სამხედრო სტატისტიკის დარგში და, გვაცნობს-რა მათს შესედულებებს სამხედრო გეოგრაფიისა და სამხედრო სტატისტიკის მნიშვნელობის შესახებ, იძლევა თავის განსაკუთრებულ ხაზს და კონცეპციას. სამხედრო გეოგრაფია და სამხედრო სტატისტიკა, როგორც ზემოთ აღვნიშნეთ, მის დროს ისახება და იწყებს ჩამოყალიბებას. საყურადღებოა, რომ მილუტინი გაუკრიტიკებლად არ სტოვებს არც ერთ მიმდინარეობას, რაც მანამდე და მის დროს ცნობილი იყო გეოგრაფიისა და სტატისტიკის სფეროში, და ამ დარგების დასავლეთ ევროპელ ფუძემდებელთა გაცნობის დროს ინარჩუნებს თავის ორიგინალურ შეხედულებას იმდენ რიგ უმნიშვნელოვანეს საკითხებზე.

შეგჩერდეთ უმთავრესად პირველ სამხედრო გეოგრაფთა შეხედულებებზე, რომელთა შესახებ საკმაო მასალას გვაწვდის თვით მილუტინის ზემოხსენებული ნაშრომი.

სამხედრო გეოგრაფიის სახელწოდებით პირველი თხზულებანი იყვნენ პრუსიის კაპიტანის ჰომეიერის ნაშრომი—შვეიცარიის აღწერა და ვენტურინის ნაშრომი—აღმოსავლეთ რაინლანდის სამხედრო გეოგრაფიის სახელმძღვანელო; ორივე ეს ნაშრომი გამოქვეყნდა მე-19 საუკუნის პირველსავე წლებში. ამათი მომდევნო ნაშრომები გამოიცა 1820 და 1839 წლებს შორის. შინაარსის მიხედვით მათი უმეტესი ნაწილი, მილუტინის აზრით, ორ ჯგუფად შეიძლება გაიყოს: ერთნი ქვეყნების დაწვრილებითი ტოპოგრაფიულ აღწერად შეიძლება ჩაითვალოს, მეორენი—ზოგადი ფიზიკური და პოლიტიკური გეოგრაფიიდან ამოღებული ცნობების კრებულად. პირველი რიგის ავტორთა აზრით სამხედრო გეოგრაფია მდგომარეობს წინარის დაწვრილებით ტოპოგრაფიულ აღწერაში ყველა იმ კერძო ნოვლენათა გათვალისწინებით, რომელთაც შეიძლება რაიმე გავლენა ექნეთ სამხედრო მოქმედებაზე, თუნდაც ტაქტიკურის წერიც. ეს ნაშრომები და აგრეთვე პრუსიის არტილერიის კაპიტანის ადოლფის ნაშრომი—ევროპის სამხედრო გეოგრაფიის სახელმძღვანელო, რომლის პირველი ტომი შეიცავს ზოგად წინასწარ ცნობებს მათემატიკური და ფიზიკური გეოგრაფიიდან და ცნობებს

თვით ბუნებისმეტყველებიდანაც კი (1829 წ.), ხოლო მეორე ტომი პირენეს ნახევარკუნძულის დაწვრილებით ტოპოგრაფიულ აღწერას (1831 წ.), არსებითად ერთიმეორის მსგავსნი არიან. მეორე რიგის ავტორთა აზრით სამხედრო გეოგრაფია უნდა შეიცავდეს ზოგადი გეოგრაფიიდან ამოკრებილ ყველა იმ ცნობას, რომელთაც შეიძლება დამოკიდებულება ექნეთ სამხედრო მოსაზრებებთან, ან რომელნიც სამხედრო პირის ცნობიერების სფეროში უნდა შედიოდნენ. ჰანცოგი, მაგდებურგის სკოლის პასტორი, რომელმაც პირველმა გამოსცა ევროპის სამხედრო გეოგრაფიის სახელმძღვანელო ორ პატარა ტომად (1820 და 1823 წ.), წინასიტყვაობაში შეეხო გეოგრაფიული მონაცემების გავლენას სტრატეგიულ მოსაზრებებზე, ხოლო ტოპოგრაფიულია ტაქტიკურზე და ფიქრობდა, რომ სამხედრო გეოგრაფია შეიძლება იყოს ან ზოგადი, ან კერძო. მის კვალს გაჰყვნენ მაინეკე, მალხუსი, ანდრე, რუდტორფერი. რუდტორფერის აზრით, სამხედრო გეოგრაფია უნდა შეიცავდეს ყოველივე მას, რაც ზოგადი გეოგრაფიიდან და სტატისტიკიდან შეიძლება ნასესხები იქნას ყველაზე უფრო სასარგებლო და საინტერესო სამხედრო პირისათვის. ეს ცნობები, ამოკრებილი ზოგადი ფიზიკური და პოლიტიკური გეოგრაფიიდან, რუდტორფერს გადმოცემული აქვს ტაბულების სახით. რუდტორფერი ავითარებდა ერცჰერცოგ კარლის აზრს, რომ სამხედრო მოქმედებათა მსვლელობა დამოკიდებულია ადგილგარემოს პირობებზე, მთების მდებარეობა და მდინარეთა დენა უცვლელია და განსაზღვრავენ იმ პუნქტებს, რომლებზედაც არმიები უნდა შეხვდნენ ერთმანეთს ყოველგვარ გარემოებასა და ყოველგვარ ვითარებაში. ბენიკენი თავისი ნაშრომის—ევროპის სამხედრო გეოგრაფიის ელემენტები—წინასიტყვაობაში ამბობს: სამხედრო გეოგრაფია გვაცნობს სახელმწიფოს და მის მიერ დაკავებულ დედამიწის ზედაპირს იმ მიზნით, რომ გავარკვიოთ სახელმწიფოთა ფარდობითი ძალები და საშუალებანი ომის ერთმანეთთან საწარმოებლად. თავის წიგნში მას წარმოდგენილი აქვს ცნობები თითოეულ სახელმწიფოზე, ამოღებული ზოგადი გეოგრაფიიდან, რასაც ემატება მოკლე სტატიები საზღვარზე მდებარე სიმაგრეთა და ბუნებრივ მიჯნათა შესახებ, აქვეა მოცემული შიდა სიმაგრეები, თავდაცვითი ხაზები, შეიარაღებულ ძალთა შედგენილობა და სამხედრო ისტორიის თვალსაზრისით შესანიშნავი პუნქტები. ორიგინალური იდეა დაუდო საფუძვლად თავის აზრს სამხედრო გეოგრაფიაზე სენ-სირის სამხედრო სკოლის მასწავლებელმა თეოფილ ლავალემ: დედამიწაზე ზოგიერთი მნიშვნელოვანი



ბუნებრივი მიჯნაა, რომლებიც ოდესღაც ხალხთა შორის საზღვრებად იყო გამოყენებული. მაგრამ დროთა განმავლობაში ეს ბუნებრივი მიჯნები კაცის ნებით განუწყვეტლივ ირღვეოდა და ახლაც ირღვევა. დედამიწის ზედაპირი ისე უნდა იქნას შესწავლილი, რომ დავენყაროთ იმ უცვლელ ბუნებრივ მიჯნებს, დაიყოს ისინი მდინარეთა აუზებისა და ქედების მიხედვით, ხოლო შემდეგ თითოეულ ამ დანაყოფში შევნიშნოთ ისტორიული ცვლილებები და ახლანდელი მდგომარეობა სხვა, ცვალებადი გეოგრაფიული საგნებისა. რადგან აღნიშნული ცვლილებები დედამიწის ზედაპირზე უფრო მეტად ომების გამოისობით ხდებოდა, გეოგრაფიის შესწავლა ამ სისტემით ძლიერ სანტერესო მომარჯვება იქნება ამ მეცნიერებისა სამხედრო ხელოვნებაში. ამ გზით ადგილის შესწავლა გასაღებს მოგვცემს სტრატეგიულ მოქმედებაში გასარკვევად. გენერალ ჟომინის აზრით სამხედრო გეოგრაფია შედგება ომის თეატრის ტოპოგრაფიული და სტრატეგიული აღწერისაგან, ყველა იმ ბუნებრივ და ხელოვნურ დაბრკოლებათა აღნიშვნით, რომლებიც შეიძლება შეგვხვდეს საომარ შემართებაში, მუდმივ, გადამწყვეტ პუნქტთა გამოკვლევით როგორც საზღვარზე, ისე მხარის მთელ სივრცეზე. პოლკოვნიკი იაზიკოვი თავის ნაშრომში—„ცდა სამხედრო გეოგრაფიის თეორიისა“ (1838 წ.), უარყოფს-რა გერმანელ მწერალთა აზრებს, რომლებიც სამხედრო გეოგრაფიას სავსებით აიგივეებენ ზოგად გეოგრაფიასთან, ამბობს: დედამიწის ზედაპირის გარკვეული მიზნით შესასწავლად, როგორც, მაგალითად, იმისათვის, რომ ვამოძრაოთ მასზე შეიარაღებული ძალები რაც შეიძლება ხელსაყრელ პირობებში, არ კმარა მხოლოდ აღიწეროს ეს ზედაპირი. აუცილებლად უნდა გამოვიკვლიოთ მისი მნიშვნელობა შესწავლის სპეციალური მიზნის მიმართებაში, ე. ი. სტრატეგიული ღირსება მთელ სივრცეთა, რომელთაც ვთვლით დედამიწის ზედაპირზე ბუნებრივ და პოლიტიკურ მიჯნებად, გეოგრაფიულ-სტრატეგიული პუნქტები და ხაზები, რომელთაც ეს სივრცეები შეიცავენ. ასე რომ იქნებოდეს გამოკვლევით დედამიწის ზედაპირის ყველა ადგილი, რომელთა გამოკვლევა გვმართებს სტრატეგიული თვალსაზრისით, მაშინ ჩამოყალიბდებოდა ცალკე მეცნიერება, რომლისათვისაც სრული უფლება გვექნებოდა დაგვერქმია სამხედრო გეოგრაფია. სამხედრო გეოგრაფია არ უნდა იფარგლებოდეს ადგილობრივ მონაცემთა სტრატეგიული მნიშვნელობის გამოკვლევით მხოლოდ ერთ ეპოქაში, იგი. აუცილებლად კრიტიკულად უნდა იხილავდეს ყველა შემთხვევასა და გარემოებას, რომელშიაც მუდამ იდებოდა სხვადა-

სხვა ეპოქაში გეოგრაფიულ მონაცემთა ესა თუ ის მნიშვნელობა: მიზანი კი ამ განხილვისა უნდა მდგომარეობდეს მასში, რომ მისგან გამოყვანილ იქნას ზოგადი, გონებით განსაკერძოებული ჰუმანიტარული გეოგრაფიულ მონაცემთა თითოეული გვარეობის მუდმივი მნიშვნელობაზე განსაზღვრულ ვითარებაში. სამხედრო გეოგრაფია თეორიული მეცნიერებაა, დარგი ან ნაწილი თვით სტრატეგიის თეორიისა. როგორც მისი მიხედვით სამხედრო გეოგრაფიაში ყოველი ქვეყანა ისე უნდა იყოს აღწერილი, რომ გამოიხატოს მისი ფიზიკონომიის ის დამახასიათებელი ნიშნები, რომელთაგანაც დამოკიდებულია თვით მნიშვნელობა მთელი ქვეყნისა სამხედრო მხრივ, ე. ი. ხელსაყრელობა თუ დაბრკოლებანი არმიის განლაგებისათვის, მოძრაობისათვის, მოქმედებისათვის, კვებისათვის, მომარაგებისათვის და სხვ. და სხვ. ტოპოგრაფიული წერილობითი გამოდევნება კი როგორც საჭიროდ არ მიაჩნია.

თავისი საკუთარი შეხედულება აქვს სამხედრო გეოგრაფიაზე დ. ა. მილუტინს.

მილუტინის შეხედულებით გეოგრაფიის ცოდნა, გეოგრაფიულ საგანთა და მოვლენათა გათვალისწინება აუცილებლად საჭიროა სახელმწიფოს შესწავლის დროს. კერძოდ, როცა გვინდა გამოვარკვიოთ სახელმწიფოს სამხედრო ძლიერების დონე, გვინდა შევისწავლოთ მისი სამხედრო ძალები და საშუალებანი, შესწავლის ობიექტებში აუცილებლად გეოგრაფიული მონაცემებიც უნდა იგულისხმებოდეს. მაგრამ მილუტინს თავისებურად ესმის თვით სახელმწიფოს შესწავლის საკითხი. იგი სახელმწიფოს შემსწავლელ დისციპლინად გეოგრაფიას კი არ მიიჩნევს, არამედ სტატისტიკას და აქედან სახელმწიფოს სამხედრო მხრივ შესწავლაც, მისი ღრმა რწმენით, სამხედრო სტატისტიკამ უნდა აწარმოოს და არა სამხედრო გეოგრაფიამ. ამ თავის შეხედულებას, რომელსაც, აქვე ვიტყვით, დღეს არავინ არ იზიარებს, მილუტინი, როგორც ვიცით, შემდეგი მოსაზრებებით ასაბუთებს: გეოგრაფია ცოდნის ისეთი დარგია, რომელიც ყველა სხვა მეცნიერებისათვის გამოსადგე ცნობათა დაგროვებას, აღწერას, აღწერას აწარმოებს, ის არც ერთ საკითხს არ იკვლევს, მას არა აქვს კვლევისათვის საჭირო გარკვეული თვალსაზრისი, ზოგად იდეასა და დასკვნას არ იძლევა, ამდენად არც მეცნიერებაა იგი; გეოგრაფიის საგანს არ შეიძლება შეადგენდეს ადამიანის, საზოგადოებრივი ცხოვრების, პოლიტიკური ვითარების შესწავლა; გეოგრაფია მუდამ იყო და მომავალშიაც უნდა დარჩეს თავისი სახელის ეტიმოლოგიური მნიშვნელობის ერთგული და, მაშასადამე, დედა-

მიწის ზედაპირის აღმწერი ცოდნის დარგი; სახელმწიფოს, როგორც პოლიტიკური სხეულის, შესწავლა სტატისტიკის საქმეა; სტატისტიკა პოლიტიკური მეცნიერებაა, რომელიც შეისწავლის სახელმწიფოს ცხოვრების ყველა მხარეს მოცემულ მომენტში, დროის ერთ განსაზღვრულ მონაკვეთში; სტატისტიკამ სახელმწიფოს შესწავლის დროს უნდა გამოიყენოს გეოგრაფიული მონაცემებიც; გეოგრაფია ამ შემთხვევაში სტატისტიკას უნდა დაექვემდებაროს; რა ურთიერთობაცაა გეოგრაფიასა და სტატისტიკას შორის სახელმწიფოს შესწავლის საქმეში, იგივე ურთიერთობაა სამხედრო გეოგრაფიასა და სამხედრო სტატისტიკას შორისაც სახელმწიფოს სამხედრო მხრივ შესწავლის საქმეში. ამ შეხედულებათა მქონე მილუტინი, ბუნებრივია, რომ არ ეთანხმებოდეს აქ აღნიშნულ სამხედრო გეოგრაფებს მათს მოსაზრებებში სამხედრო გეოგრაფიის არსის შესახებ.

დ. ა. ნილუტინის აზრით არც ერთი ზემოხსენებული სამხედრო გეოგრაფი სწორ პოზიციასზე არ დგას. მას უსარგებლო თხზულებებად მიაჩნია ისეთი ნაშრომები, სადაც მოცემულია მხარის დაწვრილებითი ტოპოგრაფია ყველა იმ კერძო მოვლენით, რომლებიც ჩვეულებრივ გეოგრაფიულ ნაწერებში გვხვდება, როგორიცაა: ყველა ნაკადული, ყველა გზა, ყველა თუნდაც პატარა ხიდი, ჭაობი, ტყე და სხვ., რადგან ფიქრობს, რომ, თუმცა აუცილებლად საჭიროა გვექონდეს ცნობები ყველა ამ ადგილობრივ მონაცემზე ომის საწარმოებლად ტაქტიკურ მოქმედებათა მხრივ იმდენადვე, რამდენადაც დაწვრილებითი ტოპოგრაფიული რუკები, მარშრუტები, აღწერილობანი მხარის შესანიშნავი პუნქტებისა და ნაწილებისა, მაგრამ ყველა მსგავსი ცნობა, გულმოდგინედ შეკრებილი მშვიდობიანობის და ომიანობის დროს და შენახული გენერალური შტაბის არქივებში, არ შეიძლება შესწავლილ იქნას დასახსომებლად და არც შეიძლება შეადგენდეს განსაკუთრებულ თხზულებათა საგანს—ეს მშრალი ნომენკლატურა არაფერს არ მოგვცენს, თუ განუწყვეტლივ არ იწარმოებს მისი შევსება და შესწორება ახალი ცნობებით, ვინაიდან ყველა აღნიშნული ადგილობრივი მონაცემი დაუსრულებლად იცვლება: გაჰყავთ ახალი გზები, ნუშავდება ახალი მიწები, იჩეხება ტყეები, აშრობენ ჭაობებს, ტბორებებად აკუმებენ ნაკადულებს და ა. შ. რას მოგვცემდა ყველა ამ წვრილმანი ცნობის გულდასმით შესწავლა? და რომელი ადამიანი ური ნეხსიერება დაიჩვენა ამგვარ უნაყოფო სწავლას? ამავე დროს თვით ყველაზე უფრო დაწვრილებითი კრებულებიც კი მოკლებულია იმ სისრულეს, რომელიც დააკმაყოფილებდა სამხედრო მოქმედებათა ყველა მოთხოვნილებას; რაოდენ გულმოდგინედ ცდილობენ მთავ-

რობები მშვიდობიან დროს შეკრიბონ მსგავსი ცნობები მეზობელი ქვეყნების შესახებ, მაგრამ სამხედრო მოქმედებათა დაწყების წინ და მათი მსვლელობის დროს აუცილებელი ხდება კიდევ რეკოგნოსცირება, ადგილზე დათვალიერება, შედგენა პოზიციების მარშრუტებისა, გეგმებისა და ა. შ. ამაში მდგომარეობს ერთი უმთავრეს მიზანთაგანი ყველა არმიასი გენერალური შტაბის დაარსებისა. მილუტინი არც იმ სამხედრო გეოგრაფთა აზრს იზიარებს, რომელთა შეხედულებით სამხედრო გეოგრაფიაში აღწერილი უნდა იყოს არა მარტო ადგილის ყოველი წვრილმანი მოვლენა, არამედ ამასთანავე აუცილებელია განვიხილოთ ისინი თვით სამხედრო მოქმედებათა თვალსაზრისითაც. მილუტინს შეუძლებლად მიაჩნია ყველა შემთხვევის წინასწარ გათვალისწინება. მისი აზრით ერთი და იგივე ადგილობრივი საგანი ორ სხვადასხვა შემთხვევაში სრულიად ერთი მეორის საწინააღმდეგო მნიშვნელობის შეიძლება აღმოჩნდეს და მივიღებთ უსასრულო სხვადასხვაობას. წინასწარ განსაზღვრა ყველა გზისა კოლონის მოძრაობისათვის, ბრძოლის პოზიციებისა და საბანაკო ადგილებისა, ეს იქნებოდა გამოვლენებოდი თქმერას. მილუტინი ეთანხმება როონის მოსაზრებას, რომ სამხედრო გეოგრაფიაში ყოველი ქვეყანა ისე უნდა იყოს აღწერილი, რომ გამოიხატოს მისი ფიზიონომიის ის დამახასიათებელი ნიშნები, რომელთაგან, დამოკიდებულია თვით მნიშვნელობა მთელი ქვეყნისა სამხედრო მხრივ, ტოპოგრაფიულ წვრილმანებში შექრა კი როონს საჭიროდ არ მიაჩნია. მაგრამ მილუტინი შენიშნავს, რომ როონის ნაშრომი სწორედ ასეთ წვრილმანებს შეიცავს, რომელთა დასწავლა შეუძლებელია. ჰანცოვის, მაინეკეს, მალხუსის, ანდრეს და რუდტორფერის ნაშრომების შესახებ მილუტინი ამბობს, რომ ისინი გეოგრაფიულ და სტატისტიკურ ცნობათა კარგი კრებულებია, რომელთაც სამხედრო გეოგრაფია ეწოდებათ იმიტომ, რომ შეკრებილი ცნობები ავტორებს მიაჩნიათ სასარგებლოდ უპირატესად სამხედროთათვის ან სამხედრო მოქმედებათა შესახებ მოსაზრებებისათვის. თუ სამხედრო გეოგრაფია, დასძენს მილუტინი, იქნება ზოგად გეოგრაფიულ თხზულებათაგან ამოკრებილი ფაქტების კრებული, დანიშნული საკუთრივ საცნობაროდ სამხედრო მკითხველთათვის, სამხედრო გეოგრაფიის ასეთი განსაზღვრების შეწყნარება უკვე აღარ იძლევა საშუალებას ითვლებოდეს იგი სამხედრო მეცნიერებათა განსაკუთრებულ დარგად, ვინაიდან ფაქტიურ ცნობათა ყოველი კრებული, რაგინდ კარგად იყოს იგი შედგენილი, შესწავლის განცალკევებულ, თვითმყოფ საგანს ვერ შეადგენს. თუ გეოგრაფია გადმოცემულია სისტემატი-

კურ სახელმძღვანელოებში და ისწავლება სკოლებში;—ეს მხოლოდ და მხოლოდ ელემენტარული საგნის ოდენობითა და მნიშვნელობით, რომლის შესწავლა აუცილებლად სჭირდება ყოველ განათლებულ ადამიანს. მაშასადამე, თუ სამხედრო გეოგრაფიაც უნდა შედგებოდეს ზოგადი გეოგრაფიიდან ამოკრებილი მხოლოდ ფაქტიური ცნობებისაგან, ამ შემთხვევაში ისიც შეიძლება აგრეთვე ყოფილიყო მხოლოდ ელემენტარული სახელმძღვანელო, შეფარებული სამხედრო სკოლებისათვის, ან უბრალოდ საცნობარო საკითხების კრებული, მსგავსად სიტყვარებისა. მილუტინი ეხება ზოგიერთი ავტორის ცდას ააშორონ სამხედრო გეოგრაფიას ელემენტარული სახელმძღვანელოს ან მშრალი საცნობარო ხასიათის კრებულის დანიშნულება და მისცენ მას ერთგვარი სპეციალური და დამოუკიდებელი ხასიათი. რუდტორფერის შეხედულება, რომ გეოგრაფიული პირობები განსაზღვრავენ იმ პუნქტებს, რომლებზედაც არმიები უნდა შეხვდნენ ერთმანეთს გარემოებათა მიუხედავად, ყოველგვარ ვითარებაში, მილუტინს არა სწორად მიაჩნია და ამბობს: ამით სამხედრო გეოგრაფიას ეძლევა სამხედრო ისტორიის გაგების წყაროს მნიშვნელობა და გამოდის, რომ ყოველ ეპოქაში არმიები უნდა შეხვდნენ ერთმანეთს აუცილებლად ერთსა და იმავე პუნქტზე „გარემოებათა მიუხედავად“. თითქმის არც ღირს შეუდგე იმის მტკიცებას,—შენიშნავს მილუტინი,—რომ სამხედრო მოქმედებათა მსვლელობა მარტოოდენ ადგილგარემოს პირობებზე არ არის დამოკიდებული, ვინაიდან ყოველ ომს თან სდევს თავისი სრულიად განსაკუთრებული გარემოებანი, მიზნები და მისწრაფებანი და ამიტომ ყოველი ადგილობრივი საგანი იცვლის თავის მნიშვნელობას სხვადასხვა ეპოქაში. ომის თეატრის სახეც იცვლება სხვადასხვა ეპოქაში. ახალი გზების გაყვანის, ახალი ხიდებისა თუ სიმაგრეების აგების, საზღვრების შეცვლისა და სხვა მიზეზების გამო. მილუტინს შედარებით უფრო მოსწონს ბენიკენის აზრი, მაგრამ შენიშნავს, რომ თვით შესრულება ამ აზრისა ავტორის განზრახვას არ ეფარდება. მისი სტატიები შეიცავს მშრალ ნომენკლატურას, ეს ნომენკლატურა არ არის შეკავშირებული არავითარი იდეით, არც მოსაზრებებით, მაშასადამე, არ გვაძლევს არავითარ წარმოდგენას სახელმწიფოს ძალებსა და საშუალებებზე, საცნობარო წიგნადაც ვერ გამოდგება იგი. ლავალეს შეხედულების შესახებ მილუტინი ამბობს: ეს აზრი მეტად ორიგინალურია, მაგრამ სამწუხაროდ სრულიად დამოუყენებელი. დედამიწის ზედაპირის მსგავსი შესწავლა მეტისმეტად ტვირთავს მესხიერებას და მას არავითარ დასკვნებამდე არ მივყავართ. სხვა-

დასხვა ეპოქაში გეოგრაფიული საგნების მნიშვნელობა სამხედრო და პოლიტიკური მხრივ იცვლება. თვით უმნიშვნელოვანესი ბუნებრივი მიჯნებიც კი ჰკარგავენ ხშირად ყოველგვარ მნიშვნელობას, რადგან ადამიანის ძალა ყოველ ნაბიჯზე სძლევეს ბუნებას და იმორჩილებს მას თავისი მიზნებისა და მოსაზრებებისათვის. იაზიკოვის იდეას—დაესახა სამხედრო გეოგრაფია თეორიულ მეცნიერებად, თვით სტრატეგიის თეორიის დარგად, მილუტინი განუხორციელებელ იდეად სთვლის და ამბობს: გეოგრაფია, რა სპეციალური მიზნითაც იყოს შედგენილი, ყოველთვის უნდა დარჩეს დედამიწის ზედაპირის აღწერად, ამა თუ იმ მიმართებაში. გეოგრაფიული ცნობები აუცილებლად უნდა ესებოდეს ერთ განსახილველ მომენტს. თუ ისინი, მსგავსად ისტორიული ფაქტებისა, შეიძლება გამოკვლეულ იქნას კრიტიკულად, თეორიის ზოგადი კანონების საფუძველზე, ასეთი გამოკვლევა მაინც ვერ შექმნის თვითონ თეორიას. რა თქმა უნდა, თეორია ემყარება მონაცემთა განხილვას და მათ ერთმანეთთან დაპირისპირებას, ზოგადი კანონებისა და ძირითადი საწყისების გამოსაყვანად. მაგრამ სწორედ ამის გამო თვით შესწავლა მონაცემთა, თუნდაც კრიტიკული, მხოლოდ მისალას წარმოადგენს თეორიისათვის. ასე, სამხედრო ისტორიაში, ყოველი ლაშქრობა შეიძლება განხილულ იქნას კრიტიკულად, მაგრამ ეს განხილვა ჯერ კიდევ შორს დგას სტრატეგიის თეორიისაგან. მით უფრო ნაკლებად მოხერხდება, რომ რაიმე ადგილობრივ მონაცემთა გამოკვლევა, მხოლოდ და მხოლოდ განსახილველ მომენტში, იქცეს ამ თეორიის ნაწილად. ომის თეატრების აღწერილობანი, გეოგრაფიულ მონაცემთა სტრატეგიული მნიშვნელობის კრიტიკული გამოკვლევით, გარდუვალად ეხებიან მხოლოდ ერთ ეპოქას, მეორე ეპოქისათვის კი ისინი გამოუსადეგარი არიან. ეს ადასტურებს, რომ ომის თეატრის სტრატეგიული გამოკვლევის დროს შეუძლებელია შემოვიფარგლოთ მარტოდენ გეოგრაფიული მონაცემებით და უგულებელვყოთ ყველა სხვა მოსაზრებანი, როგორც, მაგალითად, პოლიტიკური, ზნეობრივი და სხვ. და სხვ. ცალმხრივი იქნება ის სტრატეგიული თეორიები, რომლებიც დაემყარება მარტოდენ ერთი გვარობის მოსაზრებებს. შეიძლება თუ არა სამხედრო გეოგრაფიის მივეცეთ ადგილობრივ მონაცემთა კრიტიკული გამოკვლევის მნიშვნელობა სტრატეგიულ მიმართებაში?—ამაზე მილუტინი უარყოფითად უპასუხებს. იგი ამბობს: თუ სიტყვის ეტიმოლოგიურ და საყოველთაოდ მიღებულ მნიშვნელობას მივხედავთ, სამხედრო გეოგრაფია

უნდა შემოიფარგლოს მხოლოდ იმ მონაცემებით, რომლებიც ეხება დედამიწის ზედაპირის მოყვანილობას, ამიტომ, ცხადია, იგი ვერ მოჰკიდებს ხელს სტრატეგიულ გამოკვლევებს, არამედ იძულებულია დარჩეს ფაქტიურ ცნობათა უბრალო კრებულად, ამ შემთხვევაში იგი, რასაკვირველია, ვერ იქცევა შესწავლის ცალკე, დამოუკიდებელ საგნად. ხოლო, თუ ჩვენი მიზანი იქნება არა მარტოდენ ფაქტიური ცნობების შეძენა, არამედ ომის თეატრის ან მთელ სახელმწიფოთა კრიტიკულად გამოკვლევა, სტრატეგიულ მიმართებაში, მაშინ აუცილებელია მნიშვნელოვნად გავაფართოოთ მოსაზრებათა არე, მათ საფუძვლად მივიღოთ, ადგილის გარდა, ყველა ის მონაცემი, რომელიც ყოველ სახელმწიფოში საზოგადოდ საზღვრავს მის საშუალებებს და წესებს ომის წარმოებისათვის, ვარგისობა და არახელსაყრელობა გეოგრაფიული, ეთნოგრაფიული და პოლიტიკური მდგომარეობისა, ზოგად სამხედრო მოსაზრებათა მიმართებაში, აქედან კი გამოკვლევა გავრცელდება სახელმწიფოს თითქმის მთელ შედგენილობაზე და უკვე ზოგადი მიზნისაკენ მიგვიყვანს: სახელმწიფოს ძალისა და ძლიერების განსაზღვრისაკენ სამხედრო მხრივ. ასეთი მიზანი მართლა შეიძლება მოგვეცემს ცალკე და მეტად მნიშვნელოვან შესასწავლ საგანს, მაგრამ საკუთრივ ადგილობრივი მონაცემები, რომელნიც განსაზღვრავენ სახელმწიფოს ხელსაყრელ და არახელსაყრელ სტრატეგიულ პირობებს, მის ძლიერ და სუსტ მხარეებს, ამ გამოკვლევაში შევა როგორც ნაწილი დიდი მთელისა, და, მაშასადამე, ამ შემთხვევაში უკვე აღარ შეიძლება დავარქვათ შესწავლის მსგავს გვარეობას სამხედრო გეოგრაფია, უფრო წესიერი და მართებული იქნება ვუწოდოთ მას სამხედრო სტატისტიკა (გვ. 6—32).

გავარკვიოთ ცოტა უფრო დაწვრილებით როგორ დისციპლინად აქვს წარმოდგენილი მილუტინს სტატისტიკა საერთოდ და სამხედრო სტატისტიკა კერძოდ. მილუტინი ეხება სტატისტიკის ამოცანების საკითხს და ამბობს, რომ პირველ ხანებში სტატისტიკას მეტად განსაზღვრული მიზანი ჰქონდა დასახული: ხალხის და სახელმწიფოს მდგომარეობის უბრალო აღწერა. ასე ესმოდათ სტატისტიკის დანიშნულება მის მამათმთავართ — კონრინგს და ახენვალს, რომლებიც გერმანიაში პირველად შეუდგნენ ამ მეცნიერების გაშლას და სწავლებას. კონრინგმა (1660 წ.) პირველად დაიწყო მისი სწავლება, ხოლო ახენვალმა (1749 წ.) სახელი მისცა მას. თუმცა ამ გაგებით სტატისტიკა არსებობდა გაცილებით უფრო ადრეც: არა მარტო XVI და XVII საუკუნეებში,

როცა გაჩნდა ზოგიერთი თხზულება სხვადასხვა სახელმწიფოს მდგომარეობისა და წყობილების შესახებ — იტალიაში, გერმანიაში, პოლანდში, საფრანგეთში, არამედ ძველისძველ დროშიაც — ამგვარ მოძღვრებას მაშინ ერქვა *res publica, notitia publica*; ზოგი სტატისტიკის სახელს აწარმოებდა ლათინური სიტყვიდან *status* — მდგომარეობა, ზოგი კი გერმანული სიტყვიდან *Staat* — სახელმწიფო. ზოგის მიზანი იყო გაერკვია სახელმწიფოს წყობილება, სახელმწიფოს ღირსშესანიშნაობათა ერთობლიობა, სახელმწიფოს მდგომარეობა ან თვისება, ხალხის მატერიალური დოვლათი ან სახელმწიფოს ძალა და ძლიერება, ზოგისა ცივილიზაცია კი, ზოგმა სტატისტიკის მიზანი გაავრცელა სახელმწიფოს საშინაო და საგარეო ცხოვრებაზე, დაბოლოს ბუტემ მისცა ყველაზე უფრო ფართო განსაზღვრება ახენვალის მიერ შექმნილ მეცნიერებას: „სტატისტიკა არის სისტემატური გამოხატულება იმ მონაცემთა, რომელთა საშუალებით საფუძვლიანად გაეიგებთ — რა ხარისხით აღწევს სახელმწიფო თავის მიზანს რომელიმე განსაზღვრულ მომენტში, რომელშიაც აწმყო დრო იგულისხმება“. სტატისტიკაზე სხვადასხვა შეხედულება, მილუტინის აზრით, ეხებოდა არა იმდენად საქმის არსებით მხარეს, რანდენადაც ფორმას: ახენვალის სკოლის ყველა მწერალი დღემდე სტატისტიკაში ხედავდნენ მხოლოდ მონაცემთა აღწერას ან გამოსახვას, სცვლიდნენ მხოლოდ ამ მონაცემთა არჩევანს, აფართოვებდნენ ან ავიწროებდნენ მათ ფარგალს. მხოლოდ უკანასკნელ ხანაში ადამიანის ცოდნათა ყველა დარგმა იწყო ფაქტიურ ცნობათა ვიწრო ჩარჩოებიდან გამოსვლა და სწრაფვა ფიზიკურ, ზნეობრივ და სამოქალაქო სამყაროს მოვლენათა პრაგმატულ (მიზეზ-შედეგობრივ — დ. დ.) გამოკვლევისაკენ. ზოგიერთი მწერალი (ლუდერი, გატერერი) ძლიერ დაესხა თავს უსულო ჩონჩხს, სახელად სტატისტიკას, და ცდილობდა სული ჩაედგა მისთვის. იმავე დროიდან ბევრმა შესანიშნავმა მწერალმა დაიწყო სამოქალაქო ცხოვრების სხვადასხვა მოვლენის კრიტიკული გამოკვლევა: ყველა მონაცემი, რომელთა დაგროვება მოხერხდა აქამდე ხალხის სიმდიდრისა, მისი ფიზიკური და ზნეობრივი მდგომარეობის შესახებ, გახდა გულდასმითი ანალიზური დამუშავების საგანი, მიზეზთა და შედეგთა ასახსნელად სახალხო კეთილდღეობის განვითარების ანონების გამოსაყვანად. ზოგიერთი მწერალი სტატისტიკას მხოლოდ და მხოლოდ პრაქტიკული, უტილიტარული თვალსაზრისით უტყეობს, როგორც დამხმარე საშუალებას მთაურობათა აღმინისტრაციულ მოსაზრებათათვის და განკარგულებათათვის. ზოგის



აწრით იგი პოლიტიკური არითმეტიკაა, მისი არსი მარტო ციფრები, სტატისტიკა ზოგიერთებმა ალბათობის თეორიის დარგად აქციეს. ზოგმა (ნიმანმა), სამართლიანად სთვლიდა-რა, რომ მონაცემთა მარტოდენ აღწერას შეუფერებელი იქნებოდა მეცნიერების სახელი დარქმეოდა, და ხედავდა-რა, რომ თითქმის ყველა წინა დროის მწერალს აუცილებელ საჭიროებად მიაჩნდა თავის სტატისტიკისათვის დაერთო კიდევ სტატისტიკის თეორია (როგორც იმ კანონთა ახსნა, რომელთა საფუძველზე სტატისტიკოსს უნდა შეესწავლა მონაცემთა ყოველი გვარეობა), მისცა თვით თეორიას სტატისტიკის სახელი, ხოლო სტატისტიკა გამოჰყო თეორიისაგან სახელმწიფოთმცოდნეობის (Staats-Kunde) სახელწოდებით. ზოგმა—მხოლოდ ერთი მომენტის შესახები ფაქტიური ცნობები, როგორც ცვალებადი მონაცემები, განზე გადასდო, მონინდომა სტატისტიკის ამაღლება თეორიული ანუ დოგმატიკური მეცნიერების დონემდე, რომელიც მოახდენდა განყენებულ ჭეშმარიტებათა ან ზოგად კანონთა გამოყენას, რომელთა მიხედვით ყოველი სამოქალაქო საზოგადოება ყოველ დროს უნდა ვითარდებოდეს. ხოლო მოცემული დროის და ამა თუ იმ სახელმწიფოს ნამდვილი ფაქტების შესწავლა მთავრობათა და ადმინისტრაციათა პრაქტიკულ საქმედ ნიიხნიეს. მილუტინის განმარტებით ყველა პოლიტიკური მეცნიერების საერთო საგანია კაცობრიობა სამოქალაქო ცხოვრებაში, ნაშასადამე, სახელმწიფო მისი რთული ორგანიზმის ყოველგვარ გამოვლინებაში. ეს გამოვლინებანი შეიძლება შევისწავლოთ სხვადასხვანაირად: როგორც ძოვლენათა გვარეობის მიხედვით, ასევე მათი გამოკვლევის წესის ან მიზნის მიხედვით. ამის შედეგად თვით მეცნიერება დაიყოფა ბევრ ნაწილად და განყოფილებად, რაც შესწავლას გაგვიადვილებს. ეს დაყოფა ორგვარი უნდა იყოს: ერთი—დაფუძნებული პოლიტიკურ მეცნიერებათა გამოსაკვლევი საგნების კლასიფიკაციაზე, მეორე—დაფუძნებული გამოკვლევის მიზნებისა და წესების სხვადასხვაობაზე. კვლევა-ძიების მიზანი ორგვარია: მიზანი თეორიული ანუ დოგმატიკური, ზოგად კანონთა გამოსაყენად, რომელთა მიხედვით ყოველი სახელმწიფო ან ხალხი ვითარდება ან უნდა ვითარდებოდეს თავისი მიზნების მისაღწევად; მიზანი მეორეგვარი—ამ განვითარების ნამდვილი გამოვლინება, ამით გავარკვევთ ამა თუ იმ სახელმწიფოში ან ხალხში სახელდობრ როგორ ხდებოდა ან ხდება ეს განვითარება. პირველი მიზანი ჰქმნის მეცნიერებათა რიგს—თეორიულს ანუ დოგმატიკურს, მეორე—ბადებს კაცობრიობის

სამოქალაქო ცხოვრების შესწავლის ორ წესს: ან თანმიმდევრულ, ქრონოლოგიურ განვითარებაში—ისტორიული შესწავლა, ან მის გამოვლინებაში ერთ მოცემულ მომენტში—სტატისტიკური შესწავლა. ამგვარად, სახელმწიფოს სტატისტიკური შესწავლა, ერთის მხრივ, მოიცავს პოლიტიკური სხეულის რთული ორგანიზმის ყველა ნაირგვაროვან მოვლენას, მეორე მხრივ, მისი ფარგალი განისაზღვრება შესწავლის თვით მიზნით, რომელიც მდგომარეობს არა ზოგად კანონთა გამოყენებაში, რომელთა მიხედვით ყოველი სახელმწიფო და ყოველთვის უნდა ვითარდებოდეს, არამედ მოცემული სახელმწიფოს ნამდვილი განვითარების ჩვენებაში მხოლოდ ერთ მოცემულ მომენტში (უფრო ხშირად თანამედროვე ეპოქაში). ამგვარად, სტატისტიკა შუალა ადგილს დაიკავებს ორი სკოლის უკიდურესობას შორის, რომლებიც მას ორ ერთი მეორის სრულიად საწინააღმდეგო მნიშვნელობას აძლევენ: იგი არ დაეწეება მონაცემთა ან მოვლენათა უბრალო აღწერის დონემდე, რადგან მან ანალიზურად უნდა გამოიკვლიოს ისინი, გარკვეული მიზნით. მეორე მხრივ, იგი არ გადდის თეორიულ მეცნიერებათა რიგში, პოლიტიკურ მეცნიერებათა სხვა დარგებს დაუთმობს ზოგადი კანონების გამოყენებას. ეს არ შეუშლის მას ხელს იყოს ფრიად სასარგებლო, გვემსახუროს თეორიული დასკვნების გამოყენებისათვის ემპირიულ საწყისად და ამავე დროს გვიანდელმდევანელოს პრაქტიკულ გამოყენებათა სფეროშიაც. შესწავლის სხვადასხვა გვარობა ერთი მეორისაგან მკვეთრად არ გამოიყოფა, პირიქით, შეუძლებელიცაა გვერდი ავუქციოთ მათ შერწყმას. მეტსაც ვიტყვი—შესწავლის სამივე წესის (თეორია, ისტორია, სტატისტიკა) ურთიერთ დახმარება აუცილებელია. თეორია, გამოყვანილი გონების მხოლოდ განყენებული საწყისებიდან (à priori), ხშირად მერყეობს, თუ მას არა აქვს ემპირიული, ცდისეული საყრდენი, თუ განყენებული დასკვნები არ მოწმდება ყოველ ნაბიჯზე ისტორიისა და სტატისტიკის ფაქტებით. მეორე მხრივ, არც ისტორიული და სტატისტიკური შესწავლაა სახელმწიფოსი შესაძლებელი, მტკიცე თეორიული საფუძვლის გარეშე, დოგმატიკურ მეცნიერებათა ხელმძღვანელი აზრის გარეშე. ეს ცოტაა: სტატისტიკოსს არ შეუძლია და არც უნდა იზღუდავდეს თავს ფაქტებით, რომელნიც მხოლოდ ერთ მომენტს ეხება; იგი ვერავითარ დასკვნას ვერ გამოიმუშავებს მოვლენათა ერთმანეთთან დაპირისპირების გარეშე მათს თანმიმდევრულ კავშირში. ბოლოს, კაცობრიობის სამოქალაქო ცხოვრების მოვლენათა ყოველი გვარობა შეიძლება გამოკვლევულ იქნას ერთობლიობაში—ისტორიულ განვი-

თარებაშიაც, თანადროულ ნამდვილ გამოვლინებაშიაც (ანუ რომელიმე მოცემულ მომენტშიაც) და ზოგადი კანონების საზიოთაც ე. ი. თეორიულადაც. სწორედ ამ აზრით შეიძლება ითქვას, რომ სტატისტიკის ყოველ ნაწილს აქვს მისი შესაბამისი თეორიის ნაწილიც. ამით სტატისტიკის შინაარსს და საგანს ეძლევა ძლიერ ფართო გასაქანი მიუხედავად იმისა, რომ მისი მიზანი და კვლევის წესი ისახლეობა. სტატისტიკა თავისი გამოკვლევებით უნდა მოიცავდეს სახელმწიფოს ყველა ნაირგვაროვან მიზანს და წესს, მათს ნამდვილ გამოვლინებაში, მოცემულ მომენტში. მხოლოდ მაშინ შეიძლება მიიღოს სტატისტიკურმა შესწავლამ სისასვე და მთლიანობა თეორიულ მეცნიერებათა მსგავსად. მაგრამ სახელმწიფოს მექანიზმი დღეს ისე რთულია, მისი ძალების გამოვლინება ისე მრავალგვარია, რომ სტატისტიკა გადაიქცეოდა ვეებერთელა და მრავალგვაროვან დისციპლინად, და თუნდაც ერთი სახელმწიფოს ყოველმხრივი შესწავლა ისევე ძნელი იქნებოდა, როგორც ყველა თეორიული მეცნიერების ერთ მთელად გაერთიანება. სტატისტიკა უნდა დაიყოს იმდენივე დარგად, რამდენადაც თეორია—მისი ყოველი ნაწილი ცალკე სპეციალობას უნდა შეადგენდეს. მაგრამ ცალმხრივი რომ არ შეიქნეს იგი, უნდა შეეხოს სახელმწიფოს ცხოვრების ყველა მხარეს, ყველა მიზანს და საშუალებას. ამისათვის საშუაადისია საჭირო, ყოველი ნაწილი ცალკე უნდა დამუშავდეს. პოლიტიკურ მეცნიერებათა თეორიული ნაწილი წინ ვერ წავიდოდა, რომ არ დაყოფილიყო ცალკე მეცნიერებებად და თითოეული მათგანი ცალკე სპეციალისტის შესწავლის საგნად არ ქცეულიყო. ჯერ უნდა გაკეთდეს ეს, მერმე მოხდება ამ ნაწილების დაახლოება და ერთ მთელად გაერთიანება.

ასე განმარტავს მილუტინი სტატისტიკის საგანს, მის მიზანსა და ამოცანებს, მის ადვილს სხვა მეცნიერებათა შორის და მისი განვითარების მომავალს. სამხედრო სტატისტიკის შესახებ კი მილუტინი შემდეგს ამბობს: სტატისტიკას მუდამ რჩებოდა განხე სახელმწიფოს სა მ ხ ე დ რ ო ძ ა ლ ა. ეს სპეციალისტებმა უნდა გააკეთონ. ცივილიზაციის წარმატება და ომების შეწყვეტის მოლოდინი, სამუდამო მშვიდობიანობა—ჰიპოთეზური ოცნებაა. პოლიტიკურ მეცნიერებათა საგანი არ შეიძლება იყოს უტოპია, ისინი გამოცდილებას უნდა დაემყარონ. ჩვენ უნდა შევეხოთ ადამიანთა მოდგმას იმ სახით, როგორიცაა იგი დღეს, და არა, როგორც შეიძლება ან უნდა იყოს იგი. მით უფრო სტატისტიკაში, რომელიც საზოგადოებათა სამოქალაქო ცხოვრების ნ ა მ დ ვ ი ლ გამოვლინებებს

გვაცნობს, ეს საზოგადოებანი უნდა იყოს განხილული ისე, როგორც არიან დღეს, და არა ისე, როგორც გესურდა გვენახა ისინი. პოლიტიკურ მეცნიერებებში სახელმწიფოს სამხედრო ძალას საკმაოდ საპატიო ადგილი უნდა დაეთმოს. Si vis pacem, para bellum (ვისაც მშვიდობიანობა სურს, იგი ემზადოს ომისათვის—დ. დ.). სტატისტიკის სწორედ ამ ნაწილს შეგვიძლია დავარქვათ სამხედრო სტატისტიკა, რომლის მიზანიც უნდა იყოს სახელმწიფოების ძალთა და საშუალებათა გამოკვლევა სამხედრო მხრივ მოცემულ მომენტისათვის. წინათაც ასე ეს-ზოდათ სამხედრო სტატისტიკის ამოცანები, მაგრამ არსებითად მას ვიწრო ვნიშვნელობას აძლევდნენ, რადგან სამხედრო ძალაში გულისხმობდნენ მხოლოდ საკუთრივ შეიარაღებულ ძალებს; ამიტომაც იფარგლებოდნენ ჯარების აღრიცხვით და მათი წყობილების აღწერით, მაშინ როდესაც ეს საგანი სამხედრო სტატისტიკის მხოლოდ ნაწილს უნდა შეადგენდეს, სწორედ ისე, როგორც მარტო ერთი ჩამოთვლა ფაბრიკებისა და ქარხნებისა ვერ მოგვცემს სახელმწიფოს სამეურნეო სტატისტიკას. სამხედრო სტატისტიკა ზოგადი სტატისტიკის მხოლოდ ნაწილია ან სახეობა, ამიტომ იგი პოლიტიკურ მეცნიერებათა რიგს ეკუთვნის; მაგრამ ამავე დროს იგი უნდა ემყარებოდეს აუცილებლობის გამო სამხედრო ხელოვნების მითითებებსა და მოთხოვნილებებს, მაშასადამე, იგი თავის კვლევაში სტრატეგიის თეორიით და სამხედრო ადმინისტრაციის თეორიით უნდა ხელმძღვანელობდეს, სწორედ ისე, როგორც პოლიტიკური ეკონომიით და ფინანსების თეორიით ხელმძღვანელობს სამეურნეო და საფინანსო სტატისტიკა. სამხედრო ხელოვნების თეორია თავის უმაღლეს ნაწილებში მჭიდროდ უკავშირდება თითქმის ერწყმის კიდევ პოლიტიკურ მეცნიერებათა დისციპლინებს, რადგან თვითონ ომი სახელმწიფოს პოლიტიკური ცხოვრების ერთ-ერთი გამოვლინებაა. ამიტომ სამხედრო სტატისტიკა შეიძლება იმდენადვე მივაკუთვნოთ პოლიტიკური შესწავლის საგნებს, რამდენადაც სამხედრო ცოდნათა წრეს (იხ. ციტირ. ნაშრომი, გვ. 40—55).

ასეთია მილუტინის შეხედულებანი სამხედრო სტატისტიკაზე. ამ საკითხს ასე დაწვრილებით იმიტომ ვავეცანით, რომ მილუტინმა, როგორც ვთქვი, სამხედრო გეოგრაფია ამ სამხედრო სტატისტიკაში ჩააქსოვა, როგორც მისი ერთ-ერთი ნაწილი. მაგრამ სამხედრო გეოგრაფია სამხედრო სტატისტიკაში მოექცა თავისებური გაგებითა და ვნიშვნელობით: სამხედრო გეოგრაფია მეცნიერება არაა,

უქრობს მილუტინი, იგი მხოლოდ ერთიმეორესთან დაუკავშირებელ, გაანალიზებას მოკლებულ ცნობებს წარმოადგენს. ეს ცნობები, როგორც მასალა, შედის სამხედრო სტატისტიკაში, რომელიც უკვე შეცნაურებაა, რადგან ის საგნებსა და მოვლენებს იკვლევს, აანალიზებს, თავის აზრს ზოგად იღვავს და დასკვნად აქცევს. ამგვარად, მილუტინის სამხედრო სტატისტიკა უზრალს სახელის შეცვლა როდია სამხედრო გეოგრაფიისა, არამედ განსაკუთრებულ სამეცნიერო დარგს წარმოადგენს, რომელიც სამხედრო გეოგრაფიის ცნობებს თავისი მიზნებისათვის იყენებს.

რა ადგილი ეთნობა გეოგრაფიულ მონაცემებს მილუტინის სამხედრო სტატისტიკაში? მილუტინის სამხედრო სტატისტიკაში გეოგრაფიული მონაცემები წარმოდგენილია „როგორც ნაწილი დიდი მთელისა“. ეს იმით აიხსნება, რომ მილუტინს სამხედრო ძალა და სამხედრო საშუალებანი გაცილებით უფრო ფართო გაგებით ესმის, ვიდრე მის წინამორბედს. მისი გაგებით სამხედრო ძალა მარტო ჯარი როდია, ან თუნდაც მარტო შეიარაღებული ნაწილი ხალხისა, არამედ ყველა საშუალება და ღონისძიება საზოგადოდ ერთობლიობაში, რაც აუცილებელია სახელმწიფოში თავდაცვითი თუ შეტევითი ომის საწარმოებლად (გვ. 52). მილუტინის სამხედრო სტატისტიკა არ იფარგლება ჯარების აღრიცხვით და მათი წყობილების აღწერით, ეს საგანი მისი სტატისტიკის მხოლოდ ნაწილს შეადგენს. ის ამბობს: „სამხედრო ძალა მოიცავს საერთოდ ყველა საშუალებას, რაც კი სახელმწიფოს გააჩნია თავისი საგარეო უშიშროების უზრუნველსაყოფად ან თავისი პოლიტიკური მიზნების იარაღის ძალით მისაღწევად; აქედან სამხედრო სტატისტიკაც მოიცავს სახელმწიფოს თითქმის მთელ შედგენილობას, განიხილავს-რა მასში ყველა ელემენტს სამხედრო თვალსაზრისით, თავდაცვითი თუ შეტევითი ომის წარმოების საშუალებათა მიმართებაში. ამგვარად, სამხედრო სტატისტიკაში აუცილებლად უნდა შედიოდეს გეოგრაფიული მონაცემებიც იმ ხარისხით, რამდენადაც ამ მონაცემთა განოკლებვა აუცილებლად საჭიროა სახელმწიფოს სტრატეგიული პდგომარეობის გამოსარკვევად მეზობლების მიმართ, მისი თავდაცვისა და შეტევის საშუალებათა გასათვალისწინებლად. სამხედრო სტატისტიკის მსგავსი განსაზღვრებისაგან მისი დამოკიდებულება სამხედრო გეოგრაფიასთან თავისთავად ირკვევა; ვინაიდან ეს უკანასკნელი ხდება მასალად პირველისათვის; სამხედრო სტატისტიკა კი, კრებს-რა მონაცემებს სამხედრო გეოგრაფიიდან, აწარმოებს ამ მონაცემთა გამოკვლევას განსაზღვრული მიზნით და სხვა მონაცემებ-

თან კავშირში. სწორედ ასეთივე ურთიერთობაა სტატისტიკასა და გეოგრაფიას შორის საერთოდ — დაასკვნის მილუტინი (გვ. 54—55).

სამხედრო სტატისტიკის ასე განმარტება, როგორც მას მილუტინი იძლევა, ავტორის უნებლიეთ ხელს უშლის მისავე ცდას, მიმართულს იქითკენ, რომ სამხედრო სტატისტიკამ სამხედრო გეოგრაფიის ადგილი დაიკავოს. თუ კი სამხედრო სტატისტიკაში აუცილებლად უნდა შედიოდეს გეოგრაფიული მონაცემები სახელმწიფოს სტრატეგიული მდგომარეობის გამოსარკვევად, მისი თავდაცვისა და შეტევის საშუალებათა გასათვალისწინებლად, თუ კი სამხედრო გეოგრაფია მასალას აწვდის სამხედრო სტატისტიკას, სამხედრო სტატისტიკა კრებს მონაცემებს სამხედრო გეოგრაფიიდან, მაშინ საკმარისია შეეთანხმდე, რომ ამ მონაცემთა გამოკვლევის უფლებაც სამხედრო გეოგრაფიას ექნეს, და სამხედრო გეოგრაფია სამხედრო ცოდნის სრულუფლებიან დარგად, სამხედრო მეცნიერებად დარჩება. არ უნდა შეგვზღუდოს გეოგრაფიის სახელის ეტიმოლოგიურმა მნიშვნელობამ (მით უფრო, როცა ეს მნიშვნელობა შეიძლება გაგებულ იქნას ვიწროდ და ფართოდაც, ცნობილია, რომ ერატოსთენემ ჩვენს მეცნიერებას სახელი „გეოგრაფიკა“ უფრო მსახველობითი-გრაფიკული გაგებით უწოდა, მაგრამ შემდგომ ჩვენი გაგება სახელი გეოგრაფიისა გადახალისდა), არ უნდა შეგვზღუდოს აგრეთვე გეოგრაფიის განვითარების დონემ უძველეს ეტაპზე, როცა გეოგრაფია საგანთა და მოვლენათა აღნუსხვას და აღწერას აწარმოებდა მხოლოდ. ფაქტების დაგროვება არა მარტო გეოგრაფიის, არამედ ყველა სხვა დისციპლინისათვისაც დამახასიათებელი ეტაპი იყო ცოდნის ამ დარგთა ჩასახვის პერიოდში, ფაქტების გაანალიზება, მეცნიერული კვლევა, ზოგად იდეათა და დასკვნათა გამოყვანა კი შემდეგ დაიწყო. გეოგრაფიასაც ასე მოუხდა. ჯერ კიდევ მილუტინის დროსაც, მისივე თქმით, უძირითადესი საწყისებიც კი არ იყო სამხედრო გეოგრაფიისათვის განმტკიცებული, თითქმის ყოველი ავტორი უარყოფდა ყველაფერ ძველს და ცდილობდა შეექმნა რაიმე ახალი, მეცნიერებათა თვით სახელწოდებასა და მათ მნიშვნელობაშიაც ვერ ახერხებდნენ შეთანხმების მიღწევას და სამხედრო გეოგრაფიას ყოველი ავტორი თავისებურად საზღვრავდა (გვ. 5). ამ პირობებში არაბუნებრივად არ მიგვაჩნია, რომ თვით მილუტინიც ცდილიყო შეექმნა რაიმე ახალი. მაგრამ მილუტინის მიერ შექმნილი ახალი დარგი, მისი სამხედრო სტატისტიკა, ავტორის სურვილის წინააღმდეგ, ისევ ძველი, ნაცადი გზით, სამხედრო გეოგრაფიის სახელით წარიმართა. მილუტინის მიერ სამხედრო სტატისტი-

კისათვის გამიზნებული პროგრამული მოსაზრებანი მოვლენათა შემდგომმა განვითარებამ ისევ სამხედრო გეოგრაფიას განუკუთვნა. ამიტომაც, ჩვენც, სრულიად სამართლიანად, მილუტინს სამხედრო გეოგრაფიის ფუძემდებლად ვთვლით რუსეთში.

მაშ, ასე: მილუტინი ომის თეატრის ან მთელ სახელმწიფოს სტრატეგიულ მიმართებაში კრიტიკულად გამომკვლევ სამეცნიერო დარგად სამხედრო სტატისტიკას სთვლის, სამხედრო გეოგრაფიას კი აკისრებს გეოგრაფიულ მონაცემთა უბრალო აღმწერს და აღმწერი ცოდნის დარგის როლს. თუ კი ის შეიძლება, რომ სამხედრო სტატისტიკას სამხედრო გეოგრაფიის მასალა გადასცემოდა საკვლევად, ისიც უნდა ყოფილიყო შესაძლებელი, რომ მომხდარიყო პირიქით, გაძლიერებულიყო, გაღრმავებულიყო სამხედრო გეოგრაფია მასზე სამხედრო-სტატისტიკური ხასიათის მასალის გადაცემით; მაგრამ, არა, ეს მილუტინისათვის მიუღებელია, რადგან ჯერ ერთი — გეოგრაფიის თვით სახელწოდების ეტიმოლოგიური მნიშვნელობა მას ამის უფლებას არ აძლევს, ცოდნის ისეთ დარგს, რომელიც აღწერს ადამიანსა და მის გარემოს, აკვლევს ვერ აკისრებს, მეორე — ბუნებრივი ფაქტორების შემსწავლელ გეოგრაფიას არიდებს ადამიანის, საზოგადოების, სახელმწიფოს სოციალ-პოლიტიკური ცხოვრების შესწავლას. ყოველივე ამის შემდეგ გასაგებია, რათ აუქცია გვერდი მილუტინმა სამხედრო გეოგრაფიას, როგორც სახელმწიფოს სამხედრო მდგომარეობის შემსწავლელ დისციპლინას, და რათ მისცა სამხედრო სტატისტიკას უპირატესობა სახელმწიფოს სამხედრო ძალთა და საშუალებათა შესწავლის საქმეში.

არ შეიძლება არ აღინიშნოს, რომ თავის საერთო მსჯელობაში მილუტინი გზადაგზა ზოგიერთ ისეთ მოსაზრებასაც გამოთქვამს, რომელიც ჩვენთვის მისაღებია, მაგრამ, რამდენადაც ეს მოსაზრებანი მთლიანად მიმართულია სამხედრო გეოგრაფიის, როგორც სამეცნიერო დარგის, უგულებელყოფისაკენ და მისი სამხედრო სტატისტიკით შეცვლის ცდისაკენ, ამდენად ესენიც ნაკლებად დამაჯერებელ საბუთებს წარმოადგენენ მილუტინის საერთო შეხედულებათა სისწორისათვის.

მაგალითად, ჩვენც უდავოდ მიგვაჩნია, რომ თუ ჩვენი მიზანი იქნება არა მარტოდენ ფაქტიური ცნობების შექმნა, არამედ ომის თეატრის ან მთელ სახელმწიფოთა კრიტიკულად გამოკვლევა, სტრატეგიულ მიმართებაში, მაშინ აუცილებელია მნიშვნელოვნად გავაფართოვოთ მოსაზრებათა არე, მათ საფუძვლად მივიღოთ, ადგილის გარდა, ყველა ის მონაცემი, რომელიც ყოველ სახელმწიფოში სა-

ზოგადოდ სახლგრავეს მის საშუალებებს და წესებს ომის წარმოებისათვის, ვარგისობა და არახელსაყრელობა გეოგრაფიული, ეთნოგრაფიული და პოლიტიკური მდგომარეობისა, ზოგად სამხედრო მოსაზრებათა მიმართებაში, აქედან კი გამოკვლევა გავრცელება სახელმწიფოს თითქმის მთელ შედგენილობაზე და უკვე ზოგადი მიზნისაკენ მიგვიყვანს: სახელმწიფოს ძალისა და ძლიერების განსაზღვრისაკენ სამხედრო მხრივ. ისიც მისაღებია, რომ ომის თეატრის სტრატეგიული გამოკვლევის დროს შეუძლებელია შემოვიფარგლოთ მარტოდენ გეოგრაფიული მონაცემებით და უგულებელვყოთ ყველა სხვა მოსაზრებანი, როგორც, მაგალითად, პოლიტიკური, ზნეობრივი და სხვ. და სხვ. ცალმხრივი იქნება ის სტრატეგიული თეორიები, რომლებიც დაემყარება მარტოდენ ერთი გვარეობის მოსაზრებებს. კიდევ უფრო მისაღებია მილუტინის შეხედულება ხალხის ცხოვრებისა და ბუნების პირობების ურთიერთდამოკიდებულების შესახებ, რომ მარტოდენ ქვეყნის ადგილობრივი თვისებები არ აპირობებენ ხალხთა და სახელმწიფოთა ცხოვრებას. სავსებით სწორი შეხედულებისაა მილუტინი აგრეთვე მეცნიერების შესახებ საერთოდ, როცა ამბობს, რომ მარტოდენ მონაცემთა აღრიცხვა, რაგინდ სისტემატური წესით დალაგდეს ისინი, ჯერ კიდევ ვერ შესძლებს მეცნიერების შექმნას, მეცნიერებას ჰქმნის არა მარტო ერთი აღწერა მონაცემთა ან მოვლენათა, არამედ ის ლოგიკური ანალიზი, რომლითაც ეს კერძო მონაცემები ან მოვლენები შეირწყმებიან იდეათა ერთ მოხდენილ მთლიანობად. მეცნიერება ვერ დაკმაყოფილდება მარტოდენ ფაქტიური ცნობებით, იგი მოითხოვს ყოველი საგნის კრიტიკულ გამოკვლევას, სხვადასხვა მონაცემის ერთმანეთთან დაპირისპირებას და მათზე მსჯელობას ზოგად იდეათა და დასკვნათა გამოსაყვანად. ნაწილობრივ ისიც მართალია, რომ არაა საჭირო და თითქმის შეუძლებელიცაა აიწეროს ადგილის ყოველი წვრილმანი მოვლენა მათი განხილვით სამხედრო თვალსაზრისით, რადგან ყველა შესაძლო შემთხვევის წინასწარ გათვალისწინება ვერ ხერხდება. მაგრამ ეს და ზოგიერთი სხვა მართალი აზრი მაინც, ვიმეორებთ, დამაჯერებელს ვერ ხდის მილუტინის ძირითად არასწორ კონცეპციას გეოგრაფიის და კერძოდ სამხედრო გეოგრაფიის არსისა და კომპეტენციის ფარგლების შესახებ.

დაუმორჩილა-რა სამხედრო გეოგრაფია სამხედრო სტატისტიკას, მილუტინმა სახელმწიფოს სამხედრო ძალთა და საშუალებათა შესწავლაში დომინირებული ადგილი მიაკუთვნა ისეთ საკითხებს, როგორიცაა სახელმწიფო წყობილება, დადგენილებანი, ფინანსები,



სამხედრო სისტემა, შეიარაღებული ძალები და ა. შ., გეოგრაფიული საგნები და მოვლენები კი თითქმის სრულიად მიჩქმალა, ან, უკეთ რომ ვთქვათ, მათ მხოლოდ იმდენად შეეხო, რამდენადაც ქვეყნის სტრატეგიული მდგომარეობის გამოსარკვევად გამოადგებოდა. ამან თავი იჩინა არა იმდენად პროგრამაში, რომელიც მილუტინმა შექმნა სამხედრო სტატისტიკისათვის და რომელსაც გავეცნობით წინამდებარე ნაშრომის მეხუთე თავში, სადაც სამხედრო გეოგრაფიის თემატიკას განვიხილავთ, რამდენადაც ამ პროგრამის მიხედვით ავტორის მიერ შედგენილ თხზულებაში—„პირველი ცდანი, სამხედრო სტატისტიკისა“ (იხ. „Первые опыты военно-статистики“, წიგნი I, რომელშიაც მეთოდოლოგიური ხასიათის სტატიის გარდა სამხედრო გეოგრაფიისა და სტატისტიკის მნიშვნელობის შესახებ, რომელიც ნაშრომს შესავალის სახით აქვს წინ წამძღვარებული, მოთავსებულია „გერმანიის კავშირის პილიტიკური და სამხედრო სისტემის საფუძვლები“, აგრეთვე წიგნი II „პრუსიის სამეფოს სამხედრო სტატისტიკა“; პირველი წიგნი გამოცემულია 1847 წელს, ხოლო მეორე წიგნი—1848 წელს). მილუტინს კარგად ჰქონდა ვათვალისწინებული სხვა სამხედრო ავტორთა ცდა—მოეცათ თავის თხზულებებში გეოგრაფიული მონაცემები არა ქვეყნის გეოგრაფიული დახასიათებისათვის, არამედ თავისი საკუთარი იდეების განსამარტავად ან რაიმე სტრატეგიულ დასკვნათა გამოსაყვანად. მან იცოდა, რომ საეციალურ სამხედრო-გეოგრაფიულ თხზულებათა გარდა, ან ქვეყნის სამხედრო აღწერისა და ომის თეატრის სტრატეგიული განხილვის შემცველ ნაშრომთა გარდა, რომლებშიაც ზოგადი სტრატეგიული მსჯელობა კი არაა, არამედ კერძო, ცალკეული შენიშვნები სხვადასხვა გეოგრაფიულ საგანზე, ბევრგან გვხვდება აგრეთვე „ომის თეატრების აღწერა მათი სტრატეგიული თვისებების გამოკვლევით. თითქმის ყველა მწერალი, რომელთაც გადმოცემული აქვთ რომელიმე ლაშქრობის ან ომის ისტორია, იწყებდნენ იმ ადგილის მიმოხილვით, სადაც სამხედრო მოქმედებანი სწარმოებდა, ზოგჯერ კი მსჯელობდნენ გეოგრაფიულ, სტატისტიკურ და პოლიტიკურ მონაცემებზე, ომის ზოგადი გეგმის მოხაზვისა და მათ მიერ აღწერილი ამბების მიმართებაში. მსგავსი ნაწყვეტები გვხვდება გენერალ ჟომინის, კლაუზევიცის, ბუტურლინისა და სხვათა და სხვათა თხზულებებში. ცხადია, ყველგან მსჯელობა ეხება მხოლოდ და მხოლოდ გარკვეულ ეპოქას, რომელზედაც ავტორი მოგვითხრობს, ეს მსჯელობა ემყარება საქმის თანადროულ მდგომარეობას და სხვადასხვა მოსაზრებას, რომელნიც გეოგრაფიულ მონა-

უვითა წრეს არ ეკუთვნიან. დაასრულ ბევრ თხზულებაში გვხვდება ცალკეული აზრები ზოგიერთი გეოგრაფიული პუნქტისა და ხაზის სტრატეგიული მნიშვნელობის შესახებ, რაც ხმარდება ავტორთა იდეების განმარტებას, ან რაიმე სტრატეგიული დასკვნების გამოყვანას“ (იხ. დასახელებული წიგნი I, გვ. 29). ამის მცოდნე ავტორისაგან შეიძლება მოლოდინი გექონოდა, რომ იგი მაინც გამოასწორებდა შემჩნეულ ნაკლს და ქვეყნის სამხედრო-გეოგრაფიული დახასიათების დროს თვალსაჩინო ადგილს დაუთმობდა გეოგრაფიულ მიმოხილვებს. მაგრამ მილუტინი ამის მაგალითს არ გვაძლევს. მისი კრძალვა და ზიდი, გამოთქმული ნაშრომის შესავალში, რომ „აღნიშნული მოსაზრებანი სამხედრო გეოგრაფიისა და სამხედრო სტატისტიკის მნიშვნელობის შესახებ დაგვრჩენია მხოლოდ გაეშალოთ და დავადასტუროთ თვით საქმეზე შესრულებით: რაგინდ ძნელი იყოს ეს წამოწყება, რაგინდ მცირე იმედს იძლეოდეს იგი წარმატებისათვის, მაინც წარმოვადგენთ მკითხველთა სამსჯავროს წინაშე ზოგიერთს ჩვენს ცდასაო“ (გვ. 69),—ნათლად უსაფუძვლოც არ შეიქნა: ნაშრომის ერთ ნაწილში, სადაც, ჩვენის აზრით, გეოგრაფია სრულად უნდა ყოფილიყო წარმოდგენილი, ის თითქმის არც კი ივრძნობა და ტივტივებს ავტორის საერთო პოლიტიკური მსჯელობის მორევში. ამას ისიც დაგვიმოწმებს, რომ 33-გვერდიანი მიმოხილვა, რომელშიაც მოცემულია ქვეყანა (ტერიტორია), ქვეყნის ტოპოგრაფიული ხასიათი, სამიმოსვლო გზები, ჰავა, ნიადაგები, მეურნეობა, მოსახლეობა, ამ საკითხებს შორის მოცულობის მხრივ ისეა განაწილებული, რომ უმეტესი დრო და ადგილი სოციალ-ეკონომიურ საკითხებს ეთმობა. სახელდობრ, ქვეყნის მდებარეობა, ფართობი, სანაპირო ზღვები, მცხოვრებთა რაოდენობა და ქვეყნის სახელმწიფოებრივი შედგენილობა მოცემულია 12 ბჭკარში; ქვეყნის ზედაპირი დახასიათებულია 2 გვერდზე, მდინარეები 10 ბჭკარში და ავტორი თითქოს ისწრაფვის გაეცალოს ამ უაღრესად მნიშვნელოვან საკითხებს და გადავიდეს სამიმოსვლო გზებზე, რასაც 7 გვერდზე მეტს უთმობს; შემდეგ ეხება ჰავასა და ნიადაგებს, როგორც სამხედრო საშუალებებს, ამ დიდ საკითხებს უთმობს სამიოდე ბჭკარს; მეურნეობა განხილულია ორიოდე გვერდზე, მთამადნეული 10 ბჭკარში, ხოლო მოსახლეობა კი გაშლილია 17 გვერდზე, ე. ი. მას უჭირავს მიმოხილვაში ნახევარზე მეტი ადგილი. დანარჩენ თავებს, როგორცაა გერმანიის კავშირის პოლიტიკური სისტემა, საერთო სამხედრო სისტემა, შეიარაღებულ ძალთა მდგომარეობა, ეთმობა წიგნში 113 გვერდი. ამასთანავე ისიც უნდა ითქვას, რომ

თვით ის მცირეოდენი გეოგრაფიული ცნობები, რაც მილუტინს გერმანიის სამხედრო მდგომარეობის დასახასიათებლად აქვს მომარჯვებული, მათს უბრალო დასახელებას უფრო წარმოადგენს, ვიდრე სამხედრო თვალსაზრისით განხილვას და შეფასებას. ამისათვის საკმარისია მოვიყვანოთ რამდენიმე ნიმუში: „ქვეყანა (ტერიტორია), რომელიც გერმანიას უჭირავს, მეტად ნაირგვაროვანი თვისების მქონეა. ადგილის ხასიათი იცვლება მონაცვლეობით გადასვლით მაღალი, ალპური მთებიდან ტალღებრივ და დასასრულ სრულიად დაბალი სიბრტყის ადგილზე. სამხრეთ-აღმოსავლეთი ნაწილი გადაკვეთილია დაახლოებით 500 ვერსის მანძილზე ალპის მთიანი ქედით, რომლის მწვერვალები ჰქმნიან მუდმივი თოვლის უწყვეტ ზოლს, ხოლო ფერდობები, კონტრფორსები და გვერდითი ქედები, გადასერილნი ღრმა ხეობებით და ქვაბურებით, ვრცელდებიან განით. 200 ვერსამდე და ფარავენ ტიროლის, ზალცბურგის, შტირიისა და ილირიის თითქმის მთელ ფართობს (ე. ი. ავსტრიის ყველა სამხრეთულ სამფლობელოებს გერმანიის კავშირის ფარგლებში). გერმანიის მთელი შუა ნაწილი, ისევე როგორც სამხრეთ-დასავლეთიც—დაფარულია მეორეხარისხოვანი მთებით, რომლებიც მეტნაწილად ტყიანია, მაგრამ დამრეცია და თანდათან ერწყმის დასახლებულ და დამუშავებულ, ტალღებრივ ადგილს“ (გვ. 82). ამას მოსდევს მთების დასახელება, რითაც თავდება ზედაპირის დასახსიათება. მდინარეებიც ასევეა წარმოდგენილი: „მდინარეთა და ნაკადულთა ურიცხვი რაოდენობა უხვად რწყავს გერმანიის ყველა ნაწილს. მათგან 60-მდე სანაოსნოაა გამოსადეგი; მაგრამ თვით გერმანიის ფარგლებში ზღვაში აქვთ შესართავი მხოლოდ რამდენიმე მნიშვნელოვან მდინარეს—ოდერს, ელბას, ვეზერს, ჩრდილო ემსს. უმნიშვნელოვანესნი კი—რაინი და დუნაი შესართავებით სხვას ეკუთვნიან, ერთი—ჰოლანდს და მეორე—რუსეთს. ადრიატიკის ზღვას გერმანიის ფარგლებში არც ერთი მნიშვნელოვანი მდინარე არ ერთვის.—ალპები, რომლებიც აქ ზღვის ნაპირს უახლოვდებიან, თითქოს ელობებიან გერმანიისაკენ მისასვლელებს“ (გვ. 84). ამის მეტი აქ არაფერია ნათქვამი მდინარეების შესახებ. ასევე ორიოდე სიტყვითაა ნახსენები ჰავა და ნიადაგები: „ერთ-ერთი უმნიშვნელოვანესი ძირითადი მონაცემი (ელემენტი), რომელიც განსაზღვრავს ქვეყნის სამხედრო საშუალებებს—არის მისი წარმოებითობის ბუნებრივი პირობები, ე. ი. ჰავა, ნიადაგის ნაყოფიერება და მისი დამუშავების უნარიანობა. შემდეგ თვითონ ხარისხი მიწის დამუშავებისა და ყველა მის საწარმოო ძალთა სარტყიანი გამოყენებისა (ფიზიკური კულტურა)—დამოკიდებულია.

ქვეყნის დასახლებულობაზე, მცხოვრებთა შრომისმოყვარეობაზე და მის სარეწაო საქმიანობაზე. გერმანიაში ჰაეა და ნიადაგი საერთოდ ზელშემწყობია ფიზიკური კულტურისათვის,—ხოლო მის იმ ნაწილებში, სადაც ბუნება უფრო მწირია, მას სძლევს გერმანული შრომისმოყვარეობა“ (გვ. 92). აი, ესაა და ეს, ქვეყნის ჰაეასა და ნიადაგებზე მეტი არაფერია ნათქვამი. თუ მხედველობაში არ მივიღებთ ზოგიერთ ცნობას რაინის შესახებ, რაც მოცემულია წიგნის ბოლოს საერთო დასკვნებში გერმანიის სტრატეგიული მდგომარეობის საკითხის გარკვევასთან დაკავშირებით, მილუტინის გეოგრაფიული ცნობები მისი ნაშრომის პირველ წიგნში მხოლოდ აქ მოყვანილი მაგალითებით იფარგლება.

ამგვარად, მილუტინის სამხედრო სტატისტიკაში სამხედრო-გეოგრაფიული მონაცემები ჯეროვანი მოცულობით და ხარისხით არ არის წარმოდგენილი. თუ მილუტინის გასამართლებლად ამ შემთხვევაში იმას ვიტყვით, რომ მან აკი სამხედრო სტატისტიკა ამჯობინა სამხედრო გეოგრაფიას და აქედან გამომდინარე გეოგრაფიულ გარემოს, ცხადია, შედარებით ნაკლებ ყურადღებასაც მიაქცევდა სახელმწიფოს სამხედრო მხრივ შესწავლის საქმეშიო, ასეთი მსჯელობაც არ იქნებოდა სწორი. გეოგრაფიული პირობების გაცნობა ძილუტინმა თავის სამხედრო სტატისტიკასაც ერთ-ერთ მთავარ ამოცანად დაუსახა და, რაკი დაუსახა, კიდევ მართებულად უნდა განეხორციელებინა ეს მიზანი. არ შეიძლება არ ითქვას, რომ ეს ხდება მაშინ, როდესაც სამხედრო სპეციალისტები—არა მარტო გეოგრაფები, არამედ ისტორიკოსებიც და ომის თეორიის შემოქმედნიც, გეოგრაფიულ ფაქტორებს ჯეროვან ყურადღებას აქცევენ. კლაუზევიცს, როგორც ვიცით, თავის ფილოსოფიურ ნაშრომში „ომის შესახებ“ სპეციალური და საკმაოდ დიდი ადგილი აქვს დათმობილი გეოგრაფიული მოვლენების შეფასებისათვის სამხედრო-სტრატეგიული თვალსაზრისით. მოვიგონოთ მისი ნაშრომის მეექვსე ნაწილი—თავდაცვა და ამ ნაწილის მე-15, 16 და 17 თავები: თავდაცვა მთებში (362—380 გვ.), მე-18 და 19 თავები: მდინარეების დაცვა (380—396 გვ.), მე-20 თავი: ა) ქაობების დაცვა (396—397 გვ.), ბ) შეტბორვა (398—401 გვ.) და 21-ე თავი: ტყეების დაცვა (401—402 გვ.), რომ არა ვთქვათ რა დანარჩენ ნაწილებსა და თავებზე, სადაც ავტორი გვითვალისწინებს გეოგრაფიულ მონაცემთა როლს საომარ ბრძოლებში. ეხება-რა სხვადასხვა გარემოებას, რომელიც ყოველთვის თან ახლავს საბრძოლო საშუალებათა მომარჯვებას ბრძოლის წარმოების დროს, და რომლებიც მეტ-ნაკლებად გავლენ-

ნას ახდენენ ბრძოლაზე, კლაუზევიცი ასახელებს სამს, ესენია: ადგილის პირობები (ფართო გაგებით ქვეყანა და მოსახლეობა), დრო (დღეღამე თუ წელიწადის დრონი) და ამინდი (მაგალითად, ნისლი, მეტადრე ამინდის უჩვეულო გამოვლინება—ძლიერი ყინვები და ა. შ.). ეს სამივე გარემოება, მისი აზრით, აუცილებლად საჭიროებს გათვალისწინებას როგორც ტაქტიკისათვის, ისე სტრატეგიისათვისაც. მილუტინს, რომელსაც წინ უსწრებდა კლაუზევიცი, შეეძლო ფართოდ გამოეყენებინა ამ დიდი მოაზროვნის მდიდარი მემკვიდრეობა. სამხედრო გეოგრაფიისათვის, მაგრამ მან სამხედრო გეოგრაფიას დამოუკიდებლად სამხედრო სტატისტიკისაგან მეტად მცირე როლი მიუჩინა—გეოგრაფიულ მონაცემთა აღნუსხვა და აღწერა და არა მათი გაანალიზება და გამოკვლევა, და სამხედრო ხელოვნებაში, კერძოდ სტრატეგიაში, გეოგრაფიული მონაცემები არა-საკმაო სიღრმითა და მოცულობით შეიტანა. ამ უკანასკნელ გარემოებას მილუტინი უთუოდ იმით გაამართლებდა, რომ ჯერ ერთი—გეოგრაფიულ მონაცემთა სტრატეგიული მნიშვნელობა, დადგენილი ერთი რომელიმე დროისათვის, არ შეიძლება ძალაში დარჩეს ყველა სხვა დროისათვის, და მეორე—ყოველგვარი სტრატეგიული მსჯელობა აუცილებლად ცალმხრივი იქნება, თუ იგი მარტოდენ გეოგრაფიულ მონაცემებს დაემყარა (გვ. 30). ეს აზრი თავისთავად სწორია, მაგრამ იგი მილუტინის თეორიასა და მეტადრე პრაქტიკაში ისეთ უკიდურესობას აღწევს, რომ მას გეოგრაფიულ მონაცემთა მნიშვნელობის საგრძნობი შესუსტება მოსდევს. მართლაც, რატომ არ შეიძლება შევანელოთ მილუტინის უკიდურესი აზრი და ვთქვათ, რომ გეოგრაფიულ მონაცემთა სტრატეგიული მნიშვნელობა, დადგენილი ერთი რომელიმე დროისათვის, შეიძლება ძალაში დარჩეს სხვა დროისათვისაც, თუ ყოველთვის არა—ზოგჯერ მაინც, თუ ყველა ობიექტისათვის არა—ზოგიერთი მათგანისათვის მაინც, თუ ყოველმხრივ არა—ნაწილობრივ მაინც. ან კიდევ, როცა ვამბობთ, სტრატეგიული მსჯელობა ცალმხრივი იქნება, თუ იგი მარტოდენ გეოგრაფიულ მონაცემებს დაემყარებაო, ეს თავისთავად სწორი აზრი რა თუნდა გამორიცხავდეს გეოგრაფიულ მონაცემებზე მსჯელობის მიზანშეწონილებას, როდესაც სხვა მონაცემებთან ერთად მათი გათვალისწინებაც ხდება საჭირო, ან ზოგჯერ აუცილებელიცაა მათი წინაპლანზე წამოწევა სხვა მონაცემებთან შედარებით. მილუტინმა აზრის უკიდურესობაში გადაყვანის შედეგად შეასუსტა ყურადღება გეოგრაფიული პირობებისადმი, მაშასადამე, სამხედრო გეოგრაფიისადმი, რაც არაფრით არ შეიძლება იქნას გამართლებული. გეო-

გრაფია ერთ-ერთ სამხედრო სამეცნიერო დარგად უნდა დარჩეს როგორც სახელმწიფოს ბუნების, მოსახლეობისა და მეურნეობის უმსწავლელი დისციპლინა, და არა მარტოდენ გზადაგზა ცნობების მიმწოდებელ დარგად, მასალად საბრძოლო მოქმედებათა კერძო ამოცანების გადასაწყვეტად.

ჩვენის აზრით, გეოგრაფიის მეცნიერულობის საკითხის გადაუჭრელობა, რომელიც ასე მწვავედ იდგა მილუტინის დროს, და ის გარემოება, რომ გეოგრაფიის მეცნიერულობა გარკვეულად იქეის ქვეშ იყო მაშინ დაყენებული, დაღს ასევე მთელუტინის მთელ მსჯელობას გეოგრაფიაზე და კერძოდ სამხედრო გეოგრაფიაზე. დღეს ეს საკითხი სავსებით გადაჭრილია ცოდნის ამ დარგის სასარგებლოდ. გეოგრაფია მეცნიერებაა, მას აქვს თავისი საკუთარი კვლევის ობიექტი—დედამიწის ზედაპირი საერთოდ და მისი ცალკეული ადგილები, ქვეყნები, ლანდშაფტები კერძოდ, აქვს აგრეთვე მას თავისი საკუთარი თვალსაზრისი საგნებისა და მოვლენების განსახილველად. გეოგრაფია საგნებისა და მოვლენების არა მარტო აღწერას, არამედ ახსნა-განმარტებას და კრიტიკულ კვლევასაც აწარმოებს, მას გამოაქვას მოვლენათა გაანალიზების საფუძველზე ზოგადი იდეები, ზოგადი დასკვნები, ასე ვთქვათ, კანონები. გეოგრაფია არაა მარტო ბუნებრივი ფაქტორების შემსწავლელი მეცნიერება, მას ადამიანის, საზოგადოების, სახელმწიფოს სოციალ-პოლიტიკურ სფეროშიაც აქვს საკვლევეო საკითხები: გეოგრაფიულ გარემოსა და ადამიანის ურთიერთ დამოკიდებულება. ცხადია, ამ საკითხებს საბჭოთა გეოგრაფია ამუშავებს მარქსისტულ-ლენინური ფილოსოფიის საფუძველზე, რის გამოც თავიდან აცილებულია საფრთხე ადამიანის და მისი ცხოვრების დაქვემდებარებისა ფიზიკურ-გეოგრაფიულ გარემოსადმი. რაც შეეხება გეოგრაფიის ერთ-ერთ სახეობას—სამხედრო გეოგრაფიას, იგი გეოგრაფიული მეცნიერების სახეობაა, მისი ერთ-ერთი დიდად მნიშვნელოვანი დარგი, რაც თვით მის სახელწოდებაშია მოცემული. სამხედრო გეოგრაფია შეისწავლის სახელმწიფოს ფიზიკურ-გეოგრაფიულ, ეკონომიურ-გეოგრაფიულ და პოლიტიკურ-გეოგრაფიულ საგნებსა და მოვლენებს, არა მარტო აღწერას და აღწერს მათ, არამედ გამოიკვლევს კიდევ, როგორც ეს სამეცნიერო დისციპლინას შეეფერება. სამხედრო გეოგრაფია თავის შესასწავლ ობიექტებს სამხედრო თვალსაზრისით მიუდგება, მაგრამ, ცხადია, ეს იმას არ ნიშნავს, რომ იგი შეზღუდვებზე მარტოდენ ფიზიკურ-გეოგრაფიული მონაცემებით და უგულებელყოფს ეკონომიურ-გეოგრაფიულ და პოლიტიკურ-გეოგრაფიულ მო-

ნაცემებს, საერთოდ ქვეყნის საზოგადოებრივ და სახელმწიფოებრივ ფაქტორებს, სოციალურ ფაქტორებს. სამხედრო-გეოგრაფიული ცოდნა გამოყენებული იქნება ქვეყნის, სახელმწიფოს სტრატეგიული მდგომარეობის შესათვასებლად, მაგრამ ეს იმას არ ნიშნავს, რომ ამის გამო ჩვენი სტრატეგიული თეორიები მარტოდონდენ ერთი გეარეობის მოსაზრებებს დაემყარებიან და, მაშასადამე, ცალმხრივად განვითარდებიან. სამხედრო-გეოგრაფიული საგნები და მოვლენები გამოყენებული იქნებიან ომის ცალკეული ბრძოლებისათვის ტაქტიკური მოსაზრებების გამოსამუშავებლად, მაგრამ ეს იმას არ ნიშნავს, რომ ადგილის სამხედრო-გეოგრაფიული მიმოხილვა დაიტვირთება ყოველგვარი წვრილმანით, დავაკისრებთ მას გაითვალისწინოს მოსალოდნელი ბრძოლის პროცესში ყველა შესაძლო შემთხვევა და დაიწყოს ერთი რომელიმე გარემოებისათვის ხელსაყრელი ან არახელსაყრელი შემთხვევის გაზოგადება, მისი გავრცელება ყოველგვარ სამხედრო მოქმედებაზე გარემოების მიუხედავად. ეს იმდენად ცხადი დებულებებია, რომ მათზე შეჩერება და დასაბუთებისათვის სიტყვის განგრძობა საჭიროდ არ მიგვაჩნია.

სამხედრო გეოგრაფია, რომელსაც ას წელიწადზე მეტია საფუძველი ჩაეყარა, საესებით ჩამოყალიბდა და მომწიფდა საბჭოთა ხანაში.

საბჭოთა სამხედრო გეოგრაფია, ითვალისწინებს-რა საუკუნოვან წარსულ გამოცდილებას, რაც სამხედრო გეოგრაფიამ თავისი განვითარების გზაზე განვლო, ახლებურად წარმართავს თავისი სამეცნიერო-საკვლევო მუშაობას. ჩვენი შეხედულებით შეცდომა იქნებოდა მიგვეჩინა სამხედრო გეოგრაფია არა-პოლიტიკურ მეცნიერებად და მილუტინის მსგავსად მისი ფუნქციები სხვა ე. წ. პოლიტიკურ მეცნიერებათათვის გადაგვეცა. არა-პოლიტიკური არც ერთი მეცნიერება არ არის, მაშასადამე, არც გეოგრაფიაა, და კერძოდ მისი სახეობაც—სამხედრო გეოგრაფია, ამიტომ სამხედრო გეოგრაფია საბჭოთა უმაღლეს სასწავლებლებში, სადაც მისი კათედრები გვაქვს, უფლებამოსილია და ვალდებულიცაა არკვიოს ქვეყნის, სახელმწიფოს სამხედრო ძალები და საშუალებანი, როგორც ფიზიკური, ისე სოციალ-პოლიტიკური და ეკონომიური ფაქტორების გათვალისწინებით.

## IV

### სამხედრო გეოგრაფია მისი განვითარების თანამედროვე მტაკზე

სამხედრო გეოგრაფიის მდგომარეობის განმტკიცება საბჭოთა ხანაში.— ა. სნესარევის სამხედრო-გეოგრაფიული კონცეპცია.— ფიზიკურ-გეოგრაფიული ფაქტორის როლი და ადგილი სამხედრო მოქმედებათა შეფასების საქმეში.

საბჭოთა ხელისუფლების დამყარების პირველსავე წლებში წითელი არმიის სამხედრო აკადემიებში ჯეროვანი ყურადღება მიექცა სამხედრო გეოგრაფიის სწავლებას. ამ პერიოდის სამხედრო გეოგრაფთა შორის განსაკუთრებით უნდა შეეჩერდეთ ა. სნესარევზე, რომელიც მილუტინის შემდეგ ერთ-ერთი უდიდესი მეთოდოლოგი არის სამხედრო გეოგრაფიის დარგში. ა. სნესარევის ნაშრომი, რომელიც ჩვენ ხელთა გვაქვს, გამოქვეყნებულია მოსკოვში სამხედრო აკადემიის მიერ 1924 წელს ლითოგრაფიული ნაბეჭდის სახით (იხ. Шенсареv А. — „Введение в военную географию“, м. 1924 წ.). სნესარევის ეს ნაშრომი წარმოადგენს ლექციებს, დაწერილს ავტორის მიერ თავისი მსმენელებისათვის სამხედრო აკადემიაში. ნაშრომი 414 გვერდიანია და შეიცავს ცხრა თავს. პირველ თავში მოცემულია გეოგრაფიის ისტორიული მიმოხილვა (1—29 გვ.), მეორე თავში— გეოგრაფიის მეთოდოლოგია (30—55 გვ.), მესამე, მეოთხე, მეხუთე და შეექვსე თავები ეხება სტატისტიკურ მეთოდს და სტატისტიკას საერთოდ (56—246 გვ.), მეშვიდე და მერვე თავებში გაშუქებულია სამხედრო გეოგრაფიის წარსული, მისი შინაარსი, კვლევის მეთოდები (246—348 გვ.), მეცხრე თავი მიძღვნილია სამხედრო გეოგრაფიის მეთოდოლოგიისადმი (348—414 გვ.).

ა. სნესარევი იშვიათ ერუდიციას ამჟღავნებს საერთოდ გეოგრაფიისა და კერძოდ სამხედრო გეოგრაფიის სფეროში. იგი,



როგორც მისი ნაშრომიდან ჩანს, ღრმად ჩაწედომია გეოგრაფიის და მისი სახეობის—სამხედრო გეოგრაფიის ჩასახვის, მათი განვითარების და თანამედროვე მდგომარეობის საკითხებს. ასევე საფუძვლიანად გაცნობია სტატისტიკური მეთოდის და მეცნიერების—სტატისტიკის (სახელმწიფოთმცოდნეობის გაგებით) საკითხებსაც და ყოველივე ეს მოხერხებულად აქვს მომარჯვებული თავის სწორ შეხედულებათა დასასაბუთებლად, რომ: 1. სამხედრო გეოგრაფია ზოგადი გეოგრაფიის ერთ-ერთი მთავარი სახეობაა, რომელიც ამავე დროს მჭიდრო კავშირშია სამხედრო მეცნიერებასთან, 2. გეოგრაფია და კერძოდ სამხედრო გეოგრაფია თვითმყოფ სამეცნიერო დისციპლინებს წარმოადგენენ, 3. სტატისტიკური მეთოდის მომარჯვება ყველა სამეცნიერო დარგს და, მაშასადამე, გეოგრაფიასაც სჭირდება კვლევა-ძიების დროს, მაგრამ ეს იმას არ ნიშნავს, რომ ეს სამეცნიერო დარგები სტატისტიკის სახელით უნდა მოინათლონ, 4. მილუტინის მიერ სამხედრო გეოგრაფიის, როგორც მეცნიერების, უარყოფა და მის ადგილზე სამხედრო სტატისტიკის დაფუძნების ცდა მიუღებელია, 5. სამხედრო გეოგრაფია არ უნდა შემოიფარგლოს მარტოოდენ იმ ფაქტორთა განხილვით, რაც სტრატეგიის სფეროში შედის, და ამით არ უნდა იქცეს იგი სტრატეგიის ერთ-ერთ დარგად. განვიხილოთ ა. სნესარევის მოსაზრებანი რამდენადმე დაწვრილებით.

ეხება-რა გეოგრაფიული ფაქტორის მნიშვნელობას სამხედრო საქმეში, სნესარევი ამბობს: „ადამიანი ომს აწარმოებს დედამიწის ზედაპირზე, ჰაერში და მიწის ქვეშ, ამდენად გეოგრაფიული ფაქტორი ომის მუდმივი თანამგზავრია. წარმოუდგენელია ომი გეოგრაფიის გარეშე ისე, როგორც სივრცის გარეშე... თეატრის ან რაიონის ზოგადი ხასიათი, მისი რელიეფი, ჰავა, მდინარეთა თვისება და მათი მიმართულება, გზების ქსელი, ბუნების სიმდიდრე თუ სიღარიბე, სანიტარია—ყველა ეს ფაქტორი, როგორც მიზეზიანი და აბეზარი კონტროლიორები ან მსაჯულნი, ამღვრევენ, სცვლიან, უარყოფენ ან ადასტურებენ ოპერაციულ განზრახვას. ვაი იმ სარდალს, რომელიც გეოგრაფიის დარგში წინდაუხედავი ან უვიცი აღმოჩნდება... გეოგრაფიის გავლენა ომზე და საომარ მოქმედებაზე მარადიულია... სამხედრო მეცნიერებათა შორის, როგორც ყოველთვის იყო აღიარებული, სამხედრო გეოგრაფიას მუდამ ერთ-ერთი საპატიო ადგილთაგანი ეჭირა... ყველა სამხედრო მეცნიერება ეზიარა გეოგრაფიას, აივსო პირამდე მისი შინაარსით, როგორც ღრუბელი გაიჟღერებოდა წყლით... უკანასკნელ დროში, ამას ხაზი უნდა

გაესვას, ტექნიკის დიდმა გავლენამ სამხედრო საქმეზე საბაბი მოგ-  
ვცა გვეფიქვნა, რომ გეოგრაფია აღარაა ისე ყოველმხრივი, გადა-  
ვიდა მეორე პლანზე, დასთმო თავისი მთავარი პოზიციები. ახლა  
აღარააო, ამბობენ ტექნიკის მოთაყვანენი, არც გაუვალნი ადგილე-  
ბი, არც გაწყვეტა ან მოუხერხებლობა კავშირგაბმისა, აღარააო  
ზამთრის მკაცრი განკარგულებანი, აღარაა ქაობები, აღარაა მდინა-  
რეები. მაგრამ იმისათვის, რომ ტექნიკის საშუალებით ებრძოლო  
არახელსაყრელ გეოგრაფიულ პირობებს—ადგილის მიუვალობას,  
სიერის მისადგომობას ტყვიის დამშენი მტრისათვის, მაღალ მიწის-  
ქვეშა წყალს, ქარის ტაქტიკურად გამოუსადეგარ თავისებურებას  
და სხვ.—საჭიროა მათი შესწავლა, მათი ტაქტიკური (უფრო იშვი-  
ათად—სტრატეგიული) გავლენის ძალის აწონ-დაწონა, ე. ი. მათი  
გაგება და აღიარება. აქედან,—თუ ტექნიკას კი შეუძლია შეასუსტოს  
ზოგ შემთხვევაში გეოგრაფიული ფაქტორების გავლენა, ეს იმას  
როდი ნიშნავს, რომ საჭირო არ იყოს მათი შესწავლა და შეფა-  
სება... იმის თქმაც კი შეიძლება, რომ გეოგრაფია ჩვენს დროში  
კიდევ უფრო ფართოდ და მრავალმხრივ ახდენს გავლენას სამხე-  
დრო საქმეზე, ვიდრე წინათ. მას შემდეგ, რაც თვითმფრინავებმა  
ჰაერი გადასერეს, გახებმა გამოიწვიეს გაძლიერებული ინტერესი  
ამინდისადმი, სანგრებმა, მეტადრე ღრმა თავშესაფარებმა, და  
ნაღმების ომმა ადამიანის ყურადღება მიაპყრო დედამიწის ქერქისა-  
კენ, მისი შრეებისაკენ, მიწისქვეშა წყლისაკენ და, ბოლოს, უაღრე-  
სად შორს სროლამ ინტერესი გამოიწვია ატმოსფეროსადმი, მისი  
ფენებისადმი, მისი ჰაერით გავსილობის ხარისხისადმი,—გეოგრაფი-  
ული ფაქტორები შეიპყრნენ სამხედრო საქმეში უფრო მეტად  
მძლავრ და ფართო ნაკადად“ (გვ. 1—4). ამის შემდეგ სწესარევი  
არკვევს საკითხს—რა ურთიერთობაშია სამხედრო გეოგრაფია ერ-  
თის მხრივ ზოგად გეოგრაფიასთან და მეორე მხრივ სამხედრო მეც-  
ნიერებასთან, და ამბობს: „ჩვენი მეცნიერება ზოგადი გეოგრაფიისა  
და სამხედრო მეცნიერების შესაყარ გზაბოძალზე დგას; პირველისა-  
გან იგი ლებულობს შინაარსს მისი რთული ელემენტებით და კვლე-  
ვის მეთოდებს, ხოლო მეორისაგან თემების განხილვის თვალსაზ-  
რისს და მათს პროგრამულ განაწილებას. მაგრამ ჩვენს დროში სამ-  
ხედრო გეოგრაფიის კავშირი ზოგად გეოგრაფიასთან ყოველმხრივია  
და სრული. ოდესღაც ის ზოგადი გეოგრაფიისაგან ლებულობდა  
მხოლოდ მისთვის უსაჭიროეს თემებს, როგორცაა გზები, ომის  
თეატრის რელიეფი, მოსახლეობის მასა, მაგრამ ახლა, როცა ომები  
ზოგადსახალხო და ზოგჯერ თითქმის ზოგადმსოფლიო ხასიათს ატა-

რებენ (1914—1918 წ.წ. ომი), სახმელრო გეოგრაფია ყველა სფეროში სესხულობს მასალას ზოგადი გეოგრაფიისაგან: ვასცილდა-რა ტოპოგრაფიის ძველ ჩარჩოებს, ჩვენი მეცნიერება დაეუფლა ომის თეატრებს, შემდეგ ზურგს, მერმე მთელ მეომარ ქვეყანას, მიიღო თავის მფლობელობაში ხალხებისა და სახელმწიფოების ცხოვრების და საქმიანობის ყველა მხარე და თავისი ამოცანების გაფართოვების გზაზე შემდგარმა სამხედრო გეოგრაფიამ თავისი ნასესხები მასალა ისეთ ფარგლებამდე გაზარდა, რომ დღეს იგი თვისობრივადაც და ოდენობითაც ფარავს დედა-მეცნიერების შინაარსს. მაგრამ, რჩება-რა ზოგადი გეოგრაფიის წარმოებულად, სამხედრო გეოგრაფია მკიდრო ორგანულ კავშირში იმყოფება სამხედრო მეცნიერებასთან. ეს იმას ნიშნავს, რომ ზოგადი გეოგრაფიიდან მიღებულ მთელ მასალას მისი პირვანდელი განაწილებით და მეცნიერული განმარტებით იგი გადაანაწილებს, შეიცნობს და განმარტავს სამხედრო ანალიზის, სამხედრო ინტერესების თვალსაზრისით, ე. ი. საბოლოო აზრით, ომში კერძო და ზოგად გამარჯვებათა მიღწევის მხრივ“ (გვ. 4—5). სნესარევისათვის სადავო საკითხად არ ითვლება გეოგრაფიის და მისი სახეობის—სამხედრო გეოგრაფიის მეცნიერულობა. ეს ასედაც უნდა იყოს. სნესარევი მე-20 საუკუნის პირველ მეოთხედში სწერს ამ ნაშრომს, ეს კი ისეთი ხანაა, როცა გეოგრაფიის მეცნიერულობის საკითხი არც ერთი სერიოზული მოაზროვნისათვის პრობლემატური აღარ არის. საკმარისია გეოგრაფიის ზრდისა და განვითარების ყველა ეტაპს იცნობდეთ, რომ ამ საკითხში მართებულად გაერკვიოთ. სნესარევი სწორედ ერთი იმ მოაზროვნეთაგანია, რომელიც ზედმიწევნით კარგად იცნობს გეოგრაფიის ჩასახვის, ზრდისა და განვითარების ყველა ეტაპს, დაწყებული ბაბილონელთა დროიდან და დამთავრებული ჩვენი დროით. თავის მოკლე ისტორიულ მიმოხილვაში სნესარევი გვაცნობს ბაბილონელთა, ბერძენთა (ჰეროდოტე, არისტოტელე, ერატოსთენე, ალექსანდრე მაკედონელი, სტრაბონი, კლავდი პტოლემე) და რომაელთა (იულიუს კეისარი, სენეკა, ტაციტი, პლინიუს-უფროსი) დამსახურებას გეოგრაფიული მეცნიერების წინაშე, ეხება საშუალო საუკუნეების ხანას, არაბთა, ბიზანტიელთა, ვენეციელთა, ნორმანთა ლეაწლს გეოგრაფიის სფეროში, ახასიათებს დიდ გეოგრაფიულ აღმოჩენათა ეპოქას, მოხსენებული ჰყავს კოლუმბი, ვასკოდა-გამა, მაგელანი, ტასმანი, კუკი, კოპერნიკი, კეპლერი, გალილეი, სნელიუსი, ნიუტონი, განსაკუთრებით ამახვილებს ჩვენს ყურადღებას მეცნიერული გეოგრაფიის აღორძინების ხანაზე, დახასიათებული ჰყავს ვარენიუსი, ალექსანდრე ჰუმბოლდტი, კარლ რიტერი,

პეშელი, რიხტჰოფენი, არ სტოვებს უყურადღებოდ ახალი დროის გეოგრაფიულ აღმოჩენებს და გამოკვლევებს აფრიკაში, აზიაში, ამერიკაში, ავსტრალიაში, ახალ გვინეაში, პოლარულ ქვეყნებში. ამ მოკლე ისტორიული მიმოხილვის შემდეგ სნესარევი არკვევს საკითხის მეთოდოლოგიურ მხარეს—გეოგრაფია, როგორც მეცნიერება, მისი არსი, შინაარსი, მეთოდები. აქ იგი ასახელებს და აანალიზებს გეოგრაფიის, როგორც მეცნიერების, თორმეტნაირ განსაზღვრებას: 1—„გეოგრაფია მთელი (იმ დროისათვის) ცნობილი დედამიწის ხაზოვანი გამოსახულება“ (პტოლემე), 2—დედამიწის „აღწერა“ ანუ „გამოსახვა“, ე. ი. „მეცნიერება რუკების შესახებ“ (ერასტოსთენე, ამავე განსაზღვრებას იზიარებდა მერკატორი), 3—„გეოგრაფია არის მეცნიერება დედამიწის შესახებ“, 4—„გეოგრაფია არის მეცნიერება დედამიწის აწმყოს შესახებ, რასაც ახსნის მისი წარსულით, ხოლო გეოლოგია მეცნიერებაა დედამიწის წარსულის შესახებ, რასაც ახსნის მისი აწმყოთი“ (მაკინდერი), 5—„გეოგრაფია არის ისტორია სივრცეში, ხოლო ისტორია გეოგრაფიაა დროში“ (ჰერდერი, მას იმეორებს ელიზე რეკლიუცი), 6—„გეოგრაფია არის დედამიწის არა აღწერა, არამედ გაგება, მცოდნეობა—დედამიწისმცოდნეობა“ (რიტერი), 7—„გეოგრაფია არ არის დედამიწის აღწერა ან დედამიწისმცოდნეობა, იგი არის მეცნიერება დედამიწის ზედაპირის შესახებ“ (რიხტჰოფენი), 8—„გეოგრაფია შეისწავლის დედამიწას მთლიანობაში, ურთიერთქმედებას დედამიწის ზედაპირსა და მის შინაგან ნაწილს შორის“ (გერლანდი), 9—„გეოგრაფია იკვლევს ურთიერთ დამოკიდებულებებს, რომლებიც არსებობენ ორგანულ და არაორგანულ სამყაროს შორის“ (დევისი), 10—„გეოგრაფია არის მეცნიერება დედამიწის, როგორც ადამიანის საცხოვრებელი ადგილის, შესახებ“ (იგივე დევისი), 11—„გეოგრაფია არის მეცნიერება დედამიწის, როგორც სიცოცხლის ადგილსამყოფელის, შესახებ“ (იგივე დევისი), 12—„გეოგრაფია შეისწავლის დედამიწის სფეროს მთლიანობაში“ (გეიკი და სხვ.). არც ერთ ამ შეხედულებას სნესარევი არ იზიარებს. „თქმა იმისა, რომ გეოგრაფია შეისწავლის მთელ დედამიწას, თანაც ყოველმხრივ, ეს იქნება მხოლოდ დადასტურება ზოგიერთის აზრისა, რომ გეოგრაფია არის არა მეცნიერება, არამედ დედამიწისა და მის ბინადართა შესახებ სხვადასხვა ერთიმეორესთან დაუკავშირებელი ცოდნის აგლომერატი“—ამბობს სნესარევი და იქვე დასძენს, რომ ამჟამად გეოგრაფიის, როგორც მეცნიერების, ყველაზე უფრო მართებულ განსაზღვრებად ითვლებათ ალფრედ ჰეტნერის მიერ მოცემული განსაზღვრება.

ღერება (გულისხმობს ჰეტნერის ნაშრომს—„გეოგრაფიის არსისა და მეთოდების შესახებ“, რომელიც 1905 წელს გამოქვეყნდა), სახელდობრ: ემყარება—რა გეოგრაფიის რიტერულ განსაზღვრებას—გეოგრაფია არის „მეცნიერება სივრცეებისა და მათი საგნობრივი გავსილობის შესახებო“, ჰეტნერი ამბობს, რომ გეოგრაფია არის ქოროლოგიური მეცნიერება დედამიწის ზედაპირის შესახებ, მისი საგანია—ცალკეული ქვეყნების ნიშნები და თვისებანი; ჰეტნერის უფრო სრული განსაზღვრება ასეთია: „გეოგრაფია ანუ ზოგადი დედამიწისმცოდნეობა არის მეცნიერება, რომელიც შეისწავლის დედამიწას, როგორც ერთიმეორესთან სივრცობლივ-მიზეზობრივად დაკავშირებულ მოვლენათა ერთობლიობას“. გეოგრაფის ნამდვილი სამოქმედო სარბიელი ქვეყანათმცოდნეობააო—სთქვა ჰეტნერმა და ამ შეხედულებას სნესარევი საესებით იზიარებს. სნესარევის აქვე მოჰყავს ლ. ს. ბერგის შეხედულებანი გეოგრაფიაზე, რომ „გეოგრაფია არის მეცნიერება ლანდშაფტების შესახებ“. ჩვენს მიზანს არ შეადგენს გავარკვიოთ აქ სხვადასხვა გეოგრაფის და მათ შორის სნესარევის შეხედულებათა სისწორე გეოგრაფიის არსსა და პრინციპებზე, ჩვენთვის მხოლოდ ისაა საყურადღებო, რომ სნესარევი, ემყარება—რა მის თანამედროვე ცნობილ გეოგრაფთა (ჰეტნერის, ბერგის, ემანუილ დე მარტონის და სხვ.) აზრებს, უდავოდ სთვლის, რომ „გეოგრაფიას აქვს თავისი შესწავლის საგანი და თავისი მეთოდი“ და, მაშასადამე, გეოგრაფია თვითმყოფი მეცნიერებაა (5—40 გვ.).

საკითხის ასევე ისტორიული თანმიმდევრობით გათვალისწინებით სნესარევი მიდის იმ დასკვნამდე, რომ სამხედრო გეოგრაფიაც მეცნიერებაა. მისი ნაშრომის მე-7 და მე-8 თავები ეხება სამხედრო გეოგრაფიის წარსულს, მის შინაარსს, კვლევის მეთოდებს, ხოლო მე-9 თავი სამხედრო გეოგრაფიის მეთოდოლოგიურ მხარეს (გვ. 246—414). სნესარევი იგონებს ინგლისელი სამხედრო გეოგრაფის ფიტცჯერალდ-ლის სიტყვებს, ნათქვამს ზოგადი გეოგრაფიის შესახებ, რომ „გეოგრაფიას, როგორც მეცნიერებას, თავისებური ადგილი უჭირავს—იგი ერთ-ერთი ყველაზე უფრო ადრე დაწყებული და ყველაზე უფრო გვიან გაგებული მეცნიერებააო“, და დასძენს: იგივე შეიძლება ითქვას სამხედრო გეოგრაფიაზედაცაო.

სნესარევის აზრით სამხედრო გეოგრაფია ცოდნის უძველესი დარგია. კიდევ მეტი, მას სამხედრო გეოგრაფია გეოგრაფიის უძველეს ფორმად მიაჩნია. სამხედრო-გეოგრაფიული ცნობები აუცილებელ საარსებო მოთხოვნილებას წარმოადგენდა თემისა და სახელ-

მწიფოს შექმნის უკვე უპირველეს საფეხურებზე, საჭირო იყო როგორც თავისი საკუთარი ქვეყნის, ისე მეზობლების სამხედრო საშუალებათა და შესაძლებლობათა ცოდნა—ცოდნა ხალხისა, ქვეყნისა, საშუალებებისა, გზებისა. სამხედრო-გეოგრაფიულ ცნობებს დიდ ყურადღებას აქცევდნენ ძველი აღმოსავლური ხალხები—ჩინელები, ინდუსები, სპარსელები, ეგვიპტელები, ებრაელები. ხალხთა ნაირგვარობისა და სიჭრელის მიუხედავად მუდამ და დაჟინებით თავს იჩენდა ხოლმე სამხედრო გეოგრაფიის ძირითადი თემები—ტერიტორია (განსაკუთრებით გზები), ხალხი (მასა, მისი თავისებურებანი, დამოკიდებულება ომთან) და საშუალებანი (შინაარსი და ოდენობა). სამხედრო-გეოგრაფიული თემები მარადიულია, ისინი ომის აუცილებელი თანამგზავრია, და, რადგან ადამიანი ომობს,—ხოლო ის დიდი ხანია რაც ომობს,—იგი ამავედროულად მუშაობს სამხედრო-გეოგრაფიული ფაქტორების გამორკვევის დარგშიაც. მიუხედავად მისი ასეთი სიძველისა, სამხედრო გეოგრაფია ჩვენს უახლეს დრომდე ვერ იყო შეცნობილი როგორც განსაზღვრული მეცნიერება მისთვის მკაფიოდ მოზომილი შინაარსით. პირაქით, ჩვენს წინ ამ მეცნიერების ისტორიული ბედის ასეთი სურათია: ან სხვა მეცნიერებათა ზღვაშია იგი შეცურებული, ან ეს სხვა მეცნიერებანი მისჯან მასალას სესხულობენ. „იმ შორეულ ხანაში შეუძლებელი იყო და პრაქტიკულადაც საჭიროებას არ წარმოადგენდა შექმნილიყო მეცნიერების გამოკვეთილი სახე. სამხედრო-გეოგრაფიული ცნობები იშვიათად თავსდებოდა ცალკეულ დამოუკიდებელ თხზულებებში, უფრო ხშირად ეს ცნობები შეჰქონდათ რელიგიოზური, პოლიტიკური, იურიდიული, ისტორიული და გეოგრაფიული შინაარსის წიგნებში. ამის გარდა, მთავრობის მიერ შეკრებილი ცნობები საიდუმლოდ ინახებოდა და კერძო პირთათვის სრულიადაც არ იყო მისაწვდომი. ბოლოს, სხვა მეცნიერებათა ინტერესები (პოლიტიკის, ეკონომიკის, ზოგადი გეოგრაფიის, ისტორიის) ისე იყო გადაწეული სამხედრო-გეოგრაფიულთან, რომ ვღებულობდით მეცნიერებათა კრებულს, რომლიდანაც ძნელი ხდებოდა სამხედრო გეოგრაფიის შინაარსის გამოკრისტალება“ (246—247 გვ.). სნესარევეს მოჰყავს მდიდარი ცნობები იმის შესახებ, თუ როგორ უწყობდნენ ხელს სხვადასხვა ქვეყნები და ხალხები სამხედრო გეოგრაფიის ჩასახვასა და განვითარებას, სახელდობრ: ჩინეთი, ინდოეთი, სპარსეთი, ეგვიპტე, ებრაელები, საბერძნეთი, რომი, ბიზანტია, არაბები, შორეულ აღმოსავლეთში მოგზაური ევროპელები (პლანო კარპინი, რუბრუკვისი, მარკო პოლო); ასევე გაშუქებული აქვს სნესარევეს სამხედრო გეოგრაფიის

მდგომარეობა საშუალო საუკუნეების დასავლურ ქვეყნებში, იტალიის სამხედრო-გეოგრაფიული შრომები, ვენეციის ელჩთა რეპორტები, მარინო სანუტოს შრომა, დიდ გეოგრაფიულ აღმოჩენათა შემდეგი პერიოდი, სტატისტიკური შრომების ჩასახვა იტალიასა, საფრანგეთსა და ჰოლანდში, რაც სამხედრო-გეოგრაფიულ გამოკვლევათა პირველ გამოხატულებას წარმოადგენდა, სახელმწიფოთმცოდნეობა გერმანიაში (კონრინგი, ახენვალი); მოხსენებული ან განხილული არიან სნესარევის ნაშრომში სამხედრო გეოგრაფიის ხაზით ცნობილი შემდეგი თეორეტიკოსები: ბიუშინგი, შლიოცერი, ნიმანი, ლუდერი, ლოიდი, ერცჰერცოგი კარლი, ნაპოლეონი, ჟომინი, კლაუზევიცი, ბუტურლინი, ჰომეიერი, ადოლფი, ვენტურინი, როონი, ჰანცოგი, მაინეკე, მალხუსი, ანდრე, რუდტორფერი, ბენიკენი. ლავალე, პ. იაზიკოვი, დ. ა. მილუტინი (247—318 გვ.).

სამხედრო გეოგრაფიის ჩასახვის, მისი ზრდისა და განვითარების გზების გათვალისწინების შემდეგ სნესარევი დაასკვნის, რომ სამხედრო გეოგრაფია, როგორც დამოუკიდებელი დისციპლინა, თავს იჩენს მე-19 საუკუნის დასაწყისიდან; ამის გარეგანი გამოხატულება ის იყო, რომ პირველად გამოჩნდა სცენაზე მისი სახელი—„სამხედრო გეოგრაფია“ (ჰომეიერისა და ვენტურინის შრომების სახით). „მაგრამ ეს პირველი ნაბიჯები, ამბობს სნესარევი, მეტად გაუბედავი და მერყევი იყო და საჭირო შეიქნა თითქმის ნახევარი საუკუნე, რომ ჩვენი მეცნიერება, რუსი სამხედრო მოაზროვნის გენიის წყალობით, შემდგარიყო იმ ფაზით და მტკიცე პლათფორმაზე, რომელზედაც მან ჩვენს დრომდე მოაღწია. სამხედრო გეოგრაფიის ეს შემოქმედი იყო დიმიტრი ალექსის-ძე მილუტინი“ (გვ. 294). მილუტინის სამხედრო-გეოგრაფიული კონცეპცია, სნესარევის აზრით, ყველა მანამდე და მის შემდეგ არსებულ კონცეპციასზე მაღლა დგას: „დადგენა სამხედრო გეოგრაფიის ცნების, მოცულობისა და შინაარსის, როგორც ეს მოგვცა დ. ა. მილუტინმა, იმდენად მარჯვეა და ამომწურავი, რომ იგი გაბატონებულია მეცნიერებაში ჩვენს დრომდე. ეს კიდევ ცოტაა. შინაარსის ასეთ სიფართოვმდე და სიღრმემდე ვერ მივიდნენ არა მარტო ევროპის სამხედრო გეოგრაფები გასული საუკუნის პირველი მესამედისა—როონი, ჰანცოგი, მალხუსი, რუდტორფერი, ბენიკენი, ლავალე და უფრო მცირენი, რომელთაც ზემოთ შევეხეთ, არამედ ჩვენი დროისათვის უფრო მახლობლნიც. როგორც, მაგალითად, ნიოქსი, ლებლონი მარგა, მალეტერი, ფიტცჯერალდ-ლი, მაი და სხვანი. ჩვენმა თანამედროვე ეპოქამ, განსაკუთრებით 1914—1918 წ.წ. მსოფლიო ომმა,

რასაკვირველია, მილუტინის მეცნიერებაში შეიტანა თავისი ცვლილებანი, განხრა, უფრო ტონალობა, მაგრამ იგი ვერ შეეხო პროგრამისა და შინაარსის არსებობის მხარეს. ამიტომ თანამედროვე სამხედრო გეოგრაფიის შინაარსის გადმოცემა შეიძლება შესრულებულ იქნას დამატებათა და შესწორებათა პროცესში მასზე, რაც 80 წლის წინათ (დღეს კი ითქმის 95 წლის წინათ—დ. დ.) ახლად და თითქმის მარტოდმარტოდ გააკეთა რუსმა სამხედრო მოაზროვნემ“ (318—319 გვ.).

სნესარევისათვის სამხედრო გეოგრაფია უდავოდ თვითმყოფი მეცნიერებაა, რადგან სამხედრო გეოგრაფიას თავისი საკუთარი კვლევის მიზანი აქვს—სახელმწიფოს ძალისა და ძლიერების გამორკვევა სამხედრო მხრივ, მას საკუთარი თვალსაზრისი აქვს მისი შინაარსის საფუძვლად მიჩნეული სამი ძირითადი თემის—სახელმწიფოს ტერიტორიის, ძალებისა და საშუალებების განსახილველად და ეს თვალსაზრისია მათი (ტერიტორიის, ძალებისა და საშუალებების) სამხედრო მხრივ შეფასება. ტერიტორიის შესწავლა გულისხმობს სახელმწიფოს ფიზიკური მდგომარეობის გაშუქებას—თანამედროვე ქვეყნის სამხედრო ძლიერების ნათელსაყოფად მისი საზღვრების, ფართობის, ზედაპირის, ჰავის, გზების და სხვათა განხილვას, აქვე დაისმება საკითხი სახელმწიფო წყობილებაზედაც. ძალების შესწავლა ნიშნავს სახელმწიფოს ცოცხალი ძალების—მისი ხალხის განხილვას, აქ განიხილება ერთის მხრივ ხალხის მასა, როგორც შეიარაღებული ძალის პოტენციალი, რომელიც შეისწავლება რაოდენობის, ფიზიკურ და სულიერ თავისებურებათა და ისტორიულ ჩვევათა მხრივ, და მეორე მხრივ—სახელმწიფოს შეიარაღებული ძალები, მათი რაოდენობის, თვისების, ორგანიზაციის, ტექნიკური მომზადების და სხვა მხრივ. საშუალებათა შესწავლა ეხება იმ ბუნებრივ და ხელოვნურ მონაცემთა ჯამს, რომელნიც ომის საშუალებებს, სხვანაირად რომ ვთქვათ, ომის კაპიტალებს შეადგენენ, მასში შედის ქვეყნის ბუნებრივი სიმდიდრენი, რამდენადაც ისინი საჭიროა ომის საწარმოებლად, მრეწველობა, ფინანსები, ტექნიკა, რკინიგზები და მისთანანი. სნესარევის ხელს არ უშლის სამხედრო გეოგრაფიის მეცნიერულობის საკითხის გარკვევის დროს ის გარემოება, რომ სამხედრო გეოგრაფია მასალას ზოგადი გეოგრაფიიდან კრებს, არც ის, რომ სამხედრო გეოგრაფია მჭიდრო კავშირშია სამხედრო მეცნიერების ყველა დარგთან. სამხედრო გეოგრაფია, მიიღებს—რა მასალას ზოგადი გეოგრაფიიდან, თავისი თვალსაზრისით აშუქებს მათ. მისი კავშირი სამხედრო ისტორიასთან და სტრატეგიასთან არ-



სებითი მნიშვნელობისაა. სამხედრო გეოგრაფიას შუა ადგილი უჭირავს ზოგად გეოგრაფიასა და სამხედრო მეცნიერებათა შორის.

სწესარევი არ იზიარებს იმ სამხედრო გეოგრაფთა აზრს, რომელნიც სამხედრო გეოგრაფიას ტოპოგრაფიული ჩარჩოებით ფარგლავდნენ (ჰომეიერი, ადოლფი, ვენტურინი, როონი), არც იმათ აზრს, ვინც სამხედრო გეოგრაფიას უცქეროდა, როგორც ზოგადი გეოგრაფიიდან ამოღებულ იმ ცნობათა კრებულს, რომელთაც რაიმე დამოკიდებულება აქვთ სამხედრო მოსაზრებებთან და რომელთა ცოდნა სამხედრო პირისათვის საჭიროა (ჰანცოვი, მაინეკე, მალხუსი, ანდრე, რუდტორფერი). ამ საკითხზე სწესარევი მილუტინის შეხედულებას იზიარებს, თუმცა არაყოველმხრივ. მაგალითად, ტოპოგრაფიული მასალის დიდ მნიშვნელობას სწესარევი არ უარყოფს. მხოლოდ მოითხოვს, რომ ტოპოგრაფია სამხედრო გეოგრაფიის ერთ-ერთი ელემენტი იყოს. ზოგადი გეოგრაფიიდან მასალის ამოკრებას სწესარევი აუცილებელ საჭიროებად სთვლის. ის ეთანხმება მილუტინს, რომ სამხედრო მეცნიერებად ვერ ჩაითვლება ცოდნის ისეთი დარგი, რომელიც სამხედრო ცნობათა უბრალო კრებულს შეადგენს; მაგრამ ის არ ეთანხმება მილუტინს, თითქოს სამხედრო გეოგრაფია, რომელიც კრებს მასალას ზოგადი გეოგრაფიიდან, უბრალო კრებულს წარმოადგენდეს. „რასაკვირველია, ამბობს სწესარევი, სამხედრო გეოგრაფია, როგორც მეცნიერება, თუ ისეხეხებს მასალას ზოგადი გეოგრაფიიდან, რასაც, უნდა ითქვას, სხვა მეცნიერებებიც შვრებიან, განმარტავს მას თავის საჭიროებათა თვალსაზრისით, გადაანაწილებს მასალას, წინ წამოსწევს სხვა მხარეებს, შეჰქმნის ახალ თემებს, გაატარებს სხვა სამხედრო მეცნიერებათა ამოცანებსა და მოთხოვნილებებს; ბოლოს, მას აქვს შემეცნების თავისი საყვარელი მეთოდები, რასაც ზოგადი გეოგრაფია თითქმის არ იყენებს, მაგალითად, ისტორიული“ (გვ. 300). სწესარევი დიდი ყურადღებით ეპყრობა იმ სამხედრო გეოგრაფთ (ბენიკენი, ლავალე, ჟომინი, იაზიკოვი), რომლებიც შეეცადნენ მიეცათ სამხედრო გეოგრაფიისათვის ნამდვილი თვითმყოფი მეცნიერების ხასიათი. მაგრამ ეს ისე არ უნდა გავიგოთ, რომ სწესარევი მათ მოსაზრებებსაც იზიარებდა სამხედრო გეოგრაფიის მეცნიერულობის მაჩვენებელ ნიშნებზე. სწესარევი არ იზიარებს იმ შეხედულებას, თითქოს სამხედრო გეოგრაფია მხოლოდ მაშინ ჩაითვლება თვითმყოფ, დამოუკიდებელ მეცნიერებად, როცა იგი შესძლებს გამონახოს გეოგრაფიულ გარემოში ისეთი საგნები და მოვლენები, რომელთაც მარადიული მნიშვნელობა აქვთ ომებისათვის (ლავალე).

ამგვარი „მნიშვნელოვანი“ და „მუდმივი“ პუნქტების ძიებისაკენ მისწრაფებაში, რომლებიც თითქოს გადამწყვეტ მიჯნებს წარმოადგენენ ყოველ ომში, სწესარეგვა დაინახა უკიდურესობისაკენ გადახრა. ის იმოწმებს მილუტინს, რომ „სამხედრო მოქმედებათა მსვლელობა მარტოოდენ ადგილგარემოზე არ არის დამოკიდებული, რადგან ყოველ ომს სრულიად თავისებური გარემოებანი, მიზნები და მისწრაფებანი ახლავს, და ამიტომაც ყოველი ადგილობრივი საგნის მნიშვნელობა იცვლება სხვადასხვა ეპოქაში“. მაგრამ სწესარევი არც იმ უკიდურესობაში ვარდება, რომ ადგილობრივ პუნქტებს მათი სამხედრო მნიშვნელობის ცვალებადობის გამო სამხედრო გეოგრაფიამ ყურადღება არ უნდა მიაქციოს. ის ამბობს: „თუ არა პუნქტები, გეოგრაფიული რაიონები ხომ მაინც ზოგჯერ მძლავრ, თითქმის დესპოტურ გავლენას ახდენენ სამხედრო ოპერაციათა მსვლელობაზე, მათ განმეორებადობაზე და მათ ლოკალიზებაზე, და რომ ომების ისტორიაში გვხვდება პირდაპირ მიმზიდველი რაიონები, რომელთაც ეტანებიან სამხედრო ეპიზოდები და რომლებზედაც საბრძოლო ამბები მეორდება მთელს დროსა და გარემოებისა“ (301—302 გვ.). სწესარევი არც იმ შეხედულებას იზიარებს, რომ სამხედრო გეოგრაფია უნდა იხილავდეს გეოგრაფიულ საგნებსა და მოვლენებს მარტოოდენ სტრატეგიული თვალსაზრისით და იგი სტრატეგიის ერთ-ერთ დარგს უნდა წარმოადგენდეს (ჟომინი, იაზიკოვი). მაგალითად, იაზიკოვის აზრით სამხედრო გეოგრაფია არის დედამიწის ზედაპირის გამოკვლევა სტრატეგიული მხრივ თანამედროვე ეპოქაში და სამხედრო გეოგრაფიის თეორია არის გეოგრაფიული ელემენტის გამოკვლევა სტრატეგიულ მოსაზრებათათვის. სწესარევი სამხედრო გეოგრაფიის მეცნიერულობის საფუძვლად მიიჩნევს არა მის ამა თუ იმ ცალკეულ შესაძლებლობას სამხედრო საქმის მომსახურების დარგში, არამედ მას, რომ იგი—სამხედრო გეოგრაფია—სახელმწიფოს შემსწავლელ განსაზღვრულ დისციპლინას წარმოადგენს, რომელსაც აქვს თავისი კვლევის ობიექტი, თავისი კვლევის მიზანი და თვალსაზრისი. მას ყველაზე მართებულად მიაჩნია ზენიკენის მიერ გამოთქმული მოსაზრება, რომ „სამხედრო გეოგრაფიას მივყავართ სახელმწიფოთა და მათ მიერ დაკავებული მიწის ზედაპირის შეცნობისაკენ იმ მიზნით, რომ განისაზღვროს სახელმწიფოთა ფარდობითი ძალები და საშუალებანი ურთიერთშორის ომის წარმოებისათვის“. გამოთქმა—„სახელმწიფოთა ფარდობითი ძალებისა და საშუალებების განსაზღვრა ომის წარმოებისათვის“—სწესარევი მიიჩნია სრულყოფილ ფორმულად, რომელიც მეტად მოხერხებულად გამოხატავს

სამხედრო გეოგრაფიის, როგორც ცალკე მეცნიერების, მიზანს. ეს ფორმულა, სნესარევის აზრით, საკიროებდა მხოლოდ გაშლას და მისი შინაარსის ჩამოყალიბებას. ეს საქმე შეასრულა დ. ა. მილუტინმა. თანამედროვე სამხედრო გეოგრაფიის ჭეშმარიტ ფუძემდებლად სნესარევი სთვლის მილუტინს. მილუტინმა სახელმწიფოს ძალთა და საშუალებათა სამხედრო მხრივ შემსწავლელ სამეცნიერო დისციპლინას ფართო ამოცანა დაუსახა. ამ დისციპლინის შინაარსი მილუტინის აზრით არ უნდა იფარგლებოდეს ჩარჩოებით—„ადგილობრივ მონაცემთა კრიტიკული გამოკვლევით სტრატეგიული თვალსაზრისით“ და არ უნდა მისდევდეს იგი მიწის ზედაპირის შესახებ მხოლოდ ფაქტიურ მონაცემთა შეგროვებას, იგი უნდა შეიცავდეს ყველა იმ მონაცემს, რომლებიც ყოველ სახელმწიფოში განსაზღვრავენ მის საშუალებებს და წესებს ომის წარმოებისათვის, მისი გეოგრაფიული, ეთნოგრაფიული და პოლიტიკური მდგომარეობის ვარგისობას და არახელსაყრელობას ზოგად სამხედრო მოსაზრებათა მიმართებაში; აქედან კვლევა უნდა გავრცელდეს მთელ სახელმწიფოზე სრული მისი მოცულობით და ემსახურებოდეს ზოგად მიზანს: გამოარკვიოს სახელმწიფოს ძალა და ძლიერება სამხედრო მხრივ.

ჩვენ აღარ გავიმეორებთ აქ მილუტინის შეხედულებებს სახელმწიფოს ძალთა და საშუალებათა სამხედრო მხრივ შემსწავლელი სამეცნიერო დისციპლინის შინაარსის, მოცულობისა და სისტემის შესახებ. ამ საკითხის გაშუქება ჩვენი წინამდებარე ნაშრომის ერთ-ერთ მთავარ ამოცანას შეადგენდა, რასაც თავისი ადგილი უკვე დაუთმეთ. აღვნიშნავთ მხოლოდ, რომ სნესარევი საფუძვლიანად გააკრიტიკა მილუტინის მეთოდოლოგიური შეხედულებანი იმ ნაწილში, სადაც საკითხი ეხება სახელმწიფოს ძალთა და საშუალებათა სამხედრო მხრივ შემსწავლელი სამეცნიერო დისციპლინისათვის სახელწოდების გამონახვას. როგორც ვიცით, მილუტინმა ასეთ სამეცნიერო დისციპლინას სამხედრო სტატისტიკა უწოდა და ამით დაარღვია მის დრომდე გამტკიცებული ტრადიცია—ამოიღო ხმარებიდან სახელი „სამხედრო გეოგრაფია“. სნესარევი ილაშქრებს მილუტინის და მის მიმდევართა წინააღმდეგ სამხედრო გეოგრაფიის სამხედრო სტატისტიკით შეცვლის საკითხში და მოითხოვს ამ შეუწყნარებელი შეცდომის გამოსწორებას. ვარდა იმ უდავო მოსაზრებებისა, რომელნიც სნესარევის მომარჯვებელი აქვს თავისი პოზიციის დასაცავად ამ საკითხში, მას მხედველობაში აქვს ის უთუოდ ანგარიშგასაწვევი გარემოებაც, რომ სამხედრო გეოგრაფიის სახელით ეს დისციპლინა ჯერ

კიდევ მილუტინამდე ბევრად ადრე იყო ცნობილი, თვით რუსეთის სამხედრო აკადემიაშიაც მილუტინამდე 15 წლის არსებობის ისტორია ჰქონდა მას, და, რაც მთავარია, მილუტინის დროს და მის შემდეგაც მთელს ევროპაში სწორედ ამ სახელით იყო ცნობილი ცოდნის ეს დარგი. სნესარევის ღრმა რწმენით, მილუტინმა სახელმწიფოს ძალთა და საშუალებათა სამხედრო მხრივ შემსწავლელი სამეცნიერო დისციპლინა კარგად განსაზღვრა, მაგრამ მას სახელი ცუდად შეუჩია. სნესარევი ამას იმით ხსნის, რომ გეოგრაფიის, როგორც მეცნიერების, ისტორიაში განცდათა წარუმართებლობამ და მომენტის შეუსაბამობამ, აგრეთვე მილუტინის მეტად მოძველებულმა და უკიდურესად ვიწრო შეხედულებამ გეოგრაფიაზე, საბედისწერო როლი შეასრულა ახალი მეცნიერებისათვის სახელის დადგენის საქმეში. ამ ახალი მეცნიერების შემოქმედი, როგორც ჩანს, არასაკმარისი გეოგრაფი იყო, განწყობით მაინც, და ამან თავი იჩინა ამ მეცნიერებისადმი გულგრილ დამოკიდებულებაში, რაც მის ერთგვარ ქირღვამდე მიდიოდა. არასაკმარისი გეოგრაფობა ჩვენი აკადემიის სამხედრო გეოგრაფიის კათედრის ისტორიაში შემდეგშიაც გვიშლიდა ხელს. ამ კათედრის თითქმის არც ერთ პროფესორს არ ჰქონია სპეციალური მომზადება ზოგად გეოგრაფიაში და არ შეუქმნია თავის მოღვაწეობაში აკადემიამდე რაიმე შრომა წმინდა გეოგრაფიის დარგში“ (გვ. 322). სნესარევი არა მარტო გეოგრაფიის შეუფასებლობას უსაყვედურებს მილუტინს. მისი აზრით მილუტინმა სტატისტიკის მნიშვნელობაც გაზვიადებულად წარმოიდგინა. მილუტინის სტატისტიკა, აღმოცენებული ახენვალის სკოლის შეხედულებებზე, რომლის სათავეს კონრინგისაქენ მიგყავართ, უდღეური სამეცნიერო დარგი აღმოჩნდა. მილუტინმა ვერ გაითვალისწინა ამ მეცნიერების უდღეურობა. „ბოლოსდაბოლოს. ამბობს სნესარევი. ისწრაფოდა-რა, რაც უნდა მომხდარიყო, შეექმნა სამხედრო გეოგრაფიისაგან მეცნიერება და არჩევდა-რა ამ მეცნიერებისათვის სახელს გეოგრაფიასა და სტატისტიკას (ახენვალის სტატისტიკას) შორის, მილუტინი შეჩერდა მეორეზე და თავისი მეცნიერება მონათლა უსიკოცხლო მეცნიერების სახელით. გეოგრაფიის არასაკმარისი სიღრმით ცოდნამ, ერთის მხრივ, და მეტისმეტად ვარდისფერმა წინამძღვრებმა და იმედებმა სტატისტიკის მისამართით, ამ მეცნიერულ მარცხში მთავარი როლი შეასრულა“ (გვ. 323). მაგრამ, თუ მილუტინის დროის სტატისტიკას არ ჰქონდა უფლება დაპატრონებოდა სამხედრო გეოგრაფიას, პით უფრო. სნესარევიც აზრით, თანამედროვე სტატისტიკა ამის უფლებას მოკლებული.

რადგან თანამედროვე სტატისტიკა არ არის დამოუკიდებელი მეცნიერება, იგი მხოლოდ მასიურ მოვლენათა შესწავლის მეთოდს წარმოადგენს. სტატისტიკას არა აქვს თავისი საგანი, სტატისტიკას არა აქვს თავისი მასალა. სტატისტიკა მეთოდია, რომელიც მომსახურებას უწევს ნაირგვაროვან სამეცნიერო ჯარგებს და ახლო მომავალში იგი ყველა მეცნიერების მიერ იქნება გამოყენებული. თანამედროვე გეოგრაფია წარმოადგენს თავისი მნიშვნელობით უაღრესად თავისებურ და მკაფიოდ გამოხატულ მეცნიერებას, რომელსაც აქვს თავისი გარკვეული შინაარსი და გარკვეული მეთოდები. სამხედრო გეოგრაფიაც განსაზღვრული მეცნიერებაა და მისი შეცვლა სტატისტიკით, რომელიც მეცნიერება კი არ არის, არამედ მხოლოდ მეთოდია, ეს იქნებოდა მეცნიერების დაუმსახურებელი ჩამოქვეითება მისი კვარცხლბეკიდან. თუ იმას ვიტყვით, რომ სტატისტიკური მეთოდი ფართოდაა გამოყენებული სამხედრო გეოგრაფიაში, ისიც უნდა გვანხოდეს, რომ ეს მეთოდი ერთადერთი მეთოდი როდია სამხედრო გეოგრაფიისათვის და გაუგებარია, რატომ მას უნდა მიეცეს უპირატესობა სხვა მეთოდების წინაშე, რომ არა ვთქვათ რა იმის შესახებ, რომ მეთოდი კი არ განსაზღვრავს მეცნიერების არსს, არამედ მისი მოცულობა და შინაარსი. მუდამ, საუკუნეთა დასაბამიდან, არსებობდა მხოლოდ სამხედრო გეოგრაფია და ასეთად უნდა დარჩეს იგი სამომავლიოდაც (323—327 გვ.). სნესარევი სტატისტიკური მეთოდის, როგორც ასეთის, დახასიათებაზე დიდხანს აჩერებს ჩვენს ყურადღებას. მისი ნაშრომის მთელი მოცულობის თითქმის ნახევარი (190 გვერდი 414-დან) ამ საკითხს ეთმობა (უთუოდ ამ გარემოებამ ათქმევინა ა. სუდაკოვს საყვედური, რომ „სტატისტიკასთან გადამეტებულმა დაახლოებამ უარყოფითი შედეგები მოგვცა; ხშირად სამხედრო-გეოგრაფიულ კურსებში ვეებერთელა განყოფილებას ურთავდნენ თვით თეორიული სტატისტიკიდანაც კი, ასე აქვს, მაგალითად, ა. სნესარევისაო“, მაგრამ სნესარევის ეს ნაბიჯი სწორად არა აქვს გაგებული ა. სუდაკოვს. სნესარევის მიზანი სრულიადაც არ იყო ის, რომ სტატისტიკით დაეჩრდილა სამხედრო გეოგრაფიის კურსი). სტატისტიკისა და სტატისტიკური მეთოდის კარგად მცოდნე სნესარევი სრული დამაჯერებლობით შესძლო თავის სწორ შეხედულებათა დასაბუთება სამხედრო გეოგრაფიაზე. სნესარევის შრომამ ხელი შეუწყო სამხედრო გეოგრაფიის, როგორც თვითმყოფი მეცნიერების, განმტკიცებას ჩვენში.

ა. სნესარევის შრომა ზოგიერთ მის ნაწილში, ცხადია, მიუღებელია საბჭოთა მკითხველისათვის. მარტო ის ერთი გარემოება, რომ სნესარევი გეოგრაფიაში ჰეტენერის ქოროლოგიური კონცეპციის მიმდევარია და ეკონომიურ გეოგრაფიაში იგი ისეთ „ავტორიტეტებს“ ემყარება, როგორცაა, მაგალითად, ს. ვ. ბერნშტეინ-კოგანი, უკვე ყველაფრის მთქმელია. სნესარევი ბუნებისა და ადამიანის ურთიერთობის საკითხებში სრულიად უცხო, მარქსიზმ-ლენინიზმისათვის შეუწყნარებელ ფილოსოფიას ავითარებს. იგი ფიზიკურ-გეოგრაფიულ ფაქტორს განმსაზღვრელ როლს ანიჭებს ადამიანის საზოგადოებრივ და სახელმწიფოებრივ ცხოვრებაში, ამ მხრივ სნესარევი მილუტინის დონემდე ვერ ასულა და მისგან ბევრადაა ჩამორჩენილი. სნესარევის აზრით, „ქვეყნის მდებარეობა სიგანედის ამა თუ იმ კოორდინატებს შორის განსაზღვრულ კლიმატურ სარტყელზე მიგვითითებს... კლიმატური პირობები შეიძლება სრულიად უვარგისი აღმოჩნდეს ცხოვრებისათვის, ადამიანთა შრომისათვის და კულტურის განვითარებისათვის... მსოფლიოს მართავეს ზომიერი სარტყლის ხალხთა ჯგუფი, ხოლო ცივი და ცხელი რაიონების ხალხები ან ძლივსძლივობით არსებობენ, ან მონურად ემსახურებიან ზომიერ რაიონიდან გამოსულ მეუფეებს. ეს გეოგრაფიის შეურყეველი კანონია, და სიგანედის კოორდინატები მის საწყის მონახაზს იძლევიან. და ამ „უსამართლო“ კანონის შეუბრალებლობაში არ შეიძლება ბრალი დაედოს არც ევროპელთა ეგოიზმს, არც შავკანიანთა მოთენთილობას; ბუნება თავის მაგარ მარწუხებში იჭერს ადამიანს და მას ან გამარჯვებულის გვირგვინით ამკობს, ან კაენის მონის დაღს ასვამს“ (გვ. 357). გერმანიაში აღმოცენებული მავნე, ანტიმეცნიერული გეოპოლიტიკური მოძღვრება სნესარევს მეცნიერულ მიმდინარეობად აქვს მიჩნეული და მას კონცეპციის სიფართოვით თავის სანხედრო-გეოგრაფიულ აზროვნებასთან ანათესავენ (გვ. 273-ის სქოლიო). ამის ვარდა, თავის 414 გვერდიან ნაშრომში არსად სნესარევი არ იმარჯვებს მარქსიზმის კლასიკოსთა შეხედულებებს, საკითხთან დაკავშირებით დასახელებულ ლიტერატურაშიაც კი არ მიუთითებს ნაიჭი. რაც, რა თქმა უნდა, შემთხვევითი არ შეიძლება იყოს. თუმცა სნესარევის შრომა 1924 წელსაა გამოქვეყნებული, მაგრამ, როგორც თვითონვე აღნიშნავს, ეს შრომა ემყარება ძველ პლაიფორმას. შექმნილს 1914—1918 წლების მსოფლიო ომამდე. მასში თავი რადიკალური ცვლილებების შესატანად ავტორმა თავის თავს მუშა მისცა და არც უგრძენია თავი ამისათვის საკმაოდ ძლიერ მოტივირებულ რევოლუციურად განწყობილად (გვ. 398). ამ არსებითი ნაწილის მთლიან

ხედავად, საბჭოთა მკითხველი სნესარევის შრომას იყენებს მხოლოდ როგორც კრიტიკულად ასათვისებელ ლიტერატურულ მემკვიდრეობას.

სამხედრო გეოგრაფიის არსის განსაზღვრა შეიძლება ამით დავამთავროთ. გეოგრაფია საერთოდ და მისი სახეობა—სამხედრო გეოგრაფია კერძოდ დღეს საყოველთაოდ მიჩნეული არიან სამეცნიერო დისციპლინებად. სამხედრო გეოგრაფიის მიზნები და ამოცანები უკვე საკმაოდაა დაზუსტებული. სამხედრო გეოგრაფთა მთელი ყურადღება ახლა მიმართული უნდა იყოს ქვეყნების, სახელმწიფოების და ომის თეატრების საფუძვლიანი სამხედრო-გეოგრაფიული შესწავლისაკენ და ამით სამხედრო ცოდნის შეესება-გაღრმავებისაკენ. მაგრამ ეს მაინც არ იქნება საკმარისი, თუ სამხედრო გეოგრაფია იდეოლოგიურად არ დაიხვეწა, თუ მას არ ჩამოერეცხა ის დანალექი, რაც საკმაოდ სქელ ფენად ადევს ამ უძველეს მეცნიერებას ბურჟუაზიულ სამხედრო გეოგრაფთა მარქსისტული დიალექტიკური მატერიალისტური მსოფლმხედველობისადმი უგულვებელმყოფელი დანიოკიდებულების გამო. მოვიფიქროთ თუნდაც სნესარევის ზემოაღნიშნული შეხედულება გეოგრაფიული ფაქტორების ყოვლის შემძღობაზე და სოციალ-პოლიტიკური ფაქტორების დაჩრდილვა ფიზიკურ-გეოგრაფიული მონაცემებით, რასაც ამ ბოლო დრომდე აქვს გასავალი სამხედრო გეოგრაფთა გარკვეულ წრეებში. ზოგიერთი სამხედრო გეოგრაფი თავის ნარკვევში ფიზიკურ-გეოგრაფიულ ფაქტორს წინა პლანზე წამოსწევს, არას იტყვის სოციალ-პოლიტიკურ ფაქტორებზე და მკითხველს, შესაძლოა ავტორის სურვილის გარეშე, არასწორ შეხედულებას შეუმუშავებს სამხედრო მოვლენებზე. ავილოთ, მაგალითისათვის, ა. სუდაკოვის სტატია— „რა არის სამხედრო გეოგრაფია“ (იხ. ურნ. „География в школе“ № 5, 1940 წ., გვ. 53—57, სტატია „Что такое военная география“). ავტორი ზართალია, როცა ამბობს, რომ „საბჭოთა ქვეყანაში სამხედრო გეოგრაფიას, დამყარებულს მარქსისტულ-ლენინურ თეორიაზე, ყველა პირობა აქვს თავისი განვითარებისათვის სწორი გზით და მის წინაშე დასმულ პრაქტიკულ ამოცანათა წარმატებით გადაწყვეტისათვის“. მაგრამ თავის სტატიაში თვითონვე თანმიმდევრულად ვერ ამყარებებს მარქსისტულ-ლენინურ მიდგომას სამხედრო-გეოგრაფიული საკითხების განხილვის დროს. აღნიშნულ სტატიაში ჯოხი გადალუნულია ფიზიკურ-გეოგრაფიული ფაქტორებისაკენ, გვრჩება შთაბეჭდილება, თითქოს ქვეყნის ბუნებრივი პირობები განსაზღვრავდეს სამხედრო ოპერაციების წარმატებას. სამხედრო მოქმედებათა თეა-

ტრის მიმოხილვის დროს თითქმის სრულიად დავიწყებულია ქვეყნის საზოგადოებრივ-პოლიტიკური ვითარება, სოციალური ფაქტორები. განსაკუთრებით ძლიერ იგრძნობა ეს წერილის იმ ნაწილში, სადაც ავტორი ეხება რუსეთ-თურქეთის სამხედრო მოქმედებათა თეატრის დახასიათებას პირველ იმპერიალისტურ ომში და სარიყა-მიშისა და არზრუმის 1914/15 და 1915/16 წლების ზამთრის სამხედრო ოპერაციებს.

მოვიყვანოთ ამის მაგალითები სუდაკოვის აღნიშნული სტატიდან.

თეატრის მდებარეობა ავტორს განმარტებული აქვს შემდეგნაირად: სამხედრო ოპერაციები სწარმოებდა ისეთ რაიონში, რომელიც მეტისმეტად იყო დაშორებული რუსული ჯარების მთავარი ფრონტებისაგან და თურქეთის „სასიცოცხლო ცენტრებისაგან“. ამ რაიონს მეტსახელად „თურქულ შორეულ აღმოსავლეთს“ უწოდებდნენ. ქვემოხუცების გადაზიდვა ქ. ანკარიდან, რომელიც მაშინ ფრონტთან უახლოეს სარკინიგზო სადგურს წარმოადგენდა, ცუდი ყამირი გზებით მთელ სამ თვეს მოითხოვდა. ამის შედეგი იყო ის გარემოება, რომ ოპერაციათა მსვლელობაში, მიუხედავად ზოგიერთი მომენტის კატასტროფულობისა ორივე მხარისათვის, სხვა ფრონტებიდან დახმარების გაწევა სრულიად შეუძლებელი აღმოჩნდა.

თეატრის რელიეფი ავტორს ასე აქვს დახასიათებული: თეატრის რელიეფს უაღრესად საინტერესო ნიშნები ახასიათებს სამხედრო თვალსაზრისით. ქედების, მთიანეთის და ხეობების ქაოსში სამხედრო თვალსაზრისით არჩევს პონტოს თავრის, სამი სომხეთის თავრის და მთავარი თავრის მიმართულებას და ხედავს მათ შორის მდებარე ხეობებში ჯარების მოძრაობისათვის ბუნებრივ გზებს (ჩრდილო ირანსა და ავღანისტანში კი, პირიქით, ქედები გზების განივად მიიმართებიან ამ ქვეყნიბიდან სსრ კავშირისაკენ). მეტი ყურადღებითი შესწავლით გამოიყოფა მთავარი მათგანი: ყარსის პლატოდან და ერევნის ვაკიდან პასინისა და არზრუმის ხეობების გავლით ქ. ერზინჯანისაკენ, ქ. სივასისაკენ და ა. შ. ისტორიული მაგალითები (1828 წ., 1854/55 წ., 1877/78 წ., 1914/15 წ.) ადასტურებენ ამ მიმართულებების უმეტეს მნიშვნელობას. ხეობათა ამ გრებილის სრულ წინააღმდეგობას წარმოადგენს მდ. ჭოროხის გრძელი ხეობა, რომელიც სულ ვიწრო, ძნელად გასასვლელ კლდეკარებისაგან შედგება. ქვეყნის საერთო მაღალმთიანი ხასიათი ისე მკვეთრადაა გამოხატული, რომ აღნიშნულ ხეობებსაც კი აბსოლუტური სიმაღლე აქვთ 1,5—2 კმ,



ქედები კი ხშირად 3,5 კმ-საც აღემატებიან. რუსული ჯარებისათვის, რომლებიც ძირითადად დაბლობი ვაკეების მცხოვრებნი იყვნენ, თვით ყოფნაც კი ასეთ პირობებში დიდ უხერხულობას ჰქმნიდა. ბევრი რამ არის რელიეფში კერძო დამახასიათებელი თავისებურებაც, რომელიც სამხედრო ინტერესს იწვევს. მაგალითად, ზოგიერთ ქედს ბრტყელი თხემი აქვს, რაც ხელს უწყობს ჯარების მოძრაობას არტილერიითაც კი. ისინი ხეობებზე უფრო მოხერხებულია ამით, რომ იქ არ გვხვდება პატარა მდინარეები თავიანთი ეგზომ ნაკლებად საიმედო სამხედრო დროს ხიდებით. თავრების განვიად მიიმართებიან აღმოსავლეთ მთიანეთის ქედები, მაგალითად, სოღანლულისა და არსიანის ქედები და დასავლეთ მთიანეთის ქედები, მაგალითად, დევენ-ბოინუ. ყარა-ბაზარი და სივრი-დალი. ესენი ჰკვეთენ ხეობათა ზემოაღნიშნულ მთავარ ხაზს და, თუმცა არადიდი ფარდობითი სიმაღლისანი არიან, მაინც ჰქმნიან დაბრკოლებებს, იწვევენ გზების გადაჭრას. ბუნებრივია, რომ სწორედ აქ წარმოიშვა ომის მსგელობაში მთავარი ფრონტები და პოზიციების ხაზები. არაწაკლები მნიშვნელობა მოიპოვა თურქთა კეპრიკის პოზიციამაც პასინის ხეობის ცენტრალურ ვიწროებში ჩრდილო და შუა სომხეთის თავრებს შორის, რადგან მას მოწინავე მდებარეობა ჰქონდა არზრუმის სიმაგრის მიმართ. თეატრის მთავარიანი ხასიათი მოითხოვდა აქ ან სპეციალური ჯარების, ე. წ. „ალპური ნაწილების“ გამოყენებას, ან ჩვეულებრივის, მაგრამ კარგად მომარაგებულის საქაპანო ალალებით და სამთო არტილერიით. ამ მხრივ ორივე მეომარი მზარე, და რუსები კი კამპანიის დასაწყისში მეტადრე, არც თუ ისე საკმარისად იყვნენ მომზადებული.

თეატრის მდინარეები, ავტორის დახასიათებით, სიდიდით უმნიშვნელონი არიან და ვიწროკალაპოტიანი (აქ არაა სანაოსნოდ გამოსადეგი მდინარეები, თუ მხედველობაში არ მივიღებთ ჭოროხზე კაიუკებით მიმოსვლას), მაგრამ ალაგალაგ დინების სისწრაფისა და ნაპირების ქარაფიანობის გამო ჯარების დამაშორიშორებელ სერიოზულ დაბრკოლებას წარმოადგენენ, რითაც დიდად ზრდიან ზოგიერთი ხიდის მნიშვნელობას. არზრუმის ოპერაციის გეგმაში რუსებს მიზნად ჰქონდათ დასახული, რომ თურქთა ზურგში მდინარე არეზზე გადებული კეპრიკის ხიდი აეფეთქებინა კავალერიის, რომელიც ღამით ამ ხიდს გადალახავდა. მხოლოდ შემთხვევამ გადაარჩინა დაღუპვას თურქული არმიის ნახევარი (არ წაიყვანეს განყოფილი და ამიტომ ვერ მიაგნეს ხიდს სიბნელეში). ათეულობით პატარა მდინარეებმა, რომლებიც მოედინებიან პონტოს თავრიდან

შავი ზღვისაკენ და ნაკლებად საინტერესონი არიან თურქეთის ზოგად გეოგრაფიაში, დიდი როლი შეასრულეს, როგორც მეტად მნიშვნელოვანმა მიჯნამ, რომელზედაც თურქები თავის პოზიციებს მართავდნენ რუსული ჯარების შეტევის დროს ქ. ტრაპიზონისაკენ.

თეატრის კლიმატურ პირობებს მეტად დიდი მნიშვნელობა აქვს ავტორის აზრით. ხანგრძლივი ზამთარი ხასიათიერება: მკაცრი ყინვებით და უხვი თოვით—თოვლის სისქე უღელტეხილებზე 3 მეტრამდე აღწევს. რაიონში, რომელიც კოლხიდაზე უფრო სამხრეთითაა, სადაც თებერვალში ია ჰყვავის, ჯარებს აწვდიდნენ ნახეიარქურქებს, ქეჩის ფენსაცმელს (ვალენოკს), თეთრ შენილბულ ხალათებს და ბნელ სათვალესაც კი და ცინგის საწინააღმდეგო საშუალებას, როგორც არქტიკაში. ენვერ-ფაშას, რომელმაც სათანადო ყურადღება არ მიაქცია ამ კლიმატურ მონაცემებს, დაეზრო თავისი მე-9 და მე-10 კორპუსთა ჯარისკაცები ათეულ ათასობით ამ ჯარების გრძელი გარსშემოსაველი მოძრაობისას მთებში სარიყამიშის ოპერაციის დროს.

მთების უტყეობა, ავტორის შენიშვნით. კიდევ უფრო ართულეს მკაცრი ზამთრის სიძნელებს: ჯარები ვერსად ვერ მოარიდებენ თავს მტანჯველ ქარებს და ძნელია იშოვო აქ ესოდენ აუცილებელი სათბობი (სრული წინააღმდეგობაა ფინეთის თეატრის მიმართ, სადაც აგრეთვე ცივა, მაგრამ შეშა და სადგომთათვის საშენი მასალა—აურაცხელია). ტყეებით შემოსილია მხოლოდ პონტოს თავრის დასავლეთი და ჩრდილო. ფერდობები და სოლანლუღას ქედი. ტყის არსებობას ამ უკანასკნელზე განსაკუთრებული დიდი მნიშვნელობა ჰქონდა რუსული ჯარების არზრუმის ოპერაციისათვის. 1916 წლის იანვარში ათასობით რუსთა ჯარისკაცი ყინვასა და ქარბუქში შეტევას აწარმოებდა მთების გავლით და თითოეულ მათგანს, გარდა წყვილი ჩანთისა ვაზნებით, ჰქონდა ზურგზე წყვილი შეშის ნაპობი, თანაც ამ შეშის ნაპობს ვაზნაზე ნაკლები მნიშვნელობა როდი ჰქონდა. ტყე სხვა მხრივაცაა საყურადღებო. მაგალითად, სოლანლუღის ტყეს სამხედრო გეოგრაფი რუკაზე განიხილავს არანაკლები ინტერესით, ვიდრე არარატის მთას, რომელიც საუკეთესო ორიენტირს (გზის გამგნებს) წარმოადგენს ავიაციისათვის 200 კილომეტრიანი რადიუსის ფარგლებში, ან ვანის ტბას.

სამიმოსელო გზები, ავტორის აზრით, დიდ გავლენას ახდენს ჯარების დაჯგუფებაზე და მათ გადაყვან-გადმოყვანაზე ოპერაციების მსვლელობაში. ხეობათა მთავარი ზოლის მიმართულებით თბილისიდან მიიმართებოდა თეატრის საუკეთესო გზები: რკინიგზა

და ორმაგი განის სამხედრო გზატკეცილი, რომელიც მდ. ყარს-ჩაის ხეობით მიაღებოდა სარიყამიშს სოღანლულის ქედის ჩრდილო ძირზე. შემდეგ პასინის ხეობით არზრუმამდე იყო 3 პარალელური ყამირი გზა, გამოსადეგი ადალთა მოძრაობისათვის. ამ გზებით მოძრაობდნენ რუსული კავკასიის არმიის მთავარი ძალები, ამავე გზებს ემყარებოდნენ მთავარი თურქული ძალები, რომლებიც არზრუმის გამაგრებულ რაიონს იცავდნენ. უფრო ცუდად იყო გზების საქმე მდ. მტკვრის სათავეებიდან არზრუმისაკენ. აქ დასავლეთ და აღმოსავლეთ მთიანეთის ქედებს შორის ხეობებში ჩრდილოეთიდან ქ. ოლთისისაკენ მიიმართებოდა მხოლოდ ერთი გზატკეცილი, შემდეგ კი, თვით არზრუმამდე, ერთი ცუდი ყამირი გზა იყო და საჩალვადრო ბილიკები. ამ მიმართულებით მოქმედებდნენ მეორეხარისხოვანი ნაწილები. მდ. ქოროხის ხეობაში, რომელიც მოკლებული იყო ყოველგვარ საურმე გზას, თითქმის არ ყოფილა სერიოზული საბრძოლო მოქმედება, სანაპიროზე კი საბრძოლო მოქმედება შესაძლო გახდა მხოლოდ მას შემდეგ, როცა დაიწყო ახალი გზების მშენებლობა ბათობიდან. ხეობათა უგზოობით შუა და სამხრეთ სომხეთის თავრებს შორის აიხსნება ის, თუ რატომ არ უტევდნენ ამ მიმართულებით (ქ. ერევნიდან) რუსული ჯარები არზრუმს (ახლა აქ მიიმართება საუცხოო საავტომობილო გზა, რომელსაც საერთაშორისო მნიშვნელობა აქვს, თეირანი-თავრიზი-ტრაპიზონი). 1914 წლის დეკემბერში ენვერ-ფაშამ დაიწყო თავისი განთქმული სარიყამიშის ოპერაცია, რომელსაც მიზნად ჰქონდა ელვის სისწრაფით მოესპო მთელი რუსული კავკასიის არმია და დაეპყრო ამიერ-კავკასია. ამ ოპერაციის ყველაზე უფრო მნიშვნელოვანი თავისებურება ის იყო, რომ თურქებმა პასინის ხეობაში დასტოვეს თავისი ძალების ერთი მესამედი (მე-11 კორპუსი და კავალერია), ხოლო მთავარი ძალები (მე-9 და მე-10 კორპუსები) მთელი სამთო არტილერიით გაემართნენ ჩრდილო სომხეთის თავრის გავლით ქ. ოლთისის რაიონის ხეობებში (მე-10 კორპუსი „ეშმაკის ხვრელში“—გიურჯი-ბოღაზში—არზრუმიდან ჩრდილო-დასავლეთისაკენ), იმ ვარაუდით, რომ შემდეგ სოღანლულის და არსიანის მთების ხელმეორედ გადალახვით აელოთ სარიყამიში და რუსულ არმიას ზურგიდან დასხმოდნენ. მაგრამ ამ მარშრუტის უგზოობა თურქული ჯარებისათვის ისეთივე მტანჯველი აღმოჩნდა, როგორც ყინვა და თოვლი უღელტეხილებზე. შედეგი—დაიღუპა ორივე გარსშემომგლელი კორპუსი რუსული ჯარებია დარტყვით, რომლებიც ადვილად გადაეწყვნენ მოხერხებულ ხეობაში. მაგრამ, თუ ენვერი გაიმარჯვებდა მის მიერ მოთქმებულ ოპერაცი-

აში, რუსულ არმიასაც ემუქრებოდა სრული დაღუპვა და ისევ უმთავრესად საგზაო პირობების გამოისობით. ყარსის სიმაგრეიდან მოწყვეტილი მთავარი რუსული ძალების ნახევარგარემოცვიდან გამოსასვლელად რჩებოდა მხოლოდ ერთი საურმე გზა სოლანლულის ქედიდან ყალიზმანის ხეობაში—მდ. არეზის კანიონი. მოწინააღმდეგის მოწოლით ასეთ პირობებში უკან დახევას აუცილებლად კატასტროფა მოყვებოდა. თეატრის გზების შესწავლა—განაგრძობს სუდაკოვი—კარგად აგვიხსნის მხარეების მთელ რივ მეორეხარისხოვან საბრძოლო მოქმედებასაც სარიყამიშის ოპერაციის მსვლელობაში. ასე, მაგალითად, ამიერ-კავკასიაში შეტევაში მონაწილეობის მისაღებად თურქებმა დროულად გაგზავნეს კონსტანტინეპოლიდან არადიდი რაზმი. ხმელეთის გზით ეს რაზმი თეატრს მოაღწევდა მხოლოდ რამდენიმე თვის შემდეგ, ამიტომ იგი ზღვით გამოგზავნეს, თუმცა საფრთხე მოელოდა—შეიძლებოდა იგი რუსულ ფლოტს მოესპო, და გადმოსხეს სოფელ ხოფის რაიონში მდ. კოროხის შესართავის ცოტა სამხრეთით. აქედან ეს რაზმი სხვა თურქული ჯარებისაგან იზოლირებულად გაემართა ქ. არტაანისაკენ და დაიკავა იგი. რუკა გვაჩვენებს, რომ აქ რაზმის სწრაფი მოძრაობისათვის არაკუდი საურმე გზა იყო იალამუს-ჩამის უღელტეხილზე გადავლით. არტაანის უკანვე დასაბრუნებლად თბილისიდან რუსულმა სარდლობამ დასძრა ჯარების რაზმი. მისი მარშრუტი ასეთი იყო: რკინიგზით ქ. ბორჯომამდე და შემდეგ გზატკეცილით ქ. ახალციხისა და ქ. ახალქალაქის გავლით. რუკა განმარტავს, რომ ორმაგი სიგრძის გარსშემოსავლელი გზა ახალციხიდან არტაანისაკენ ახალქალაქის გავლით სინამდვილეში უფრო მოკლე აღმოჩნდება, რადგან ეს—გზატკეცილია, ხოლო პირდაპირი გზა ხანგარის უღელტეხილის გავლით—მხოლოდ არასაიმედო ყამირი გზაა.

ა. სუდაკოვის ამგვარ მსჯელობას საბრძოლო მოქმედებათა თეატრების დასახასიათებლად ჩვენ წუნსა ვდებთ, მაგრამ არა იმიტომ, რომ თეატრის ფიზიკურ-გეოგრაფიულ პირობებს, როგორცაა მდებარეობა, რელიეფი, ჰავა, მდინარეები, ტყე და მისთანანი, ანგარიშს არ ვუწევდეთ და მათს მნიშვნელობას ვამციკრებდეთ, არამედ იმიტომ, რომ, როგორც ვხედავთ, აქ ოპერაციების მსვლელობა მართოდენ ბუნებრივი პირობების მიხედვითაა შეფასებული, რაც უფლებას გვაძლევს ვიფიქროთ, რომ ავტორი ფიზიკურ-გეოგრაფიულ ფაქტორებს განმსაზღვრელ როლს ანიჭებს. ამ შთაბეჭდილებას ოდნავადაც ვერ ანელებს ერთი პაწია აბზაცი, სადაც ნათქვამია, რომ თეატრის მოსახლეობის ნაციონალური შემადგენლობის თავისებურებას პატა-

რა როლი არ უთამაშნია ენერჯის ავანტიურულ გეგმებში; მისი იმედი, რომ დაჩაგრული მუსულმანი ხალხები მტრულად იყვნენ განწყობილი მეფის რუსეთისადმი, საგრძნობლად გამართლებულა. არც პომდევნო აბზაკი შველის საქმეს, სადაც ლაპარაკია თეატრის სამეფურნეო პირობებზე: ჩამორჩენილი, თხლად დასახლებული მხარის ეკონომიური რესურსების სიღარიბემ განსაზღვრა არმიების მომარაგება მხოლოდ და მხოლოდ სამხედრო საწყობების ხარჯზე, რომელთა შევსება ღრმა ზურგიდან ხდებოდა. მაგრამ მეჯოგეობის პროდუქციის სიჭარბეს ერთგვარი მნიშვნელობა ჰქონდა: რუსული ჯარები ზორციით მომარაგებაში უფრო იშვიათად განიცდიდნენ შეფერხებას, ვიდრე პურით მომარაგებაში. ეს ორიოდე მკლე ცნობა—ნაციონალური საკითხისა და ეკონომიური პირობების შესახებ ფარდას არ ჰდის მკომარი მხარეების სოციალური, საზოგადოებრივ-პოლიტიკური ცხოვრების და კერძოდ საიხედრო პოლიტიკის დედაარსს, რომელიც საზღვრავდა ომის მიზნებსა და ამოცანებს, ომის საშუალებათა და სამხედრო ძალთა მომზადების ხარისხს, მებრძოლთა და მათი სარდლობის კლასობრივ ინტერესებს, მეომარი მხარეების ეროვნებათა და ხალხთა ამ ომით დაინტერესების დონეს, მეზობელ ქვეყნების და სხვა სახელმწიფოთა დამოკიდებულებას ამ ომისადმი და ა. შ. მართალია, ყოველივე ამას დაწვრილებით ვერ დაეთმობა ადგილი სამხედრო გეოგრაფიაში, მაგრამ სამხედრო გეოგრაფიის გამოფიტვა სოციალ-პოლიტიკური ელემენტებისაგან შესაწყნარებელი არ არის.

ვიდეე უფრო მკაფიოდ ჩანს სოციალური ფაქტორის უგულვებელყოფის ცდა სამხედრო გეოგრაფიის არსის განსაზღვრაში ი. ტროიციკის სტატიაში—„სამხედრო გეოგრაფია“, რომელიც მოთავსებულია დიდ საბჭოთა ენციკლოპედიაში (იხ. ტომი მე-15, გვ. 281—283). სტატიის ავტორს არასწორი შეხედულება აქვს სამხედრო გეოგრაფიის მეთოდოლოგიურ მხარეზე, როცა ამბობს, რომ „სამხედრო გეოგრაფია ზოგადი გეოგრაფიის სპეციალური დარგია, რომელიც შეისწავლის ფიზიკურ-გეოგრაფიულ გარემოს სივრცობრივ დამოკიდებულებებს, მის თვისებებს და მასთან დაკავშირებულ საწარმოო ძალებს, აგრეთვე სოციალურ ურთიერთობებს, ჩამოყალიბებულთ ამ უკანასკნელთა საფუძველზე, ყველა ამ ფაქტორის ომის, საომარი ოპერაციების და ბრძოლის მომზადებასა და წარმოებაზე გავლენის თვალსაზრისით... ჩვენი დროის სამხედრო გეოგრაფია შეიძლება განისაზღვროს როგორც ქოროლოგიური მეცნიერება“. ამგვარად, ტროიციკი სოციალურ ფაქტორს იხსენიებს, მა-

გრამ შეუფერებელ ადგილას და უმართებულად. არაა სწორი მისი აზრი, რომ სოციალური ურთიერთობანი თითქოს ჩამოყალიბებული იყოს ფიზიკურ-გეოგრაფიულ გარემოს თვისებებთან დაკავშირებულ საწარმოო ძალთა საფუძველზე. ხოლო სანხედრო გეოგრაფიის ქოროლოგიურ მეცნიერებად გამოცხადება სტატიის ავტორში ამჟღავნებს აშკარად ჰეტნერის ანტიმეცნიერული გეოგრაფიული კონცეპციის მიმდევარს.

სამხედრო მოქმედებათა და მდგომარეობათა მარქსისტულ-ლენინური შეფასების კლასიკურ მაგალითებს წარმოადგენენ დიდი სტალინის სტატიები, რომლებშიაც სამხედრო მოქმედებათა მიღწეული ან მოსალოდნელი წარმატებანი ახსნილია ან გათვალისწინებულია არა იმდენად ფიზიკურ-გეოგრაფიული პირობებით, რამდენადაც სოციალური და პოლიტიკური მომენტების გაანალიზებით. მოვიგონოთ შემდეგი სტატიები—„სამხედრო მდგომარეობისათვის სამხრეთში“, „ანტანტის ახალი ლაშქრობა რუსეთის წინააღმდეგ“, „უკრაინის კვანძი“ (პირველი ორი სტატია მოთავსებულია წიგნში *ლენინი და სტალინი*—ნაწარმოებთა კრებული საკ. კ. პ. (ბ) ისტორიის შესწავლისათვის, ტ. II, გვ. 274—278 და გვ. 279—283, საკ. კ. პ. (ბ) ც. კ-ის პარტგამომცემლობა, 1936 წ., ხოლო მესამე სტატია კრებულში: *სტალინი*—სტატიები და სიტყვები უკრაინაზე, გვ. 39—41, უკ (ბ) ც. კ-ის პარტგამომცემლობა; სამივე ეს სტატია ერთად ცალკე ბროშურადაც გამოიცა ჩვენში, 1941 წელს). სტატიაში „სამხედრო მდგომარეობისათვის სამხრეთში“, პირველ თავში—„ანტანტის ჩაშლილი გეგმები“ ნათქვამია: „1919 წლის გაზაფხულზე საბჭოთა რუსეთის წინააღმდეგ მოფიქრებულ იქნა კოლჩაკ-დენიკინ-იუდენიჩის კომბინირებული ლაშქრობა. მთავარი დარტყმა უნდა მოეხდინა კოლჩაკს, რომელსაც დენიკინი იმედოვნებდა შეუერთდებოდა სარატოვში, რათა ერთად დაეწყოთ მოსკოვზე შეტევა აღმოსავლეთით. იუდენიჩს დაეკისრა დამხმარე დარტყმა პეტროგრადზე. ლაშქრობის მიზანი ფორმულირებულ იქნა გუჩკოვის მოხსენებაში დენიკინისადმი: „ერთი დარტყმით ჩავახრჩოთ ბოლშევიზმი მისთვის ძირითადი სასიცოცხლო ცენტრების—მოსკოვის და პეტროგრადის წართმევით“. თვით ლაშქრობის გეგმა კი მოხაზულ იქნა დენიკინის წერილში კოლჩაკისადმი; ეს წერილი ხელში ჩაგვითარდა გრიშინ-ალმაზოვის შტაბთან ერთად 1919 წლის გაზაფხულზე. „მთავარი ისაა, რომ არ შეგჩერდეთ ვოლგაზე,—სწერდა კოლჩაკს დენიკინი,—არამედ განვაგრძოთ დარტყმა ბოლშევიზმის გულისაკენ—მოსკოვისაკენ. იმედი მაქვს სარატოვში შეგხვდებით...

პოლონელები თავის საქმეს გააკეთებენ, ხოლო რაც შეეხება იუდე-  
 ნიჩს, იგი მზადაა და არ დააყოვნებს დაარტყას პეტროგრადს...“  
 ასე სწერდა დენიკინი გაზაფხულზე, როდესაც კოლჩაკის გაცხარე-  
 ბული შეტევა სწარმოებდა ვოლგაზე. მაგრამ ეს გეგმა ჩაიშალა:  
 კოლჩაკი უკუქცეულ იქნა ურალის გადაღმა; დენიკინი შეჩერებულ  
 იქნა ხაზზე: მდინარე სეიმი—ლისკი—ბალაშოვი; იუდენიჩი განდევნილ  
 იქნა იამბურგს იქით. საბჭოთა რუსეთი მთელი და უვნებელი დარჩა.“  
 შემდეგ სტალინი ეხება 1919 წლის შემოდგომისათვის მოფიქრე-  
 ბულ შემმუსვრელი ლაშქრობის ახალ გეგმას და ამბობს: „მაგრამ  
 ბედმა ინება, რომ ეს გეგმაც ჩაშლილიყო. დენიკინის ჯარები უკუქცე-  
 ულია პოლტავა-კუპიანსკ-ჩერტკოვოს იქით; იუდენიჩი განადგურ-  
 ებულია და გადარეკილია ნარვას იქით. რაც შეეხება კოლჩაკს,  
 ნოვო-ნიკოლაევსკთან სასტიკი დამარცხების შემდეგ მისი არმიისაგან  
 მხოლოდ მოგონებალა დარჩა. რუსეთი ახლაც მთელი და უვნებელი  
 დარჩა“. სტალინის მეორე თავში—„კონტრრევოლუციის დამარცხე-  
 ბის მიზეზთა შესახებ“, სტალინი კონტრრევოლუციის და, უპირ-  
 ველეს ყოვლისა, დენიკინის დამარცხებას ხსნის შემდეგი მიზეზებით,  
 როგორცაა: ა) კონტრრევოლუციის ჯარების ზურგის უმტკიცობა  
 და ბ) კონტრრევოლუციის საგანაპირო მდგომარეობა, და აგრეთვე  
 სხვა უახლოესი მიზეზებითაც, როგორცაა: 1) რეზერვებისა და შევ-  
 სებათა საქმის გაუმჯობესება საბჭოთა სამხრეთის ფრონტზე, 2)  
 მომარაგების საქმის გაუმჯობესება, 3) კომუნისტ-მუშების ნოზღვა-  
 ვება ფრონტზე პიტერიდან, მოსკოვიდან, ტვერიდან, ივანოვო-ვოზ-  
 ნესენსკიდან, რომლებიც ჩვენს სამხრეთის პოლკებში შევიდნენ და სავ-  
 სებით გარდაქმნეს ისინი, 4) მმართველობის აპარატთა მოწესრი-  
 გება, რაც წინათ სავსებით მოშლილი იყო მამონტოვის თავდასხმა-  
 თა გამო, 5) სამხრეთის ფრონტის სარდლობის მიერ საფლანგო  
 დარტყმათა ოსტატურად გამოყენება შეტევის დროს, 6) თვით შე-  
 ტევის მეთოდურობა. კონტრრევოლუციის ჯარების ზურგის უმტკი-  
 ცობის შესახებ სტალინი ამბობს: „ვერცერთი არმია ქვეყანაზე  
 ვერ გაიმარჯვებს, თუ მას მტკიცე ზურგი არა აქვს, ხოლო დენიკი-  
 ნის (და აგრეთვე კოლჩაკის) ზურგი სავსებით მერყევია. კონტრრევო-  
 ლუციური ჯარების ზურგის მერყეობის ეს ფაქტი აიხსნება ამ ჯა-  
 რების შემქმნელი დენიკინ-კოლჩაკის მთავრობის სოციალური ხასი-  
 ათით. დენიკინს და კოლჩაკს თან მოაქვთ არა მარტო მემამულისა  
 და კაპიტალისტის უღელი, არამედ ინგლის-საფრანგეთის კაპიტა-  
 ლის უღელიც, დენიკინ-კოლჩაკის გამარჯვება ეს არის რუსეთის  
 დამოუკიდებლობის დაკარგვა, რუსეთის გადაქცევა ინგლის-საფრან-

გეთის ფულის ქისათა მეწველ ფურად. ამ აზრით დენიკინ—კოლჩაკის მთავრობა ყველაზე ანტიხალხური, ყველაზე ანტინაციონალური მთავრობაა. ამ აზრით საბჭოთა მთავრობა ერთად-ერთი ხალხური და ერთად-ერთი ნაციონალური მთავრობაა ამ სიტყვის საუკეთესო მნიშვნელობით, ვინაიდან მას თან მოაქვს არა მარტო მშრომელთა განთავისუფლება კაპიტალისაგან, არამედ მთელი რუსეთის განთავისუფლებაც მსოფლიო იმპერიალიზმის უღლისაგან, რუსეთის გადაქცევა კოლონიიდან დამოუკიდებელ თავისუფალ ქვეყნად. განა ცხადი არ არის, რომ დენიკინ-კოლჩაკის მთავრობა და მისი ჯარები ვერ დაიმსახურებენ ვერც პატივისცემას და ვერც მხარდაჭერას რუსი მოსახლეობის ფართო ფენების მხრივ? განა ცხადი არ არის, რომ დენიკინ-კოლჩაკის ჯარებში შეუძლებელია იყოს გამარჯვების ის მხურვალე სურვილი და ის აღფრთოვანება, ურომლებოდაც გამარჯვება საერთოდ შეუძლებელია? დენიკინ-კოლჩაკის ზურგი ირღვევა, ძირს უთხრის რა ფრონტის სიმაგრეს, იმიტომ, რომ დენიკინ-კოლჩაკის მთავრობა ეს არის რუსი ხალხის მონობის მთავრობა, მთავრობა, რომელიც მოსახლეობის ფართო ფენების მაქსიმალურ უნდობლობას იწვევს. საბჭოთა ჯარების ზურგი მტკიცდება და თავისი ძალებით კვებავს წითელ ფრონტს იმიტომ, რომ საბჭოთა მთავრობა ეს არის რუსი ხალხის განთავისუფლების მთავრობა, მთავრობა, რომელიც მოსახლეობის ფართო ფენების მაქსიმალური ნდობით სარგებლობს“. კონტრრევოლუციის საგანაპირო მდგომარეობის შესახებ ს ტ ა ლ ი ნ ი ამბობს: „ჯერ კიდევ ოქტომბრის გადატრიალების დასაწყისში გამოისახა ერთგვარი გეოგრაფიული გამიჯვნა რევოლუციასა და კონტრრევოლუციას შორის. სამოქალაქო ომის შემდგომი განვითარების მსვლელობაში რევოლუციის და კონტრრევოლუციის რაიონები საბოლოოდ გამოირკვა. შიდა რუსეთი მისი სამრეწველო და კულტურულ-პოლიტიკური ცენტრებით—მოსკოვი და პეტროგრადი, ნაციონალური მხრივ ერთგვაროვანი მოსახლეობით, უმთავრესად რუსი მოსახლეობით,—რევოლუციის ბაზად გადაიქცა. რუსეთის განაპირა მხარეები კი, უმთავრესად სამხრეთი და აღმოსავლეთი განაპირა მხარეები, სადაც არ არის მნიშვნელოვანი სამრეწველო და კულტურულ-პოლიტიკური ცენტრები, ნაციონალური მხრივ უაღრესად მრავალფეროვანი მოსახლეობით, რომელიც, ერთის მხრივ, შედგება პრივილეგიური კოლონიზატორ-კაზაკებისაგან და, მეორე მხრივ, არასრულუფლებიანი თათრებისა, ბაშკირებისა, ყირგიზებისა (აღმოსავლეთში), უკრაინელებისა, ჩაჩნებისა, ინგუშებისა და სხვა მუსულმანი ხალხებისაგან,—კონტრრევოლუციის ბაზად გადაიქცნენ. აქედან არ არის იმის გაგება, რომ რუსეთის მებრძოლი ძალების ასეთ გეოგრაფიულ



განაწილებაში არაბუნებრივი არათერია. მართლაც: სხვა ვინ უნდა იყოს საბჭოთა მთავრობის ბაზა, თუ არა პეტროგრად-მოსკოვის პროლეტარიატი? სხვა ვინ უნდა იყოს დენიკინურ-კოლჩაკური კონტრ-რევოლუციის სიმაგრე, თუ არა რუსული იმპერიალიზმის ძველის-ძველი იარაღი, პრივილეგიური და სამხედრო წოდებად ორგანიზებული კაზაკობა, რომელიც ძველთაგანვე ეწევა არარუს ხალხთა ექსპლოატაციას განაპირა მხარეებში? განა ცხადი არ არის, რომ არავითარი სხვა „გეოგრაფიული განაწილება“ არც შეიძლებოდა ყოფილიყო? მაგრამ ამ მდგომარეობას შედეგად ჰქონდა (და ახლაც აქვს) მთელი რიგი საბედისწერო გარდუვალი მიწისუფლები კონტრრევოლუციისათვის და ამდენივე გარდუვალი პლუსები რევოლუციისათვის. გააფთრებული სამოქალაქო ომის ეპოქაში მომქმედ ჯარების წარმატებისათვის აბსოლუტურად აუცილებელია იმ ცოცხალ ადამიანთა გარემოს ერთიანობა, შეკავშირებულობა, რომლის ელემენტებით საზრდოობს და რომლის ძალებით თავი გააქვს ამ ჯარებს, მასთან ეს ერთიანობა შეიძლება იყოს ნაციონალური (განსაკუთრებით სამოქალაქო ომის დასაწყისში), ან კლასობრივი (განსაკუთრებით სამოქალაქო ომის განვითარების დროს). ასეთი ერთიანობის გარეშე წარმოუდგენელია ხანგრძლივი სამხედრო წარმატებანი. მაგრამ საქმეც სწორედ ისაა, რომ რუსეთის განაპირა მხარეები (აღმოსავლეთი და სამხრეთი) დენიკინისა და კოლჩაკის ჯარებისათვის არ წარმოადგენენ და არც შეიძლება წარმოადგენდნენ არც ნაციონალური და არც კლასობრივი მხრივ ცოცხალი გარემოს ერთიანობის იმ მინიმუმსაც კი, ურომლისოდაც (როგორც ზემოთ ვამბობდი) სერიოზული გამარჯვება შეუძლებელია. მართლაც, რა ნაციონალური ერთიანობა შეიძლება იყოს, ერთის მხრივ, თათრებსა, ბაშკირებსა, ყირგიზებსა (აღმოსავლეთში), ყალმუხებსა, ჩაჩნებსა, ინგუშებსა, უკრაინელებსა (სამხრეთში) და, მეორე მხრივ, კოლჩაკ-დენიკინის ქეშმარიტ რუსულ თვითმპყრობელურ მართვაგამგეობას შორის? ან კიდევ: რა კლასობრივი ერთიანობა შეიძლება იყოს, ერთის მხრივ, ურალის, ორენბურგის, დონის, ყუბანის პრივილეგიურ კაზაკობასა და განაპირა მხარეების ყველა დანარჩენ მოსახლეობას შორის, რუს „სხვაქალაქელთა“ გამოუკლებლივ, რომელთაც უხსოვარი დროიდან სჩაგრავდნენ და ექსპლოატაციას უწევდნენ მუშობელი კაზაკები? განა ცხადი არ არის, რომ ასეთი სხვადასხვაგვარი ელემენტებისაგან შემდგარი ჯარები აუცილებლად უნდა დაიშალოს საბჭოთა არმიების მხრივ პირველ სერიოზულ დარტყმისათანავე, რომ ყოველმა ასეთმა დარტყმამ აუცილებლად უნდა გა-

ადღიეროს რუსეთის განაპირა მხარეების არაკაზაკ ელემენტების მისწრაფება საბჭოთა მთავრობისაკენ, რომელიც ძირიან-ფესვიანად უარყოფს დიდმპყრობელურ ზრახვებს და სიამოვნებით უჭერს მხარს მათს ნაციონალურ მისწრაფებებს. განაპირა მხარეების დაპირისპირებით შიდა რუსეთი სულ სხვა სურათს იძლევა. ჯერ ერთი, ნაციონალური მხრივ ის ერთიანი და შეკავშირებულია, ვინაიდან მისი მოსახლეობის ცხრა მეათედი ველიკოროსებისაგან შედგება. მეორე, იმ ცოცხალი გარემოს კლასობრივი ერთიანობის მიღწევა, რომელიც საბჭოთა ჯარების ფრონტსა და უშუალო ზურგს კვებავს, ადვილდება მასში გლეხებს შორის პოპულარული პეტროგრად-მოსკოვის პროლეტარიატის ყოფნით, რომელიც მკიდროდ რაზმავს მას საბჭოთა მთავრობის გარშემო. სხვათა შორის სწორედ ამით აიხსნება საბჭოთა რუსეთის ზურგისა და ფრონტის ის გასაოცარი კონტაქტი, რომელიც არასოდეს არ ამშვენებდა კოლჩაკ-დენიკინის მთავრობას: საკმარისია საბჭოთა მთავრობამ გადასძახოს ფრონტისადმი დახმარების შესახებ, რომ რუსეთმა თვალის დახამხამებაში მოგვეცეს ახალი პოლკების მთელი წყება. ამაშივე უნდა ვეძიოთ იმ გასაოცარი ძალისა და უმაგალითო მოქნილობის წყარო, რომელსაც ჩვეულებრივ საბჭოთა რუსეთი იჩენს კრიტიკულ წუთებში. აქვე უნდა ვეძიოთ იმ, ანტანტის განათლებულ შამანთათვის გაუგებარი, ფაქტის ახსნა, რომ „კონტრრევოლუციური ჯარები, აღწევენ რა გარკვეულ საზღვრებს (შიდა რუსეთის საზღვრებს!), გარდუვალად კატასტროფას განიცდიან“...

ეს საკმაოდ ვრცელი ამონაწერი ოქტომბრის სოციალისტური რევოლუციის სტრატეგის დიდი სტალინის სტატიიდან ნათლად გვეუბნება, რომ სამხედრო მოქმედებათა მსვლელობა და შედეგები არ შეიძლება თეატრის ფიზიკურ-გეოგრაფიული პირობების ავჯარგიანობით შეფასდეს, მთავარია სოციალური ფაქტორები. მაგრამ ეს ისე არ უნდა გავიგოთ, რომ ფიზიკურ-გეოგრაფიულ პირობებს თავისი მნიშვნელობა არ ჰქონდეთ და მათ თავისი როლის შესრულება არ შეეძლოთ სამხედრო ოპერაციების დროს. მოვიგონოთ დიდი სტალინის აზრი ქვეყნის ფიზიკურ-გეოგრაფიული პირობების მნიშვნელობის შესახებ ამ მხრივ მისი ნაშრომიდან— „ოქტომბრის რევოლუცია და რუსეთის კომუნისტების ტაქტიკა“. აღნიშნავს-რა ოქტომბრის რევოლუციის გამარჯვების გამაადვილებელ შინაგან ხელსაყრელ პირობებს, ერთ-ერთ ასეთ პირობად დიდი სტალინი სთვლის მას, რომ ოქტომბრის რევოლუციის განუკარგულებამი იყო ახალგაზრდა სახელმწიფოს უზარმაზარი სივრ-

კვები, სადაც მას შეეძლო თავისუფალი მანევრირება, უკანდახევად, როდესაც ამას ვითარება მოითხოვდა, სულისმოთქმა, ძალების მოკრება და სხვ.“, და „ოქტომბრის რევოლუციას კონტრარევოლუციასთან ბრძოლის დროს ქვეყნის იმედი ჰქონოდა, რომ ქვეყნის შიგნით არსებული სურსათის, სათბობისა და ნედლეულის რესურსები მისთვის საკმაო იქნებოდა“ (ი. სტალინი — „ლენინიზმის საკითხები“, მე-11 გამოცემა, ქართული თარგმანი, გვ. 101).

ამგვარად, ფიზიკურ-გეოგრაფიულ პირობებს—ტერიტორიას, ქვეყნის ბუნებრივ სიმდიდრეს—სურსათის, სათბობი და ნედლეული რესურსების სიუხვეს თავისი გარკვეული მნიშვნელობა აქვთ სამხედრო საქმეში. ისინი, როგორც შესაძლებლობანი, და არა როგორც განმსაზღვრელი ფაქტორები, გავლენას ახდენენ საბრძოლო მოქმედების წარმატებასა და გამარჯვებაზე. ჩვენ მუდამ უნდა გვახსოვდეს დიდი სტალინის ბრძნული აზრი ქვეყნის ყოველგვარ შესაძლებლობათა გამოვლინებისა და ამოქმედების აუცილებლობის შესახებ ქვეყნის როგორც მშვიდობიანი მშენებლობისა, ისე საომარ მოქმედებათა ნაყოფიერად წარმოების უზრუნველსაყოფად: „სახელმწიფოთა ისტორიაში, ქვეყნების ისტორიაში, არმიების ისტორიაში ყოფილა შემთხვევები, როცა წარმატებისათვის, გამარჯვებისათვის ყველა შესაძლებლობა არსებობდა, მაგრამ ისინი, ეს შესაძლებლობანი, გამოუყენებელი რჩებოდა, რადგან ხელმძღვანელები ვერ ამჩნევდნენ ამ შესაძლებლობებს, ვერ იყენებდნენ მათ, და არმიები მარცხდებოდნენ“ (ი. სტალინი — „ლენინიზმის საკითხები“, მე-11 გამოცემა, ქართული თარგმანი, გვ. 406). არავის ისე მტკიცედ არ მართებს ამ ჭეშმარიტების დახსომება, როგორც სამხედრო გეოგრაფს. საბჭოთა სამხედრო გეოგრაფმა ყოველმხრივ კარგად უნდა შეისწავლოს და გაგვაცნოს ქვეყნის (როგორც ჩვენი, ისე მოკავშირე თუ მოწინააღმდეგე მხარის) ყოველგვარი შესაძლებლობა, ქვეყნის ბუნებრივი სიმდიდრენი, საერთოდ ფიზიკურ-გეოგრაფიული და ეკონომ-გეოგრაფიული პირობები. მაგრამ, ვიმეორებთ, ამავე სამხედრო გეოგრაფს მოეთხოვება ქვეყნის (როგორც ჩვენი, ისე მოკავშირე თუ მოწინააღმდეგე მხარის) სოციალ-პოლიტიკური ცხოვრების გათვალისწინებაც და ზუსტად გაანალიზება, ამის გარეშე ყველა მისი თეორიული და პრაქტიკული მოსაზრებანი უნდადაგო, უსაფუძვლო იქნება.

სამხედრო მოქმედებაში მიღწეულ წარმატებათა ახსნა მარტო-ოდენ ფიზიკურ-გეოგრაფიული მოვლენებით იმას ემსგავსებოდა, რომ ჩვენს დიად სამამულო ომში წითელი არმიის ბრწყინვალე გა-

მარჯვება მოსკოვის მისადგომებთან აგვეხსნა ზამთრის ცივი ამინდებით. ცხადია, წითელი არმიის ძლევამოსილების წყაროდ ცარივლა ზამთრის მიჩნევა უაზრობაა. ეს ბუნებრივი, ფიზიკური ფაქტორი არარაობაა იმ დიდსოციალ-პოლიტიკურ ვითარებასთან შედარებით, რამაც უზრუნველყო წითელი არმიის წარმატებანი.

აი, რას ამბობს დიდი სტალინი სამამულო ომში მიღწეულ წარმატებათა შესახებ თავდაცვის სახალხო კომისრის ბრძანებაში წითელი არმიის არსებობის XXIV წლისთავთან დაკავშირებით:

„მ თვის წინათ ფაშისტური გერმანია მუხანათურად დაესხა თავს ჩვენს ქვეყანას, უხეშად და უტიფრად დაარღვია ხელშეკრულება თავდაუსხმელობის შესახებ. მტერს იმედი ჰქონდა, რომ პირველივე დარტყმის შემდეგ წითელი არმია განადგურდებოდა და წინააღმდეგობის უნარს დაჰკარგავდა. მაგრამ მტერი სასტიკად მოსტყუვდა ანგარიშში. მან ვერ გაითვალისწინა წითელი არმიის ძალები, ვერ გაითვალისწინა საბჭოთა ზურგის სიმტკიცე, ვერ გაითვალისწინა ჩვენი ქვეყნის ხალხთა ნებისყოფა გამარჯვებისა, ვერ გაითვალისწინა ფაშისტური გერმანიის ევროპული ზურგის არასამედობა, ბოლოს, ვერ გაითვალისწინა ფაშისტური გერმანიისა და მისი არმიის შინაგანი სისუსტე. ომის პირველ თვეებში, გერმანელ ფაშისტთა თავდასხმის მოულოდნელობისა და შეცრობის გამო, წითელი არმია იძულებული აღმოჩნდა უკან დაეხია და საბჭოთა ტერიტორიის ნაწილი დაეტოვებინა. მაგრამ უკანდახევისას იგი ჰქანცავდა მტრის ძალებს და სასტიკად ურტყამდა მას. არც წითელი არმიის მებრძოლებს, არც ჩვენი ქვეყნის ხალხებს ექვი არ ეპარებოდათ, რომ ეს უკან დახევა დროებითია, რომ მტერს შევჩაჩერებთ, ხოლო შემდეგ გავანადგურებთ კიდევ. ომის მსვლელობაში წითელ არმიას ემატებოდა ახალი სასიცოცხლო ძალები. ივსებოდა ადამიანებითა და ტექნიკით, დასახმარებლად მოსდიოდა ახალი სარეზერვო დივიზიები. და დადგა დრო, როდესაც წითელ არმიას საშუალება მიეცა შეტევაზე გადასულიყო უზარმაზარი ფრონტის მთავარ უბნებზე. მოკლე ხნის განმავლობაში წითელმა არმიამ ზედიზედ ჩასცა ლახვარი გერმანიის ფაშისტურ ჯარებს დონის როსტოვთან და ტიხვინთან, ყირიმში და მოსკოვთან. მოსკოვთან წარმოებულ გააფთრებულ ბრძოლებში მან დაამარცხა გერმანიის ფაშისტური ჯარები, რომლებიც გარშემორტყმით ემუქრებოდნენ საბჭოთა დედაქალაქს. წითელმა არმიამ უკუაგდო მტერი მოსკოვიდან და მას დასავლეთისაკენ მიერეკება. გერმანელი დამპყრობელებისაგან საე-

სებით გათავისუფლებულია მოსკოვისა და ტულის ოლქები, მტრის მიერ დროებით დაკავებული სხვა ოლქების ათობით ქალაქები და ასობით სოფლები. ახლა გერმანელებს უკვე აღარა აქვთ ის საზღვდრო უპირატესობა, რაც მათ ომის პირველ თვეებში ჰქონდათ მუხანათური და უეცარი თავდასხმის შედეგად. უეცრობისა და მოულოდნელობის მომენტი, როგორც გერმანიის ფაშისტური ჯარების რეზერვი, სავსებით ამოიწურა. ამით ლიკვიდირებულ იქნა ის უთანასწორობა ომის პირობებში, რაც გერმანიის ფაშისტთა თავდასხმის უეცრობით იყო შექმნილი. ახლა ომის ბედს გადასწყვეტს არა ისეთი მეორეხარისხოვანი მომენტი, როგორცაა უეცრობის მომენტი, არამედ მუდმივ მომქმედი ფაქტორები: ზურგის სიმტკიცე, არმიის მორალური სულისკვეთება, დივიზიების რაოდენობა და ხარისხი, არმიის შეიარაღება, არმიის უფროსთა შემადგენლობის ორგანიზატორული ნიჭი... შორს არ არის ის დღე, როცა წითელი არმია თავისი მძლავრი დარტყმით უკუაგდებს გამხეცებულ მტრებს ლენინგრადისაგან, გასწმენდს მათგან ბელორუსიისა და უკრაინის, ლიტვისა და ლატვიის, ესტონეთისა და კარელიის ქალაქებსა და სოფლებს, გაათავისუფლებს საბჭოთა ყირიმს, და მთელ საბჭოთა მიწა-წყალზე კვლავ ძლევამოსილად იფრიალებს წითელი დროშები... აუცილებელია, რათა ფრონტზე ჯარის სულ ახალი და ახალი ნაწილები მიდიოდნენ გამხეცებულ მტერზე გამარჯვების გამოსაჰქედად. აუცილებელია, რათა ჩვენი მრეწველობა, განსაკუთრებით სამხედრო-მრეწველობა, გაორკეცებული ენერჯით მუშაობდეს. აუცილებელია, რათა დღითი-დღე ფრონტი სულ უფრო და უფრო მეტ ტანკებს, თვითმფრინავებს, ქვემეხებს, ნალმსატყორცნებს, ტყვიამფრქვევებს, შაშხანებს, ავტომატებს, საომარ მასალებს იღებდეს. ამაშია წითელი არმიის ძალისა და ძლიერების ერთ-ერთი ძირითადი წყარო. მაგრამ წითელი არმიის ძალა მარტო ამაში როდია. წითელი არმიის ძალა, უწინარეს ყოვლისა, იმაში მდგომარეობს, რომ იგი ეწევა არა დაპყრობითს, არა იმპერიალისტურ ომს, არამედ სამამულო, განმათავისუფლებელ, სამართლიან ომს. წითელი არმიის ამოცანა იმაში მდგომარეობს, რომ გაათავისუფლოს გერმანელი დამპყრობელებისაგან ჩვენი საბჭოთა ტერიტორია, გაათავისუფლოს გერმანელი დამპყრობელების უღლისაგან ჩვენი სოფლებისა და ქალაქების მოქალაქენი, რომლებიც ომამდღე თავისუფალნი იყვნენ და ადამიანურად ცხოვრობდნენ, ხოლო ახლა დაჩაგრულნი არიან და იტანჯებიან ძარცვისა, აკლებისა და შიმშილისაგან, დასასრულ, გაათავისუფლოს ჩვენი ქალები იმ სირცხვილისა და შეურაცხყოფისაგან, რასაც მათ გერმანელი ფაშისტ-

მტარვალები აყენებენ. რა შეიძლება იყოს ასეთ ამოცანაზე უფრო კეთილშობილური და დიადი? არც ერთ გერმანელ ჯარისკაცს არ შეუძლია სთქვას, რომ იგი სამართლიან ომს ეწევა, ვინაიდან არ შეუძლია არ ხედავდეს, რომ მას აიძულებენ იომოს სხვა ხალხების გაძარცვისა და დაჩაგვრისათვის. გერმანელ ჯარისკაცს არა აქვს ომის დიადი და კეთილშობილური მიზანი, რომელიც შესძლებდა მის აღფრთოვანებას და რომლითაც მას შეეძლო ეამაყნა. და, პირიქით, წითელი არმიის ყოველ მებრძოლს შეუძლია სიამაყით სთქვას, რომ იგი ეწევა სამართლიან, განმათავისუფლებელ ომს, ომს თავისი სან-შობლოს თავისუფლებისა და დამოუკიდებლობისათვის. წითელ არმიას აქვს ომის თავისი კეთილშობილური და დიადი მიზანი, რომელიც აღფრთოვანებს მას საგმირო საქმეებისათვის. სწორედ ამით აიხსნება, რომ სამამულო ომი ჩვენში წარმოშობს ათასობით გმირ ვაჟებსა და ქალებს, რომლებიც მზად არიან თავი დასდონ თავისი სამშობლოს თავისუფლებისათვის. ამაშია წითელი არმიის ძალა. ამაშივეა გერმანიის ფაშისტური არმიის სისუსტე... ბოლოს, წითელი არმიის ძალა იმაში მდგომარეობს, რომ მას არა აქვს და არც შეიძლება ჰქონდეს რასობრივი სიძულვილი სხვა ხალხებისადმი, მათ შორის გერმანელი ხალხისადმიც, რომ იგი აღზრდილია ყველა ხალხისა და რასის თანასწორუფლებიანობის სულისკვეთებით, სხვა ხალხების უფლებებისადმი პატივისცემის სულისკვეთებით. გერმანელთა რასობრივ თეორიას და რასობრივი სიძულვილის პრაქტიკას ის შედეგი მოჰყვა რომ ყველა თავისუფლებისმოყვარე ხალხი ფაშისტური გერმანიის მტერი გახდა. სსრკეში რასობრივი თანასწორუფლებიანობის თეორიას და სხვა ხალხების უფლებებისადმი პატივისცემის პრაქტიკას ის შედეგი მოჰყვა, რომ ყველა თავისუფლებისმოყვარე ხალხი საბჭოთა კავშირის მეგობარი გახდა. ამაშია წითელი არმიის ძალა. ამაშივეა გერმანიის ფაშისტური არმიის სისუსტე“ (იხ. „ბრძანება თავდაცვის სახალხო კომისრისა, 1942 წლის 23 თებერვალი, № 55, ქ. მოსკოვი“, თბ. 1942 წ., გვ. 8—19).

შეადარეთ ეს ანალიზი იმ აზრს, რომელსაც ზემოთ შევხებთ — თითქოს ცივმა ზამთარმა განაპირობა წითელი არმიის წარმატებანი, და მიიღებთ აზრის ნაცვლად საბავშვო ზღაპარს თეთრწვერა თოვლის ბაბუისა და ყინულის ლოლუების უძლიველობის შესახებ.

ფიზიკურ-გეოგრაფიული ფაქტორის არა-განმსაზღვრელი როლის შესახებ სამხედრო მოქმედებათა დარგში კიდევ უფრო მეტი სიცხადით მიგვიითობს დიდი სტალინი თავის მოხსენებაში, რომელიც მან გააკეთა დიდი ოქტომბრის სოციალისტური რევოლუ-

ციის XXV წლისთავთან დაკავშირებით მშრომელთა დეპუტატების მოსკოვის საბჭოს და ქ. მოსკოვის პარტიულ და საზოგადოებრივ ორგანიზაციათა 1942 წლის 6 ნოემბრის საზეიმო სხდომაზე. ეხება-რა 1941 წლის საომარი მოქმედების საკითხს საბჭოთა კავშირ-გერმანიის ფრონტზე და გამოაყოფს-რა ამ საომარ მოქმედებაში ორ პერიოდს, დიდი სტალინი აღნიშნავს, რომ: „პირველი პერიოდი — ეს უპირატესად ზამთრის პერიოდია, როცა წითელმა არმიამ, მოიგერია რა გერმანელების იერიში მოსკოვზე, აიღო ინიციატივა თავის ხელში, გადავიდა შეტევაზე, გარეკა გერმანელთა ჯარები და 4 თვის განმავლობაში ზოგ ადგილას 400-ზე მეტი კილომეტრი გაი-არა... საომარმა მოქმედებამ პირველი პერიოდის განმავლობაში, განსაკუთრებით კი წითელი არმიის წარმატებითმა მოქმედებამ როსტოვის, ტულის, კალუგის რაიონში, მოსკოვთან, ტიხვინთან და ლენინგრადთან—ორი ღირსშესანიშნავი ფაქტი გამოავლინა. მან დაგვანახა, ჯერ-ერთი, ის, რომ წითელი არმია და მისი საბრძოლო კადრები გაიზარდნენ სერიოზულ ძალად, რომელსაც უნარი წესწყევს არა მარტო გაუმკლავდეს გერმანელ ფაშისტთა ჯარების შემოუევას, არამედ კიდევ დაამარცხოს ისინი აშკარა ბრძოლაში და უკან გარეკოს. მეორეც,—მან დაგვანახა, რომ გერმანელ ფაშისტთა ჯარებს მთელ მათს სიმტკიცესთან ერთად აქვთ ისეთი სერიოზული ორგანული ნაკლოვანებანი, რომლებსაც წითელი არმიისათვის ზოგ ხელსაყრელ პირობებში შეუძლიათ გამოიწვიონ გერმანელთა ჯარების დამარცხება. არ შეიძლება შემთხვევითად ჩაითვალოს ის ფაქტი, რომ გერმანელთა ჯარები, რომლებმაც ტრიუმფალური მარშით გაიარეს მთელი ევროპა და ერთი დაკვრით შემუსრეს ფრანგთა ჯარები, რომლებიც პირველხარისხოვან ჯარებად ითვლებოდნენ, მარტო ჩვენს ქვეყანაში შეხვდნენ ნამდვილ საომარ წინააღმდეგობას, და არა მარტო წინააღმდეგობას, არამედ იძულებული გახდნენ წითელი არმიის დარტყმებით უკან დაეხიათ დაკავებული პოზიციებიდან 400-ზე მეტი კილომეტრით და უკანდახვევის გზაზე მიეტოვებინათ ქვიშხების, მანქანების, საომარი მასალების კოლოსალური რაოდენობა. მხოლოდ ომის ზამთრის პირობებით არასგზით არ შეიძლება ამ ფაქტის ახსნა“ (იხ. ი. ბ. სტალინი — „დიდი ოქტომბრის სოციალისტური რევოლუციის XXV წლისთავი“, თბ. 1942 წ., გვ. 8—9).

საბჭოთა სამხედრო გეოგრაფიას კარგად ესმის სამხედრო მოქმედებათა თეატრის ფიზიკურ-გეოგრაფიული ფაქტორების მნიშვნელობა ომისათვის, მაგრამ არანაკლებ კარგად ესმის მეომარ მხარეთა საზოგადოებრივი და სახელმწიფოებრივი ცხოვრების სოციალ-პოლიტიკური ფაქტორების როლი სამხედრო ოპერაციათა წარმოების საქმეში. ამაშია მისი დიდი უპირატესობა ყველა სხვაგვარი სამხედრო გეოგრაფიების წინაშე.

## სამხედრო გეოგრაფიის შედგენილობა და თემატიკა

სამხედრო ქვეყანათმცოდნეობა.—სამხედრო მოქმედებათა თეატრების გეოგრაფია.— დ. ა. მილუტინის პროგრამული მოსაზრებანი.— ი. ტროიციკის სტატიასთან დართული პროგრამის ნიმუში.—საბჭოთა სამხედრო გეოგრაფიის თემატიკა ერთ-ერთი უახლესი პროგრამის მიხედვით.

გეოგრაფიულ გარემოსადმი სამხედრო თვალსაზრისის თავისებურებათა გარკვევის დროს აღენიშნეთ, რომ სამხედრო გეოგრაფიას ყოველი გეოგრაფიული ფაქტი და მოვლენა აინტერესებს იმდენად, რამდენადაც ეს სამხედრო ოპერაციებისაარვის ხელშემწყობ ან ხელშემშლელ პირობას წარმოადგენს და რამდენადაც იგი თავდაცვითი თუ შეტევითი ომის ერთ-ერთ უმნიშვნელოვანეს ძალას და საშუალებას შეიცავს. გეოგრაფიული ფაქტებისა და მოვლენების შესწავლა საერთოდ ორი მიმართულებით სწარმოებს: ა) კონკრეტული ტერიტორიის ფარგლებში და ბ) ზოგადად, ე. ი. ტერიტორიალურ მონაცემთა განზოგადებით. სამხედრო გეოგრაფიას, როგორც ვიცით, თითოეული ფაქტორის გათვალისწინება უხდება კონკრეტულ ვითარებაში, მოცემული ტერიტორიის ფარგლებში. და, რადგან მოცემულ ტერიტორიათა, ქვეყანათა შესწავლა მეცნიერული გეოგრაფიის იმ დარგის საქმეა, რომელსაც ქვეყანათმცოდნეობა ეწოდება, გასაგებია, რომ სამხედრო გეოგრაფიასაც აქვს ასეთივე დარგი—სამხედრო ქვეყანათმცოდნეობა. მეცნიერული გეოგრაფიის მეორე დიდი დარგი, რომელიც ცალკეულ ფაქტორებს ზოგადად განიხილავს და ცნობილია ზოგადი ფიზიკური გეოგრაფიის სახელწოდებით, სამხედრო გეოგრაფიაში ცალკე ღიბსივლინად არ არის გამოყოფილი, იგი გამოხატულებას პილოვებს პილო სამხედრო ქვეყანათმცოდნეობაში.



სამხედრო ქვეყანათმცოდნეობა ქვეყანას, სახელმწიფოს შეისწავლის, როგორც მთლიან ერთეულს. მაგრამ სამხედრო გეოგრაფია გვერდს ვერ აუქცევს ცალკეულ ადგილგარემოთა და მცირეოდენი სივრცის მქონე უბნების შესწავლას. რა თქმა უნდა, აუცილებელია სამხედრო თვალსაზრისით იმ ადგილგარემოს შესწავლა, რომელიც სამხედრო მოქმედებათა სარბიელს ანუ თეატრს წარმოადგენს. სამხედრო მოქმედებათა თეატრი, როგორც ცნობილია, არის ცოტად თუ ბევრად გამოცალკევებული რაიონი, ზოლი ან ტერიტორია, რომელზედაც ომის დროს ვითარდება ორივე მხარის სამხედრო ოპერაციები. ის შეიცავს არმიების თავმოყრის ადგილებს, ოპერაციების ადგილებს და ზურგის არეს (საეტაპო რაიონს). ბევრი რამ, რაც შეიძლებოდა მეორეხარისხოვან ობიექტად მიჩნეულიყო ან სრულიადაც უგულებელეყოთ ქვეყნის, როგორც მთელი ერთეულის, მიმოხილვის დროს, უურადლების ცენტრში დგება სამხედრო მოქმედებათა თეატრის გაცნობის დროს. აქ უბრალო წვრილმანსაც კი თავისი მნიშვნელობა და დანიშნულება ეძლევა, ზოგჯერ ამ წვრილმანმა საგანმა თუ მოვლენამ შესაძლოა გადამწყვეტი როლიც კი შეასრულოს სამხედრო ოპერაციაში. აღარას ვიტყვით იმის შესახებ, რომ ქვეყნის, როგორც მთელი ერთეულის, მიმოხილვის დროს შეუძლებელია ერთნაირი გულდასმით აღინუსხოს ყოველი მისი კუთხე-გარემოს ყოველი დეტალი. ამისათვის საჭიროა სამხედრო გეოგრაფიას ჰქონდეს ცალკე განყოფილება—სამხედრო მოქმედებათა თეატრების გეოგრაფია ან მოკლედ თეატრების გეოგრაფია. მართლაც, სამხედრო გეოგრაფიას ორი დიდი დარგი აქვს—სამხედრო ქვეყანათმცოდნეობა და თეატრების გეოგრაფია.

სამხედრო გეოგრაფიის ორ-დარგიანობა ამ სამეცნიერო დისციპლინის თანდაყოლილი თვისებაა, მისი მიზანშეწონილება უდავოდაა ცნობილი ყველა სამხედრო სპეციალისტის მიერ. მას მხარს უჭერენ სამხედრო გეოგრაფიის უახლესი წარმომადგენლებიც. „სამხედრო სასწავლებლებში—ამბობს ა. სულაკოვი—სამხედრო გეოგრაფია სამხედრო დისციპლინათა რიცხვშია, მოქცეული და ძირითად დისციპლინათა მიმართ (როგორიცაა „სტრატეგია“, „ოპერაციების ხელოვნება“, „ტაქტიკა“ და სხვ.) მიჩნეულია, როგორც დამხმარე, მათი მომსახურე საგანი ჯარების მოქმედების ადგილგარემოს ყოველმხრივ შესწავლის საქმეში. ამგვარად, სამხედრო გეოგრაფიის შესწავლის მთავარ ობიექტს „სამხედრო მოქმედებათა თეატრები“ წარმოადგენს. მაგრამ თეატრების გამოკვლევის დროს შეუძლებელია მათი სრული მოწყვეტა იმ ქვეყნებისაგან, რომელთაც ისინი ეკუთვნ-

ნიან: ქვეყნების მთლიანობაში შესწავლა, სამხედრო თვალსაზრისით, ასევე მნიშვნელოვანი საქმეა, და ამიტომ საერთო „ქვეყანათმცოდნეობა“ სამხედრო გეოგრაფიაში უნდა შედიოდეს, როგორც მისი ნაწილი და წინაეც კი უნდა უსწრებდეს თეატრების გეოგრაფიას. სამხედრო მოქმედებათა თეატრების როლი და მნიშვნელობა დიდად არის დამოკიდებული შესაბამისი ქვეყნების საერთო სამხედრო ძლიერებაზე (თავდაცვითი უნარიანობაზე), მათს მდებარეობაზე და მთელ რიგ ფიზიკურ-გეოგრაფიულ და სხვა პირობებზე. ჩვენს დროში, ისეთ შორსმოქმედ საომარ საშუალებათა განსაკუთრებულ ზრდასთან დაკავშირებით, როგორცაა ავიაცია და წყალქვეშა ნავები, თეატრების სივრცობლივი ფარგლები ძლიერ ფართოვდება, ნაწილობრივ განუსაზღვრელიც კი ხდება; მათ შეიძლება მოიცვან მთელი ქვეყანა და ქვეყნების ჯგუფიც კი (პატარა ქვეყნებისა). ამის შესაბამისად ძლიერ ფართოვდება იმ რაიონების ფარგლები, რომელთა შესწავლა უნდა მოხდეს ოპერატიული და მეტადრე სტრატეგიული ინტერესით გამოწვეული დეტალებით. მაგრამ მაინც რჩება განსხვავებული, განსაკუთრებით ომის პირველ ხანაში, ხარისხი მნიშვნელობისა და ამდენად ხარისხი აუცილებელი დეტალებისა თვით შესწავლის ამოცანებში. სამხედრო გეოგრაფიის გაყოფა ორ დიდ ნაწილად—სამხედრო ქვეყანათმცოდნეობად (ანუ სახელმწიფოთა სამხედრო გეოგრაფიად) და თეატრების გეოგრაფიად—აუცილებელია და მას აქვს ადგილი ამ დისციპლინის არსებულ პროგრამებსა და კურსში... სამხედრო გეოგრაფია ორსავე თავის დარგში ეხება უმთავრესად კონკრეტულ რაიონებს, იქნება იგი მთელი ქვეყნები და თეატრები, საყურადღებონი სტრატეგიული მხრივ, თუ ტერიტორიის უმცირესი უბნები და ობიექტები, რომლებიც მხოლოდ ტაქტიკის თვალსაზრისით არიან საინტერესონი“ (იხ. სუდაკოვის ციტირებული სტატია, გვ. 53).

სამხედრო გეოგრაფიის შედგენილობის საკითხის გარკვევის შემდეგ საჭიროა გავეცნოთ მის თემატიკასაც დარგთა მიხედვით. ზოგიერთთ ამ მხრივ სამხედრო გეოგრაფიის ფუძემდებლის დ. ა. მილუტინის პროგრამული მოსაზრებანი (გამიზნებული ავტორის მიერ. სამხედრო სტატისტიკისათვის, მაგრამ მიღებული ჩვენს მიერ სამხედრო გეოგრაფიისათვის). მილუტინს სახელმწიფოს დასახასიათებლად გამოყოფილი აქვს სამი ძირითადი ძალა ანუ ელემენტი: 1) ქვეყანა (ტერიტორია), 2) მოსახლეობა და 3) სახელმწიფო წყობილება და დადგენილებანი. სამხედრო-სტატისტიკური კვლევის დროს მთელი ყურადღება ექცევა დედამიწის ზედაპირის იმ თვისებებს, რომ-

ლებიც, მილუტინის აზრით, განსაზღვრავენ საერთოდ სახელმწიფოს საშუალებებს ომის წარმატებით წარმოებისათვის, ასევე მოსახლეობას, მის მატერიალურ და მორალურ მდგომარეობას, სახელმწიფო წყობილებას, ფინანსების მდგომარეობას. შინაარსის მხრივ ნარკვევი სახელმწიფოს შესახებ სამი განყოფილებისაგან უნდა შედგებოდეს: I—შესავალი, რომელიც უნდა შეიცავდეს მთელ სახელმწიფოს საერთო მიმოხილვას სამხედრო მხრივ, ე. ი. მის საერთო ძირითად ძალთა ანუ ელემენტთა განხილვას სამხედრო თვალსაზრისით და იმ ზომით, რამდენადაც მათ შეუძლიათ გავლენა იქონიონ მთელ სახელმწიფოს სამხედრო ძლიერებაზე; II—შეიარაღებულ ძალთა გამოკვლევა, ხმელეთისა და საზღვაოსი, აგრეთვე მათი მოწყობის, მომარაგების, შენახვის და სამხედრო დროისათვის მომზადების გამოკვლევა; III—სახელმწიფოს სტრატეგიული მდგომარეობის გამოკვლევა ომის თეატრების მიხედვით. მილუტინის აზრით, პირველ განყოფილებაში ჯერ უნდა იყოს მოცემული ზოგადი შეხედულებანი სახელმწიფოს პოლიტიკურ სვებედზე, მის თანდათანით განვითარებაზე და ახლანდელ მდგომარეობაზე სახელმწიფოთა საერთო პოლიტიკურ სისტემაში, შემდეგ კი გარკვეულ იქნას საკითხი: შეეფერება თუ არა მის პოლიტიკურ მდგომარეობას ის ძირითადი ძალები, რომლებიც განსაზღვრავენ სახელმწიფოს სამხედრო საშუალებებს, სახელდობრ: ა) ქვეყანა (ტერიტორია). ე. ი. დედამიწის ზედაპირი, რომელიც სახელმწიფოს უკავია, უნდა იქნას განხილული ფართობის, მდებარეობის და საერთო ტოპოგრაფიული თვისებების მიხედვით: საზღვრების მოხაზულობა სამფლობელოთა მთლიან მასასთან და აგრეთვე ჰმეზობელ სახელმწიფოებთან დამოკიდებაში; ამას ძლიერი მნიშვნელობა აქვს ზოგადი სამხედრო მოსაზრებით: ზოგი სახელმწიფო დიდ სივრცეზეა გადაჭიმული, ან გაფანტულია ცალკე ნაწილებად, ზოგი მომრგვალებულია და მთლიან მასას შეადგენს; ერთი თავისი მდებარეობით მხოლოდ კონტინენტური სახელმწიფოა, ზოგი მხოლოდ საზღვაო; ერთი უფრო იძულებულია, რომ თავდაცვისათვის შედარებით მეტი ჯარი იყოლოს, ვიდრე მეორე; ერთი მთავარ ყურადღებას აქცევს სახმელეთო ჯარებს, მეორე კი ფლოტს. ქვეყნის საერთო ტოპოგრაფიულ ხასიათსაც შეუძლია ზოგჯერ დიდი გავლენა იქონიოს სამხედრო მოქმედებაზე; ის გვაჩვენებს ზოგჯერ შეიარაღებულ ძალთა თვით წყობილებას და შედგენილობას: ერთ სახელმწიფოს მეტი ფეხოსანი, მსროლელი ჰყავს, მეორე აძლიერებს უმთავრესად კავალერიას და ა. შ. ნიადაგის ნაყოფიერება, ჰავა და

ადგილის სხვა თვისებები განსაზღვრავენ სახელმწიფოს საკუთარ-  
 საშუალებებს არმიისა და ფლოტის მომარაგებისა და შენახვისა-  
 თვის, გვაჩვენებენ ჯარების განლაგების სისტემას მშვიდობიანობის  
 დროს და სხვ., დაბოლოს წყალსავალი და ხმელეთის გზები, ხელოვ-  
 ნური თუ ბუნებრივი, გავლენას ახდენენ საერთო სამხედრო-ადმი-  
 ნისტრაციულ მოსაზრებებზე, აადვილებენ ან აძნელებენ სამხედრო  
 ან სასურსათო მარჩაფის გადაზიდვას, თვით ჯარების მოძრაობას,  
 როგორც მშვიდობიანობის დროს, ასევე სამხედრო მოქმედებათა  
 დაწყების წინ: ამ თვალსაზრისით უნდა იქნას განხილული გზათა  
 საერთო თვისებები სახელმწიფოში და მათ მიმართულებათა სის-  
 ტემა. ბ) მოსახლეობა: მისი რაოდენობა, განაწილება, მატერია-  
 ლური კეთილდღეობის დონე, მორალური მდგომარეობა, — განსაზღ-  
 ვრავენ არა მარტო შეიარაღებულ ძალთა რიცხვს, არამედ მათ  
 არსებითს თვისებებსაც, აგრეთვე გვაჩვენებს რა ზომით, ომის შემ-  
 თხვევაში, შეუძლია მთავრობას იმედი იქონიოს ხალხის დახმარებისა  
 და თვით ჯარების კეთილსაიმედობის. გ) სახელმწიფო წყობი-  
 ლეობა, დადგენილებანი და ფინანსები: მთავრობის  
 დამოკიდებულება თავის ხალხთან, სახელმწიფოს დამოკიდებულება  
 სხვა სახელმწიფოსთან, ეს მეტისმეტად დიდ გავლენას ახდენს სამ-  
 ხედრო სისტემაზე, ომის თვით მსვლელობაზე და სამხედრო-ადმინის-  
 ტრაციულ ზომებზე, როგორც მშვიდობიან, ისე ომის დროს: ერთ  
 სახელმწიფოში შეიძლება შედარებით მეტი ჯარი ვიყოლიოთ, ვიდ-  
 რე მეორეში; ერთ მთავრობას უფრო მეტი შესაძლებლობა აქვს,  
 ვიდრე მეორეს — მიიღოს აუცილებელი ენერგიული ზომები; ერთის  
 წყობილებაში ძლიერი ცენტრალიზაციაა, მეორისაში — სახელმწიფოს  
 ნაწილებს შორის სუსტი კავშირია, ყოველივე ეს უშუალოდაა და-  
 კავშირებული სამხედრო მოსაზრებებთან. მეორე განყოფილე-  
 ბაში მოცემული უნდა იყოს სახელმწიფოს სამხედრო სისტემის  
 გამოკვლევა, შეიარაღებულ ძალთა შედგენილობა და წყობილება:  
 სამხედრო სისტემის ვარჯისობა და არახელსაყრელობა, მისი ძლი-  
 ერი და სუსტი მხარეები; რამდენი და როგორი ჯარები ჰყავს სა-  
 ხელმწიფოს მშვიდობიანობის დროს, რამდენი ჯარის გამოყვანა  
 შეუძლია მას ნამდვილად მტრის წინააღმდეგ; სწრაფად შეუძლია  
 თუ არა არმიას დადგეს საომარ ფეხზე; მზად აქვს თუ არა სახელ-  
 მწიფოს ყველა დამხმარე და სამეურნეო საშუალებანი ჯარების შე-  
 სანახად და ომის საწარმოებლად; ყურადღება უნდა მიექცეს ჯა-  
 რების სამეურნეო და მატერიალურ მდგომარეობას, სამწყობრო და  
 ზნეობრივ მდგომარეობას; შედარებულ იქნას იმ სახელმწიფოთა

არმიების თვისებები და ნაკლოვანებანი, რომელთა შორის შეიძლება მოველოდეთ ომს; უნდა შევეხოთ აგრეთვე სამხედრო ხელოვნების თეორიის მდგომარეობას და გაბატონებულ იდეებს სამხედრო მოქმედებათა შესახებ. მესამე განყოფილებაში გამოკვლეულ უნდა იქნას სტრატეგიული მხრივ სახელმწიფოს ის ნაწილები, რომლებიც ნამდვილად შეიძლება იქცეს ომის თეატრად (იხ. ციტირ. ნაშრომი, გვ. 56—61).

მილუტინის შეხედულებით ომის თეატრი უნდა იქნას განხილული შემდეგი გეგმით: 1) საერთო პირობები, რომელშიც უნდა მოველოდეთ ომს ამათუიმ სახელმწიფოსთან, ამისათვის უნდა გადავავლოთ თვალი მეომარ სახელმწიფოთა ურთიერთ მდგომარეობას გეოგრაფიული მდებარეობისა და პოლიტიკური დამოკიდებულების მხრივ; მხედველობაში იქნას მიღებული სხვა სახელმწიფოები, რომლებიც შეიძლება მოკავშირე ან ნეიტრალური გახდნენ; შემდეგ აღინიშნოს ომის თეატრის ფარგლები და მისი დაყოფა მოქმედებათა კერძო თეატრებად. 2) ამ შესავალის შემდეგ აუცილებელია სამხედრო-გეოგრაფიული მიმოხილვა მთელი იმ სივრცისა, რომელიც მოქცეულია ომის განსახილველ თეატრში, ე. ი. აღნიშნოს იგი მთავარ, მკვეთრ დამახასიათებელ ხაზებში; არ უნდა შევიკრეთ წვილმან ცნობებში, რამდენადაც შეიძლება უნდა გამოვხატოთ ქვეყნების ფიზიკონომია სამხედრო თვალსაზრისით, როონის იდეის მიხედვით, ე. ი. შევნიშნოთ ქვეყნის ის საერთო ნიშნები, რომლებიც საზღვრავენ მისი ხელსაყრელობის დონეს ჯარების მოძრაობისა და მოქმედებისათვის, მათი დაბანაკებისათვის, მომარაგებისათვის, შენახვისათვის და სხვ. და სხვ. ამ თვალსაზრისით უნდა გამოისახოს უმთავრესი თვისებები ადგილის, მდინარეების, მთების, სამიმოსვლო გზების, და ნაჩვენები იქნას უშესანიშნავესი პუნქტები, განსაკუთრებით ციხე-სიმაგრენი. 3) საერთო მიმოხილვის შემდეგ უკვე შეიძლება შევუდგეთ ომის თეატრის სტრატეგიულ განხილვას. გამოირკვეს: ერთი თუ მეორე მეომარ მხარისათვის უმნიშვნელოვანესი გეოგრაფიული საგნებისა და საერთოდ მთელი მხარის თვისებების ვარჯისობა და არახელსაყრელობა. ბუნებრივი მიჯნები, როგორიცაა: მდინარეები, ქედები, ზღვის ნაპირები, პოლიტიკური საზღვრები, პოლიტიკური მხრივ მნიშვნელოვანი ან გამაგრების მხრივ ძლიერი პუნქტები, გზები, მათ შორის რკინიგზებიც, ომის თეატრის სხვადასხვა ნაწილის საერთო ფარდობითი მდებარეობა, მათი საშუალებანი ჯარების მომარაგებისა, შენახვისა და მოქმედებისათვის,—ყოველივე ამას შეიძლება ექნეს გამოსადეგი

ან არახელსაყრელი გავლენა მოქმედებებზე, გარკვეულ ვითარებაში, აძლიერებს ან ასუსტებს თავდაცვას, საზღვრავს სახელმწიფოს სუსტ ან ძლიერ პუნქტებს. ამ მონაცემთა მიხედვით შეიძლება დავსახოთ ყველაზე უფრო მოსალოდნელი მოქმედებათა საგნები, ყველაზე უფრო ხელსაყრელი ან გადამწყვეტი ოპერაციული ხაზები (მოქმედებათა გზები), ყველაზე უფრო გამოსადეგი ბაზისები, უმნიშვნელოვანესი თავდაცვითი ხაზები და ა. შ. ეს მოსაზრებები შეიძლება გამოგვადგეს ერთგვარად საერთო დასკვნების გამოსაყვანად ომის მთელი თეატრის ვარგისობისა და არახელსაყრელობის შესახებ და ადგილობრივ მონაცემთა გავლენის შესახებ ომის საერთო გეგმაზე; მაგრამ უცნაური იქნებოდა გვეფიქრნა, რომ შეიძლებოდა დაგვესახა მოქმედებათა მთელი მსვლელობა, ადგილები, სადაც უნდა შეხვდნენ არმიები ერთმანეთს და სადაც უნდა გაისხნას აუცილებლად ომის კვანძი: ეს უკვე დამოკიდებულია შესრულების კერძო მომენტებზე და შემთხვევითს გარემოებაზე, რომელთა წინასწარ გათვალისწინება შეუძლებელია. მილუტინი შენიშნავს, რომ აუცილებელია დავეყრდნოთ სამხედრო ხელოვნების საღ საწყისებს, ცალმხრივობა ადგილის სტრატეგიულ შეფასებაში საზიანოა. არც ძველი გამოცდილებაა ამ მხრივ ყოველთვის გამოსადეგი, შეიძლება ყალბი დასკვნები გამოგვივიდეს (იხ. ციტირ. ნაშრომი, გვ. 62—67).

მილუტინის პროგრამულ მოსაზრებათა შესახებ უნდა ითქვას შემდეგი: ავტორი გეოგრაფიულ საგნებსა და მოვლენებს მიანიჭ შედარებით უფრო ნაკლებ ადგილს უთმობს, ვიდრე ისეთ საკითხებს, როგორიცაა სახელმწიფო წყობილება, დადგენილებანი, ფინანსები, სამხედრო სისტემა, შეიარაღებული ძალები, სახელმწიფოს სტრატეგიული მდგომარეობა და მისთანანი. ჩვენის აზრით, სამხედრო გეოგრაფიისათვის გეოგრაფიული გარემო, გეოგრაფიული საგნები და მოვლენები ყურადღების ცენტრში უნდა იდგეს. ის არ უნდა იყოს მხოლოდ საბრძოლო ოპერაციებისათვის საჭირო დამატებითი ცნობები. სამხედრო გეოგრაფიას განსაზღვრული სამეცნიერო დარგის დანიშნულება და მნიშვნელობა უნდა ჰქონდეს სახელმწიფოს თავდაცვის საერთო საქმეში. ის უნდა იძლეოდეს მთლიან და ნათელ სურათს სახელმწიფოს ბუნების, მოსახლეობისა და მეურნეობის შესახებ და ამის შემდეგ მისი ცალკეული ცნობები აგრეთვე უნდა იქნას გათვალისწინებული და გამოყენებული საბრძოლო ოპერაციების კერძო ამოცანების მართებულად გადასაწყვეტად, როცა ამას მოითხოვს ბრძოლის კონკრეტული ვითარება.

დასასრულ, მილუტინის პროგრამის ძირითადი ნაკლი ისიცაა, რომ აქ სრულიად უგულვებელყოფილია კლასები და კლასობრივი ურთიერთობანი. მილუტინის ლიბერალური მსოფლმხედველობა, ცხადია, შორს იდგა მარქსისტულ-ლენინური ფილოსოფიის კონცეპციისაგან.

ამ მხრივ გაცილებით უფრო უპასუხებს ჩვენს ახალ მოთხოვნილებებს ი. ტროიციის სტატიასთან დართული სამხედრო გეოგრაფიის პროგრამის ნიმუში. აქ წარმოდგენილია სამხედრო გეოგრაფიის ორივე დარგი, როგორც სამხედრო ქვეყანათმცოდნეობა ანუ სახელმწიფოების სამხედრო გეოგრაფია, ისე თეატრების ანუ სახელმწიფოს ცალკე რაიონების სამხედრო გეოგრაფია. აქ დავიწყებული არ არის ფიზიკურ-გეოგრაფიული საკითხების გვერდით სოციალ-პოლიტიკური საკითხები და ქვეყნის ეკონომიური მდგომარეობა. პროგრამაში იგრძნობა საკმაოდ გარკვეული აზრი იმის შესახებ, რომ საერთო დასკვნა სახელმწიფოს ძლიერი და სუსტი მხარეების შესახებ შესაძლოა გამოყვანილ იქნას ქვეყნის როგორც ფიზიკურ-გეოგრაფიული, ისე სოციალ-პოლიტიკური და ეკონომიური ფაქტორების გათვალისწინების საფუძველზე, თუმცა არ შეიძლება არ შევნიშნოთ, რომ მაინც არა-საკმაო სიღრმითა და მოცულობითაა აქ წარმოდგენილი ფიზიკური გეოგრაფია. აი, თვით პროგრამაც. სახელმწიფოების სამხედრო გეოგრაფიის ამოცანაა, შეგვასწავლოს: 1) საგარეო პოლიტიკური ვითარება და მოსალოდნელი მოწინააღმდეგეების სამხედრო შესაძლებლობათა დახასიათება, როგორც ძირითადი კრიტერიუმი შემდგომი დასკვნისათვის. 2) სახელმწიფოს მდებარეობა ოკეანეების, მსოფლიო გზებისა და მოსალოდნელი მოწინააღმდეგეების მიმართ. ბლოკადის შესაძლებლობა. 3) ტერიტორიის სიდიდე და მისი სამეურნეო ათვისების დონე. სარკინიგზო ქსელი. ყამირი გზების ქსელის განვითარება. ავტოტრანსპორტის მდგომარეობა. დასკვნა ტერიტორიის შესახებ, რომელიც გამოსადეგია ომის მიზნებისათვის გამოსაყენებლად. 4) საზღვრების გავრცელება, ხასიათი და სასაზღვრო ზოლის თვისებები. საზღვრის ღია და დაფარული ადგილები. საზღვრის დაშორება ქვეყნის სასიცოცხლო ცენტრებიდან და ამ ცენტრების უშიშროების ხარისხი. 5) მოსახლეობა, როგორც მუშახელისა და არმიის დაკომპლექტების წყარო. რაოდენობა, სიმჭიდროვე, ასაკობრივი შემადგენლობა, პროფესიული შემადგენლობა, კულტურული დონე (წერაკითხვის გავრცელება, კვალიფიციური ჯგუფები მათი სამხედრო მიზნებისათვის გამოყენების თვალსაზრისით). სამხედრო ვალდებულ-

თა, სამხედრო მომზადებულთა და სამხედრო სამსახურისათვის გამოსადეგ პირთა მარქაფი. 6) სოციალური სტრუქტურა და კლასობრივი ურთიერთობანი სახელმწიფოში. ნაციონალური და კლასობრივი წინააღმდეგობანი. სოციალური ჯგუფების ობიექტური დაინტერესება ომში. ნაციონალური და კლასობრივი პოლიტიკა. 7) გაბატონებული კლასის ორგანიზაცია სახელმწიფოში, ორგანიზებულ კლასობრივ ძალთა თანაფარდობა. სახელმწიფოს პოლიტიკური ორგანიზაციის ყველაზე მეტად სუსტი რგოლი. დასკვნა ქვეყნის სახელმწიფო ორგანიზაციის გამძლეობაზე ომის პირობებში. 8) სოფლის მეურნეობის მდგომარეობა და მისი განვითარების პერსპექტივები. პურისა და ალაფის (ფურაჯის) ბალანსი და ქვეყნის მოთხოვნილებათა დაკმაყოფილების ხარისხი კვების პროდუქტებით. მეჯოგეობა და მეცხენეობა. საგარეო ბაზრებისაგან ქვეყნის დამოუკიდებლობის ხარისხი. საგარეო ბაზრებთან კავშირი ომის პირობებში. 9) საერთო და სამხედრო მრეწველობის ნედლეულისა და ენერგეტიკული ბაზები. ძირითადი რაიონების უშიშროება. სახელმწიფოს უზრუნველყოფა სათბობით და ნედლეულით ბლოკადის პირობებში. 10) დამუშავებითი მრეწველობის დარგები, დაკავშირებული ქვეყნის თავდაცვასთან და სამხედრო მრეწველობა. მათი ოდენობითი დახასიათება, დისლოკაცია (განლაგება) და განვითარების უახლოესი პერსპექტივები. სამრეწველო ცენტრების უშიშროების ხარისხი და ომის მოთხოვნილებათა უზრუნველყოფის ხარისხი. 11) სახელმწიფოს ფინანსიური შესაძლებლობანი ომის დროს. 12) საერთო დასკვნები სახელმწიფოს ძლიერი და სუსტი მხარეების შესახებ.

ცალკეული რაიონების შესასწავლად პროგრამა უნდა იხსნაგდეს შემდეგი საკითხების გარკვევას: 1) რაიონების მდებარეობანი გზების მიმართ, რომელნაც მიიშროებენ სახელმწიფოს სასიცოცხლო ცენტრებისაკენ. 2) ფიზიკურ-გეოგრაფიული პირობები. ძირითადი მიჯნები, რომელთაც ოპერაციული მნიშვნელობა აქვთ. 3) ეკონომიური მდგომარეობა და ეკონომიური დამოუკიდებლობის დონე. 4) სარკინიგზო ქსელი და საქაპანო გზების ქსელი. ჩვენი ძალების და მოწინააღმდეგის ძალების ოპერაციული თავმოყრისა და გაშლის პირობები. ოპერაციული ტევადობა. 5) სოციალური და პოლიტიკური ურთიერთობანი. 6) უმთავრესი ოპერაციული მიმართულებანი და მათი დახასიათება ჯარის გადაყვან-გადმოყვანის, მისი დაბანაკების, ადგილობრივი საშუალებებით უზრუნველყოფის და მოსახლეობაში პოლიტიკური მუშაობის პირობების თვალსაზრისით. 7) საერთო დასკვნა მოსალოდნელი და უფრო გამოსადეგი ამოცანების შესახებ,



რომლებიც შეიძლება დაისახონ მეომარმა მხარეებმა ნოცემულ თეატრზე, და თეატრის მნიშვნელობის შესახებ სახელმწიფოს თავდაცვის საერთო სისტემაში.

ა. სულაკოვის სამართლიანი შენიშვნით, ზოგადი ქვეყანათმცოდნეობის სფეროში სამხედრო გეოგრაფია ბევრად არ განსხვავდება ქვეყნების ფიზიკური და ეკონომიური გეოგრაფიისაგან. აქ მხოლოდ მკაფიოდაა გამოხატული სამხედრო თვალსაზრისი და ზოგიერთი თემა აქ თვალსაზრისით განხილულია განსაკუთრებული დაწვრილგზით: საზღვრები, როგორც მიჯნა ჯარების თავმოყრისა ომის დასაწყის პერიოდში, ტერიტორია მისი კონფიგურაციის მხრივ, ღრმა ზურგის არსებობის მხრივ და ა. შ., მთიანი მხარეები, რომლებიც სერიოზულ დაბრკოლებებს ჰქმნიან, აგრეთვე მნიშვნელოვანი გასასვლელები მათკენ, ტყიანი და კაობიანი რაიონები (მაგალითად, აღმოსავლეთ პრუსიაში ტბა მაუერზეეს, ციცაბო მორენული ბორცვების და იოჰანისბურგის ტყის დაბრკოლებათა კომპლექსი, რომელმაც დიდი გავლენა მოახდინა 1914 წელს სამხედრო მოქმედებათა მსვლელობაზე, ან დუნაიზე გადასასვლელი ქ. სვიშტოვთან—ქ. სვიშტოვი, ან დამახინჯებული გამოთქმით სისტოვი, მოხერხებული პუნქტია ბულგარეთში დუნაიზე გადასასვლელად, რადგან მდინარის მარცხენა ნაპირი სვიშტოვის პირდაპირ ჭაობებისაგან თავისუფალია; ცნობილია რუსული ჯარების განთქმული გადასვლა აქ დუნაიზე 1877 წლის 15 ივნისს,—არა ნაკლებ ინტერესს იწვევს სამხედრო კვლევისათვის, ვიდრე ქვანახშირის აუზები, მეტალურგიული და საფეიქრო ცენტრები და მისთანანი), ჯარების მოქმედების კლიმატური პირობები, მოსახლეობა როგორც არმიების დაკომპლექტების წყარო, სამხედრო მრეწველობა, მთავარი სარკინიგზო და სხვა კომუნიკაციები (სამომოსვლო გზა, რომელიც არმიის განლაგების რაიონს არმიის ბაზასთან აკავშირებს) და როკადები (გზები ფრონტის გასწვრივ ჯარების გადასაყვანად), შეიარაღებული ძალები, მეურნეობა ომისათვის რესურსების თვალსაზრისით და სხვ. უფრო ნათლადაა გამოხატული სამხედრო გეოგრაფიის სპეციფიკა მის მეორე განყოფილებაში—თეატრების გეოგრაფიაში. ამ განყოფილებაში გეოგრაფიულ გარემოს ყველა ელემენტის შესწავლა მეტისმეტად დაწვრილებით ხდება, რაც სავსებით განსახორციელებელია შესასწავლ რაიონთა რიცხვის განსაზღვრულობის გამო, და სამხედრო თვალსაზრისი იქ იმდენადაა გატარებული, რომ ეს გარემოება განიხილება უწინარეს ყოვლისა და უმთავრესად მასში მოქმედ სამხედრო ძალების პირობების, ამოცანებისა და მოთხოვნილებათა მხრივ. მდინარე, მაგალი-

თად, კერძო შემთხვევაში განიხილება, როგორც დაბრკოლება, თანაც თითოეული გვარეობის ჯარისათვის და წელიწადის სხვადასხვა დროისათვის ცალკეულად; აღინუსხება მდინარეზე გადასვლის აუცილებელი საშუალებანი სხვადასხვა ადგილას. მეურნეობის შესწავლის დროს დიდი ყურადღება ექცევა ჯარების ადგილობრივად მომარაგების საშუალებებს და სამხედრო ქონების რემონტის საშუალებებს; ტრანსპორტის შესწავლის დროს—ჯარების მიზიდვისა და თავმოყრის და სამანევროდ მათი გადაჯგუფების პირობებს. დაწვრილებით გამოიკვლევა ჯარების დაბანაკების პირობები და სანიტარულ-ვეტერინარული პირობები. განყოფილების სპეციფიკური სამხედრო ხასიათი გამოიხატება აგრეთვე ისეთი წმინდა სამხედრო თემების გამოჩენით მასში, როგორიცაა ჯარების მოქმედების მთავარი ობიექტები, „შესაძლო ოპერაციული მიმართულებანი“ და „სტრატეგიული მიმართულებანი“ სამხედრო ვითარების კონკრეტულ შემთხვევებში თეატრზე. ზოგად კურსში ასეთი წინასწარი საერთო ორიენტირება თითოეული თეატრისათვის აუცილებლადაა მოცემული, და ამას თავისი დიდი მნიშვნელობა აქვს, ყოველი წვრილმანის გათვალისწინება ზოგად კურსში არ ხერხდება და არცაა საჭირო, რადგან ეს გაკეთდება თავის დროზე და უფრო ზუსტადაც—პოლკის ან თუნდაც დივიზიის მოქმედების რაიონი შეიძლება შესწავლილ იქნას მათთვის საჭირო დაწვრილებით მხოლოდ სპეციალურ სამუშაოთა ჩატარებით შტაბებში ადგილგარემოს რეკოგნოსცირებით (ადგილის უშუალოდ გამორკვევით, გამარტივებული წესით, მაგრამ დეტალურად აგეგმვით).

სამხედრო გეოგრაფიის კურსში საპატიო ადგილი ეთმობა რუკის დაუთლების საქმეს. სამხედრო მოქმედებათა თეატრის გეოგრაფიული პირობებისა და მეტადრე მისი რუკის ცოდნას უდიდესი მნიშვნელობა აქვს თეატრის სამხედრო ვითარებაში მართებულად გასარკვევად. თეატრის რუკა რაც შეიძლება დიდ მასშტაბიანი უნდა იყოს და სპეციალური დანიშნულების, რომ ადგილის ყველა საჭირო დეტალის ჩვენების საშუალებას იძლეოდეს, რადგან გარემოს პირობების სრული გაგება მთელი რიგი დეტალების გარკვევის შემდეგ ხერხდება. სუდაკოვს საჯულ ისხმო მაგალითი მოჰყავს, რომ არაზუსტი და არასრული რუკის გამოყენებამ თურქულ არმიას რამდენიმე კერძო მარცხი აგემა: თურქული არმიის შტაბების განკარგულებაში ყოფილა მხოლოდ ხუთვერსიანი მასშტაბის რუკები, ისიც ცთომილებიანი (მაგალითად, სარიყამიში ნაჩვენები ჰქონიათ არა თავის ადგილას, არამედ მისგან დასავლეთით, მ კილომეტრის დაშორებით, ხოლო ერთ ქედზე არ ჰქონიათ აღნიშნული იქ არსებული ბრტყელი თხემი

—გამოსადეგი ჯარების მოძრაობისათვის არტილერიითაც კი), რუსები კი მომარაგებული ყოფილან საუცხოო ორვერსიანი რუკებით. არ ვმარა, რომ რუკა კარგი იყოს. აუცილებელია იცოდეთ მასზე სწორი გავნება, გამგნებთა (ორიენტირთა) მტკიცედ დახსომებთ. ამისათვის ადგენენ თეატრის დიდ ზოგად რუკას ან ცალკე რაიონების სქემატურ რუკებს. სამხედრო დანიშნულების რუკების შედგენისა და მათი გამოყენების საკითხებს უშუალოდ სამხედრო ტოპოგრაფია არკვევს, მაგრამ სამხედრო გეოგრაფიაც თავის მხრივ ხელს უწყობს და უზრუნველყოფს სამხედრო-ტოპოგრაფიული ცოდნის განმტკიცებას, რადგან სამხედრო გეოგრაფიის კურსის დამუშავებას მუდამ თან ახლავს სათანადო რუკებზე მუშაობა.

სამხედრო გეოგრაფიის თემატიკის საკითხის გარკვევა დავათავროთ ჩვენი უმაღლესი სამხედრო სასწავლებლებისათვის გამომუშავებული და ოფიციალურად მიღებული ერთ-ერთი უახლესი პროგრამის გაცნობით. ჩვენს ხელთაა სამხედრო გეოგრაფიის პროგრამა, შედგენილი საბჭოთა კავშირის ერთ-ერთი სამხედრო უმაღლესი სასწავლებლისათვის, გამოქვეყნებული 1940 წელს. აქ მოცემულია როგორც პროგრამის სქემა ცალკეული საკითხების ქრონომეტრაჟით საღექციო და პრაქტიკულ მეცადინეობათათვის, ისე თვით პროგრამის გაშლაც. პროგრამა შეიცავს სამ კარს. პირველი კარი ეხება სსრ კავშირის სამხედრო-გეოგრაფიულ მიმოხილვას, მეორე—კაპიტალისტური სახელმწიფოების სამხედრო-გეოგრაფიულ მიმოხილვას, ხოლო მესამე—სამხედრო მოქმედებათა თეატრების დახასიათებას. სამივე კარს წინ უძღვის შესავალი, რომელიც გაარკვევს სამხედრო გეოგრაფიის საგანსა და ამოცანებს. გავეცნოთ ამ პროგრამას.

სსრ კავშირის სამხედრო-გეოგრაფიული მიმოხილვის დროს უმთავრესად გაშუქებულია შემდეგი საკითხები: სსრ კავშირის მდგომარეობა კაპიტალისტური გარემოცვის სისტემაში. სსრკ ტერიტორია, საერთო ფართობი. სსრკ ტერიტორიის განვრცობა მერიდიანისა და პარალელის მიმართულებით. სსრკ ტერიტორიის შედარება უდიდეს კაპიტალისტურ სახელმწიფოებთან. სსრკ სახელმწიფო საზღვრები. სსრკ სახელმწიფო საზღვრების განვრცობა. საზღვაო და სახმელეთო საზღვრები, მათი დახასიათება. სსრ კავშირის ფიზიკურ-გეოგრაფიული პირობების დახასიათება. სსრ კავშირის მოსახლეობა. სსრ კავშირის სამხედრო-ეკონომიური ბაზა. სსრ კავშირის ენერგეტიკული რესურსები. სსრ კავშირის შავი და ფერადი მეტალურგია. სსრ კავშირის დამუშავებითი მრეწველობა. სსრ კავშირის სოფლის მეურნეობის ზოგადი დახასიათება. სსრ კავშირის ტრანსპორტი და კავშირგაბმულობა.

კაპიტალისტური სახელმწიფოების სამხედრო-გეოგრაფიული მიმოხილვის დროს უშუალოდ ძირითადად შემდეგი საკითხები: 1) მოცემულ სახელმწიფოს მდებარეობა, შედგენილობა, სიდიდე. მდებარეობის შეფასება სამხედრო თვალსაზრისით. საზღვრები. სანაპირო ხაზის დახასიათება. სახმელეთო საზღვრების შეფასება სამხედრო და სამხედრო-პოლიტიკური თვალსაზრისით. საცხედრო-საზღვაო ბაზები და ციხე-სიმაგრეები. ტერიტორიის სიდიდის სამხედრო შეფასება. ზღაპირის აგებულება. რელიეფის შეფასება ეკონომიური და სამხედრო თვალსაზრისით. მდინარეები, ტბები და არხები. მათი სამხედრო მნიშვნელობა. ჰავა, ნიადაგები და მცენარეულობა. 2) მოსახლეობა. მოსახლეობის რაოდენობა და სიმჭიდროვე. ქალაქისა და სოფლის მოსახლეობის თანაფარდობა. მოსახლეობის პროფესიული შედგენილობა. კლასობრივი შედგენილობა. მოსახლეობის შეფასება, როგორც შეიარაღებულ ძალთა დაკომპლექტებისა და შრომითი რესურსების წყაროსი მშვიდობიანობისა და ომის დროს. სახელმწიფო წყობილება. 3) სამხედრო-ეკონომიური ბაზა. მეურნეობის სტრუქტურა. ენერგეტიკული და ნედლეული რესურსები. მეტალურგიული მრეწველობა, მისი სიმძლავრე და განლაგება. სხვა ქვეყნებზე დამოკიდებულების ხარისხი სამხედრო-სტრატეგიული ნედლეულის უმნიშვნელოვანეს სახეთა მიხედვით (ნავთობი, ფერადი ლითონები და სხვ.). დამუშავებითი მრეწველობა. მანქანათმშენებლობა და მოტორთაშენებლობა, საავიაციო და საავტომობილო მრეწველობა, გემთმშენებლობა და ქიმიური მრეწველობა. მსუბუქი მრეწველობა. სამხედრო მრეწველობა. მრეწველობის დასახელებულ დარგთა განვითარების დონე და მათი დისლოკაცია (უმნიშვნელოვანესი რაიონები და ცენტრები). სამხედრო საკურაველის წარმოების შესაძლებლობანი. სოფლის მეურნეობა, მისი თავისებურებანი და უმნიშვნელოვანესი დარგები. სხვა ქვეყნებზე დამოკიდებულების ხარისხი სასოფლო-სამეურნეო პროდუქტების მხრივ. ტრანსპორტი. საზღვაო ტრანსპორტი. საზღვაო ფლოტის საერთო ტონაჟი, მისი ეკონომიური და სამხედრო მნიშვნელობა. სავაჭრო ფლოტის სიმძლავრე. უმნიშვნელოვანესი სავაჭრო ნავსადგურები. საზღვაო გზები. სარკინიგზო, სამდინარეო ტრანსპორტი, ავტოტრანსპორტი, ავიატრანსპორტი; მათი განვითარების დონე და თანამედროვე მდგომარეობა. კავშირგაბმულობის საშუალებანი. საგარეო ვაჭრობა. იმპორტისა და ექსპორტის შედგენილობა, სავაჭრო და სავადასახადო ბალანსი. ნედლეულისა და სურსათის მხრივ საგარეო ბაზრებზე დამოკიდებულება. 4) შეიარაღებული ძალები. უმაღლესი მმართველობა, დაკომპლექტება, რაოდენობა,

შედგენილობა, ორგანიზაცია, დისლოკაცია. მთავარი სამხედრო-საზღვაო და საავიაციო ბაზები. საერთო დასკვნა ქვეყნის სამხედრო ძლიერების შესახებ, მისი მატერიალური და ადამიანთა რესურსების შესახებ.

პროგრამაში დასმულია საკითხები თითოეულ სახელმწიფოს ბუნებრივ, ეკონომიურ და სოციალ-პოლიტიკურ თავისებურებებთან შეფარდებით, რასაც აქ არ შეეხებოდა.

სამხედრო მოქმედებათა თეატრების მიმოხილვისათვის პროგრამა ძირითადად შემდეგი საკითხების გაშუქებას სახავს: სამხედრო მოქმედებათა თეატრის შედგენილობა, მისი საზღვრები, ოპერაციულ-სტრატეგიული მნიშვნელობა, ფიზიკურ-გეოგრაფიული დახასიათება, პოლიტიკურ-ეკონომიური დახასიათება. თეატრის სამხედრო-საინჟინერო შზადყოფნა. თეატრის სამიმოსელო გზები და ჯარების თავმოყრის პირობები. თავდაცვის პირობები. თეატრის კავშირგაბმის ხაზები და საშუალებანი. ადგილობრივ ძალთა და საშუალებათა გამოყენების შესაძლებლობანი. დახანაკების პირობები. სამხედრო მოქმედებათა თეატრის დაყოფა ოპერაციულ მიმართულებათა მიხედვით. თითოეული ამ მიმართულების მიხედვით ჯარებისა და მათი მომსახურე ერთეულების თავმოყრის, თავდაცვის, შეტევის, დაფუძნებისა და გამოყენების პირობები. საერთო დასკვნები ჯარების და მათი მომსახურე ერთეულების გამოყენების შესახებ.

ამგვარად, საბჭოთა სამხედრო გეოგრაფიის თემატიკა უახლეს პროგრამებში მკიდროდ უკავშირდება ფიზიკური, ეკონომიური და პოლიტიკური გეოგრაფიის თემატიკას და ყოველ მონაცემს იგი სამხედრო თვალსაზრისით აშუქებს. საბჭოთა სამხედრო გეოგრაფიის პროგრამა გეოგრაფიულია როგორც თავისი თემატიკით, ისე ცალკეული თემის განხილვის მიზანმიმართულებით, მაგრამ ამავე დროს იგი გეოგრაფიულ პირობებს სახავს არა განმსაზღვრელ ფაქტორად სახელმწიფოს პოლიტიკურ, კერძოდ სამხედრო-პოლიტიკურ ვითარებაში, არამედ ერთ-ერთ უმნიშვნელოვანეს ფაქტორად, რომელსაც დიდი გავლენის მოხდენა შეუძლია ქვეყნის სამხედრო და საბრძოლო მდგომარეობაზე.

დასკვნა: ჩვენ გავარკვეით სამხედრო გეოგრაფიის არსი, მისი შედგენილობა და თემატიკა. გავითვალისწინეთ სამხედრო გეოგრაფიის, როგორც მეცნიერების, განვითარების მთავარი ეტაპები.

შკითხველის ყურადღება შევაჩერეთ საკითხის უახლეს მდგომარეობაზე. უკვე მკაფიოდ ისახება გზები ამ დიდად მნიშვნელოვანი სამხედრო სამეცნიერო დისციპლინის შემდგომი განვითარებისათვის საქართველოშიაც. მკვლევარის წინაშე ფართო სარბიელია გადაშლილი საქართველოს სახელოვანი სამხედრო წარსულის ასათვისებლად და ჩვენი ქვეყნის მრავალფეროვანი გეოგრაფიული პირობების შესათასებლად სამხედრო თვალსაზრისით. მეორე მხრივ, წინამდებარე ნაშრომი ნათლად გვაჩვენებს—რა დიდი პრაქტიკული გამოყენება აქვს გეოგრაფიულ მეცნიერებას საზოგადოებისა და სახელმწიფოს ცხოვრების ყველა სფეროში და კერძოდ ქვეყნის თავდაცვის საქმეში. სამაშულო ომის პირობებში ყველა სამეცნიერო დარგი, და მათ შორის გეოგრაფიაც, ქვეყნის თავდაცვის უდიადეს მიზნებს ემსახურება. მეტსაც ვიტყვით: გეოგრაფია, მისი სპეციალური სახეობა—სამხედრო გეოგრაფია, იმ სამეცნიერო დარგთა პირველ რიგებში დგას, რომელნიც აიარაღებენ ჩვენი სოციალისტური სამშობლოს დამცველთა შტრის გასანადგურებლად და გზას უკაფავენ მათ ღრწყინვალე გამარჯვებისაკენ.

---

## სიტყვების და გამოყენებული ლიტერატურა.

1. Ленин—Собрание сочинений, მე-3 გამოც. ტ. VII, XVIII და XXX.
2. Ленинский сборник, მე-2 გამოცემა, ტ. XII.
3. ლენინი—რჩეული ნაწერები, ტ. II, ტ. III, თბ. 1933 წ.
4. ი. სტალინი—„სამხედრო მდგომარეობისათვის სამხრეთში“, თბ. 1941 წ.
5. „—„ლენინიზმის საკითხები“, მე-11 გამოცემა.
6. ბრძანება თავდაცვის სახალხო კომისრისა, № 55, 1942 წ. 23 თებერვალი.
7. ი. ბ. სტალინი—„დიდი ოქტომბრის რევოლუციის XXV წლის-თავი“, თბ. 1942 წ.
8. Программа по военной географии, მ. 1940 წ.
9. Н. Троицкий—„Военная география“, სტატია БСЭ-ში, ტ. XV.
10. А. Судаков—„Что такое военная география“, ჟურნ. „География в школе“, № 5, 1940 წ.
11. В. Г. Клемятьев—„Боевые действия горных войск“, მ. 1940 წ.
12. Руководство для действий войск в горах, б. I, მ. 1941 წ.
13. Наставление по полевой службе штабов Красной Армии.
14. История СССР, ტ. II—Россия в XIX веке, პროფ. მ. ვ. ნეჩინას რედაქციით, მ. 1940 წ.
15. Клаузевиц—„О войне“, მე-2 გამოცემა, მ. 1934 წ.
16. С. Кузмин—„Война в мнениях передовых людей“, ს.-ბ. 1904 წ.
17. Г. Жюмиви—„Очерки военного искусства“—ტ. I, მ. 1939 წ.
18. „ „ „ „ ტ. II, მ. 1939 წ.
19. П. Языков—„Опыт теории военной географии“, б. II, ს.-ბ. 1838 წ.
20. Д. Милютин—„Первые опыты военной статистики“, წიგნი I, ს.-ბ. 1847 წ.
21. А. Снесарев—„Введение в военную географию“, მ. 1924 წ.
22. П. Гейсман—„Краткий курс истории военного искусства—средние и новые века. VI—XVIII столетия“, მე-2 გამოცემა, ს.-ბ. 1907 წ.
23. Н. Дубровин—„История войны и владычества русских на Кавказе“, ტ. I, ს.-ბ. 1871 წ.
24. М. Литвинов—„Окрании России, военно-географические очерки. I—Кавказ“, მე-2 გამოცემა, ს.-ბ. 1884 წ.
25. Б. С. Эсадзе—„Летопись Грузии“, თბ. 1913 წ.
26. Служивый—„Очерки покорения Кавказа“, ს.-ბ. 1901 წ.
27. Акты Кавк. Археографической Комиссии, ტ. X, თბ. 1885 წ.
28. П. Н.—Д. А. Милютин в 1861—1881 годах, სტატია ჟურნ-ში „Русская старина“, ტ. 49, ს.-ბ. 1866 წ.
29. პროფ. ა. პ. ლიდოვი—დ. მილუტინი, სტატია ბრ.-ფერ. ენციკლოპედიაში.
30. ნ. პ. ევრუე—დ. მილუტინი, სტატია სამხედრო ენციკლოპედიაში, ტ. XV, პ. 1914 წ.
31. დავით კლდიაშვილი—„მეზარები“, თბ. 1932 წ.
32. გრიგოლ ორბელიანის წერილები, ტ. I, თბ. 1936 წ., ტ. II, თბ. 1937 წ.